

6-2-1944



6
34-8
11

6
10 L
6

6-24-11









L'ARIANE

DE MONSIEVR
DES MARETS,
CONSEILLER DV ROY,
ET CONTROLLEVR GENERAL
DE L'EXTRAORDINAIRE DES
GVERRES.

DE NOUVEAV REVEVÈ, ET AVGMENTEE
de plusieurs Histoires par l'Auteur,

Et enrichie de plusieurs Figures.

*Domus Sancti
Solarii*



*Pantheon
Bianchi*

A PARIS,

Chez MATTHIEU GUILLEMOT, rue Saint Jacques,
au coin de la rue de la Parcheminerie.

M. DC. X

AVEC PRIVILEGE

ROY





AVX DAMES.

BEAV sexe, à qui la Nature a
donné ce qu'elle avoit de plus ri-
che & de plus aimable ; source
des plus agreables delices ; qui te-
nez dans vos belles mains l'Em-
pire de l'Vniuers , puisque vous
commandez aux hommes , & que vous leur di-
stribuez comme il vous plaist, ou l'infortune ou le
bon-heur ; C'est à vous seules à qui ie presente cét
Ouvrage ; le l'adresse aux plus beaux Obiects de la
terre ; & comme vous estes ce qui plaist le plus au
monde , c'est à vous aussi à qui ie desire plaire le
plus. Si la puissance mesme de l'Amour ne releue
que de la vostre , tout ce qui luy appartient ne doit
hommage qu'à vous ; & ces auantures qui sont
des effets de la beauté des Dames , ne se doivent
offrir qu'à ce qui peut en produire de semblables.
I'espere qu'il n'y en aura pas une parmy vous qui
ne trouue icy dequoy passer quelques heures assez
à y

EPISTRE.

doucement. Les plus seueres ne s'offenceront point que ce Liure leur parle d'Amour ; & ne craindront pas en le lisant de se dire à elles mesmes, ce qu'elles ne veulent point entendre de la bouche des hommes. Celles qui souffrent seulement d'estre aimées sans qu'elles aiment, & qui veulent beaucoup de respect & de ceremonie, trouueront icy des Amants comme elles les desirent ; Et celles qui sont plus douces, & qui pour soulager les flammes de ceux qui les seruent, en veulent bien prendre une partie, auront quelque satisfaction de voir icy leurs passions autorisées par des exemples. Mais pource qu'entre celles qui aiment il y en a de constantes & de volages ; & que ce Liure prend entierement le party des premieres, i'aurois peur que les autres ne s'offensassent de voir leur humeur mal traitée, si ie ne leur donnois des raisons pour se deffendre contre celles qui sont desdrites dans cét Ouurage. Les plus seueres Iuges trouueroient de la difficulté à resoudre lequel est le plus loüable, ou de sçauoir bien conseruer sa passion, malgré les trauerses de la fortune, ou de sçauoir changer bien à propos. C'est à la verité une chose bien glorieuse de faire voir une Amour invincible, qui ne redoute ny le Ciel ny la Terre ; qui se fortifie par les obstacles mesmes, & qui ne seroit pas esbranlée par la ruine de tous le monde. Ces af-

E P I S T R E.

*fections ne peuvent estre si parfaites qu'elles ne
 soient fondées sur la vertu ; & la raison les ayant
 fait naistre, il faut de necessité qu'elles durent tou-
 jours, estant impossible que ce qui a esté raison une
 fois, ne le soit plus. Chacun doit confesser que cette fa-
 çon d'aimer est admirable, mais aussi est-elle bien rare.
 La plupart des amours naissant de causes legeres :
 un petit charme surprend les yeux, & leur oste la
 connoissance de plusieurs deffauts. La constance en
 ces affections est sans doute plus vicieuse que le chan-
 gement ; & bien souuent on appelle inconstance, ce
 qui est en effect une iudicieuse retraitte. Le change-
 ment est quelquefois une vertu plus forte & plus cou-
 rageuse que la constance mesme. C'est par luy que
 l'on dompte une passion de plusieurs années, & que
 l'on repare tout le desordre qui estoit dans l'ame. Les
 hommes qui ont tousiours plus de sujet d'aimer,
 tombent moins aussi dans l'inconstance ; & les Da-
 mes qui trouuent en nous tant de deffauts, sont sou-
 uent par raison, & par un effort genereux, ce que
 l'on croit qu'elles font par foiblesse. La Loy qui def-
 fend de changer, est seulement plus rigoureuse pour
 nous : pource qu'il semble que nous soyons obligez de
 souffrir iusques à l'extremité plustost que d'estre in-
 fidelles, & que les Dames soient excusables de chan-
 ger pour la moindre inquietude que l'amour leur
 donne. La constance est une qualité trop serieuse &
 à iij*

EPISTRE.

croy melancolique , pour un sexe si agreable & si riant. Ce qui destruit la beauté doit estre aussi detesté parmy vous que la vieillesse & la maladie. Cette constance voudroit parestre en vous vaillante, & capable de supporter les ennuis, aux despens de vos plus riches thresors. C'est elle qui esteint le vif esclat des yeux; qui efface le teint, qui ruine l'embon-point, & qui pour vous faire acquerir la gloire de bien aimer, vous fait perdre celle d'estre aimées. La legereté a bien plus de gayeté & de charmes; & si dans un cruel accident d'amour il faut que l'un des deux changemens arrive, ou de l'esprit ou de la beauté, on doit bien vous pardonner si vous choisissez celuy qui conserve ce que vous avez de plus cher au monde. Ce sont là des raisons que peuvent alleguer les inconstantes: celles qui suivent les loix de la fidelité trouveront assez dans ce Livre dequoy leur respondre. Je conseille à chacune de demeurer dans l'opinion qui est la plus conforme à son humeur; & vous demande seulement cette grace, que celles qui se plaisent à estre infidelles, ne blasment point les austeres fidelitez, qu'elles trouveront icy descrites, & que celles qui aiment la constance, n'accusent point les inconstantes. Mais ie vous arreste, lors que peut-estre vous avez impatience d'entretenir Ariane. Je vous laisse donc avec elle: toutefois avant que de vous quitter, ie vous advertis qu'elle est un peu honteuse; pource qu'elle



L E BIBLIOTHECA NAZ.
ROMA
VITTORIO EMANUELE

PREMIER

LIVRE DE

L'ARIANE.



OME commençoit à sentir avec douleur les violences & les fureurs de Neron, apres auoir souffert avec patience les premieres débauches de sa ieunesse : Et ce peuple superbe des despoüilles de tout le monde, gémissoit sous les cruautéz de ce Prince; Quand la Fortune voulut donner naissance aux accidens qui trauerferent les plus vertueuses affections de la terre, & permit que le Cirque où se faisoient les combats de pompe & de plaisir seulement, fust arrousé de sang par vne trahison detestable. Mais cette lascheté ne pût auoir son effect entier, & ne demeura pas impunie, pource que par vne heureuse pre-

uoyance du Ciel, ceux qui deuoient assaillir furent preuenus d'une terreur, qui leur faisant perdre le courage & le iugement, conserua la vie à ceux dont la perte auoit esté resoluë.

Deux ieunes Siciliens allant de nuit par la ville, l'un porté d'amour, l'autre de complaisance seulement pour son amy, & passant près du Cirque avec quatre ou cinq de leur suite, apres auoir fait quelque bruit de leurs espées pour vn dessein qu'ils auoient, furent attaquez par une troupe d'hommes armez, dont le desordre les faisoit plustost parestre personnes espouuantes, que resoluës d'auoir la vie de ces Estrangers: Toute-fois leur nombre estoit tel, que sans la valeur extrême qu'ils rencontrèrent, bien tost ils se fussent donné le passage libre: mais ceux qui estoient assaillis, ignorant leur dessein, firent voir tant d'adresse & de vaillance, qu'apres vn grand combat, les autres furent contrains de dire que c'estoit l'Empereur.

A ce nom les Estrangers firent iour, apres auoir fait mille actions trop belles pour n'estre esclairées que de la Lune, & laisserent retirer leurs ennemis: mais ils demurerent si chargez de playes, que l'un d'eux tomba évanouy de la perte qu'il faisoit de son sang; & l'autre voulant secourir son amy, fut surpris d'une deffaillance pareille.

Leurs seruiteurs qui fondonnent en larmes de voir leurs vaillans Maistres reduits à cette extremité, se preparent à les enleuer de ce lieu pour les porter chez eux, lors que deux Dames richement vestuës, & de qui la beauté receuoit vn grand esclat par la lumiere des flambeaux que deux ieunes enfans portoient deuant elles, arriuerent

avec leurs domestiques pour apprendre le sujet du bruit qu'elles auoient entendu deuant leurs logis : mais regardant ceux qui estoient estendus sur la place, & les ayant recognus pour le braue Melinte, & le gentil Palamede; l'amour qu'Emilie portoit à Melinte luy fit faire mille regrets, de le voir pour son sujet en vn estat si déplorable; & Camille donna quelques pleurs au malheur de Palamede, de qui elle se sçauoit si passionnément aimée.

Ces deux sœurs, apres auoir long temps tesmoigné leur douleur, firent emporter ces corps chez elles, pour essayer si les remedes ne les feroient point reuenir, & les mirent en lieux separez dans des lits dignes de la richesse & du luxe de ce siecle.

Ce fut là que Melinte reuenant par l'assistance d'Emilie comme d vn profond sommeil, & ouurant en fin les yeux, demanda où estoit Palamede. Emilie qui n'ignoroit pas leur amitié, luy dit qu'il n'estoit pas loing, & qu'il estoit blessé comme luy; mais que s'il plaisoit aux Dieux tous deux ne courroient aucun danger. Il supplia Emilie qu'elle luy permist de l'aller voir : ce qu'elle ne voulut point souffrir, pource que ses blesseures ne luy permettoient pas encore de se leuer, & se contenta de l'asseurer qu'il estoit en la chambre prochaine avec autant de besoin de repos que luy. Laissez moy donc, dit-il, en repos, ie vous prie, & ne pouuant souffrir sa veüe, se tourna de l'autre costé du lit.

Emilie s'estant esloignée, il commença de se plaindre ainsi en luy mesme: Ah! Palamede, que vostre amitié me fait commettre de fautes contre la pureté de mon amour; & que les feintes d'aimer Emilie à vostre priere m'auoient

esté insupportables , sans qu'elles attirassent encore tant de mal-heur ! Que pouuois-ie attendre qu'une punition des Dieux , apres auoir tant de fois trahy mon ame , forçant mes paroles d'estre contraires à tous mes sentimens ? Au lieu de faire agir d'un commun accord tout ce qui est en moy pour n'adorer qu'une chose , j'ay permis la diuision en moy-mesme , ma bouche & mes actions sacrifiant à de fausses Deitez , cependant que mes pensées n'en adoroient qu'une toute pure & toute sainte.

Mais aussi , pouuois-ie nier quelque chose à Palamede ? Mon amour , pouuois-tu refuser de te faire cet effort pour celuy qui a causé ta naissance ? & lors qu'il a désiré quelque secours de nous , eussions nous allegué la seuerité de nos loix pour nous tacher d'ingratitude ? Helas ! qu'il est difficile de maintenir sa vie exempte de blâme ; & que pour satisfaire à un deuoir , bien souuent on quitte la consideration d'un autre. Au moins tu m'es tesmoin , mon ame , & toy diuinité presente à mon souuenir ; que si mes paroles ont tesmoigné d'estimer autre chose , mes pensées les ont tousiours desaduouées , & ont mesprisé ces sujets indignes d'elles , & bien differens de la cause parfaite de mon amour.

Il s'arrestoit quelque temps sur cette consideration qui le consolait : puis regardant en combien d'endroits il estoit blessé , il continuoit à penser ainsi : Faut il que les playes de la vraye affection qui me trauaille soient invisibles , & que pour vne amitié feinte ie porte des blessures si veritables & si visibles ? blessures quelquesfois marquées de gloire , & qui me comblez de honte , comment vous pourray-iecacher à mon amour offensée ? La Fortune que ma constance mesprisait , n'a pas perdu l'occasion ,

lors que mes actions pouuoient estre blasimées d'infidélité; & après auoir graué sur moy par ces playes le souuenir eternal de cette rencontre, malgré mes desseins m'a fait porter dans ces lits que j'éuitois avec tant de soin. Mais, Fortune, fais ce que tu pourras, iamais tu ne feras consentir mon ame à perdre la qualité de bien aimer. Je me vange bien de toy, mesprisant tes faueurs si désirées des autres: tantost tu me les présentes sous les charmes de la douceur & de la facilité: tantost tu m'y portes par la force de tes accidens inéuitables, pour ruiner en moy vne perfection qui se moque de ton empire: & ie n'ay qu'à leur opposer le souuenir de la beauté que j'aime, pour rendre tous leurs attraits inutiles: Non, non, trompeuse, perds l'esperoir que ie quitte cette constance dont tu es ennemie: tu peux bien rendre mon affection malheureuse, mais iamais tu ne la feras déchoir d'un seul degré de la grandeur où elle est paruenüe.

Ces différentes pensées tourmentoient ou soulageoient son esprit, selon qu'il receuoit les vnes ou les autres, & l'entretindrent iusques au lendemain, qu'il se trouua obligé de garder le lit à cause de ses playes, bien qu'il n'y en eust aucune mortelle. Mais Palamedé fut bien plus long temps sans donner aucun signe de vie, sinon que le cœur luy battoit encore: toute fois par la force des remèdes on luy fit en fin reuenir la veüe, & ses blessures estans sondées se trouuerent en lieu bien dange-reux.

Ces deux amis estoient fort estimez à Rome pour leur noblesse, accompagnée de mille qualitez admirables, & s'estoient acquis l'amitié de tous ceux qui aimoient la vertu, depuis qu'un honneste desir de voir le siege de l'Em-

pire, leur auoit fait suivre l'Ambassade qu'enuoyoit les Syracusains à Neron, pour estre soulagez de quelques impositions nouuelles. Ils s'estoient rendus recommandables, & auoient acquis la gloire d'estre les plus accomplis du monde; toute-fois en qualitez differentes. Melinte qui auoit l'esprit sage & parfaitement accort, estoit plus retenu, & faisoit paroistre à propos ses vertus naturelles, & les sciences qu'il auoit acquises. Palamede estoit plus prompt & entreprenant, toute-fois avec tant de grace, que ses desseins réussissoient la plupart avec du bon-heur, & de la gloire.

Tous deux estoient merueilleusement beaux & adroits: Melinte estoit plus haut, & d'une taille plus libre: ses cheveux qu'il portoit assez longs & ondez, estoient vn peu bruns; & il auoit certains charmes au visage, avec vne agreable majesté, qui donnoit de l'amour & du respect à tous ceux qui le voyoient. Palamede estoit blond, & auoit le visage & le corps plus pleins; d'une façon tousiours gaye, & qui paroissoit recevoir peu souuent en son ame le louchy & les résveries.

Othon Cheualier Romain, qui fut depuis Empereur, & qui estoit alors le plus puissant en credit aupres de Neron, cherissoit plus que tous leur amitié, & auoit fauorisé la naissance de leur reputation dans Rome, lors qu'il fit sçauoir que c'estoient ces deux fameux Siciliens dont il estoit tousiours fait recit dans les nouuelles qui venoient à Rome des victoires de Corbulon Lieutenant de l'Empereur contre les Parthes, sous la conduite duquel ils auoient donné des preuues d'une vaillance admirable. Souuent ils auoient monté les premiers à l'assaut, & sauté ensemble du haut des murailles, dans les villes assiégées

pour monstrier le chemin aux soldats : souuent ils auoient causé le gain des batailles , ourant les plus espais escadrons par les coups furieux de leurs jaelots & de leurs espées , à quoy rien ne pouuoit resister : De sorte qu'ils estoient caressés de tous les Nobles , & adinirez du peuple , estant reconnus des plus anciennes maisons de la Grèce , doüiez de mille belles qualitez , & entr'autres d'une valeur qui les rendoit ensemble aimables & redoutables.

Mais la fortune ialouse d'une vertu si haute qu'elle craignoit en estre vn iour maistrisée , se pleut à trauerser leur vie par ses plus cruelles rencontres : car non contente de les auoir conduits si près de la mort , elle suscita la fureur de Neron , & le fit resoudre de les enuoyer tuer dans leur logis pour se vanger de l'accident qui luy estoit arriué la nuit precedente. A peine ouuroient-ils les yeux pour recevoir le iour , qu'on vint aduertir Melinte de ce cruel dessein , qui ne leur permettroit pas de iouir long temps de la vie. Mais on celoioit tout à Palamede , qui estoit en vn estat assez déplorable , sans y adiouster encore la peur d'un mal qui le deuoit bien tost mal-heureusement guerir. Melinte sceut aussi que le combat de la nuit estoit arriué par vne embuscche qui leur auoit esté dressée par Neron mesme sous la conduite de Marcelin ; que l'Empereur auoit esté blessé à la main , & Marcelin au bras.

Cet homme estoit l'un des principaux ministres des passions de ce ieune Prince , à qui l'amour de Camille & la jalousie qu'il auoit de Palamede auoient fait entreprendre de se deffaire de luy & de Melinte , & d'en donner le passe-temps à Neron , qui se plaisoit d'aller ainsi de nuit , battant & tuant ceux qu'il rencontroit. Marcelin ayant

failliy ce premier coup, & voyant l'Empereur animé à se vanger à cause de sa blessure, ne laissa point refroidir son courroux: & fit resoudre qu'un Tribun iroit sur le soir avec des gardes les massacrer en la maison de Maxime, où ils croyoient qu'ils se fussent retirez, pource que c'estoit le lieu de leur demeure.

Ces nouuelles qui eussent troublé les plus asseurez, ne donnerent point d'estonnement à Melinte, lequel estant trop courageux pour craindre la mort, se prepara pour la recevoir; ses blessures le rendant incapable de resister ou de fuir: car bien que l'Empereur ne sceust pas où ils estoient alors, cela pouuoit bien tost venir à sa connoissance. Cét amas d'accidens funestes remplissoit de tristesse cette maison: les vns estoient muets d'estonnement, les autres pleins de desespoir de voir leur perte ineuitable: Emilie & Camille ne se pouuoient consoler, & ne feignoient point de tesmoigner deuant tous l'excès de leur douleur: Melinte seul demeuroid inuincible contre tant de mal-heurs, & remplissoit d'admiration ceux qui le voyoient si bien préparé à recevoir sans crainte les coups de la fortune.

Arcas esclaue de Melinte, qui n'auoit iamais abandonné son Maistre depuis sa ieunesse, & qui auoit tousiours esté tesmoin de son extrême vertu & de ses valeureuses actions, sembloit auoir tiré profit d'un si bel exemple: car il estoit fort courageux, & auoit formé en luy une si grande affection pour Melinte, que rien ne pouuoit égaler les soins qu'il prenoit à le seruir. Cét esclaue ne pouuoit considerer le visage constant de son Maistre, & l'extremité de son mal-heur, sans que son cœur pressé n'en-uyast des larmes à ses yeux. A la fin, inspiré de quelque

Dieu,

Dieu, ou porté par son seul courage, il osa proposer, que si l'on pouuoit cacher quelque temps le lieu où ils estoient, il s'asseuroit de garantir leurs vies, & que l'on ne les chercheroit plus. On voulut sçauoir de luy quel expedient il auoit trouué, mais il dit que l'on eust soin seulement de ce qu'il auoit déclaré, & que bien tost on apprendroit l'effect de sa resolution. Il sortit incontinent du logis d'Emilie, & alla chez Maxime, emmenant seulement avec luy vn autre Esclaue qui estoit à Palamede, nommé Nise, qu'il connoissoit autant affectionné que luy pour le salut de son Maistre. Lors qu'ils furent arriuez, & enfermez dans la chambre de Melinte & de Palamede, Arcas luy dit; Nise, ie t'ay choisi pour m'assister au dessein que i'ay conceu de sauuer la vie de nos Maistres: le suis resolu de mourir pour Melinte, & si tu as assez de courage tu mourras aussi pour Palamede. Nise sans s'estonner luy demanda ce qu'il falloit faire. Arcas luy respondit: Nous prendrons chacun vn de leurs habits, & de peur encore d'estre reconnus par ceux qui viendront de la part de Neron, nous aurons chacun vn casque en teste, & nous nous armerons d'espées & de poignards, comme en dessein de nous deffendre, ou de vendre nostre vie chèrement lors qu'ils entreront dans cette chambre: apres auoir quelque temps resisté, nous pourrons en receuant la mort nous gaster le visage de coups de poignard, & le souiller ainsi de sang & de playes, afin d'estre pris pour eux, & d'assouuir la vengeance de l'Empereur qui n'y pensera plus. Nise demeurant muet, & songeant à l'ordre de cette inuention, Arcas creut qu'il n'estoit pas assez resolu pour vn si rare effect, & luy dit: Quoy, Nise, doutes tu si tu dois mourir pour vn sujet qui nous rendra les

plus beaux exemples de courage & de fidelité qui furent jamais ? Aimes tu mieux viure dans la plus basse condition des hommes, que de mourir comme les plus renommez du monde ? Ayant des Maistres si vertueux & si vaillans, n'aurons nous point appris à faire au moins vne action en quoy nous les imitions ? Nise l'interrompt, & luy dit : Arcas, cesse de me vouloir persuader ; ie suis aussi resolu que toy de mourir. En vain aurois- ie tesmoigné vne si continuell^e affection pour Palamede, si ie ne la monstrois encore en l'occasion la plus importante de sa vie ; tu verras avec quelle ioye ie receuray la mort, & mon ame s'en iroit encore plus contente si auant que de partir elle scauoit que nos Maistres fussent en lieu de seureté. Les Dieux, reprit Arcas, feront le reste, faisons ce qui est de nostre deuoir ; nous ne pouuons perir que bien contents : car s'ils ont à mourir, il nous seroit impossible de les suruiure ; & si nous les garentissons, quelle gloire d'estre louez d'eux tant qu'ils seront au monde ? Nise, faisons vne action en nostre vie qui ne tienne rien de l'Esclaue, & montrons que la fortune au moins ne nous a pas osté la liberté de mourir. Sur cela ces deux fideles seruiteurs s'embrasserent, & s'estant accommodez d'habillemens, de casques, & d'espées, resolurent d'attendre la mort en cette chambre où l'on deuoit les chercher.

Bien que la nuit ne fust pas encore si proche, iamais leur courage ne se refroidit, au contraire s'entretenant des admirables qualitez de leurs Maistres, ils s'animoient dauantage à mourir pour eux, & estimoient leur fin bien glorieuse. A la fin la maison est enuironnée de soldats, le Tribun entre avec cinquante gardes de l'Empereur, & parle à Maxime, qui leur dit que les deux amis Siciliens

n'estoient pas chez luy; toutefois il obeït au commandement de faire ouvrir ses chambres. Ils entrent dans celle de Melinte, & trouuent les deux Esclaues dignes d'éternelle memoire, chacun ayant vne espee & vn poignard, & le casque en teste, qu'ils iugerent estre Melinte & Palamede, qui s'estoient resolu de mourir les armes à la main. Le Tribun qui estoit entré avec trois soldats seulement, se voyant arresté par eux: Quoy, dit-il, vous osez resister à Neron? Mais eux sans respondre les attaquerent, & se monstrerent long temps dignes seruiteurs de si vaillans Maistres: toutefois leur dessein estant de mourir & non pas de se deffendre, ils ne leur porterent qu'autant de coups qu'ils iugerent à propos pour rendre la feinte plus vray-semblable. Les soldats Romains qui croissoient en nombre, & qui ne manquoient pas d'adresse ny de courage, auancerent facilement sur eux, & en fin Nise estant porté par terre de plusieurs coups, & faisant semblant de s'opposer à ceux qui attaquoient Arcas pour représenter l'amitié de leurs Maistres, se donna trois ou quatre coups de poignard dans le visage sans estre apperceu. Cependant on entendit vne voix qui crioit de dehors qu'on leur sauua la vie, & que Neron le commandoit. Ce cry arresta les soldats, & aussi tost Othoh entrant dans la chambre se fit connoistre, & dit qu'il apportoit la grace que l'Empereur leur donnoit. Il embrassa Arcas sous l'habit de Melinte, & se réjouit qu'il eust eschapé de ce danger: mais en mesme temps Nise expira, ce qui luy fit faire mille regrets de n'estre pas artiué plus tost. Arcas le pria de faire retirer les soldats, afin qu'il luy peust parler en secret, & lors qu'ils furent seuls, il osta son casque, & rendit Othoh bien surpris: mais il le re-

tira de cét estonnement , luy declarant qui il estoit , & le dessein qu'il auoit pris avec Nise. Othon admirant cette resolution , donna mille loüanges à tant de fidelité , & fit autant de souhaits que l'esprit de Nise peust rencontrer vne demeure digne d'une si belle action. Apres auoir eu soin du corps de Nise , il pria Arcas de le conduire où estoit Melinte , & voulut qu'il portast le mesme habit. Aussi tost ils sortirent du logis , mais au lieu de rassurer les esprits chez Emilie , ils remplirent d'espouuante à leur abord toute la maison , pource que Othon auoit grande suite , & l'on croyoit que ce fussent les soldats de Neron qui auoient sceu où les deux amis estoient : toutefois apres qu'Othon & Arcas se furent declarez , le trouble s'appaîsa vn peu , & on les mena parler à Melinte. Othon luy presenta premierement Arcas , & voyant qu'il estoit estonné de le voir ainsi vestu , il luy fit le recit de sa genereuse resolution , que chacun admira. Melinte alors luy commanda de s'approcher de son liét , & l'embrassa long temps , sans que ce pauvre Esclaue peust prononcer vn mot , tant il auoit de ioye , plustost de voir son Maistre hors de danger , que d'estre demeuré viuant. Puis Othon conta qu'heureusement il auoit appris sur le soir le mariage qui s'estoit donné contr'eux à la suscitation de Marcelin sans qu'il le sceust , comme il auoit ignoré auparavant le combat de la nuict : qu'aussi tost il estoit allé deuers Neron , à qui il auoit representé le merite de ceux qu'il vouloit perdre : qu'il les auoit reconnus trop sages pour auoir offense sa Maîesté : qu'il falloit soupçonner Marcelin qui auoit dessein peut-estre pour quelque différend qui estoit entr'eux , de les oster du monde , & qu'il estoit bien plus coupable qu'eux de faire seruir l'Empe-

reur à ses passions, sans songer que la gloire d'un si grand Prince pourroit estre tachée de ce reproche d'auoir fait mourir de si vaillans hommes: qu'en fin luy ayant fait reuoyer le commandement, il auoit voulu luy mesme y aller en haste, de peur que l'exécution ne se fist trop promptement. Il luy-recita en suite la douleur qu'il auoit eüe entrant dans la chambre, de voir desia l'un des deux estendu sur la place: apres cela son erreur d'aller embrasser Arcas pensant qu'il fust Melinte: mais il auoia que son action meritoit bien d'autres caresses. Melinte apres l'auoir remercié de tant de soins dont il luy estoit redevable, affranchit Arcas en sa presence, & luy promit de plus grandes recompenses à son retour en Sicile. Ce changement d'accidens mit la ioye en la place des apprehensions precedentes, Othon ayant asseuré que tant qu'il auroit quelque credit, ils seroient en seureté dans Rome. Melinte obligé par de si grandes faueurs, estant plus satisfait du salut de son amy que du sien mesme, luy tesmoigna par les plus affectionnées paroles qu'il pût choisir, de quelle sorte il se les estoit acquis. Othon qui estoit des plus nobles & des plus courtois d'entre les Romains, repartit honnestement à ses ciuilitéz, & de peur de l'incommoder dauantage, pource qu'il parloit avec peine; prit congé de luy, sans auoir veu Palamede qui n'estoit pas en estat d'estre visité.

Lors qu'il se fut retiré, Melinte impatient de voir son amy, & de luy dire ce qui se passoit, se leua malgré l'empeschement d'Emilie qui l'assistoit fort soigneusement: mais estant dans la chambre on luy deffendit de parler, les Chirurgiens l'ayant aduertý du peril où ils le trouuoient. Melinte commença à maudire en son ame ces

mal-heureuses femmes qui luy faisoient perdre vne personne si chere, & voyoit à regret près de son liét la belle Camille, qui n'espargnoit point sa peine pour le secourir; toutefois Palamede tirant le rideau apperceut Melinte, qu'il pria de s'approcher, & ayant supplié Camille de les laisser seuls, elle se retira: puis Melinte estant assis, d'une voix assez foible, luy parla ainsi. Jamais ie n'auois crû pouuoir apprehender la mort, & iamais personne n'eut plus de regret de mourir: ie me trouue esloigné du meilleur pere & de la plus aimable sœur du monde, & ie meurs pour vn sujet qui sera tousiours desapprouué de mon cher Melinte. C'est le plus grand desplaisir qui me puisse accompagner au tombeau, de n'auoir pas suiuy les aduis d'un amy si vertueux, & d'auoir contraint sa prudence d'obeir aux transports de mes ieunes fantasies. Si les Dieux ont resolu de m'oster la vie plustost que de me rendre sage par ces accidens, ie me soumets à leur iustice, & les prie qu'ils vous redonnent un amy autant affectionné, mais plus moderé que moy. Toutefois si vostre amitié ne peut aisément changer de sujet, i'ay vn autre moy mesme que ie puis dire bien plus accomply que moy: ie laisse vne sœur que ie vous prie d'aimer, si desia, comme ie croy, vous ne l'auiez estimée digne de vostre affection. Je sçay que vous meritez plus qu'elle, mais ie suis assuré qu'elle ne se donnera iamais à personne qui vaille moins que vous. I'auray au moins cette consolation apres ma mort quand ie sçauray qu'avec les biens que ie luy auray laissez, elle possedera le plus grand que i'aye pû acquerir. Les premieres paroles de Palamede auoient remply l'esprit de Melinte de tristesse, & ses yeux de larmes: mais les dernieres le surprirent d'estonnement, ne

croyant pas que Palamede eust iamais eu connoissance de l'amour secrette qu'il auoit pour la belle Ariane sa sœur, & ne voulant pas l'auouer puis qu'elle mesme ne vouloit pas que personne en peust rien descouurir, il se contenta de respondre ainsi.

Il me seroit impossible d'auoir plus de ioye, receuant de si chers tesmoignages de vostre amitié, si l'occasion n'en estoit si mal-heureuse : mais ie ne puis que vous remercier de l'un & regretter l'autre : & mesme ie veux esperer que les Dieux ne voudront pas si tost nous separer ; & qu'ainsi le sujet de mon desplaisir cessera, & ie pourray long temps iouir de l'affection d'un si parfait amy. Si l'estat où vous estes me permettoit de vous accuser, ie me plaindrois à vous d'auoir creu que ie peusse blasmer vos actions : si quelquefois ie les ay desapprouuées, c'est plustost que mon humeur y estoit contraire que la raison. Guerissez vous seulement, & ne songez pas à me donner personne qui puisse tenir vostre place. Je ne voudrois pas auoir vne pensée pareille de vous, qu'apres moy vous peussiez rien aimer.

Melinte cachoit vne passion si violente & si respectueuse pour Ariane, qu'il n'osa prononcer son nom, ny en dire vne parole, & laissa ainsi son discours. Palamede ayant vn peu attendu luy dit : Et que dites vous de ma sœur ? C'est, respondit Melinte, ce que ie trouue tellement pardessus mon merite, que ie n'y puis penser qu'avec presumption : aussi comme Aristide vostre pere a ses desseins plus releuez avec raison, ie me contente de l'honorer avec tout le respect que ie puis. Palamede vouloit repartir, mais Melinte luy dit, qu'il ne pouuoit plus souffrir de l'entendre parler avec tant de peine, & le pria

de remettre ce discours, & de se tenir en repos de peur d'un plus grand accident. le veux, dit Palamede, vous faire au moins vne priere d'enuoyer le plus promptement que vous pourrez en Sicile vers mon pere: peut-estre seray-ie encore viuant quelques iours, pendant lesquels il pourroit estre icy avec ma sœur, ou au moins me rendre les derniers devoirs, si ma mort preuenoit leur arriuée: ie n'ay point de plus grand desir que celuy de le voir auant que de mourir. Melinte prit cette occasion pour le laisser, apres luy auoir dit qu'il alloit à l'heure mesme dépescher vn des siens; qu'il esperoit toutefois que lors qu'ils seroient à Rome, ils auroient plustost sujet de se resioiir de sa guerison que de plaindre sa perte. Puis songeant comme il deuoit escrire, pour ne pas donner trop de peur à Aristide & à Ariane, il se resolut de dissimuler sa douleur le mieux qu'il pourroit, & fit ces lettres.

MELINTE A ARISTIDE.




*E n'ay pû refuser à Palamede ce serui-
ce qu'il a desiré de moy, de vous aduer-
tir de quelques blessures qu'il a receues en
vn combat, & vous supplier par l'affec-
tion que vous luy portez de le venir trouuer à Ro-
me avec sa sœur. La peur qu'il a de mourir sans vous
voir, a esté plus forte que toutes les prieres que ie
luy ay faites de ne vous point donner tant d'appre-
hension & de peine. Mais en satisfaisant à son desir
diminuez*

diminuez vos craintes , & croyez que vostre fils se desiant des remedes , ne veut estre redcuable de sa guerison qu'à vostre venë.

Il mit celle - cy à part pour estre donnée en secret à Ariane.

MELINTE A ARIANE.

 *'EST avec regret que ie vous fais sçavoir des nouuelles qui troubleront un peu vostre ame : toutefois quand vous sçauuez que ce frere qui vous est si cher, craint de mourir pour quelques blesseures , & desire vous voir, ne croyez pas ce mal-heur si proche : mais plutost que vostre beureux destin a fait naistre cës accident , pour faire voir dans la premiere ville du monde la plus belle personne de la terre. Vous ne devez pas estre estonnée, s'il veut que vous acqueriez cette gloire aux despens d'un peu de crainte : vous y trouuerez des personnes à qui l'amour ne peut estre favorable loin de Syracuse, & qui n'attendent leur guerison que de vostre presence. Cependant ie ne redoute aucun mal-heur, ne pouuant estimer la cause mauuaise qui produira un si bel effect , comme sera le bonheur de vous voir.*

Melinte qui n'auoit encore osé descouurir entierement

sa passion à la belle Ariane, auoit pris cette liberté de luy escrire depuis son départ de Syracuse, & mesmes en auoit eu sa permission, à cause de la paresse de Palamede, afin qu'elle eust souuent de leurs nouuelles : si bien qu'il luy parloit insensiblement de son affection, entremellant couuertement ce qui le touchoit le plus aux choses qui se passioient, sans qu'elle eust sujet de l'accuser de temerité. Mesme elle estoit bien aise de receuoir des tesmoignages de sa passion sans engager son honneur, feignant d'ignorer son dessein : & ils se trompoient ainsi tous deux agreablement, si l'on peut appeller tromperie la connoissance secrette qu'ils se donnoient d'une amour vertueuse & inuiolable.

Après que Melinte eut fermé les lettres, il les mit entre les mains d'Arcas son fidelle affranchy : & l'instruisant de ce qu'il auoit à faire, luy donna charge d'aller en diligence faire le recit du mal de Palamede, en sorte qu'ils n'eussent point trop de frayeur, & de dire que luy mesme eust escrit sans vne blesseure qu'il auoit à la main : puis il reuint trouuer son amy, & fit partir ce porteur en sa presence pour luy monstrier comme il obeissoit à sa priere, & luy donner au moins ce contentement.

Marcelin qui auoit tousiours fait estime auparauant de Palamede & de Melinte, à cause de leurs merites, & qui ne s'estoit point declaré contr'eux, sa ialousie n'ayant point encore esclaté, plein de despit de ce que par deux fois ils auoient eschappé de la mort qu'il leur auoit preparée, & ne croyant pas que l'on sceust qu'il en fust l'auteur, feignit d'estre tombé malade, & enuoya sçauoir de leurs nouuelles, dont il tesmoignoit estre en peine. Lors qu'il eut appris que son principal ennemy estoit le

plus mal , il luy enuoya d'un vnguent comme un excellent remede pour les blessures : mais Melinte l'ayant receu ne voulut pas que son amy fist l'essay de cette drogue, venant d'un lieu si suspect. La belle Camille enuoya querir un chien que l'on blessa d'un coup de cousteau : puis y fit appliquer l'vnguent, & quatre heures apres il se trouua mort , cette composition ayant enuennimé la playe , & penetré dans peu de temps iusques au cœur. La connoissance de cette trahison fit autant haïr Marcelin à Camille, comme elle l'auoit aimé auparavant : Et quand il voulut la venir voir estant guery , elle luy resmoigna tant de mescontentement , qu'il vit bien qu'il estoit ruiné aupres d'elle.

Melinte affligé du mal de son amy, bien qu'alors on ne le iugeast pas mortel, & se voyant contraint de feindre de la passion pour vne Dame qu'il n'aimoit point, passoit dans cette maison vne vie assez facheuse. Emilie qui ne pouuoit croire que ses froideurs & ses ennuis vinsent de peu d'affection pour elle, & en attribuoit la cause tantost au mal-heur qui leur estoit arriué, tantost au desir qu'il auoit de se vanger de Marcelin , ne cessoit de luy rendre des soins fort passionnez. Un iour qu'il estoit au lit, elle luy dit : Melinte , il me fache de vous voir si triste en un lieu où l'on desireroit le plus que vous fussiez content. Madame , respondit-il , le plus grand des-plaisir que j'aye, c'est de vous donner tant de peine , & ie voudrois bien qu'il vous pleust vous en remettre à ceux qui nous seruent , ie serois soulagé de la moitié de mon mal. Non , non , Melinte, reprit-elle, ne vous cachez point à moy , ce n'est point là le sujet de vostre ennuy : car si vous m'aimez vous desirez estre aimé de moy,

& vous n'en pouuez maintenant receuoir d'autres tesmoignages que mes assistances ; de sorte que ma peine vous doit estre plustost agreable qu'ennuyeuse. Mais en verité ne songez vous pas à vous vanger de Marcelin, à cause des meschancetez avec lesquelles il poursuit la vie de Palamede ? Melinte qui estoit bien aise de cacher le principal sujet de sa tristesse , fut bien aise de son erreur , & pour l'y entretenir luy dit : Madame , il est vray que ses trahisons me remplissent d'horreur & de crainte : car ie voy qu'il ne cessera d'entreprendre contre nous ; & il nous sera plus mal-aisé de nous garantir d'un lasche & d'un traistre , que d'un ennemy ouuert & courageux. Laissez moy ce soin, reprit-elle, il faut peu à peu le bannir de nostre compagnie , & nous sçaurons mieux puis apres nous sauuer de ses desseins : desia ma sœur le hayt, & i'ay gaigné cela sur elle , luy representant combien cét homme estoit à detester. Il n'y a point de doute, repartit-il, que sa frequentation est fort dangereuse , & que tost ou tard ceux qui ont vn naturel si meschant , font participer au mal-heur de leur vie ceux qui les pratiquent. Je commence, dit Emilie , à connoistre , mais bien tard, la verité de ce que vous me dites : car ie l'auois tenu pour vn homme capable de faire vne meschanceté : toute fois voyant qu'il nous rendoit tant de deuoirs, ie ne croyois pas qu'il peust mediter quelque chose qui nous apportast du desplaisir. Je ne veux pas, continua-t-elle, vous faire reproche du seruite que ie vous ay rendu en la personne de Palamede , le faisant agréer à ma sœur : mais ie veux bien vous faire voir quelle est l'affection que ie vous porte , & le pouuoir que i'ay sur elle , d'auoir esloigné Marcelin de son esprit, auquel il est vray que nous auions

de signalées obligations : & si vous auez le loisir ie vous en feray le recit en peu de mots. Melinte qui estoit bien aise de la laisser parler , la pria de prendre cette peine, & elle reprit ainsi.

HISTOIRE D'ANTONIN,
d'Emilie, de Decie, & de Camille.



Ly a bien trois années que ma sœur & moy nous espousâmes en vn seul iour deux Cheualiers Romains par vn des plus estranges accidens que la fortune ait iamais produits, & dont ie croy que l'histoire ne vous sera pas ennuyeuse. Ces deux Cheualiers, qui se nommoient Antonin & Decie, estoient amis ; Decie du commencement me tesinoignoit de l'affection, & Antonin en tesmoignoit à ma sœur : ie vous confesse qu'Antonin estant plus aymable que Decie, j'auois quelque despit que le moindre des deux se fust adressé à moy, & ie me resolu de le gagner par toutes sortes d'attraits. La peine que j'y pris ne fut pas inutile, & ie m'apperceus que peu à peu il se destacha de l'amour qu'il auoit pour ma sœur ; & en fin par mille deuoirs qu'il me rendit il tascha de me faire croire qu'il n'aimoit rien que moy au monde. Je ne fus pas difficile à estre persuadée, & de mon costé ie l'aimay autant qu'une fille peut aimer vn homme. Ma sœur s'apperceuant de ce changement, & sa douce humeur ne luy permettant pas des ressentimens violens, se contenta de

luy en tesmoigner son desplaisir, & de luy dire que de sa part elle seroit bien plus fidelle, & qu'elle n'aimeroit iamais autre personne qu'il ne fust marié avec moy. Antonin voyant la franchise avec laquelle elle l'aimoit ne feignit point de luy auoüer l'amour qu'il auoit pour moy: que du commencement il ne m'auoit regardé que comme vn obstacle à son contentement, n'esperant pas pouuoir l'espouser que ie ne fusse mariée, à cause que i'estois l'aisnée: mais que depuis il m'auoit regardé avec des yeux d'amour; & puis qu'elle luy parloit si franchement, il luy iuroit aussi que si le Ciel me donnoit à vn autre qu'à luy, il l'espouseroit aussi tost. D'vn autre costé Decie voyant qu'Antonin m'aimoit, eut dessein d'aimer ma sœur: soit qu'il deferast à son amy en luy quittant la place; soit qu'il n'aimast pas alors à contester avec vn riuai, ou qu'il remarquast des charmes en ma sœur qu'il n'eust pas encore apperceus; & Camille-aux premieres assurances qu'il luy donna de son affection, ne le voulut point abuser, ny luy faire perdre du temps: mais voyant qu'il sçauoit ce qui s'estoit passé entre Antonin & elle, luy declara franchement, que sa resolution estoit d'attendre quelle seroit la fortune des amours d'Antonin & de moy, & luy promit de l'espouser si Antonin m'espousoit.

Quelque temps apres Corbulon emmenant plusieurs troupes de Rome pour aller à la guerre contre les Parthes, Decie & Antonin furent obligez de le suivre, apres mille protestations reciproques que nous nous donnâmes Antonin & moy, d'vne amour sur laquelle l'absence ne deuoit auoir aucun pouuoir. Mais si tost qu'Antonin fut esloigné, vn presomptueux & extrauagant nom-

mé Tuberon, qui m'aimoit des long temps, dont la maison estoit attachée à celle-cy, & qui ne se croyoit reculé de mes bonnes graces que pour l'estime qu'il voyoit que ie faisois d'Antonin, ne cessa de poursuivre mes parens pour faire en sorte que ie luy fusse accordée, & à cause qu'il auoit des richesses fort considerables, fit que mon pere me força de l'espouser malgré l'auerfion que ie tesmoignay auoir pour luy, & toutes les finesses que i'inuenty pour l'obliger à ne point penser en moy.

Le vescu quatre ou cinq mois avec luy, sans luy tesmoigner aucun desplaisir de ce qu'il estoit venu à bout de ses desseins; & luy gardant toutefois en mon cœur vne haine itreconciliable. En fin Antonin & Decie reuiennent à Rome, & Antonin ne s'estoit pas encore enquis de ce qui m'estoit arriué depuis son depart, lors qu'il rencontra Tuberon, & luy demanda comment se portoit leur commune Maistresse. Tuberon voyant qu'il ne sçauoit pas qu'il m'eust espousée, se resolut de se iouer de luy; & sur ce qu'Antonin luy demanda comment il estoit avec moy: Assez bien, respond Tuberon. Mais encore, comment? dit Antonin, quelquefois on se flatte. l'en eusse peut-estre bien dit autant auant que partir, & cependant ie ne voudrois pas asseurer que cela fust encore. Il seroit difficile, respond Tuberon, que vous y fussiez aussi bien que moy. Et quelles faueurs vous tesmoigne-t'elle, reprit Antonin. Elle me donne, repartit-il, toutes les plus grandes qui se puissent receuoir. Antonin dit qu'il ne le pouuoit croire, & le pressant là dessus de luy en dire dauantage, Tuberon luy dit, Vous sçavez que sa maison & la mienne sont ioignantes l'une à l'autre, sçachez qu'elle a fait faire vne clef de la porte qui est commune

au jardin de son pere & au mien, par laquelle elle me vient voir toutes les nuits. Antonin dit que cela ne pouuoit estre; que i'estois trop sage pour me conduire de la sorte, & s'animant de colere sur ce discours, luy dit que s'il ne luy faisoit voir ce qu'il luy disoit, il le publieroit pour le plus meschant homme du monde. Tuberon luy offrit d'en faire iuges ses yeux mesmes; & afin que personne ne le peust detromper s'il le laissoit aller, le pria de venir chez luy à l'heure mesme, estant desia tard, & l'assura qu'il me verroit sur le soir dans son jardin. Antonin se laissa conduire à Tuberon, qui le mena dans vne chambre au bout de son jardin, où il l'enferma, l'asseurant qu'il ne tarderoit pas long temps à voir ce qu'il luy auoit promis. Antonin, de despit qu'il auoit, ne luy respondoit pas vn seul mot; & estant seul, tantost il s'imaginoit desia me voir, & me faire mille reproches de mon infidelité, & mesmes s'emporter aux iniures pour m'auoir surprise en vne action si desordonnée; tantost il s'accusoit luy mesme de se laisser aller à ces imaginations, & iugeant de moy par mes actions passées, ne pouuoit croire que ie fusse tombée dans vn tel abandonnement de moy mesme: puis sur cette pensée il meditoit desia le courroux qu'il deuoit tesmoigner à Tuberon, pour s'estre quelque temps moqué de luy, & pour auoir esté cause qu'il auoit pû douter de moy iusques à ce point: que si ie venois à sçauoir qu'il eust eu cette creance de moy, c'estoit pour perdre mon affection, & que sans doute Tuberon n'auoit inuenté ce discours qu'à ce dessein. Puis il retomboit dans des craintes du tout contraires; & ne pouuoit croire que Tuberon oust assez de hardiesse pour se moquer de luy; qu'il l'estimoit trop lasche

pour

pour ne redouter pas sa colere. En fin Antonin me confessa depuis, qu'il est difficile qu'un esprit ait pû iamais forger tant de pensées, & de si diuerses, qu'il en passa par le sien, au temps qu'il fut enfermé dans cette chambre.

Cependant ie venois d'estre aduertie qu'Antonin estoit de retour, & i'apprehendois extrêmement sa veuë, m'imaginant que la premiere fois qu'il me parleroit, il ne receuroit point pour excuse la violence du deuoir, & me feroit mille reproches de luy auoir manqué de foy; & lors que i'estois dans ce trouble d'esprit, Tuberon me vint trouuer, & me dit la rencontre qu'il auoit faite d'Antonin, ce qui s'estoit passé entr'eux, & le dessein qu'il auoit de se iouer de luy; à quoy il me prioit de contribuer, & qu'il l'auoit amené chez luy afin que ie fusse veuë de luy: que ie n'aurois qu'à me mettre dans vn des cabinets du jardin, & lors qu'il m'appelleroit, que ie parusse, puis comme estant honteuse d'auoir esté veuë par vn autre ie rentrasse dans le cabinet. Je m'estonnay extrêmement de l'estrange dessein de Tuberon: i'admiray son impertinence, & tashay de le diuertir de cette fantaisie autant qu'il me fut possible; mais en vain, car il y estoit entierement resolu, & de peur qu'il creust que ie craignisse de desplaire à Tuberon, ie fus contrainte de luy tesmoigner que ie ferois ce qu'il desiroit. En mesme temps il me mena dans le cabinet du jardin, & y estant demeurée seule, ie pensay que c'estoit là le plus grand desplaisir qui me peust arriuer: qu'auparauant i'auois redoute l'abord d'Antonin lors qu'il auroit appris que ie serois mariée, mais qu'alors i'auois mesme horreur de l'opinion qu'il auroit de moy, de me voir avec Tuberon comme vne fille impudi-

que; & qu'il ne manqueroit pas de meller aux reproches de mon infidelité, ceux de voir mon honneur tellement abandonné.

Tandis que j'estois dans cette pensée, j'entendis que Tuberon amenoit Antonin vers le cabinet, qui luy disoit que sans doute il se mocquoit de luy, & qu'il luy auoit seulement voulu donner la peur que ie le fauorisasse ainsi. Tuberon luy respondoit qu'il verroit s'il se mocquoit. Alors ie ne scauois ce que ie deuois faire; ie ne pouuois me resoudre de sortir pour me faire voir: mais en fin craignant que si ie tardois dauantage il me l'amenast où j'estois, ie me contraignis moy-mesme, & passay, à leur veuë, d'un cabinet en vn autre. Tuberon demanda à Antonin s'il n'estoit pas veritable: Antonin pouuoit à peine croire ses yeux; puis voyant qu'il ne pouuoit aller contre cette verité, il s'emporta à faire mille reproches contre moy, & tout en colere sortit du logis.

Tuberon ne se contenta pas de cette extrauagance, mais y en adiousta vne autre bien plus dangereuse & pour luy & pour moy. Le lendemain des le matin il alla trouuer Antonin qui estoit encore au liët, n'ayant pû dormir toute la nuit; & luy dit qu'il estoit fâché de luy auoir fait receuoir vn si sensible desplaisir, mais qu'il y auoit esté forcé par luy mesme. Antonin luy respondit qu'il n'estimoit pas que ce luy fust vne grande gloire de me posseder ainsi: qu'il deuoit plustost cette bonne fortune à la commodité qu'à son merite: que ie tesmoignoïs bien d'auoir eu enuie de passer mon temps, d'auoir voulu ietter les yeux sur luy: que s'il n'eust esté absent, & qu'il eust pû auoir pareille commodité, ie l'eusse sans doute preferé. Tuberon le nie, Antonin l'assure; en fin Tuberon picqué d'honneur, &

pour faire valoir son merite , dit que pour luy faire voir que ie ne luy permettrois iamais vne telle faueur, il vouloit luy donner le moyen d'estre seul avec moy; & que s'il vouloit venir avec luy, il nous mettroit bien tost ensemble. Antonin s'y accorde, & ils s'en vont au logis de Tuberon.

Ie fus bien estonnée quand Tuberon me vint dire, que pour oster à Antonin la vanité qu'il auoit, il estoit besoin que ie me trouuasse seule avec luy; m'assura qu'il se fioit assez en ma vertu, & me pria qu'Antonin perdist l'opinion que par son merite il me possederait aussi bien que luy. Ie tashay encore plus que l'autre fois à le diuertir de ce dessein; & luy representay qu'Antonin ayant esté enfermé avec moy, en parleroit comme il luy plairoit. Il me respondit qu'il ne seroit pas creu quand mesme il le publieroit, & que si ie ne luy donnois ce contentement il auroit sujet de croire que ie me deffois de ma force. I'y consentis à regret, & quand il m'eut laissée seule, ie songeay quel desplaisir i'aurois de me voir avec Antonin: que i'aurois à souffrir tous ses reproches, puis à resister à ses desirs: & ie songeois à la faute que faisoit mon mary, qui pouuoit bien croire que ie l'aimois mediocrement, de me reduire à cette espreuue de constance: toutefois ie me résolus à ne rien faire contre mon honneur. Tuberon peu de temps apres m'ameine Antonin en ma chambre; me prie de l'entretenir en son absence, puis nous enferme. Antonin s'approche de moy, & d'abord ie ne sçay qui estoit le plus interdit de nous deux, & qui auoit plus de rougeur au front. En fin ayant dessein d'obtenir quelque grand aduantage sur moy, & non pas de me déplaire, il se contenta de me parler en passant de mon infidelité;

puis il me cajolla, & me pria par son affection de luy accorder de pareilles faueurs qu'à Tuberon; le luy respondis modestement, & le suppliay de perdre ces esperances: puis sur ce qu'il insistoit, ie creus qu'il le falloit plustost detromper que de fauoriser dauantage les impertinences de Tuberon, & luy dis que i'estois mariée avec luy. Il ne le voulut point croire, & dit que c'estoit vne deffaute. Il continuë ses cajolleries, en veut venir aux douces violences, & me dit que soit que Tuberon fust mon mary, ou non, ie ne le puis refuser: car s'il ne l'est pas ie n'auois point de raison de luy denier ce que i'accordoys à l'autre, puis qu'il m'auoit aussi bien & mieux serui que luy, & que ie luy auois promis tant d'affection autrefois: & que si Tuberon estoit mon mary, il meritoit mieux qu'homme du monde que ie me vangeasse de luy, pour luy auoir voulu donner vne telle opinion de moy, & pour m'auoir mise en cette espreuue. le luy respondis à tout le plus vertueusement que ie pûs; luy contay tout ce qui s'estoit passé en mon mariage; qu'il estoit vray que ie l'auois aimé plus que toutes choses, & que ie l'aimois encore autant que mon honneur le pouuoit permettre; que i'auois tousiours haï, & que ie haïssois encore Tuberon, qui m'auoit voulu espouser mal-gré toute la resistance que i'y auois faite, & tous les artifices dont ie m'estois serui, tant contre luy que contre mes parens: mais que tout cela n'empeschoit pas que ie ne me maintinsse dans l'honneur. Antonin tout confus auoüa que ie parlois avec beaucoup de raison & de vertu; qu'il ne pouuoit plus douter apres m'auoir veu tenir vn discours si serieux, que ie ne fusse femme de Tuberon; & que plus ie luy auois tesmoigné de vertu, plus il trouuoit son mal-heur extrême.

de me voir possédée par vn autre; par vn homme indigne de moy, & par vn homme encore qui s'estoit moqué si cruellement de luy. En fin il me dit; ie voy bien que vous faites ce que vous deuez, mais que doy-ie faire dans le desordre où ie suis, pour vous voir entre les mains d'un autre que vous n'aimez point, & qui par ses mocqueries m'a fait vn outrage qui ne se peut reparer? le luy respondis; Vous auez veu que ie sçay bien les loix de mon honneur, c'est à vous à sçauoir celles du vostre: Aussi tost ie me leuay d'aupres de luy, & allay m'enfermer dans vn cabinet qui estoit en vn des coins de ma chambre.

Antonin demeurant seul, & me regardant partir, repeta les mots que ie luy venois de dire. Ie sçay les loix de mon honneur, c'est à vous à sçauoir celles du vostre. D'abord il ne pouuoit comprendre ce que cela vouloit dire: mais apres luy auoir donné diuerfes explications, en fin il dit parlant à luy mesme. Lasche que tu es, n'entens tu pas ces paroles? elle te tesmoigne qu'elle n'aime point Tuberon. Tu sçais qu'il s'est moqué de toy, & tu consultes encore si tu n'es pas obligé de le faire mourir? vange Emilie, & te vange d'un seul coup; oste du monde cet infame sujet de ses desplaisirs & des tiens, cet insolent possesseur de ton bien, qui ne se contente pas de te l'auoir volé en ton absence, sans y adiouster des mocqueries insupportables à elle & à moy, & sans nous reduire tous deux aux plus cruelles espreuues, elle de chasteté, & moy de patience? Il mourra cet extrauagant, qui n'est redevable qu'à la continence de sa femme de la conseruation de son honneur, que son impertinence nous abandonne. Il sortit tout furieux sur cette pensée, & n'ayant rencontré personne dans le logis, il se retira

au sien, où il ne cessa de mediter où il pourroit trouuer Tuberon pour luy oster la vie.

Sur le soir Tuberon luy mesme impatient de sçauoir ce qui s'estoit passé, alla chez Antonin pour s'enquerir de luy comment il estoit satisfait de son merite. Antonin sçachant qu'il estoit à la porte, & irrité de nouveau par la folle curiosité de cet homme, sans consulter autre chose que son ressentiment, sort l'espee à la main, & le poursuit & d'iniures & de coups, iusques en son logis. Tuberon tout sanglant s'enfuyoit, appelant les voisins au secours: mais il estoit desia nuit; & les Romains sçachant que Neron auoit accoustumé de courir les ruës, & d'exciter souuent de tels tumultes, n'osoient sortir de leurs maisons, de peur de tomber entre ses mains; car il n'aimoit pas que l'on sortist pour deffendre ceux qu'il luy plaisoit d'attaquer. Ainsi Tuberon n'estant point secouru, arriue à la porte de son logis, & tombe demy mort. L'Empereur qui par hazard estoit proche de là, y arriue avec sa troupe, & veut sçauoir ce que c'est. Cependant ie fay ouurir, entendant la voix de Tuberon. Neron entre dans le logis, & commande que l'on y fasse entrer Antonin, dont on s'estoit saisi, & que l'on apporte Tuberon. A ce bruit mon pere qui estoit logé ceans, court chez son gendre que l'on assassinoit, & ma sœur le suit. Decie aussi, amy d'Antonin, & qui aimoit Camille, estoit present, s'estant ioint ce soir là à la troupe de Neron, pour ce qu'il estoit amy de Marcelin qui accompagnoit toujours l'Empereur dans ses desordres. Antonin voyant deuant qui il auoit à rendre compte de ses actions, ayant prié que l'on l'escourast, commença à desdire à Neron en presence de tous ce qui s'estoit passé, sans rien dégui-

ser de la verité. Tiberon ne pouuant parler pour y respondre, à cause du miserable estat où il estoit, l'Empereur me commanda de dire ce que j'en sçauois. Alors sans m'estonner ny de sa presence, ny de celle de mon pere, ie dy que ie remerciois les Dieux de ce que j'auois à parler deuant l'Empereur, auquel ie ne feindrois point de me plaindre de la lascheté de Tiberon, & de la tyrannie de mon pere. Je fis recit naïfvement de l'honneur & affection que m'auoit portée Antonin, & de l'auersion que j'auois tousiours eue pour Tiberon, qui en l'absence d'Antonin auoit fait en sorte que mon pere m'auoit forcée à l'espouser, malgré tout ce que j'auois fait pour y resister: que depuis il s'estoit bien monstté indigne de moy, & indigne mesme de viure, exposant temerairement mon honneur & le sien à vne espreuue tres-dangereuse: car si ie cedois il n'auoit que ce qu'il meritoit, & si j'auois assez de force pour resister, il possedoit vne femme qu'il ne meritoit pas: mais quand mesme il eust esté asseuré de ma continence, il n'auoit pas eu l'esprit de considerer qu'elle pouuoit courir fortune, sans la discretion d'Antonin, qui dans la commodité qu'il luy auoit donnee, s'estoit comporté avec toute la sagesse que ieusse sceu desirer, & lequel s'il eust esté moins raisonnable, en pouuoit venir à des violences, contre lesquelles ma foiblesse n'eust peut-estre pas resisté, pour se vanger des deux en mesme temps; de moy pour mon infidelité, & de Tiberon pour s'estre voulu mocquer de luy. Pour moy, que ie ne croyois point que l'Empereur deust trouuer estrange, qu'Antonin eust porté son ressentiment iusques à vouloir faire mourir Tiberon: qu'Antonin en ne poursuiuant pas la ruine de mon honneur

comme il l'eust pû faire, auoit tesmoigné toute la prudence & la retenue que le plus sage des hommes puisse auoir, & en portant sa vengeance contre Tuberon seul qui l'auoit outragé par vne si cruelle mocquerie, auoit fait ce qu'un homme de courage est obligé de faire. En fin ie conclus que quand mesmes Tuberon ne mourroit point de ses blessures, ie demandois à l'Empereur qu'il luy pleust commander à mon pere de me permettre de le repudier, & d'espouser Antonin, auquel i'auois des obligations infinies, & pour son affection, & pour la conservation de mon honneur.

Alors Neron declara nul le mariage de Tuberon & de moy, comme ayant esté forcé; qu'Antonin auoit iustement tiré raison de l'offence qui luy auoit esté faite, & desira que mon pere consentist au mariage d'Antonin & de moy. Camille entendant cet Arrest, luy demanda permission, & à son pere aussi, de faire souuenir Antonin de ce qu'il luy auoit promis, & luy dit: Vous sçavez bien qu'encore mesme que l'Empereur vous permette d'espouser Emilie, vous ne le pouuez pas faire sans contreuenir à vostre serment, par lequel vous vous estes obligé de m'espouser au cas que ma sœur en espousast vn autre que vous: Elle a espousé Tuberon, & par consequent vous ne pouuez estre à autre qu'à moy. Decie qui estoit present prit la parole, & dit: Quoy, Camille, deuez vous plus pretendre d'en espouser vn autre que moy, puis que vous m'avez promis de vous donner à moy si Antonin en espousoit vn autre? le mariage de Tuberon & d'Emilie est déclaré nul par l'Empereur, qui veut qu'elle soit mariée à Antonin; deuez vous encore contester contre la raison, contre vostre promesse, & contre mon affection?

affection ? Neron prononça que Decie auoit raison , confirma le mariage d'Antonin & de moy , & voulut que Decie espousast Camille ; ce qui fut fait dès le lendemain dans cette maison ; où l'Empereur mesme voulut assister. Tuberon mourut quelques iours apres , & mon pere ne suruecut que de quelques mois , ayant conceu vn des-plaisir de ce que les mariages de ma sœur & de moy auoient esté resolués contre ce qu'il auoit peut-estre disposé en son esprit.

Cette rencontre , & les nopces qui se firent avec beaucoup de solemnité , à cause que l'Empereur y voulut assister , nous donnerent la cognoissance de Marcelin , qui conceut dès lors de l'affection pour Camille : mais nous ne iouïssmes pas long temps ma sœur & moy des contentemens que nous auions esperez. Car à peine six mois se passerent que Decie quittant l'affection qu'il auoit eüe pour ma sœur , redeuint amoureux de moy ; au moins il me le voulut faire parestre : ie luy resistay discrettement , pource que ie ne voulois point que son dessein vinst à la cognoissance de mon mary ny de ma sœur , pour ne pas perdre l'amitié qui estoit entre nous , & i'esperois qu'il s'en retireroit de luy mesme. Cette douceur luy fit croire que ie me laisserois en fin gagner , & que ie n'estois retenuë que de l'affection que ie portois à mon mary. D'autre costé iugeant des autres par luy-mesme , il creut qu'Antonin auoit repris l'amour qu'il auoit eüe autrefois pour ma sœur , & qu'il en estoit aimé , pource que sans aucun dessein ils s'entretenoient assez familièrement : dequoy il conçeut vne si furieuse ialousie , qu'il resolut de les faire mourir tous deux , cette rage seruant aussi à l'affection qu'il auoit pour moy , car il pretendoit m'es-

pouſer apres ſ'eſtre deſſait de ces deux perſonnes. Vn iour qu'il nous donna à diſner, ie fus eſtonnée que voulant manger d'une viande dont il y auoit peu dans vn plat, & qui paroifſoit fort bien aſſaiſonnée, il me retint par le bras, & feignant de ſe ſouuenir de quelque choſe qu'il auoit à me dire, m'entretint iuſques à ce qu'Antonin & Camille euſſent mangé la pluſpart de ce qu'il y auoit dans le plat, puis il le fit emporter. Je ne m'apperceus alors d'aucune choſe, mais incontinent apres diſner, le ieune eſtomac de ma ſœur commença de ſe ſouleuer, & eut bien aſſez de force pour chaſſer le poiſon qu'elle vomit. Antonin qui eſtoit beaucoup plus aagé, & qui en auoit mangé le plus, ſentant auſſi quelques douleurs, fit pluſieurs efforts pour ietter ce qu'il auoit pris, mais iamais il ne peut, quelque remede qu'on luy donnaſt, & mourut le iour d'apres. Le crime & les deſſeins de Decie eſtant aſſez clairs, vous pouuez iuger quel fut mon transport de perdre vn mary que i'honorois, & avec quelle furie j'entrepris de me vanger de luy : & il vouloit encore que j'attribuaſſe ſon action à vn excés d'amour pour moy, & que ie luy en fuſſe redevable. Mais ce furieux n'eſtant pas content, & voulant à quelque prix que ce fuſt que ma ſœur mouruſt, ie ne pûs ſonger alors qu'à luy ſauuer la vie, en la retirant chez moy, où i'auois reſolu de viure libre ſans me remarier iamais. En ce temps Marcellin eſtoit amoureux de Camille avec des paſſions ſi violentes, qu'il n'y auoit rien qu'il n'eût entrepris pour elle : & nous voyant touſiours dans les pleurs ma ſœur & moy ; elle à cauſe que Decie cherchoit par tous moyens à la faire mourir, & moy pour la perte que j'auois faite ; il entreprit de nous vanger tous deux, &

nous deliurer pour iamais d'un si cruel ennemy. Peu de temps apres nous sceusmes que sur le chemin Appien Decie auoit esté tué, & Marcelin nous confessa qu'il l'auoit fait faire pour l'amour de nous, ce qui me donna beaucoup de satisfaction, & apporta tant de soulagement à ma sœur, que pour recompense elle ne feignit point de le receuoir en ses bonnes graces. Depuis il n'y a eu sortes d'assistances dont il ne nous ait secouruës, dequoy nous estimions luy estre fort obligées. Mais pour son mal-heur, poursuivit-elle en soufriañt, Melinte est venu de Syracuse, qui possedant des merites ausquels on ne peut rien refuser, a fait que j'ay entrepris d'oster de l'affection de ma sœur vn homme à qui elle estoit fort engagée, & d'y mettre Palamede en sa place. Je ne vous dis pas ces choses pour vous monstrier que vous me soyez redevable, ny pour vous prier de pardonner à Marcelin en nostre consideration: mais pour vous faire voir qu'ayant eu ce pouuoir sur ma sœur d'esloigner cette personne de son esprit, ie pourray bien l'esloigner encore de sa veuë.

Melinte qui auoit escouté ce discours avec vne grande attention, & qui cependant faisoit ses iugemens à part de la vie de ces femmes, qui auoient causé toutes ces tragedies; ne croyant pas que toutes ces ialousies fussent arriuées sans sujet, & sçachant que celles qui viuent avec honneur n'ont point de fortunes si déreiglées, dissimula toutefois ces pensées pour luy respondre: Madame, vous me donnez tous les iours de si grands tesmoignages de vostre amitié qu'il n'y aura iour de ma vie que ie ne m'en souuienne: mais il n'est pas raisonnable qu'à nostre occasion vous soyez ingrates enuers Marcelin. l'ai-

me mieux luy pardonner pour l'amour de vous, que vous le detestiez pour l'amour de moy. l'ay seulement vne crainte, connoissant Marcelin par vostre discours mesme pour homme de sang, que nous ne soyons reduits à sortir de Rome, ou nous priuer de vostre veüe, pour euitter les effects de sa haine; & vous pouuez iuger combien ces deux choses nous seront fascheuses. Melinte, dit Emilie, ne songez point à nous quitter: i'aime mieux perdre pour iamais Marcelin, qu'un moment de vostre veüe. Peut-estre, reprit Melinte, Camille n'a pas le mesme desir. Assurez-vous, dit-elle, qu'elle suit la pluspart de ce que ie veux. Madame, repartit Melinte, en toutes facons ce sera le meilleur expedient de dissimuler de vostre costé & du nostre, & cependant nous tenir sur nos gardes. Je vous supplie donc, poursuiuit-il, d'aduertir Camille qu'elle ne le traite point si mal, pour ne le faire pas declarer contre nous, car il nous faudroit sortir de ceste ville où il est trop puissant, & vous perdre pour iamais. Emilie luy respondit en luy prenant la main; Nous ferons tout ce que vous desirez: faites aussi quelque chose en nostre faueur, & nous aimez autant que nous desirons estre aimées de vous. Madame, repliqua-t'il, il m'est impossible de vous aimer dauantage que ie fais, & i'en appelle a tescmoin les Dieux, qui scauent le secret de mon ame. Je le veux croire, dit-elle, pour mon contentement; puis elle le quitta pour aller dire à sa sœur ce qu'ils auoient aisé ensemble, pour les conseruer long temps avec elles.

Melinte se voyant seul, commença de s'entretenir ainsi dans ses pensées. Belle Ariane, que dirois-tu si tu estois presente? m'accuserois-tu de feindre de l'affection

pour Emilie ? ou me plaindrois-tu de la contrainte que j'endure ? de m'accuser tu serois iniuste , car la feinte est icy trop necessaire : & pourquoy me refuserois-tu ta pitié , sçachant que ie ne souffre tant de peine que pour te bien aimer ? Mais puis qu'elle n'est pas presente , que ces discours sont inutiles ? Ceste belle est maintenant en Sicile , & ne sçait pas mes supplices : ou si elle iuge que ie n'en suis pas exempt pour son amour , elle pense que ie ne suis trauaillé que des ennuis de l'absence ; sans pouuoir s'imaginer ceste cruelle surcharge. Toutefois , pourquoy ne sçauroit-elle pas mes peines ? si ie ne l'aime est-elle pas en mon ame ? & si elle y est , n'est-elle pas tescmoin de tous les tourmens qui m'atriuent pour ne luy manquer pas de fidelité ? Ceste beauté qui m'a tousiours deffendu de luy descouuir ma passion , ne la mesprise pas pourtant ; mais voulant en iuger plus certainement , elle s'est logée en mon ame mesme , où se trouuant aimée avec tant d'ardeur , & adorée avec tant de respect , elle ne quitte point ce lieu , & void avec ioye les trauerfes qui m'affligent , comme de fideles espreuues de mon amour & de ses merites. Quelle consolation aurois-ie si ma memoire ne me faisoit voir routes les fois que ie veux ceste diuine Image , sans laquelle la vie me seroit insupportable ? Sur ceste consideration il s'arresta , & fermant les yeux pour se bien représenter les beautez d'Ariane , avec routes les graces & les lumieres qui l'accompagnoient en son imagination , dans cét agreable rauissement , il fit ces vers.

*Souuenir si doux à mon ame ,
Aymable entretien de ma flame ,*

Ne me laisse point en ces lieux :
 Sans toy i'eusse quitté la vie,
 Dès lors que ie quittay les yeux
 Dont ma liberté fut rauie:

L'ennuy d'une absence importune,
 L'horreur de ma triste fortune,
 Qui me rait l'esper de iamais l'acquérir,
 Mes violens desirs que l'effect ne peut suivre,
 Mes soucis, mes fureurs me deffendent de viure:
 Mais ton aymable obiect me deffend de mourir.

Pare toy donc de tous tes charmes,
 Brille de tes plus belles armes,
 Heureux sujet de mon tourment:
 Regne seul dedans ma memoire,
 Et soustien mes iours seulement
 Pour mon amour & pour ta gloire.

Divine Image de ma Belle,
 Compagne. agreable & fidelle,
 Qui n'as point pou: me suivre apprehendé les flots:
 Qui n'as pas a desdain le sort d'un miserable,
 Iette de ta splendeur vn rayon secourable,
 Et dissipe les soins qui troublent mon repos.

Alors mon ame soulagée
 Des maux dont elle est outragée,
 Viura contentte souz ta loy:
 Tu seras en paix reuerée,
 Et dans vn lieu pur comme toy
 Tu te plairas d'estre adorée.

Ie sens escarter le nuage;
 Desia cette diuine Image

*Chasse mes maux, d'un œil qui regne en Souuerain.
 Pourray ie bien souffrir l'esclat de sa lumiere?
 Ie commence à la voir, ie la voy toute entiere,
 Belle comme vn Soleil dedans vn Ciel serain.*

*Victorieuse de mes peines,
 Celeste Beauté qui m'auzines
 Tant d'heur apres tant de mal-heurs;
 Maintenant qu'un plaisir si rare
 Me fait oublier mes douleurs,
 Que rien de toy ne me separe.*

*L'ay peu de soin dans ces delices;
 Si l'on m'appreste des supplices,
 Si l'on medite encore à me priuer du iour:
 Ie veux plein de repos gouverner ma pensée,
 Tandis qu'elle te void & te tient embrassée,
 Puis que c'est le seul bien permis à mon amour.*

Cependant que Melinte se laissoit emporter dans les douceurs de son imagination, Emilie venoit de trouuer sa sœur dans la chambre de Palamede, & auoit interrompu vn entretien qui leur estoit bien agreable. Camille delia vaincüe de l'amour & de la bonne grace de Palamede, se sentant encore emporter à la pitié de le voir si mal pour son sujet, l'auoit ainsi abordé. Palamede, quelle chose seroit maintenant capable de donner satisfaction à vostre esprit, & soulagement à vos douleurs? Vostre presence, dit-il, Madame, qui fait en moy ces deux effects: car bien que la fortune m'ait traitté assez cruellement, ie ne scaurois me plaindre d'elle, de quelque sorte qu'elle m'ait conduit icy, pour me donner le bon-heur de vous voir à tous momens. Ie ne voudrois pas, res-

pondit-elle, que vous achetaffiez fouuent mes faueurs à ce prix; car ainſi ma bonne volonté ſeroit bien plus cruelle, que toutes les rigueurs que vous pourriez receuoir: mais voyez ce que vous deſirez de moy. Voſtre affection, dit-il, que ie vous demande encore de grace, bien qu'il ſemble que ie l'aye acquiſe par mon ſang. Vous ne ſerriez pas icy, reprit-elle, ſi deſia ceſte affection n'eſtoit à vous: mais ie veux bien vous en aſſeurer encore, par le ſerment que ie vous fais de me bannir de tout ce que vous voudrez pour n'aimer que vous. Palamede voulant la remercier, luy prit là main, & pour la baiſer leua ſa teſte du cheuet avec peine. Camille feignant de le vouloir remettre où il eſtoit, de peur qu'il ne ſe fiſt mal, approcha ſa teſte & le baiſa: & pource qu'en meſme temps il fit vn effort qui luy fit ſentir vn eſſancement par toutes ſes playes: Hé Dieux! dit-il, quel demon enuieux meſte ainſi la douleur avec la ioye? Alors Camille ſe baiſſa, & le rebaifant, luy dit: ie ne veux pas que la douleur demeure en vous la derniere. Madame, dit-il, ie ſuis honteux de vous laiſſer faire tout le chemin, mais ſi i'eſtois guarý vous ne me preuiendriez pas. Il faut, dit-elle, auoir pitié des malades, & faire pour eux ce qu'ils ſeroient volontiers en vne autre ſaiſon. Madame, reprit-il, s'il vous plaift prendre quelquefois cette peine pour moy, ie promets en ſanté de vous en rendre quatre fois autant. ie ne veux pas, repartit-elle, vous engager en ſi grandes debtes, que vous ne me puiſſiez payer puis apres. ie vous iure, repliqua-t'il, qu'au retour de ma ſanté, ces debtes ſeroient les premieres acquittées. Emilie les ſurprit dans ce doux entretien, & apres quelques diſcours communs, elle les aduertit de ce qu'ils auoient


uoient aduifé Melinte & elle touchant Marcelin , mais loïs qu'ils se parloient il vint à Palamede vn Messager de la part de son pere qui luy apporta ces lettres.

ARISTIDE A PALAMEDE.

MON fils , Ie ne doute point que Rome n'ait assez de merueilles pour vous arrester toute vostre vie : mais songez que vous auez vn pere qui vous aimant sera bien aise de vous reuoir , & vne sœur dont le mariage est tantost resolu avec Amyntas , & qui n'attend que vostre retour pour deliberer sur le bon-heur & le repos de sa vie. Laissez donc pour l'amour de nous toutes choses , & venez iouïr de nostre amitié, si au moins elle vous est encore chere.

Ariane qui aimoit Melinte , sans qu'elle voulust mesme qu'il le sceust, auoit preueu que ceste lettre causeroit de grands troubles en son esprit : de sorte qu'elle l'accompagna de celle-cy qu'elle escriuit à son frere , sçachant bien qu'il ne manqueroit pas à luy faire voir l'vne & l'autre. Palamede ayant leu la premiere, ouurit celle de sa sœur, qui estoit ainsi.

A R I A N E A P A L A M E D E.

 O N cher frere : Vous vous estonnerez que mes desseins soient differens de ceux de mon pere : mais ie veux bien vous dire que vous ne hastiez point vostre retour pour la nouvelle qu'il vous mande : car ie ne vous attens que pour declarer que ie n'espouseray iamais Amyntas , à cause de quelques raisons que ie vous feray sçauoir. Cela est donc en vostre choix de venir ou de ne venir pas , comme il sera un iour au mien de iuger avec qui ie dois viure.

Palamede iugea que les raisons de sa sœur , qui luy faisoient prendre ceste liberté de parler , & quitter sa modestie ordinaire , deuoient estre grandes. Puis il enuoya querir Melinte pour luy communiquer ces lettres. Il se leua aussi tost de son liçt & le vint trouuer , & les sœurs les ayant laissez seuls , Melinte les prit de la main de Palamede , & ne pût s'empescher de changer quelquefois de couleur en les lisant : ce que Palamede recogneut assez , mais sçachant qu'il vouloit tenir son affection secrette , il estoit bien aise de fauoriser luy-mesme sa discretion puis qu'il aimoit à viure ainsi : & il s'estoit resolu de n'en rechercher aucune connoissance , qu'alors que Melinte le iugeroit à propos , tant il portoit de respect à ce vertueux amy. Lors qu'il vid qu'il auoit acheué de lire , pour l'empescher de soupçonner qu'il eust rien remarqué , il le preuint ainsi.

Les lettres que vous leur auez enuoyées depuis que celles-cy sont parties, feront nos excuses si nous ne les allons voir si tost. Les excuses, respondit Melinte, sont bien legitimes, mais elles ne leur feront pas trop agreables; & à present que ie vous trouue hors de danger, ie me repens bien de vous auoir obeï, & de leur auoir donné tant d'aprehension. Ma sœur, reprit Palamede, ne sera pas fâchée que ie luy aye donné ceste occasion de voir l'Italie: mais afin qu'ils nous trouuent tous deux en bon estat, retournez vous remettre au lit, car ie sçay que vous auez besoin de repos, pour toutes les peines que vous auez prises pour moy.

Melinte retourna dans sa chambre, où se trouuant seul il remercia en son ame Ariane, du soin qu'elle auoit pris d'enuoyer ceste lettre pour le garentir de peur, voyant bien qu'elle s'adressoit plustost à luy qu'à son frere; & iugeant plus à son auantage de l'estat de ses amours, qu'il n'osoit auparauant esperer, il se resolut de souffrir avec patience les contraintes auxquelles il se trouuoit obligé deuant Emilie: & ses blessures estant refermées, il employa tout son temps aupres de son amy. En quoy il apporta tant de soin, que Palamede avec l'assistance de ces Dames se trouua en estat de se pouuoir leuer, bien que ce fust encore avec beaucoup de peine.

Fin du premier Livre de l'Ariane.





L E
 DEVXIESME
 LIVRE DE
 L'ARIANE



O R s que Melinte se resioüissoit le plus de la santé qu'il voyoit renaistre en son amy, il fut luy mesme surpris d'une fièvre. La perte de sang qu'il auoit faite, & les veilles & le trauail qu'il auoit supportez durant l'extrême mal de Palamede, l'auoient tellement affoibly, avec les soucis qui le tourmentoient, que son corps ne pût resister à tant de peine. Cét accident renouuella les craintes d'Emilie pour sa vie, & elle se blasma de luy auoir permis de s'employer avec tant de soin aupres de Palamede; toutefois avec les remedes que l'on y apporta, cette fièvre ne se trouua pas bien violente.

Ce fut en ce temps qu'on leur vint dire la nouuelle qu'Aristide & la belle Ariane estoient arriuez, & mou-

roient d'impatience de les voir. Palamede pouuoit à peine encore marcher, mais il s'estoit fait conduire auprès du liêt de Melinte, & fut bien aise que son pere le trouuaſt leué, pour le tirer de peur à cette premiere entreueü; toutefois il estoit bien marry que le sort fuſt alors tombé ſur ſon amy. Emilie estoit aſſiſe ſur le liêt, ne ſçachant pas qu'en cette occaſion Melinte la voyoit à regret en cette place, & Camille entretenoit Palamede, quand Ariſtide entra ſuiuy de la belle Ariane.

Après qu'il eut embrasſé ſon fils, & luy eut teſmoigné la ioye qu'il reſſentoit de le trouuer beaucoup mieux qu'il n'auoit eſperé, Ariane oſta le voile qui luy cachoit le viſage, & deſcouurit tant de beautez qu'elle eſbloüit tous ceux qui la regarderent. Elle auoit vne douce maieſté qui rempliſſoit les ames d'admiration & d'eſtonnement: ſon teint estoit delicat, & d'une blancheur eſclatante: ſes yeux reſpandoient vne lumiere viue & delicieuſe, & conſpiroient avec les agreables traiçts de ſon viſage pour compoſer vn charme qui amuſoit la raiſon de plaiſir, cependant qu'ils la rendoient captiue. Il ſembloit que le centre de ſes belles ioües rougiſſoit par le voiſinage du feu de ſes yeux, ou que le ſang ſe fuſt retiré en ſi peu d'eſpace, pour n'oſſencer que le moins qu'il pourroit la pureté de ſa blancheur: ſes cheueux estoient blonds & annelez, ſa taille deliée, & ſon port graue & modeſte: avec cela ſon veſtement à la Sicillienne accompagnoit ſi bien tant de graces, qu'il n'y eut perſonne qui ne fuſt rauy en la voyant. Elle estoit ſuiuie d'une ieune fille nommée Epicharis qui la ſeruoit, dont la beauté euſt eſté conſiderée ſans celle d'Ariane, & qui auoit eſté ayinée quelque temps de Palamede.

Cette veüe fit en ce lieu des effects bien differens : elle remplit Palamede de ioye de voir sa chere sœur Melinte, de rauissement, & en mesme temps de honte, d'estre trouué parmy ces Dames, lesquelles quoy que belles, il trouuoit tres-indignes de son amour : & il redoutoit qu'Ariane fist vn iugement de luy qui feroit bien du tort à l'opinion qu'elle en auoit conceüe. Emilie & Camille la considererent plustost avec des yeux d'enuie que d'admiration : mais Camille n'ayant point sujet d'en estre ialousse, pource qu'elle possedoit son frere, laissa cette peine entiere à Emilie, qui ne manquoit point de remarquer les changemens de Melinte & d'Ariane, & en tiroit des consequences qui ruinoient ses plus cheres esperances. Ariane mesme n'eust pû s'empescher de faire passer le trouble où ses pensées l'auoient mise, si elle n'eust esté assistée de l'occasion d'aller baiser son frere, auquel elle s'arresta plus long temps pour se remettre de sa rougeur, cependant que son pere parloit à Melinte : puis s'estant rassurée autant qu'il estoit besoin, lors qu'Aristide eut pris son fils à part pour l'entretenir, elle s'adressa au malade, qui à son abord sentit les esmotions de mille passions differentes. Elle le remercia des soins qu'il auoit eus de son frere, & le pria de souffrir qu'elle luy rendist de pareilles assistances, pour satisfaire à tant d'obligations. Belle Ariane, dit Melinte, vous estes née pour commander & non pas pour seruir : c'est assez de vostre presence en vn lieu pour en chasser toutes sortes de maux ; aussi depuis vostre arriuée ie me sens tellement soulagé, que j'espere n'estre plus long temps importun à ces Dames de qui j'ay receu tant de bons offices. Bien que toutes ces paroles fussent autant de coups mortels aux desseins

d'Emilie, elle ne laissa pas de se meller à ce discours & luy respondre, que iamais les personnes de leur merite ne pouuoient estre importunes: qu'il y auoit bien plus d'apparence qu'il se lassast d'estre chez elles: qu'elle voyoit bien qu'Ariane leur alloit raurir ce qu'elles auoient conserué avec tant de soin: mais en quelque lieu qu'ils fussent, que iamais ils ne trouueroient des cœurs si affectionnez à leur seruice. Elle prononça ces derniers mots avec vn peu d'émotion, ce qui obligea Melinte de luy dire: Auoüez, Madame, que vous n'avez point assez mauuaise opinion de vous, pour croire que l'on puisse eschapper si aisément de vos mains. Puis voyant qu'elle demeuroid muette, comme estant pleine de saisissement, & pour luy donner le temps de se remettre, il poursuiuit: Je m'assure qu'Ariane reconnoissant icy tant d'esclat & de beautez, & nous voyant de tous costez dans les feux, ne peut s'empescher de craindre pour nous; iugeant bien qu'il est difficile d'éuiter les beaux desirs que vous faites naistre, & tous les tourmens qui les suiuent. Aussi le mal pour lequel nous sommes icy retenus, est le moindre que nous sentions: vous ne seriez pas si soigneuses de guerir celuy dont vous estes la cause, & qui est le plus grand: toutefois ie ne veux pas venir aux reproches contre des personnes à qui nous sommes si redevables: il me suffit de vous dire que vous estes trop assurées de nostre engagement; puis qu'outre ce que nous deuons à vos merites, la Fortune nous a voulu lier pour iamais à vous par tant de soigneuses assistances.

Ces paroles r'assurerent vn peu l'esprit d'Emilie, & Melinte auoit iugé qu'il falloit ainsi dissimuler pour ne la pas aigrir, & se donner le moyen de se retirer d'avec elles:

mesme

mesme il prononça ces mots d'une façon qui fit connoistre à Ariane que c'estoit feinte, & que si ce discours eust esté veritable, il n'en eust pas parlé si assurément devant elle : toutefois elle ne laissoit pas de craindre, & se préparoit pour attendre la réponse d'Emilie, au mesme temps qu'Aristide qui parloit avec Palamede d'un autre costé, les interrompit retournant à eux.

Ce bon pere estoit bien aise de voir son fils hors de danger, mais il n'auoit pas trop agreable de le trouuer en ce lieu, parmy ces femmes voluptueuses & magnifiques : toutefois estant discret & d'un bon naturel, il n'en fit rien parestre, & apres s'estre enquis de son fils, du sujet qui l'auoit conduit en cette maison, il l'aduertit de sortir le plustost qu'il pourroit d'un lieu où il apportoit tant d'incommodité : puis pour ne sembler pas inciuil, il retourna deuers Camille & Emilie, pour leur tesmoigner comme il auoit un cœur qui scauoit reconnoistre les faueurs qu'il auoit receuës d'elles en la personne de son fils. Ariane luy quitta sa place, & alla trouuer son cher frere qu'elle desiroit passionnément entretenir à part, pour scauoir tout ce qui leur estoit arriue pendant leur voyage. Palamede voyant que Melinte se preparoit pour faire ce mesme recit à Aristide, dit à sa sœur que si elle en desiroit scauoir toutes les particularitez, il seroit besoin de se retirer en la chambre prochaine : pource qu'il luy pourroit apprendre beaucoup de choses, que la discretion de Melinte ne luy permettroit pas de dire, mesme deuant ces Dames qui faisoient une grande partie de leurs auantures. Il ne voulut pas aussi qu'Epicharis y fust presente, de peur qu'elle sceust ses infidelitez, & lors qu'ils furent seuls, il commença ainsi.

HISTOIRE DE PALAMEDE,
de Melinte, d'Emilie, & de Camille.



CELLE sœur, mon humeur vous estant si connuë, ie vous croy toute preparée d'entendre beaucoup de folies, lors que vous desirez sçauoir quelle a este ma vie depuis que i'ay quitte la Sicile. Et quelquesfois songeant à mes habitudes si déreglées, ie remercie les Dieux de m'auoir donné vne sœur, dont la vertu me retient souuent par son exemple, & vn amy de qui les bons conseils corrigent mes inclinations mauuaises, & remedient aux erreurs que mes promptitudes me font commettre. Ie vous diray donc que depuis Syracuse iusques à Rome il ne nous arriua rien de fort remarquable; toutefois nous ne manquasmes pas de diuertissement: pour ce que l'agreable esprit de Melinte faisoit naistre des rencontres si plaisantes, que nos Ambassadeurs mesmes ne pouuoient viure sans nous, & ayant reconnu sa viuacité & sa prudence, & quelque franchise en moy, ne deliberoient rien sans nous en communiquer. Nous arriuasmes ainsi en cette ville, où Melinte ne tarda guere à se faire connoistre, & à nous acquerir l'amitié de ceux qui faisoient estime de l'honneur & de la bonne naissance. Nous nous mismes peu à peu dans la connoissance des plus puissans, dont il y en auoit peu qui ne fussent

bien aises d'estre visitez de nous : souuent mesmes ils nous venoient chercher pour aller ensemble aux exercices publics , & iouir de nostre conuersation : en quoy j'admirois la force du merite de Melinte , qui se faisoit rendre hommage dans vn siecle si corrompu.

Ie vous aduoüe que le superbe esclat & la magnificence de Rome commencerent de m'esbloüir : ie mesprisay nos villes , & tout ce que j'auois vû de plus beau dans la Grece & dans l'Asie : ie ne trouuois rien de si maiestueux que la Cour de l'Empereur ; rien de si graue que cét Auguste Senat ; rien de si pompeux que les Dames Romaines , qui me paroissoient autant de Princesses : En fin j'oubliai tout ce que j'auois autrefois iuge de merueilleux , pour m'attacher à ces riches obiects , & les admirer : mais au lieu de m'abaisser par la consideration de leur grandeur , mon courage osa bien se releuer iusques à eux , & pretendre de me faire estimer entré les plus illustres.

Melinte regardoit toutes ces choses d'un autre œil , & au lieu de s'esleuer à elles par l'estonnement & l'admiration , il les rabaissoit au dessous de luy , non point par vne sagesse trop seuerre , mais par vne saine connoissance de la verité de ces grandeurs , qu'il ne pouuoit estimer qu'alors qu'elles seruoient d'ornement à la vertu.

Vous sçavez que mon cœur ne peut pas demeurer long temps sans passion , & ayant quitté avec le ciel de mon pais les affections que j'y auois , il me tarδοit que ie ne fusse desia engagé en la recherche de quelqu'une de ces grandes Dames , avec laquelle ie me promettois plus de felicitez que les Dieux n'en goustent au Ciel.

Vn iour que l'on nous mena au theatre pour voir les

ſpectacles, ie me trouuay aſſez près de deux Dames dont la beauté attira mes yeux auſſi toſt, & ils s'attachèrent tellement à les conſiderer, que Mélinte s'apperceuant de ma grande attention, me paſſa la main deuant la veuë, & me dit en ſouſſant: Vous cherchez à vous faire bleſſer, croyez moy, retirez vous. l'eſtois alors empeſché dans le choix que ie voulois faire de l'vne de ces deux, & cette ſurpriſe me diuertit bien de mes penſées, mais non pas de mon deſſein; ie luy confeſſay que ie les trouuois fort belles, & que i'euſſe bien deſirer les pouuoir aborder: mais la preſſe eſtoit ſi grande autour d'elles que cela m'eſtoit impoſſible. Elles eſtoient aſſiſes ſur des ſieges riches, ayant des couſſins ſouz les bras & ſouz les pieds, & cette delicateſſe me plaiſoit infiniment: ceux qui eſtoient à l'entour leur rendoient des deuoirs avec tant de reſpect, que cet honneur adiouſtoit encore beaucoup à l'eſtime que ie commençois d'en faire. Celle qui eſtoit plus proche de moy, ſembloit auoir plus de douceur, & traiter avec plus de familiarité ceux qui luy parloient: L'autre paroïſſoit bien plus ſeuere, & d'vne humeur à prendre vn grand empire ſur ceux qui entreprenoient de la ſeruir. Pour moy qui ne deſire pas employer tant de iours à la recherche, & à qui la qualité de ces Dames, & la quantité des pourſuiuans faiſoit croire que ie perdrois aſſez de temps, ie me reſolus à celle que ie trouuois plus facile, & qui ſembloit meſme auoir quelque choſe de plus agreable. Je m'enquis de leurs noms, & appris qu'on les appelloit Emilie & Camille, deux ſœurs veufues, de qui la beauté eſtoit de tres-grande reputation à Rome, dont l'vne qui eſtoit Emilie, n'auoit aucun fauory en apparence, traitant avec meſpris

ceux qui l'aimoient, & se gouuernant avec beaucoup de discretion : & l'autre plus proche, qui se nommoit Camille, entre ceux qui la seruoient auoit le bruit d'estre entierement possedee par Marcelin l'un des plus puissans prés de l'Empereur.

L'autorité de ce riuall m'estonna vn peu, mais elle ne me fit pas perdre courage. au contraire ie creus que ie pourrois plus facilement obtenir vn bien que l'on accordoit à vn autre : & lors que ie fus au logis ie commençay à resuer, & me promener à grands pas : Melinte qui auoit remarqué que ie m'estois fort arresté sur le visage de Camille, le mit aussi à se promener, & à resuer comme moy : & apres plusieurs tours il s'approcha de moy, & me dit : Ne me celeriez vous point vos pensees, & ie vous diray les miennes ? Jamais, luy dis- ie, ie ne vous ay rien cache. Ie vous diray donc, dit- il, que depuis trois ou quatre heures, ie suis deuenu extremement amoureux. Et moy aussi, luy respondis- ie. Cela seroit- il bien possible, reprit- il ? mais puis- ie vous dire le sujet de mon affection ? Aussi librement, luy dis ie, que ie vous diray la mienne. L'ayme, ce dit- il, vne de ces Dames qui estoient au theatre prés de nous : Ie luy respondis, & moy aussi ; mais laquelle vous plaist- le plus ? Celle, me dit- il, qui vous plaira le moins. Ie l'assuray que ie receurois tousiours la loy de luy, tant s'en faut que ie luy voulusse rien prescrire. Ie vous diray donc, continua- t- il, que j'aime Camille. Ie luy dis vn peu estonné : Et moy aussi ; puis me r'assurant i'adioustay : Mais pour peu que vous me donniez de retour, ie vous la quitte, à la charge que vous m'assisterez pour acquerir Emilie. Et moy, dit- il en riant, ie vous les donne toutes deux pour l'interest que i'y pretens. Alors

reuenant à moy, & connoiffant qu'il se vouloit moquer, ie luy dis, qu'il croiroit se faire tort d'estimer ces Dames dignes de luy: que pour moy ie n'estois pas si delicat, & que ie rechercherois tousiours des plaisirs proportionnez à mon humeur, & à mon pouuoir. I'ay peur, me dit-il, que vostre humeur ne vous mene en lieu, où vostre pouuoir ne sera pas receu: puis serieusement il me representa les fascheuses rencontres que ie trouuerois en cette poursuite; cette Dame preoocupée; ce rual trop puissant, & desia dans la possession: mais ces difficultez augmententerent plustôt mon desir, que ses raisons ne le diminuèrent.

Ie songeay donc aux moyens d'auoir entrée chez elle, & cela ne me fut pas bien difficile, car ces deux sœurs ne refusoient gueres l'accès de leur maison aux honnestes gens, & par l'entremise d'un de nos amis nous y fumes bien tost receus avec honneur. Melinte ne fut pas long temps sans s'y faire connoistre pour tres-accomply, & se faire aimer comme en tous les lieux qu'il frequente.

Iamais ie n'ay porte d'enuie à l'estime que l'on a faite de luy; mais i'estois fasche que celuy qui auoit le moins de dessein fust le mieux receu: toutefois mon humeur libre n'estoit point desagréable à Camille: elle aimoit à rire, & ie ne suis pas triste: elle se plaisoit à m'entendre ioïer de la harpe, & souuent mesloit sa voix à mes accords, ce qui m'acquit vn peu de familiarité avec elle. Lors que ie luy voulus ouurir le propos de mon affection, elle receut d'abord mes paroles comme venant de la courtoisie qui m'obligeoit de luy tesmoigner que ie faisois vne estime particuliere d'elle: mais ne voulant pas la laisser en ceste opinion, & desirant qu'elle fust aileurée de la

violence de ma passion , ieluy dis , Madame , vous n'avez point vne beaute pour se faire aimer seulement par bien seance. Je vous prie de croire pour veritable , que comme vous estes la plus belle , ie suis le plus passionné du monde , & que iamais consideration ne m'empeschera de mourir à vostre seruice. Camille voyant qu'à ces paroles il falloit respondre autrement qu'elle n'auoit fait aux autres , me dit froidement , qu'il y auoit trop peu de temps qu'elle me connoissoit , pour estre assurée de mon humeur : qu'elle vouloit bien m'apprendre la sienne , qui estoit de sçauoir bien punir ceux qui abusoient de sa franchise , & leur oster les faueurs qu'elle leur auoit permises , quand ils en recherchoient d'autres où ils ne deuoient point pretendre. Ces mots que ie n'auois point attendus m'estonnerent vn peu , toutefois ie luy dis aussi tost : Et mon humeur aussi , Madame , sera de n'aimer iamais , que vous , quelque rigueur qu'il vous plaise me tesmoigner. L'arriué de Marcelin interrompit ce discours , toutefois en se leuant elle me dit encore : Si vous estes sage vous changerez ces paroles & ce dessein , & me laissa aussi confus que i'aye esté de ma vie.

Ie sortis vn peu apres , laissant Marcelin avec Camille , & Melinte avec Emilie. Celle-cy , comme vous avez veu , ne surpasse pas sa sœur en beauré , mais beaucoup en esprit , & à sçauoir s'acquérir du credit & de l'autorité sur ceux qui la voyent ordinairement , & mesme Camille se laisse entierement gouverner à elle.

Melinte retournant le soir où i'estois , me trouua songeant aux moyens de gagner les bonnes graces d'Emilie pour paruenir à celles de sa sœur , & agitant mille pensées , tantost sur l'estat de ma fortune , que ie trou-

uois si abbatuë , tantost sur les moyens de la releuer. Me voyant si triste & si pensif, il vint me dire , comme ne songeant point à mon desplaisir , qu'il commençoit à reconnoistre que l'on ne pouuoit estre heureux sans aimer. Je luy dis que ce bon-heur estoit souuent melle d'amertume: pourtant, me dit-il , ie vous voy si content, & passer de si douces heures avec Camille : mais pour moy ne trouuant point icy de beauté qui me plaise, les entretiens avec les femmes me sont des supplices. Alors ie le consideray, & voyant qu'il ne pouuoit s'empescher de rire, ie m'escriay : Ha ! Melinte , ne vous moquez point d'un affligé : est-ce là le soin que vous deuez auoir de me secourir, & un effect de l'amitié que vous m'auez promise, de vous plaire d'augmenter ma douleur? Ce n'est pas, dit-il, mon dessein de vous tourmenter, mais de vous faire connoistre que vous deuez suivre vne autre fois mes conseils. Je luy auoüy que j'auois failly, mais qu'estant entré dans ce destroit, il me falloit passer outre, ou mourir. Et quel moyen? me dit Melinte. Vous mesme, luy respondis-je. Si ce moyen, me dit-il, vous est aussi vtile comme il vous est assuré, ie vous estime desia tres-heureux: vous n'auez qu'à me proposer ce que vous desirez que ie fasse. Feignez, luy dis-je, d'aimer Emilie, & ayant acquis ses bonnes graces, obligez-la de me donner part en celles de sa sœur. Cröyez-vous, me dit-il, que ie puisse aupres d'Emilie, ce que vous ne pouuez aupres de Camille? & que ie puisse gagner par vne feinte, ce que vous ne pouuez acquerir par vne affection veritable? Essayez, luy dis-je, à l'aimer en effect, & vous prendrez plaisir à me seruir & vous aussi. Il me respondit: Et si ie suis aussi mal-heureux que vous, qui
nous

nous soulagera ? Je suis assuré , luy dis-je , que vous ne le ferez pas : car desja Emilie admire toutes les qualitez qui sont en vous , & recevra sans doute avec ioye l'offic de vostre service. Je n'ay jamais , dit-il , rien remarqué en moy qui me puisse donner cette presumption , mais ie confesse que ie ne puis estimer ce qui est en elle , ny aimer vne chose où il y a tant de déffauts ; comme en celles qui se laissent entretenir à tous venans , dont la vanité , l'avarice , & la hardiesse sont insupportables : toutefois apres luy avoir laissé dire beaucoup de choses contre ces femmes , ie le seus tellement coniuurer de forcer son humeur pour l'amour de moy , qu'il me promit en fin de seindre de l'aimer , puis qu'il n'y alloit que de sa peine pour me servir , sans qu'il craignist de s'engager , & m'assura qu'il employeroit tous les aduantages qu'il pourroit acquerir pour favoriser mes desseins , ne voulant pretendre autre faueur pour ses services.

Il faut , interrompit Ariane , que Melinte mesprise bien les femmes , d'auoir eu tant de peine à se resoudre de sacrifier quelques heures pour vostre contentement. Ce n'est pas , reprit Palamede , qu'il les mesprise : car iamais il ne manque de rendre l'honneur & l'estime qui sont deus à celles qu'il void : mais ie croy que iusqu'icy il n'a rien trouué qui meritaist d'estre aimé parfaitement de luy , & qu'un homme vertueux comme il est , ne se plaist pas à dire le contraire de ce qu'il pense : & c'est en cela que ie reconnus l'amitié qu'il me portoit : car contre son humeur il feignit de se donner tellement à Emilie , que moy-mesme ie crus qu'il auoit pris en effect de l'amour. Peut-estre , reprit Ariane , la feinte se tourna en verité , & ce desdaigneux trouuant de la facilité & de la douceur

ne voulut pas mespriser la bonne fortune qui se presentoit à luy. Vous sçaurez, continua Palamede, de quelle sorte il se seruit de ses aduantages.

Emilie iusques-là n'auoit fait parestre à tous ses Amans que du mespris & de l'indifferencce, & mesme en auoit traitté quelques vns avec tant de rigueur, que le desespoir les auoit reduits à d'extrêmes resolutions; car il n'y a point de doute qu'elle a des charmes ineuitables à tout autre qu'à Melinte, & sçait manier les esprits avec tant d'adresse, qu'elle s'acquiert vn commandement absolu sur tout ce qui l'approche: entre les autres elle estoit, plus assiduelement seruite d'un nommé Trebace, Tribun des Gardes de l'Empereur, qui pour tous les devoirs passionnez qu'un Amant puisse rendre, esprouuoit toutes les rigueurs qu'une Maistresse puisse faire sentir: mais celle qui auoit fait naistre tant d'amour sans en receuoir, en prit ceste fois sans en donner.

D'abord elle receut les offres de Melinte avec ioye; comme vne conqueste qu'elle auoit desirée, n'ayant alors autre dessein que de conseruer ceste acquisition: mesme elle ne feignoit point d'en faire gloire, & de tesmoigner son contentement à ses autres Amans, pour les tourmenter dauantage: elle les traittoit avec plus de mespris & de cruauté que iamais, de sorte que Trebace ne pouuant supporter ces coups si sensibles de mauuais traitement & de jalousie, fut en fin forcé de se resoudre à ne la plus voir. Mais Amour qui vouloit se vanger de tous ses desdains, luy fit remarquer tant de perfections en Melinte, & de douceur en ses entretiens, qu'elle commença de lentir des soins & des inquietudes lors qu'il estoit absent, & des émotions de ioye qui ne luy estoient pas ordinaires,

quand elle le voyoit. Elle eust bien voulu reietter ces tourmens , qui ne luy estoient connus que par les plaintes de ceux à qui elle en auoit tant fait souffrir , mais il luy fut impossible , & elle fut en fin reduite à se consoler de la creance que Melinte n'en ressentoit pas moins pour elle.

Melinte s'apperceut bien tost de l'effect de ses paroles & de ses devoirs , & iugea que pour mesnager cét aduantage, il falloit feindre de ne rechercher pas par discretion ce qu'il fuyoit par dessein. Il me donnoit aduis de tout , & nous auions ainsi concerté ensemble, que pour n'irriter point Marcellin, ie ne deuois tesmoigner deuant luy aucun dessein pour Camille , mais plustost luy faire croire que nous luy portions trop de respect pour entreprendre sur ses amours. Cette assurance que nous luy donnâmes , & certains devoirs que nous luy rendions, nous acquirent du tout son amitié, iusques là mesme qu'il fit recit de nous à l'Empereur , & luy fit desirer de nous voir.

Alors ie viuois assez heureux , pource que Melinte voulant euitter les occasions d'estre seul avec Emilie, pour n'auoir pas sujet de la presser , auoit trouué yne inuention pour se deliurer de cette peine, & me donner beaucoup de commodité & de contentement. Car ayant reconnu que Marcellin faisoit l'homme d'Estat, & vouloit parestre habile à parler sur toutes sortes de sujets : mesmes recherchoit son entretien , pour faire croire qu'il n'aymoit que la compagnie des sçauans , lors qu'il le voyoit plus empesché auprès de Camille, il entreprenoit des sujets assez releuez avec Emilie ; & Marcellin de peur qu'il ne semblast s'en reculer par ignorance, quittoit Ca-

mille pour se mesler dans ces propos, lesquels Melinte sçauoit prolonger & en recommencer d'autres, où Marcelin s'engageoit si auant, qu'il perdoit le souuenir de Camille, & me laissoit ainsi la place libre, cependant que Melinte se deliuroit des discours qu'il eust esté obligé de tenir à Emilie, du tout contraires à ses sentimens.

Depuis la cruelle response de Camille, ie n'auois osé reprendre ce propos, craignant de me ruiner entièrement: seulement ie luy rendois de petits deuoirs & des complaisances, attendant que Melinte peust obliger Emilie de parler en ma faueur: en fin cette occasion se presenta.

Marcelin auoit parlé de nous à l'Empereur, & entre autres qualitez de Melinte, l'auoit loué pour faire des vers Grecs excellens, & auoit dit de moy que ie sçauois iouer de la harpe, & mesme que nous en auions esté vainqueurs dans la Grece aux jeux Olympiques: c'estoient alors les plus chers passe-temps de ce Prince, de composer & reciter des vers sur le theatre, & de iouer & chanter en presence du peuple, à l'enuy de ceux qui se mesloient de ces exercices. Melinte & moy ayant salué Neron, il nous commanda de nous preparer pour monter avec luy sur le theatre deux iours apres, & disputer les prix destinez aux vainqueurs.

Ce fut à regret que Melinte se resolut d'obeïr, & de patestre pour vne action si peu conuenable à la grandeur de son courage: mais bien qu'il y eust quelque honte de voir vn si grand Prince rechercher avec tant de passion des honneurs si vains & si indignes de sa Maesté; toutefois quand ie me vis sur le theatre, vestu superbement, avec les premiers hommes de la terre, sur des draps d'or

& de pourpre, les gardes de l'Empereur autour de nous, & vn peuple infiny retentissant d'acclamations & d'applaudissemens, mon cœur sentit des ioyes que ma bouche ne vous sçauroit exprimer. Je vous diray seulement que Melinte parut en son rang vestu à la façon d'Orphée, lors qu'il alla demander Eurydice aux Enfers, & recita ce beau Poëme que vous luy auez quelquefois entendu dire, avec lequel il rauit tellement les oreilles de tout le peuple, que la fin de son recit fut suiui de mille applaudissemens.

L'estois desguisé en Apollon, & auois vn laurier proche de moy pour le représenter, quand Daphné, qu'il auoit poursuiui fut changée en cet arbre, & accommodant ma voix aux accords de ma harpe, ie chantay ces vers.

*Aimable fille de Penée
Qui m'auois soumis à tes loix;
Donques ta vie est terminée,
Tu n'es plus qu'un arbre en ce bois.*

*Helas ! pour éuiter ma flame,
Tes cris ont penetré les Cieux :
Un Dieu n'a peu fleschir ton ame,
Et ta voix a fleschy les Dieux.*

*Je te desirois moins agile;
Et le Ciel riant de mes vœux,
A voulu te rendre immobile
T'arrestant plus que ie ne veux.*

*Ta course m'estoit importune ,
 Tu craignois mes bras amoureux ;
 Et nos souhaits par ta fortune
 Sont exaucez & mal-heureux.*

*Daphné, quelle funeste enuie
 T'a fait mespriser la clarté ?
 Chere Daphné, repren la vie,
 Ou bien rends moy la liberté.*

*Mais quoy ? ie tente l'impossible ,
 Je pers ces mots comme mes pas :
 Si Nymphe elle estoit insensible ,
 Ces branches ne m'entendront pas.*

*Que ta feuille soit tousiours verte ,
 Arbre de mon mal glorieux :
 Tousiours ma teste en soit couuerte ,
 Et le front des victorieux.*

Camille & Emilie n'estoient pas beaucoup esloignées de nous, & iesus plus content de ce que Camille approuua d'un signe de teste ce que j'auois chanté, que de quelques battemens de mains qui suivirent en ma faueur. Lors que tous se furent presentez à leur tour, & que l'on voulut iuger des prix, Neron fut proclamé vainqueur : toutefois les seconds honneurs nous furent adiugez. Melinte receut vne Couronne d'or enrichie de diamans & de perles, & moy vne harpe ornée de mille esmeraudes, au haut de laquelle est vne teste de lyon à

gueule ouverte, dont la langue qui en sort est faite d'un seul ruby. le m'estonne, dit Ariane, comme la Iustice fut renduë à des Estrangers, puis qu'il y a de l'apparence qu'elle n'auoit pas esté bien gardée en la personne de Neron. Si les Iuges, reprit Palaniede, ne furent pas equitables, l'Empereur mesme corrigea leur iugement; ce qui luy acquit moins d'enuie, & plus de gloire à Melinte: pource qu'ayant receu la Couronne de laurier, il la mit sur la teste de Melinte; & pour tesmoigner le plaisir qu'il auoit receu de l'entendre reciter, luy offrit tel don qu'il luy voudroit demander. Melinte apres l'auoir remercié de tant de faueurs, sans beaucoup y penser luy demanda, comme vous auez sceu l'exemption de tributs pour la ville de Syracuse. Neron admirant sa generosité, d'auoir preferé le bien de sa patrie à son auantage particulier, luy accorda sa priere, avec d'autres priuileges pour nostre ville, & luy adiousta beaucoup de presents; outre cela il nous donna le tiltre de Citoyens Romains, avec tout l'honneur dont il nous pût fauoriser.

Ce Prince a de bons interualles, & fait quelquesfois des actions dignes de sa grandeur: mais elles sont aussi tost offusquées par vn nombre de crimes prodigieux, dont il ne craint point de tacher l'honneur de sa Maiesté: & le plus souuent il se plaist d'exercer ses plus grandes cruantez sur ceux qu'il a le plus chery: comme depuis peu sa mere, Burrus, & beaucoup d'autres seruent d'exemples, & nous mesmes ces iours passez auons esté bien près de courir vne pareille fortune. Mais laissons ces pensées fascheuses pour suiure les heureuses auantures qui nous arriuerent en ceste illustre iournée.

Lors que Palamede vouloit poursuiure son discours, Ariane & luy entendirent vn bruit en la chambre de Melinte, comme de beaucoup de personnes qui arriuoient pour le visiter. Incontinent on les vint querir, pource que c'estoit Othon qui venoit prendre congé d'eux, allant faire vn grand voyage. Desia il parloit à Melinte en secret, auquel Palamede estant admis, il leur apprit ces tristes nouuelles, qu'il estoit disgracié de Neron; que l'Empereur estant deuenu amoureux de Sabine sa femme, vouloit la posseder entierement, & pour ce sujet qu'il l'enuoyoit au fonds de l'Espagne gouverner la Lusitanie: qu'il auoit grand regret de les laisser à la mercy de Marcelin, dont la faueur s'augmentant des despoüilles de la sienne, il leur estoit à craindre de tomber en son pouuoir: mais qu'ils se seruissent assurement des amis qui luy restoient dans Rome, lesquels ne leur estoient pas inconnûs. Melinte plaignit son mal-heur, & luy tesmoigna qu'ils prenoient beaucoup de part en sa disgrâce, qui les priuoit d'un amy si passionné pour leur salut. Mais il fut contraint de laisser ce propos, pource qu'Othon ne songeoit plus à ce qu'on luy disoit, estant si attentif à considerer la beaute merueilleuse d'Ariane, que rien ne l'en pouuoit diuertir. Palamede luy dit: Celle que vous regardez est ma sœur, qui est venue icy de Sicile avec mon pere ayant sceu mon mal. Othon pour ce discours ne cessa pas de rêver, ayant tousiours les yeux attachez sur Ariane; puis tout d'un coup on le vit rougir, & vn peu apres ce sang qui s'estoit espandu sur ses ioues, fut contraint de courir vers le cœur qui s'en vouloit aller pour l'empescher de partir, & laissa son visage sans couleur. Othon se sentant deffaillir, pria Palamede de le mener

ner en sa chambre, & qu'ils fussent seuls. Lors qu'ils furent entrez, il se laissa tomber à la renuerse sur le liêt. Palamede luy demanda quel estoit son mal, mais il ne pouuoit respondre. Quel effect plus prompt & plus rare peut produire vne excellente beauté ? mais il ne doit pas estre trouué si estrange, considerant les diuins regards d'Ariane, agissans sur vn sujet nourry dans les delices, & capable de receuoir facilement ces fortes impressions. Othon en fin apres vn grand souspir, dit à Palamede : Ha ! cher amy, que la veuë de vostre sœur m'estoit dangereuse, & qu'elle m'a causé de troubles en peu de temps. l'ay receu d'abord ceste veuë si agreable, comme vn remede heureusement enuoyé du Ciel contre les desplaisirs que i'endurois : Il me sembloit que ie priois ce beau visage de faire naistre en moy vne passion qui en chassast les ennuis de ma disgrace, & le cruel regret de la perte de Sabine : Mais, eschange malheureux ! guerison qui me donne la mort ! l'ay perdu en vn seul iour mes delices, mes honneurs, & les plus releuées esperances de la terre ; & ayant trouué vn sujet admirable qui me pouuoit redonner mille fois plus de biens, il faut que ie le perde encore en vn moment. l'estois venu icy ayant l'ame troublée de douleurs, & ie les sentoies dissiper par la ioye qui m'estoit suruenue de la naissance d'vne si belle affection : mais aussi tost la consideration de ce qu'il me faut partir dans vne heure, est venue attaquer cette nouuelle amour, & luy ordonne ou demourir, ou d'estre la plus mal-heureuse qui entra iamais dans vn cœur : de la faire mourir, ie ne puis encore vouloir sa perte : de la conseruer aussi, ie ne scaurois si fort consentir à mon mal-heur, en gardant

vn souuenir qui me seroit plus cruel dans mon exil, plus il me seroit aimable. Voila, Palamede, les contraires pensées qui m'ont attaqué toutes ensemble avec tant de furie, qu'elles ont causé le desordre où vous m'auez veü: Excusez ie vous prie, mon transport: ie croy qu'aujourd'huy quelque Astre iette sur moy ses plus mal-heureuses influences.

Palamede ne sçauoit que luy dire sur vn si estrange accident: il eust plaint son mal-heur, si la cause & le remede ne l'eussent touché de si près: de luy offrir sa sœur, elle n'estoit pas en sa disposition: & de luy promettre de l'assistance auprès d'elle, quand il en eust eu la volonté, le temps estoit trop bref pour esperer d'acquiescer aucun auantage. En fin il se resolut de ne luy faire aucune ouuerture, mais de l'attendre de luy, & luy demanda ce qu'il desiroit qu'il fist pour le seruir. Non, non, Palamede, respondit Othon, ne foyez point en peine pour me secourir. Je souhaite à vostre sœur la plus grande felicité du monde, tant s'en faut que ie la voulusse rendre compagne de mon infortune: ie suis vn exilé miserable, la haine du Ciel, & le rebut de la terre, qui me preste à peine vne de ses extrémités pour me soutenir: ie n'ay desiré de vous autre soulagement que celuy que i'ay receu en vous disant l'extremité de mon mal, dont autre que vous n'entendra iamais parler. Adieu, cher Palamede, iouïssiez d'une meilleure fortune: ie ne vous demande autre grace, sinon que vous m'enseigniez à sortir de ce logis sans repasser par la chambre où est celle que i'ay trop veüe pour mon repos. L'aurois peur que mes regards n'offensassent l'heur de tant de graces par la

contagion de mon mal-heur : ou que les siens, encore plus cruels pour moy, ne rendissent mon mal incurable par de nouvelles blesseures. Je veux esperer que le souuenir de ce que ie n'ay veu qu'un moment, se pourra effacer par le temps, & ie sens bien que ie le rendrois immortel si ie luy laissois acquerir plus de force. Il le supplia en suite de faire ses excuses à Melinte, de ce qu'il s'en alloit sans le voir. Palamede luy tesmoigna qu'il plaignoit son tourment, & qu'il eust voulu le soulager par la perte de son sang, pour satisfaire à tant de faueurs dont il les auoit obligez. Othon le remercia de sa bonne volonté, & ayant appris vne sortie secrette, prit congé de luy, pour porter en Espagne vn souuenir d'Ariane, qui luy rendit le chemin bien ennuyeux, & vne grande partie de son sejour : mais en fin l'esloignement, le temps, & son ambition plus que toutes choses, guerirent cette playe avec beaucoup de peine, tant vne Beauté rare imprime puissamment ses traits sur vne ame noble & delicate. Palamede estant retourné deuers Melinte, luy conta le sujet du trouble d'Othon, ses discours, & sa resolution. Melinte n'estoit point fâché en son ame de son esloignement, se voyant deliuré d'un riuail trop puissant, encore qu'il eust regret de perdre vn amy si affectionné, & qui auoit auparauant tant de credit : toutefois il dissimula ce qu'il pensoit pour s'estonner d'une si prompte affection : puis ayant dit qu'il n'estoit point besoin de faire rien connoistre de cet accident, Aristide, Emilie, & Camille se rapprocherent, ausquels Melinte iugea qu'ils pouuoient leur apprendre la disgrâce d'Othon, puis qu'elle estoit desia diuulgée dans Rome : chacun le

plaignit, pource qu'il auoit beaucoup de belles qualitez, & entr'autres vne liberalité sans exemple. Palamede reprit sa sœur pour luy dire ce qui estoit arriué lors qu'il vit les autres engagez à ce discours, & l'ayant menée en l'autre chambre il la fit rougir lors qu'elle apprit l'amour soudaine d'Othon, dequoy ne luy estant pas feant d'oïr continuer le propos, elle l'obligea pour le rompre, d'acheuer l'histoire qu'il luy auoit commencée, dont elle auoit impatience d'apprendre la fin. Il consentit à ce qu'elle desiroit, & reprit ainsi son discours.

Je croy que nous auons esté interrompus lors que ie vous disois que nous sortismes du theatre où nous auions acquis assez d'honneur, s'il estoit honorable d'y parestre. Apres auoir quitté l'Empereur, nous fusmes accompagnez chez nous par nos amis, & vne partie du peuple: mais il me tarδοit beaucoup que ie me fusse defait de tant de personnes pour aller voir Camille. Nous feignismes d'estre las du tumulte & de la presse; ce qui fit que tous prirent congé de nous; & aussi tost ie priay Melinte de venir avec moy chez les sœurs. Elles estoient seules alors, pource que Marcelin auoit accompagné Neron au Palais, & à nostre abord: Allons, dit Emilie, receuoir ces vainqueurs avec l'honneur qui leur est deu. Melinte mettant vn genouil en terre, luy dit: Nous venons presenter ces victoires à vos pieds, puisque nous les tenons de vous: toutefois, reprit Emilie, ie n'ay pas composé les vers que vous auez recitez. Et pour moy, dit Camille, ie ne sçay point iouer de la harpe: L'amour, luy dis-ie, que nous auons pour vous est si puissant, qu'il nous a fait vaincre tout ce qui est dans Rome. Il suffit, adiousta Melinte, que vous

nous ayez regardez fauorablement, pource que la fortune ne peut rien refuser à ceux qui ont ce bon-heur. L'agreceable Camille repartit avec sa gayeré ordinaire : Si nos yeux ont acquis cette victoire, ie les trouue excellens Poëtes, & bons ioüeurs de harpe. Ie luy dis ; Ils sont bien plus sçauans que nous, car ils sçauent se faire aimer, ce que nous n'auons peu faire encore. C'est vn differend, dit Emilie, que nous deuons vuidier en particulier, & tirant Melinte à part me laissa avec la belle Camille.

Lors que nous fumes assis, ie fus vn peu estonné, n'osant encore luy parler librement de mon affection : toutefois enflé du bon-heur de ma victoire, & luy voyant vn visage assez gay, ie luy dis qu'il n'y auoit point de contentement qui ne fust suiuy de desplaisir, & que lors qu'on nous estime plus heureux, bien souuent nous auons plus d'occasion de nous plaindre de la fortune. Cela est vray, respondit Camille, mais quel sujet auez vous de parler ainsi ? Pource, luy dis-je, que le peuple m'a creu aujourd'huy bien content, & ie trouue deuant vous ma condition bien mal-heureuse. Si cela est, reprit-elle, vous deuez éuiter ma presence avec beaucoup de soin, & chercher les assemblées publiques où la fortune vous est si fauorable. Mais, luy dis-je, si ie ne puis auoir de bon-heur sans vous, ce seroit vn mauuais moyen d'estre heureux que de vous fuir. Si vous recherchez, dit-elle, le bien d'estre estime autant que peut estre vne personne de vostre merite, vous ne deuez point vous croire mal-heureux près de moy. Le merite, continuay-je, n'est pas grand, puis qu'il ne me peut faire aimer. Vostre merite, me dit-elle, est assez puissant, puis qu'il se fait aimer de

moy. Et la personne ? luy demanday-je. Je l'estime, respondit-elle. Rien plus, repartis-je. Je l'honore, dit-elle. Hé Dieux, m'escriay-je, que d'honneur, que d'estime, & point d'amour ! Je ne sçay pas, dit-elle, dequoy vous parlez. D'une chose, repris-je, que vous n'ignorez pas, puis que vous me l'apprenez si bien. C'est donc, dit-elle, un defaut de volonté. Pourquoi poursuiuis-je, une personne si parfaite veut-elle avoir ce defaut ? Hé bien, dit-elle, j'auray de la volonté pour vous. Mais, respondis-je, je voudrois de la bonne. Et moy, dit-elle ; je vous veux donner de la mauuaise. Je luy repartis ; seriez vous bien si cruelle ? Voulez-vous, continua-t-elle, que nous tombions d'accord ? C'est, luy dis-je, la faueur que je vous demande. Partageons, me dit-elle, également, vous aurez de l'indifferente. L'attendois quelque response plus fauorable, & je luy repartis que je ne voulois point d'une chose dont elle estoit si liberale à tout le monde. Aimez vous mieux, me dit-elle, les maux particuliers que les biens communs ? Je l'assuray que je ne voulois ny l'un ny l'autre. Toutefois, respondit-elle, vous avez à choisir : & je luy dis, j'aime mieux vous laisser le tout. Je veux, dit-elle, vous preuenir, & me quitta ainsi, s'en allant deuers Emilie, laquelle se fâchant de ce qu'elle interrompoit le discours de Melinte & d'elle, luy demanda pourquoy elle m'auoit quitté. Camille luy respondit en riant, & se promenant par la chambre, c'est un homme qui pretend plus d'une victoire en un iour.

Je ne sçauois alors si je deuois m'estimer heureux ou mal-heureux, n'ayant receu aucune parole auantageuse, & elle m'auoit dit toutes ces choses avec une ga-

yeté qui me faisoit bien esperer : & ie voulois aller prier Emilie d'estre iuge de nostre differend , quand Marcelin entra qui rompit nos discours. Nous luy quittasmes la place , & apres auoir quelque temps parlé de ce qui estoit arriué le iour , ie le laissay avec Camille , & faisant semblant de me vouloir occuper cependant à quelque chose , ie pris vne harpe , & chantay ces vers que j'auois faits autrefois lors que j'aimois Epicharis.

*Qu'elle a de grace en refusant !
 Que ses rigueurs sont favorables !
 Et que ses yeux en mesprisant
 Causent de tourmens desirables !
 Si iamais ces beaux rauisseurs
 Changeoient leurs desdains en douceurs ,
 Quel heur surmonteroit ma gloire ?
 Puisque m'estant si rigoureux
 Encore à peine puis-je croire
 Qu'il soit vn Amant plus heureux.*

*Fuyez, desespoirs inhumains,
 Despiés, ennemis de ma flame,
 Laissez à de plus douces mains
 Regir l'empire de mon ame.
 Beaux yeux, agreables tyrans,
 C'est à vous seuls que ie me rends,
 Je ne crains plus vos doux supplices,
 Depuis que vous m'auiez appris
 A receuoir pour des delices
 La cruauté de vos mespris.*

*Grand Dieu que les Amans adorent,
 Ha! que tes biens sont infinis,
 Puisque caressez ou punis
 Toujours ils t'aiment & t'honorent:
 Mais bien que mon cœur satisfait
 Semble iouir d'un heur parfait,
 Amour toutefois ne te lasse:
 Soulage mes autres desirs,
 Si pour des maux ie te rends grace,
 Que feray-ie pour des plaisirs?*

Camille entendit bien qu'ils s'adressoient à elle ; toutefois voyant qu'elle estoit trop empeschée avec Marcelin, ie quittay la harpe, & Melinte impatient de me dire ce qu'il auoit fait pour moy, m'aduertit de sortir. Je pris donc congé avec assez de satisfaction de ce que i'auois auancé auprès de Camille : mais l'estat de mes affaires estoit bien en meilleur terme de l'autre costé : car estant retirez chez nous, Melinte me dit qu'Emilie auoit commencé à luy parler ainsi : Que pensez-vous de vostre fortune aujourd'huy ? Qu'elle m'est fauorable, dit-il, en ce qui me touche fort peu, & contraire en ce que ie souhàitte le plus. Et que peut desirer Melinte, reprit Emilie, qu'il n'obtienne avec les auantages qu'il possède ? L'honneur, dit-il, de vos bonnes graces que ie recherche avec tant de passion. Je ne veux pas, dit-elle, qu'il tienne à moy que ceste iournée ne vous soit entierement heureuse, car ie vous donne la place en mon ame que vous y pouuez souhàitter. Je reçois, dit-il, cette faueur avec les soubmissions que ie dois, m'en reconnoissant

noissant indigne , & fais serment sur ceste belle main de n'en abuser iamais. Estes vous, reprit elle , content de moy ? Plus , respondit Melinte , que ie n'eusse iamais esperé. Et ie ne suis pas, dit-elle, satisfaite du present que ie vous ay fait , mais pour imiter la magnificence de l'Empereur , & la reconnoissance enuers vos merites qui me sont plus connus qu'à luy , ie vous offre aussi tout ce qu'il vous plaira desirer de moy , à la reserue toutefois de mon honneur. Melinte feignant vne ioye inespérée, luy dit : Puis qu'il vous plaist m'accorder tant de grace , ie l'accepte , & pour vous tesmoigner que j'aime parfaitement ce que j'ay entrepris de servir , ie ne vous demande autre faueur , sinon de faire en sorte que le seruice de Palamede soit agréé de Camille, puis ie pourray songer à me rendre heureux. Ie croy , dit Emilie, qu'aujourd'huy vous vous estes oublié vous mesme pour songer au contentement des autres : mais puis que c'est vostre desir, vous verrez de quelle sorte ie m'employeray auprès d'elle : toutefois ie ne veux pas que cela vous tiennelieu d'aucune obligation. Melinte la remercia de ceste assurance , & luy representoit la peine où i'estois , & le besoin que j'auois de son secours , lors que Camille alla rompre leur entretien en me quittant.

Chere sœur, vous pouuez iuger combien ie fus content de ces nouuelles : car connoissant qu'Emilie desiroit donner de plus grandes preuues de son amour à Melinte , ie m'assuray qu'elle ne laisseroit point sa sœur en repos qu'elle ne luy eust donné de bonnes paroles pour moy ; & ie ne fus point trompé en ceste esperance, pource que ie m'apperceus que Camille commença

à faire plus d'estime de moy , puis à croire les assurances que ie luy donnois de mon amour, & à m'obliger par les responses , & en fin à me tesmoigner de l'affection : mesmes vn iour elle me dit que i'auois vne bonne amie en sa sœur. Vous me connoissez trop pour croire que ie laisse perdre ces auantages ; aussi ie la pressay tellement qu'elle s'engagea peu à peu à moy, m'accordant de petites faueurs dont la permission me monstroït le passage bien facile à de plus grandes : de sorte que me seruant de l'occasion, vn iour que ie la trouuay sur vn liët. Ariane rougissant l'interrompit , & luy dit : Arrestez-vous là , mon frere , i'ay peur que vous me disiez des choses que ie ne veux pas entendre. Alors Palamede luy dit, Ma sœur, ie trouue bien estrange que vous apprehendiez d'oïr mes bonnes fortunes , & vous ne craignez pas tantost d'entendre le mal-heur qui nous arriua. Je seray, dit-elle , tousiours bien aise de sçauoir que tout bon-heur vous suïue, mais vous deuez taire ces particularitez. Palamede luy repartit , qu'il n'ignoroit pas entierement comment il deuoit luy parler , & qu'il estoit bien marry de ce qu'il ne s'estoit rien passé qui l'eust obligé à le taire : pour ce que l'ayant trouuée sur ce liët, i'amaïs il n'en pût rien obtenir avec toutes ses prieres & ses efforts, dequoy il ne vouloit point luy faire le recit , puis qu'elle ne l'auoit pas agreable : puis il continua. l'auouë que ie n'ay pas assez de retenue pour cacher long temps vn bon-heur. Je commençay à m'ennuyer de ma discretion qui m'obligeoit de feindre deuant le moindre de ceste maison : aussi il me semble que c'est se monstrier ingrat enuers la fortune , de ne publier pas les biens qu'elle fait,

& si ie me laissois gouverner à mon humeur , iamaïs elle n'auroit sujet de se plaindre de moy , pource que ie redirois tousiours ses faueurs plus grandes par le recit que i'en ferois , pour me confesser dauantage son re-deuable. Toutefois ayant à suiure les aduis de Melinte, & les commandemens de Camille, qui craignoit que nostre intelligence fust connuë de Marcelin , pource qu'il la possèdoit avec beaucoup d'empire , ie fus quelque temps à me surmonter moy-mesme, & à m'admirer de la discretion que ie gardois : mais en fin voyant qu'une femme de chambre nommée Cyané, estoit la plus part du temps auprès de nous , & me faisoit perdre de bonnes heures, que i'eusse passées avec plus de liberté sans elle, ie me resolus de l'acquérir , afin que si elle estoit ordinairement tescmoin , elle fust aussi complice. Je me cachay de Melinte pour pratiquer ceste fille , & ie m'en suis assez repenty depuis , pource que sans doute il m'eust fait voir le mal-heur où ie m'allois engager. Je luy fis donc quelques presens, avec lesquels ie croyois l'auoir du tout acquise , & luy decouuris la bonne volonté que sa Maistresse auoit pour moy. Elle feignit d'apprendre ces nouuelles avec contentement , & promit de me seruir en tout ce que ie pourrois desirer d'elle. Voyez comme nous sommes capables de nous oublier : car pensant qu'elle me fust plus vtile que personne , ie me fiois plus en sa confidence qu'en celle de Melinte mesme, & luy disois tout ce qui se passoit entre Camille & moy , dequoy Marcelin ne manquoit pas d'estre aduerty, comme nous auons reconnu depuis. Je vy bien qu'il ne m'abordoit plus avec tant de franchise, mais n'en iugeant point

d'autre cause que son humeur inegale, ie ne laissois pas de suiure ma fortune & mes desseins. Iusques-là Camille m'auoit entretenu d'esperance, & Melinte auoit euité les trop grands tesmoignages de l'amour d'Emilie : mais vn matin que nous nous trouuâmes seuls tous quatre, mon impatience m'obligea de coniurer Camille par mes plus ardantes affections, de m'accorder vne faueur qu'elle différoit de iour en iour. Osez vous bien, dit-elle, me faire en presence de ma sœur & de Melinte, vne demande si desraisonnable? Je m'assure, luy di-je, qu'elle iugera qu'une chose promise se doit payer ; & Melinte desirant d'elle la mesme grace, sera sans doute de mon aduis. Je voulois ainsi l'engager malgré qu'il en eust, sçachant que Camille ne me rendroit iamais heureux qu'à l'exemple de sa sœur. Ces paroles obligerent Melinte à tesmoigner le mesme desir à Emilie, & les refus qu'elle luy fit luy donnoient plustost lieu de la vaincre que de perdre esperance. Nous cessâmes de parler Camille & moy pour voir ce qu'ils resoudroient, & remismes entre leurs mains la cause de tous quatre, attendant avec impatience le succez de leur dispute : & bien que ie m'apperceusse qu'il plaidoit vn peu laschement, ie ne laissois pas de connoistre qu'il l'emporteroit : toutefois voyant qu'Emilie ne vouloit pas accorder entierement vne chose que Camille auoit du tout refusée, ie vis qu'il estoit encore besoin de quelques efforts de mon costé, & obtins en fin qu'elle s'en remettrait au iugement de sa sœur. Je voy bien, dit Emilie, qu'il est mal-aisé de se deffaire de vous : mais afin d'estre assurées si vous continuerez en cette resolution, nous vous donnons tout le reste du iour pour terme, & sur

la my-nuit vous vous rendrez icy tout seuls par vne porte que ie vous feray ouurir : si alors vous nous donnez assurance des mesmes desirs , nous vous en donnerons de ce que nous aurons resolu à vostre aduantage. Ce favorable arrest confirmé par le consentement de la belle Camille, fut receu de moy avec transport , & de Melinte avec action de graces pour tous deux. Ariane prenant la parole, dit à son frere ; ie ne doute point qu'en son ame il ne fut bien aise que ce bon-heur s'offrit sans qu'il luy eust cousté la moindre inquietude. S'il fut desdaigneux ou non , reprit Palamede , vous le sçaurez par la suite ; puis il continua.

Après mille remercimens nous prîmes congé d'elles, mais auant que de sortir i'aduertis Cyané de nostre assignation ; afin qu'elle eust soin de nous faire ouurir , & ie ne songeois pas que ie perdois en vn moment ce que nous auions acquis avec tant de peines & de paroles. Le reste de ce iour il me sembla que iamais heures n'allerent si lentement tant i'auois d'impatience, & voyant Melinte pensif d'un autre costé, ie luy demanday si la venue de la nuit luy tardoit autant qu'à moy. Nous rés-vons, me respondit-il, sur des choses bien differentes. Le luy en demanday la cause ; pource, me dit-il , que vous voudriez estre desia au lieu de l'assignation, & ie pense comment ie feray pour n'y point aller. Je le trouuay bien desdaigneux de fuir ce que d'autres desiroient avec tant de vœux ; il me conta qu'il estoit de contraire humeur, & qu'il ne pouuoit se resoudre d'aller trouuer Emilie. Cette resolution m'estonna fort, & ie commençay à maudire cette froideur, & cette continence qui trou-
bloit ainsi mon bon-heur : car n'ayant eu de bon succez

que par son moyen, sans luy ie ne pouuois rien esperer: toutefois voyant que cette surprise m'auoit osté la parole, d'une façon plus remise, il me parla ainsi: le croy que vous ne desirez pas me contraindre en ce qui m'est le plus sensible; aussi n'est-il pas raisonnable que ie vous priue d'un bien que ie vous ay acquis avec tant de soin, & que vous desirez avec tant d'ardeur: il faut trouuer vn moyen qui nous contente tous deux. Et quel? luy dis-ie, pour moy ie ne puis esperer aucune fortune si ie ne suis assisté de vous: car croyez vous qu'Emilie permettre à sa sœur de me fauoriser, si elle se void melpriée de vous? Si vostre passion, me dit-il, ne vous auengloit, vous songeriez que ie ne vous proposerois pas de trouuer yn expedient si ie n'y auois pensé: escoutez au moins si ce que i'ay aduisé est possible. Il adiouta: Nous irons à l'heure assignée avec quelques vns de nos gens, & feignant vne rencontre à la porte, nous mettrons l'épée à la main les vns contre les autres, & apres auoir fait quelque bruit de nos armes, ie me retireray avec le reste comme si i'estois pouruiuy, & vous entrerez seul en la maison, feignant de croire que i'y suis delia: puis quelque temps apres ie vous enuoyeray dire que vous ne soyez point en peine de moy; que i'ay esté secouru par quelques vns de mes amis, avec lesquels ie suis demeuré, & qui ne veulent point me laisser aller. Et à quoy, luy dis-ie, tant de peine? pour moy i'aimerois mieux venir receuoir les caresses d'une belle Dame. Aussi ferois-ie, me dit-il, si i'estois Palamede: mais puisque ie suis Melinte, permettez que ie viue à ma mode. le trouue, luy dis-ie, que c'est vn mauuais moyen d'entrer secrettement en vn logis, que d'aller faire vn tumulte à la porte: Au

contraire, dit Melinte, s'il y a quelque espion il s'enfuira de peur, & rien ne restera dans la rue; & ie trouue que l'on ne se deffiera iamais que personne vueille entrer en vn logis par ce moyen. Mais, luy dis-ie, ce sera tousiours à recommencer: pensez vous tous les soirs vser de la mesme feinte? Il trouue bon, me dit-il, que vostre preuoyance aille si loin: ne scauriez vous conseruer de vous mesme ce que ie vous auray vne fois acquis? Pensez seulement au present, & i'aduiseray pour nous deux à l'aduenir: le temps nous donnera conseil. Le m'accorday en fin à tout ce qu'il voulut.

Mais voyez, ma sœur, comme la vertu & les bons aduis sont suivis de bon-heur! sans ceste humeur & ceste resolution de Melinte nous estions du tout perdus, & toutefois nous ne laissâmes pas de nous trouuer en tres-grand danger. Ceste Cyané ayant sceu l'heure que nous deuions venir, en aduertit aussi tost Marcelin, lequel animé de jalousie, & du desir de vangeance, resolut nostre mort, & voulut se seruir de la presence mesme de l'Empereur pour couvrir son assassinat. Le soir estant à souper avec Neron, voyant ce Prince vn peu eschauffé de vin qui chantoit quelques vers qu'il auoit faits, il dit tout haut qu'un des iours precedens il n'auoit pû souffrir l'insolence & l'ingratitude de ce Sicilien qui se moquoit des vers de l'Empereur, & vantoit par tout les siens, pour toute reconnoissance de tant de graces qu'il en auoit receuës. Neron animé par ces paroles, pource qu'il n'y auoit rien qui le piquast si sensiblement que d'estre mesprisé en la chose où il affectoit le plus de gloire: En quels lieux, dit-il, ce compagnon me traite-t'il ainsi? ie l'entendis encore, respondit Marcelin, il n'y a que deux

iours qu'il parloit sur ce sujet avec vne insigne effronterie chez vne Dame qui le reçoit toutes les nuits. Ne pourrions nous point, dit Neron, attraper ce galant? dès ce soir, reprit-il, cela sera fort facile: il ne faut que l'aller attendre, & se cacher quelque part là auprès, vous le pourrez punir à souhait du crime qu'il commet tous les iours contre l'honneur de vostre Maiefté. Cela fut aussi tost resolu, & Neron avec ceux de sa troupe ordinaire s'alla mettre en embusche au lieu où il fut conduit par Marcelin, & nous attendit avec dessein de nous sacrifier à sa vengeance.

Nous ne manquâmes point de nous trouuer à l'heure, & aussi tost comme nous auions arresté ensemble nous commençâmes à tirer nos espées en faisant du bruit, & à crier, tuë, tuë, aux assassins. Neron & les autres croyant auoir esté descouuerts, & craignant d'estre tous massacrez en leur embusche s'ils ne sortoient, parurent & vindrent à nous; mais aussi estonnez que nous fûmes surpris, n'attendant pas que nostre jeu se deust tourner en vn combat veritable. Nous ne laissâmes pas de les receuoir avec beaucoup d'assurance, & en blessâmes plusieurs: toutefois pource que leur nombre estoit plus grand, nous receûmes quantité de playes; ce qui nous fit resoudre à vendre nostre vie cherement: mais eux reconnoissant nostre desespoir furent en fin contrains de nous crier que c'estoit l'Empereur. Alors nous nous esloignâmes pour les laisser passer, toutefois apres qu'ils se furent retirez, ie tombay de ma hauteur, n'estant plus soustenu de l'ardeur du combat, & ayant quatre grandes blesseures par lesquelles ie perdoistout mon sang. Melinte vint pour me secourir, mais bien qu'il ne fust pas si blessé, il ne laissa pas des'ef-

uanoüir

vanouïr aussi sur mon corps. Ce fut en cét estat que nous fusmes trouvez par ces Dames, qui estoient sorties pour sçauoir ce qui s'estoit passé deuant leur maison, & qui furent bien estonnées de nous voir ainsi traitez : puis nous firent porter icy pour nous secourir avec l'affection qu'elles nous ont fait parestre; où desesperant de ma vie ie voulus voir mon pere & vous auant que de mourir : mais les Dieux m'ont voulu faire plus de graces que n'auoit mérité ma ieunesse indiscrete, & m'ont peut-estre reserué pour vous seruir, & ce cher Melinte, à qui ie suis si redevable, & de qui la maladie qui le retient au lit à present, n'a esté causée que par les soins assidus qu'il m'a rendus pendant la mienne.

Ariane pleine de contentement d'auoir appris l'extrême fidelité de Melinte, dissimula ceste ioye pour respondre à son frere. Il est vray qu'en tout ce que vous m'avez dit, il vous a tesmoigné vne amitié tres-parfaite, qui nous oblige à des reconnoissances eternelles. Et ie voudrois qu'il se presentast vn iour occasion de nous en acquitter; puis elle continua : Mais pour quitter ce propos de Melinte, vous ne m'avez point dit comment vous avez sceu que c'estoit Cyané qui auoit tout descouvert à Marcelin. C'est, reprit Palamede, ce que i'oubliois à vous dire. Nous auions sceu que c'estoit luy, assisté de Neron qui nous auoit dressé ceste embusche, & mesmes nous reconnusmes sa mauuaise volonté en vn vnguent qu'il m'enuoya, qui estoit du poison, & lors que nous estions en peine de descourir d'où il auoit pû auoir l'aduis de nostre assignation de la nuit, j'allay auoier deuant Melinte & Camille que ie l'auois communiquée à Cyané. Camille s'escriant alors, me

dit qu'il ne falloit plus chercher l'origine de ce malheur : que ceste fille estoit du tout acquise à Marcelin ; & la faisant chastier, pource qu'elle estoit desia trop indignée de toutes les trahisons de Marcelin, elle luy fit confesser, en fin sa meschanceté. Je ne vous fay point le recit de la resolution de nos fidelles Esclaues en suite du dessein qu'auoit pris Neron de nous faire mourir, pource que vous l'avez appris d'Arcas : il me reste seulement à vous dire que depuis deux ou trois iours que Marcelin est du tout guery, il nous vient visiter, & nous tesmoigne beaucoup d'affection, pour nous oster l'opinion que nous pourrions auoir : mais Camille ne peut s'empescher deluy faire vne reception si estrange, qu'il commence à se douter de ce qui luy cause ce traitement.

Je trouue, reprit Ariane, que c'est vne grace particuliere des Dieux que vous ayez peu eschapper de cet accident : car de la sorte que vostre perte auoit esté concertée, ie tremble encore quand ie songe comment il est possible que vous l'ayez sceu éuiter : toutefois vous n'êtes pas encore hors de danger, ayant tousiours pour ennemis l'Empereur & Marcelin, dont la vengeance n'est pas satisfaite, & de qui la fureur se sera augmentée par les soins que Camille a tesmoigné auoir de vous. Les Dieux, dit Palamede, qui nous ont iusques icy preservez ne nous abandonneront pas : toutefois il ne nous faut point endormir, mais employer la prudence de vos conseils, & de ceux de Melinte, pour aduiser aux moyens de nous garantir pour iamais des maux qui nous menacent. Je croy, dit Ariane, qu'une promptre retraite à Syracuse sera le meilleur expedient ; c'est ce

qui me fait souhaitter la guerison entiere de tous deux, afin que nous puissions ensemble aller iouir du repos & de la douceur de nostre pais, & fuir vne vil-
le ou le vice & l'insolence regnent avec tant d'au-
thorité.

Fin du deuxiesme Liure de l'Ariane.







LE
TROISIÈSME
LIVRE DE
L'ARIANE.



PENDANT qu'ils s'entrete-
noient ainsi, Melinte conten-
toit le mieux qu'il pouuoit le de-
sir d'Aristide sur tout ce qui s'e-
stoit passé, & employoit tout
l'artifice de la discretion, pour in-
uenter des causes de leur mal-
heur, & taire les vrais & princi-
paux sujets de ce qui leur estoit
arriué; souuent lors qu'il n'estoit pas bien préparé pour
respondre aux demandes de ce bon vieillard, il feignoit
vne difficulté de parler à cause de son mal, pour auoir
loisir d'y penser: mais quand il eut eschapé ce passage,
& qu'il vint sur le recit de l'extrême maladie de Pala-
mede pour ses blessures, & de tous les accidens qui luy

auoient donné tant d'apprehension , il n'en oublia vn seul point, afin d'employer tout cét entretien à ce discours, & se deliurer des questions auxquelles il auoit peine de satisfaire.

Emilie & Camille rioient quelquefois, voyant de quelle façon il desguisoit la vérité, & souuent diuertissoient le propos pour le secourir. Aristide n'estoit pas assez simple pour se contenter de tout ce qu'ils disoient; toutefois il en crût vne partie, & sceut bien excuser le reste. A la fin Palamede & Ariane reuinrent dans cette chambre, & le iour finissant, Aristide & elle prirent congé de tous, avec promesse de reuenir les voir le lendemain. Ils s'en retournerent au logis de Maxime leur ancien hoste, chez qui Palamede & Melinte auoient tousiours logé depuis qu'ils estoient à Rome; & lors qu'ils furent sortis, Emilie & Camille se mirent à parler des perfections d'Ariane avec beaucoup d'admiration. Palamede se confessoit bien glorieux d'auoir vne sœur si accomplie : Melinte en parloit assez froidement, mais Emilie remarquoit vne grande contrainte en ce qu'il en disoit, & reconnoissoit que s'il luy eust esté permis d'en parler, aucun d'eux ne l'eust fait avec plus d'auantage. Le soir se passa en ces discours; & lors que Melinte se trouua seul, rappelant les beaux objets, que la presence d'Ariane luy auoit renouellez, il commença des'entretenir ainsi en luy mesme : Ah ! diuine Ariane, que ta veuë m'est chere, & toutes les fois que ie te reuoy, que tu me parois avec de nouueaux aduantages ! Il semble que tu sois venuë icy pour me reprocher que mon ame ne te conceuoit pas assez parfaitement, & que tu vueilles former en elle vne nouuelle idée, plus belle encore que celle qu'elle cherissoit. Beutez qui n'aurez

iamais d'égaux, puis-je assez vous aimer? mais plustost pourriez vous estre plus aimées? non, puis que l'amour que j'ay pour vous ne peut estre plus grande: mais pourquoy non, puisque ie la sens augmenter tous les iours par les nouvelles graces qui naissent en vous continuellement? Ah! veuë, que tu me ravis! Ah! Ariane, que les esclats de ta beauté remplissent mon ame de lumiere! & que mon imagination te receuant ressent de ioyes. Mais confesse aussi, chere Idée, que tu es receuë en vn lieu bien pur, & regarde avec combien d'ardeur, & de respect tu y es adorée.

Ces douces pensées l'empeschèrent agreablement de dormir toute la nuit, il n'estoit tourmenté que du regret d'auoir esté trouué en cette maison, surquoy il eust bien desiré satisfaire l'esprit d'Ariane. Le iour d'apres elle vint au matin avec cette fille qu'elle aimoit fort, qui se nommoit Epicharis, ayant laissé son pere au logis qui se reposer du travail de son voyage. Apres auoir sceu que son frere dormoit encore, elle entra dans la chambre de Melinte, qui la receut avec beaucoup de ioye & de respect, & Epicharis s'estant esloignée, lors qu'elle fut assise pour luy parler, & s'enquerir de l'estat de son mal, il la preuint ainsi. Je suis bien confus, Madame, de l'honneur que vous me faites, mais ie suis encore plus confus de honte, de vous voir en vn lieu où la vertu n'entra iamais qu'à vostre suite. Iamais, respondit-elle, ie n'auray cette creance, puisque vous y estiez venu deuant moy. Ah! Madame, reprit-il, fuyez de cette maison, trop indigne d'estre honorée de vos pas: si j'ay iamais esté si heureux que d'estre approuué de vous pour quelque qualité, ie dois perdre cette estime estant trouué où ie suis: & ie

vous coniure de ne point vous profaner par la conuerſation de ces Dames, ſi eſloignées de l'honneur de voſtre vie. Je ſçay bien, reſpondit-elle, quelle occaſion vous a conduit icy mal-gré vous; & tant ſ'en faut qu'elle me donne ſujet de vous blaſmer, elle fera que j'admireray voſtre vertu tant que ie viuray. Quand ie vous verrois parmy les meſchans, ie croirois touſiours que c'eſt pour les corriger par voſtre exemple, & non pas pour les imiter. Je ſuis aſſeurée combien voſtre honneur vous eſt cher, & vous ſçay bon gré d'auoir ſoin du mien, dont ie ne craindrois point de vous donner la conduite ſi ie doutois de la mienne. Il repartit; douter de voſtre ſageſſe, Madame, iamais vne penſée ſi criminelle n'entra dans mon ame: ce ſeroit mettre en doute la choſe du monde dont j'ay la plus parfaite connoiſſance: mais pardonnez moy ſi ie deſire vous voir eſloignée d'un lieu que mon honneur meſme ne peut ſouffrir qu'avec horreur, & où la maladie me retient avec tant de contrainte. Les maximes que l'on y ſuit ſont ſi contraires à celles que vous obſeruez, que ie n'y puis reſmoigner aucun contentement, qu'en reduiſant ma bouche à contredire toutes mes penſées. Melinte, dit Ariane, ie ſuiurois dès cette heure voſtre aduiſ, ſi ce n'eſtoit vne faute encore plus grande d'abandonner mon frere, & celui qui ne l'a point abandonné. Palamede, reprit Melinte, eſt hors de danger, & peut aller chez vous, & depuis voſtre arriuée ie me ſens auſſi en eſtat de m'y faire porter: mais ie vous ſupplie de vous retirer d'icy, & de receuoir la priere que ie vous en fay pour le plus grand ſeruiſſe que ie vous puiſſe iamais rendre.

Eſtranges eſſets d'une paſſion vertueuſe ! Melinte au lieu

lieu de cherir la presence de sa belle Ariane, ne peut souffrir de la voir en vn lieu où luy mesme voudroit n'estre pas : son amour pure & parfaite se sentant offensée par la moindre approche des choses vitieuses : & mesme il sembloit preuoir le mal qui leur deuoit arriuer par la demeure qu'elle feroit en ce logis, pource que Marcelin vint visiter Melinte, & entra dans sa chambre, lors qu'Ariane & luy se parloient. Cette veuë les surprit tous deux, mais beaucoup plus Melinte, voyant vne personne qu'il auoit tant de sujet de haïr : car Ariane ne le connoissant pas, creut seulement que Melinte auoit eu raison de la desirer bien loin de là, puisque l'entrée de cette maison estoit permise à toutes personnes. Toutefois Melinte dissimulant, le receut d'un visage assez ouuert, & Marcelin apres s'estre enquis de l'estat de sa santé, commença a regarder Ariane avec des yeux d'admiration & de surprise : mais elle, pour éuiter cette curieuse veuë, & la naissance de quelques desirs en luy, feignit de les laisser ensemble par ciuilité, afin qu'ils fussent libres, & entra dans la chambre de Palamede, puis sortit incontinent de la maison, apres l'auoir prié de retourner dès le iour mesme chez son pere, où elle s'alloit retirer. Marcelin ne manqua pas de demander à Melinte qui estoit cette belle Estrangere : à quoy il fut obligé de respondre, qu'elle estoit la sœur de Palamede, qui estoit venuë de Sicile avec son pere, sur le bruit de la maladie de son frere, & qui s'en deuoit retourner aussi tost le trouuant guery. I'en auois pas creu, dit il, vos Siciliennes si belles, vous auriez tort de venir chercher à Rome de la beauté. Les choses, respondit Melinte, qui viennent de loin, ou que l'on va chercher en païs estoigné, semblent tousiours plus bel-

les: car pour moy ie quitterois toutes les Siciliennes pour vne Romaine: Et moy, reprit-il, toutes les Romaines pour cette Sicilienne. Ce discours ne plaisoit point trop à Melinte, & il eust bien voulu estre à Syracuse avec Ariane, pource qu'il preuoyoit que Marcelin perdant les bonnes graces de Camille, pourroit s'adresser à elle, & leur donner beaucoup de trauerses. Aussi eut-il ce dessein; & ce qui confirma cette apprehension à Melinte, fut que Marcelin impatient de reuoir à loisir celle qui l'auoit si bien touché d'amour, en peu de temps, ne tarda guères qu'il ne feignist de vouloir voir Palamede, & partit d'auprès de Melinte pour aller en l'autre chambre, où il ne la trouua plus; de sorte qu'il fut contraint d'entretenir son frere, croyant auoir besoin de son moyen, pour la voir, & en estre bien receu, mais ils auoient d'estranges desseins l'un pour l'autre. Cét entretien ne fut pas de durée, pource que lors qu'il est question de feindre, les discours ne sont pas de longue haleine, chacun craignant de se decouuoir, & le temps se passe la pluspart en silence.

Aussi tost que Melinte peut parler à Palamede, il luy conseilla de sortir de ce logis dès le iour mesme, & luy dit qu'il s'estoit apperceu du desplaisir qu'auoit receu Aristide de les auoir trouuez là dedans: qu'il valloit mieux qu'il s'en allast seul que de l'attendre; qu'il falloit dire à ces Dames qu'Aristide lassé du chemin se portoit mal: pour luy qu'il le suiuroit dès le lendemain, & qu'il falloit ainsi se retirer separément, de peur que le départ de tous deux ne les surprist trop à la fois. Palamede resista quelque temps à cét aduis à cause de la passion qu'il auoit pour Camille, qu'il voyoit avec tant de commodite: toutefois il falloit ceder au conseil de cet amy qu'il auoit trop negligé à son

dommage ; & cette resolution estant prise , ils voulurent prendre congé des sœurs.

Emilie qui n'auoit iamais reconnu en Melinte vne passion bien esmeuë , quelque faueur qu'elle luy eust tesmoignée , commençoit à se douter de la cause de sa froideur depuis l'arriuée d'Ariane. Cette femme altiere , qui toute sa vie s'estoit veuë adorée sans auoir eu de l'amour , mouroit de despit de se sentir mesprisée ; & lors qu'elle entendit parler de cette retraite , d'abord elle repartit doucement aux courtoises paroles de Melinte , mais à ses repliques elle vsa de reproches , & des reproches elle entra en fureur. Cette douleur rompit toutes les chaines de la discretion & de la honte. Quoy , disoit-elle , apres auoir desdaigné les plus puissans de Rome , ie me voy reduite à faire la suppliante enuers vn estranger & vn inconnu ? cet ingrat , ce traistre , apres auoir receu tant d'honneur chez moy , apres auoir este retiré par moy des mains de la mort , osera bien me quitter , & refuser quelques iours à ma priere. Melinte pour arrester le cours de ces paroles , luy dit : Madame , ie ne suis ny traistre , ny ingrat ; ie n'ay perdu ny le respect que ie vous dois , ny la passion que j'auois pour vous : il ne faut point employer de prieres où vous pouuez commander ; & ce qui me fait accuser pour mesconnoissant , est ce qui vous doit plustost faire voir que ie sçay bien retonnoistre les soins qu'il vous a pleu prendre de moy , puis que ie desire vous en deliurer. Voulez vous me reduire à ne pouuoir iamais satisfaire aux obligations que ie vous ay , ne finissant point mes importunités ? & que ie souffre toute ma vie d'estre seruy de vous , sans vous pouuoir seruir ? croyez vous qu'estant chez moy j'aye moins d'amour pour

vous ? & ne voulez vous point me permettre de me mettre en pouoir de vous rendre mes devoirs ? Bien que l'honneur extrêmement vos faueurs, leur abondance commence à me deuenir pesante depuis que ie ne les acquiers plus par mes seruices. Madame, si vous auez pris plaisir iusqu'icy à me tesmoigner tant de bonne volonté, ne m'enuiez pas à mon tour le contentement de vous rendre mes soins, & de vous obliger par mes submissions à me continuer cette affection. Je ne croy pas qu'il y ait supplice pareil à vne personne de courage, comme de receuoir incessamment sans rien donner ; & c'est celuy que vous me voulez faire endurer eternellement. Emilie vn peu remise par ces paroles, le regardant fixement, luy dit : Que ie serois heureuse, Melinte, si vous estiez veritable ! mais ie crains que ce beau langage ne parte pas du cœur : il a trop d'ordre pour exprimer vne passion ; & vous semblez plustost affecter de bien dire que de bien aimer : Mais il n'importe, ie vous croiray si vous me voulez accorder deux iours encore de sejour, pendant lesquels vous puissiez vous voir en meilleure santé. Melinte ne voulant pas la mettre au desespoir, luy respondit, qu'elle pouuoit disposer non seulement de deux iours, mais encore de tous ceux de sa vie sans luy en demander congé. Ils demurerent donc ainsi d'accord : Et Camille bien mieux asseurée de l'amour de Palamede, n'estant point reduite à l'obliger par cette contrainte, luy permit de s'en aller, sçachant bien qu'elle le reuerroit assez tost.

Le desplaisir qu'apportoit ce retardement à Melinte, venoit de ce qu'il se voyoit priué pendant ce temps de voir Ariane, & sçachant que Palamede ne manqueroit

pas de luy faire le recit du sujet qui le retenoit, il voulut luy escrire cette lettre.

MELINTE A ARIANE.



E n'est plus mon mal qui me retient icy: mais celuy d'une autre, qui m'est plus insupportable que le mien. C'est une chose cruelle, d'estre mal heureux, de trop de bon-heur, & ne pouvoir eschapper de ce qui est en ma puissance. Je croy que ie suis destiné pour m'apriser toute ma vie les biens qui me sont offerts, & me laisser consumer par le desir de ceux que ie ne puis posseder. Lors que la fortune me traite le plus cruellement, elle me réduit à faire le cruel: puis ordonne une punition à mes desdains, au lieu de les recompenser estant si iustes. Mais puis qu'elle est aveugle, i'en appelle à vostre iugement; & vous demande, non pas ce que ie refuse des autres, ce seroit trop de presumption: mais ce que mesmes ie leur refuse, qui est un peu de compassion; bien qu'il semble que i'en sois indigne, puisque ie la desnie.

Melinte donna cette lettre dans des tablettes à Arcas son fidelle affranchy, à qui seul estoit conuë la secrette passion de son Maistre, qui ne s'estoit point voulu cacher de luy en plusieurs choses où il auoit esté obligé de l'em-

ployer. Ce bon seruiteur, le lendemain que Palamede fut retourné chez Maxime avec son pere, prit l'occasion d'aller sçauoir de ses nouuelles de la part de Melinte, & donna sa lettre en secret à Ariane, qui en receut tant de contentement, qu'apres l'auoir leuë, elle luy promit de faire response.

Iamais elle ne luy auoit fait cette faueur, mais ayant eu connoissance depuis peu de tant de vertus, & de merites par le rapport de son frere : des mēpris qu'il auoit fait d'vne des plus belles de Rome, pour n'offenser point son amour : des honneurs qu'il auoit acquis pour luy, & des biens qu'il auoit procurez pour sa patrie ; avec des soins respectueux qu'il luy auoit tesmoignez en la derniere visite ; elle ne peut pas luy refuser plus long temps cette grace. Mais voulant aller escrire elle fut interrompue par Marcelin, qui feignoit de venir visiter Palamede : ce qui l'obligea de l'entretenir en attendant que son frere fust venu au lieu où ils estoient : elle connut bien qu'il cherchoit à tomber sur quelques paroles d'affection : mais elle sceut éuiter si dextrement ce propos en le tournant ailleurs, qu'il vid bien qu'il luy seroit fort difficile d'entrer en discours avec elle sur le sujet de sa passion : de façon que Palamede estant arriué, elle le laissa sans auoir rien auancé, sinon d'auoir donné connoissance de son desir : Puis s'estant renfermée elle escriuit, & vint donner ses tablettes à Arcas, qui ioyeux de porter à son Maistre vn si cher gage, vola iusques chez Emilie, & Melinte les receuant avec excez de contentement y leut ces mots.

ARIANE A MELINTE.



E veux bien vous tesmoigner que ie res-
sens vostre peine , & vous consoler aus-
si de ce que l'on m'en prepare une pareil-
le. La visite que i'ay receüe de Marce-
lin me fait connoistre que ie seray importunée aussi
bien que vous : mais la severité de mon sexe sçaura
aisément esloigner ce que l'honneur du vostre vous per-
met à peine de refuser. Prenez garde que la courtoi-
sie qui seroit en moy un crime , est necessaire en vous :
& que vous devez au moins sortir par une compo-
sition honneste. Mais puisque la feinte vous a mis en
peine , elle vous en doit aussi retirer ; & l'on vous per-
met de donner pour vostre rançon autant d'asseuran-
ces d'amour que vous iugerez à propos. Cependant
soyez assuré que si les desirs des Dames s'adressent
à vous avec tant d'ardeur , il n'y a rien où les vostres
ne puissent atteindre.

Ces beaux caracteres furent cent fois baisez par Melin-
te : & bien qu'il n'eust pas receu des tesmoignages d'af-
fection fort ouverts, il ne laissoit pas d'en estre bien assu-
ré, sçachant assez combien auoit cousté à Ariane ce peu
de mots qu'elle auoit adioustez à la fin. Il se resolut donc
de suivre son conseil , & ne cessa depuis de faire parestre

à Emilie combien son affection s'estoit augmentée par les soins assidus qu'elle auoit eus de luy ; & qu'il n'auoit point de plus grand desir que d'estre en parfaite santé, pour recompenser par ses seruices vne partie de tant de peines. En fin il sceut si bien feindre qu'elle le creut , & deux iours apres luy permit de s'en aller, souz condition de la venir voir souuent. Mais quand il fut aupres d'Aristide, il se vid reduit à des feintes bien differentes : pour ce qu'au lieu que chez Emilie il falloit feindre vne extrême passion n'en ayant point , il estoit contraint de cacher icy avec beaucoup de soin celle qu'il auoit pour Ariane. Sa discretion estoit bien grande; mais la peine que cette contrainte luy donnoit n'estoit pas moindre. Il soulageoit seulement ses douleurs par quelques vers qu'il faisoit voir à Ariane, comme estoient ceux-cy.

*Mes yeux retenez bien cette flame si belle
Qu'ont voulu dérober vos regards imprudens :
Retirez avec soin tous ces feux au dedans ,
Qu'il n'en eschappe pas vne seule estincelle.*

*Quoy! mes yeux, vous pleurez d'une løy si cruelle:
Pourquoy recherchez vous des mal - heurs euidens ?
Ces feux pour estre beaux n'estoient pas moins ardans :
La veüe en estoit douce, & la prise mortelle.*

*Cachez bien, mal - heureux, ce que vous auez priü ;
Redouez la colere & les cruels mespris
Des beaux yeux qui pourroient punir vostre insolence.*

*Mais n'est - ce pas encor vous plaindre iriustement ?
Si ceux que vous voliez vous forcent seulement
De cacher vos larcins pour toute leur vengeance ?*

Helas!

Helas ! disoit-il en luy-mesme, comment est-il possible que cẽ feu demeure tousiours ainsi ; & que non seulement il ne sorte point, mais encore qu'il ne se voye jamais ? Toutefois elle me le deffend : mais à quoy me sert d'obeir si respectueusement aux loix de cette deffense ? car si elle m'aime, pourquoy me laisse-t'elle tant souffrir ? & si elle ne m'aime pas, pourquoy ne veux-je pas me soulager, en tesmoignant au moins le mal que l'endure ? mais d'un autre costé, si ie l'aime, comment pourrois-je luy desobeir ? oserois-je bien m'opposer à ses desirs ? & m'ayant tesmoigné vne fois sa volonté, puis-je douter si ie la dois suiure ? peut-estre veut-elle esprouuer dans vne contrainte si cruelle l'extremité de son pouuoir, & de mon affection : voudrois-je perdre avec l'acheté vne si belle occasion de luy faire parestre la grandeur de mon amour ? Non, non, souffrons, mon ame, bruslons mon cœur, & tenons nos suppliees bien recompensez puis qu'elle nous les ordonne. Il suffit qu'elle sçait la cruauté de nos peines, & les connoissant elle les sçaura reconnoistre. Mais cependant qu'il se fortifioit de resolutions, son feu sembloit croistre à l'enuy pour les ruiner ; & ce combat se faisant en luy, il en ressentoit tout le tourment : toutefois aimant également son ambur & sa discretion, il taschoit de les accorder toutes deux pour demeurer en luy paisiblement ; sans que l'une fust contrainte de ceder la place à l'autre : son amour impetueuse & bouillante ne laissoit pas de l'agiter tousiours, & il luy adressoit quelquefois ces vers.

*Appaise - toy, ma flame, & cesse de te plaindre,
Qu'avec vn soin si grand ie te cache en mon sein :*

*Hé! ne cognois-tu pas, cruelle, mon dessein?
C'est que tu m'es bien chere, & non pour te contraindre.*

*Ces yeux dont la rigueur te deffend de parestre,
Sont ceux qui t'ont donné la naissance autrefois:
Tu ne dois refuser ce respect à leurs loix:
Obey, sans parler, à ceux qui t'ont fait naistre.*

*Mais quoy? ie prie en vain cette flame rebelle;
Elle en accroist encor mon tourment amoureux:
Je croy qu'ayant pour pere vn bel ail rigoureux,
Elle fait gloire aussi d'estre belle & cruelle.*

Ariane voyoit tous ces vers, & reconnoissoit bien la grandeur de sa passion, & de sa contrainte, mais elle ne jugeoit pas qu'il fust temps encore de soulager ny l'un ny l'autre, en luy aduoiant qu'elle ne vouloit aimer que luy. Elle attendoit un changement qui deuoit arriuer en leurs fortunes, à leur retour en Sicile, & cependant fauorisoit Melinte de tout ce que l'honnesteté luy pouuoit permettre. Ils eussent bien desiré de partir pour retourner à Syracuse, mais Palamede ne pouuoit souffrir encore le chemin, à cause d'une grande blessure qu'il auoit à la cuisse, qui n'estoit pas bien guerie; & Melinte fut contraint de se tenir autant de temps au lit, attendant cette guerison entiere, de peur d'estre obligé de rendre ses deuoirs à Emilie, qui cependant ne cessoit d'enuoyer sçauoir de ses nouuelles.

Ceste feinte luy donnoit la commodité d'entretenir Ariane, pource qu'elle l'assistoit avec soin; toutefois il luy portoit tant de respect qu'il n'y auoit que ses yeux qui

luy oſaſſent parler d'amour, & de toute autre choſe, ils ſ'en communiquoient avec beaucoup de confiance. Vn matin elle le vint trouuer, & luy apportant des tablettes, elle le pria de lire ce qui eſtoit eſcrit, & il vit ces mots.

MARCELIN A ARIANE.

B Elle Ariane, puis que vos yeux me deſcendent de parler; pardonnez moy ſi j'ay recours à ce moyen, pour vous faire ſçauoir l'affection que vos perfections ont fait naiſtre. Si vous eſtes venue icy pour commencer à vous acquérir tous les cœurs de l'Empire, ie beny la fortune qui m'a rendu la premiere de vos conquêtes; & m'eſtant rangé ſans refus ſous voſtre obeïſſance, j'oſeray eſperer quelque part en l'honneur de vos bonnes grâces, ſi l'on y peut aſpirer par des ſeruices eternels, & vne paſſion infinie.

Ces lettres, dit Melinte, ne nous mettent point en peine de deuiner à qui elles ſ'adreſſent, ny qui les enuoye: mais Madame, adiouſta-t'il, qui vous les a données? Epicharis, dit Ariane, les a trouuées ſur ma table en me leuant, ſans eſtre cachetées, de peur, comme ie croy, que ie les laiſſaſſe au meſme eſtat. Mais qu'eſtes vous d'auis que i'en faiſſe? Madame, dit Melinte, voſtre cœur eſt libre, vous en pouuez diſpoſer. Encore vous pourriez bien vous tromper, reſpondit-elle, mais ce

n'est pas ce que ie vous demande : que feray- ie de ces tablettes ? Si vous delirez , dit-il, faire response , vous n'avez qu'à effacer la cire , puis resctire ce que vous voudrez. Vous riez , reprit-elle ; & par qui les enuoirois- ie, si ie ne sçay qui les a apportées ? Vous n'aurez, dit-il, qu'à les remettre en la mesme place , & quiconque les y aura mises sçaura bien les reprendre. Et si ie veux, repartit Ariane, qu'il n'en soit iamais parlé ? Vous les pourrez, dit-il, ietter au feu. Je suis bien aise, dit-elle, qu'elles ayent esté condamnées de vostre bouche , & en mesme temps les y ietta. Melinte voyant cette action , luy dit assez satisfait ; S'il veut vous escrire souuent il luy faut grande prouision de tablettes. Il aura bien, respondit-elle, autant besoin de se pouruoir de patience, mais s'il est opiniastre ie ne seray pas sans peine : toute fois nostre départ nous deliurera bien tost de tout. Palemede suruenant là dessus, & voyant des tablettes qui brusloient, demanda à sa sœur pourquoy on les auoit mises au feu : Elle vn peu surprise, dit qu'elle ne s'en vouloit plus seruir. Y a-t'il long temps, reprit-il, que vous vsez de celles-là ? depuis, respondit-elle, que ie suis à Rome. Ah ! ma sœur, s'escria-t'il , pourquoy vous cachez vous de moy ? vous ne lesauez que depuis ce matin : & si i'eusse voulu, vous ne les eussiez iamais veuës. Ariane rougissant, luy dit : l'auouë que si i'eusse pû , ie les eusse cachées à moy-mesme, & ie ne pensois pas qu'elles fussent venuës à vostre connoissance : s'il y eust eu du feu en ma chambre, ie ne les eusse pas bruslées en celle-cy, où i'ay trouué que Melinte n'estoit pas si curieux que vous , car il ne s'est point enquis comme vous de ce que c'estoit. Mais, continua-t'elle, sçaucez-vous qui me les a apportées ? non,

dit-il, mais estant allé en vostre chambre pendant que vous dormiez encore, ie les ay veuës sur vostre table, & les ay remises au mesme estat, puis qu'elles ne s'adrescoient pas à moy. Ie vous trouue, dit-elle, bien discret: mais vous eussiez bien fait de m'en oster la veuë. Voyez, repartit Palamede, ie suis bon enuers vn homme qui m'a fait tant de mal, mais ie suis asseuré que vous ne luy ferez pas beaucoup de bien. Ie souhaitte seulement, dit-elle, pour sa punition, qu'il m'aime toute sa vie, autant que ie le haïray pour l'amour de vous.

Pendant Melinte faisoit fort l'ignorant de ces tablettes, & leur demanda en fin ce que c'estoit. C'est vne lettre, reprit-elle, que Marcelin m'a fait tenir par ie ne sçay quel moyen: voyez s'il ne l'adresse pas en bon lieu, & pour estre receuë bien fauorablement. Son merite, dit Melinte, est bien considerable, mais son malheur est extrême de tomber en vos mains, pour nous vanger des siennes. Aristide venant dans la chambre, interrompit ce propos, & Ariane les laissant, sortit de la maison, & s'en alla au Temple prochain, couuerte comme elle auoit de coustume, d'vn grand voile qui l'empeschoit entierement d'estre veuë, ne voulant point se faire connoistre à Rome, pour le peu de temps qu'elle auoit à y demeurer.

Marcelin qui faisoit espier quand elle sortoit, ne manqua pas de la suiure, & s'approchant d'elle lors qu'elle sembloit fort attentive à ses prieres, luy dit: Les Dieux accordent à vos desirs autant de bon-heur que vous m'en pouuez donner. Elle comme surprise, leua son voile pour voir celuy qui luy parloit, & luy fit voir son extrême beauté, mais armée de tant de seuerité, que cette veuë

l'estonna infiniment, & il receut de ses yeux vne plus cruelle responce que toutes celles que sa bouche eust pû luy faire. Ce traitement luy fit voir qu'elle n'estoit pas accoustumée à souffrir ces paroles : & il creut que cette belle Estrangere ne satisferoit iamais son amour, s'il ne recherchoit les moyens honnestes de la posseder.

Il estoit resté vn scrupule en l'ame d'Ariane, d'auoir entré chez Emilie : elle se croyoit profanée, & que son honneur pouuoit estre taché de ce reproche. A toute heure les propos que Melinte luy auoit tenus pour la faire sortir de ce lieu, luy reuenoient en l'esprit, & sembloient l'accuser : de sorte qu'elle se resolut de se faire purifier au Temple de Diane. Ce iour mesme elle en parla à la Prestresse, qui se nommoit Virginie, & luy dit le sujet qu'elle en auoit. Virginie luy promit la chambre des purifications pour le iour d'apres, mais le lendemain elle la remit au huietiésme iour, luy disant pour excuse que des Dames Romaines, qu'elle ne pouuoit refuser, vouloient se purifier durant ce temps. Ariane fut contrainte d'auoir cette patience, & lors que les huit iours furent passez, elle fut receuë en cette chambre avec Epicharis seulement pour la seruir. Ce lieu estoit comme vn second Temple adiousté au premier, plus petit toutefois, & d'vne figure ronde, dont l'exaucement estoit assez grand, & qui par dehors pareissoit finir en voûte : mais alors par dedans, vn Ciel representé cachoit les arcs de la voûture.

Ariane introduitte par la Prestresse s'estonna d'y voir tant de richesses. Les tapisseries estoient à fonds d'or, & les figures de broderie de soye. Au milieu de la chambre estoit vn lit, dont les pantes estoient de pourpre

brodées d'or d'un ouurage tres-riche, & les rideaux d'une estoffe incarnate à petites fleurs d'or. Aupres du lit estoit vne cuue de marbre blanc proche du mur, d'où sortoient deux gros tuyaux d'or qui se pouuoient ouurir & fermer, de l'un desquels se tiroit l'eau chaude, & de l'autre la froide. A l'un des costez de la chambre estoit un buffet chargé de vaisselles d'or, & de grands vases de mesme, enrichis de diamans, de rubis, & d'esmeraudes: d'un autre costé estoit vne table couuerte d'un tapis de l'estoffe du lit, accompagnée de meubles de mesme, & au dessus un grand miroir avec vne bordure de la plus superbe orfeurerie qui fust dans Rome. A costé de la cuue estoit vne table chargée de vases de cristall & d'agate, remplis d'eaux de senteur de toutes sortes, avec les bassins de mesme, & quantité de linges pour seruir au sortir du bain: le paué de la chambre estoit de carreaux de marbre & de porphyre de différentes façons.

Ariane apres auoir admiré ces choses si magnifiques, & ayant esté instruite par Virginie, des ceremonies qu'elle auoit à obseruer, fut laissée seule avec Epicharis. Incontinent elle osta ses habits, en disant les prieres qui luy auoient esté ordonnées: & lors qu'elle n'eut que la chemise avec un manteau qui la couuroit, elle s'approcha de la cuue, & en prit de l'eau par trois fois, qu'elle respendit par la chambre: puis elle descourrit à nud son pied & sa jambe, qu'elle mit dans l'eau du bain. Ce fut alors quel'on vit disputer la blancheur de cette belle jambe avec celle du marbre: mais la viuacité qui animoit vne chair si delicate, luy donna bien tost la victoire, & le marbre sembloit pâlir de ce qu'il se voyoit vaincu. Ariane auoit caché dans l'eau ce beau pied, dont la petite

forme possedoit tant de perfection, & mesme la jambe entiere ; mais aussi tost elle la retira sentant l'eau froide, & redonna au iour ce chef-d'œuvre de Nature : puis ayant rendu l'eau tiede par le moyen des tuyaux, en sorte qu'elle se pouuoit mettre dedans en assurance, elle osta sa chemise avec crainte, aussi honteuse d'estre nue, comme si tant de choses inaninées eussent eu des yeux ; & voulant se mettre dans la cuue, par hazard elle ietta la veuë sur le grand miroir, & fut surprise d'abord, croyant voir en cet endroit vn tableau de Diane entrant dans le bain, qu'elle n'auoit point remarqué : mais aussi tost connoissant son erreur, elle s'estonna de se voir d'une beauté si parfaite. Car soit qu'elle considerast son visage, où la beauté, l'agrément qui charme les cœurs, & la douce maiesté auoient respandu toutes leurs richesses ; soit qu'elle regardast la iuste longueur de ce col de neige, l'embonpoint de sa belle gorge, & ces deux globes diuins qui ne sembloient enflés que de l'orgueil d'estre si parfaicts ; soit qu'elle s'arrestast à voir la beauté de ses bras, & de ses delicates mains, ou le reste de son corps si bien proportionné, dont la blancheur vniuerselle esbloüissoit ses yeux mesmes, son esprit également satisfait ne pouuoit iuger quelle partie pouuoit ceder à l'autre. Elle fut quelque temps pleine de ioye, estant rauie de se voir si admirable, mais soudain vne honte la surprit, qui la fit accuser de se louer ainsi ; puis la consideration de ce beau corps, où elle ne trouuoit rien à redire, luy faisoit auoüer encore qu'elle estoit la plus belle du monde : & aussi tost sa pudeur la retiroit de tant de plaisirs, & la faisoit rougir, ne sçachant que resoudre sur les diuers mouuemens de son ame. Heureux les yeux

yeux mortels qui voyent avec elle tant de merueilles, & à qui les incertitudes d'Ariane font prolonger ce bonheur. L'amour d'elle-mesme & sa modestie furent long temps à disputer ensemble & à la retenir debout deuant ce miroir, ayant desia vn pied sur la cuue, & ne tenant plus que d'un bras la robe qui la couuroit auparauant : mais en fin ne pouuant iuger si elle estoit plus pleine de satisfaction que de honte, elle se mit dans l'eau, & y noya tous ces differens.

Lors qu'elle fut en repos, s'entretenant avec Epi-
charis des raretez qu'elles voyoient, elle fut estonnée
que les fenestres commencerent à deuenir plus obscu-
res, comme si le Ciel se fust préparé pour vn orage :
& aussi tost elles sentirent tomber sur elles vne dou-
ce pluye d'eau de senteur. L'admiration qui les surprit,
de voir vn effect si merueilleux en vn lieu couuert,
fut suiue d'une beaucoup plus grande, lors que tout
à coup elles virent que le Ciel qui estoit représenté au
dessus de leurs testes, s'ouurit, & emplit la chambre
de lumieres. Incontinent elles entendirent vn doux
concert de voix qui chantoient les loüanges de Dia-
ne, & apres elles virent Diane mesme descendre peu
à peu, ayant les cheueux troussés en chassereffe, vn
croissant de diamans sur le front, vne robbe d'azur
ceinte au dessous du sein, & qui ne la couuroit que
iusques aux genoux, les jambes & les bras nuds, les
pieds couuerts de brodequins dorez, le carquois en es-
charpe, & l'arc en la main : quand elle fut en terre
la musique cessa, & la Deesse s'approchant d'Ariane,
qui estoit confuse d'estonnement, luy tint ce discours.
Belle Ariane, vostre deuotion m'est infiniment agrea-

ble: ie loué la pureté de vostre ame , qui n'a pû souffrir que l'on vous peust faire vn simple reproche , qui auoit son excuse. Aussi ie veux que celles qui m'adorent , soient non seulement Vierges d'effect & de pensée , mais encore que leur vertu soit au dessus des atteintes de la médifance. Toutefois ie vous deffends vn vœu si austere ; vous estes nee pour estre femme , & en cet estat ie vous aimeray tousiours , & vous rendray heureuse , puisque ie n'aime pas moins les chastes mariages que les vœux de virginité. Je vous ay choisi vn espoux qui vous mettra dans la plus grande felicité de la terre , & ie veux que vous l'aimiez , si vous voulez vous rendre digne des faueurs que ie vous feray. Adieu ma chere & bien aimée Ariane , ie vay vous enuoyer des messagers qui vous prepareront à ne vous opposer pas à ce que ie desire. En disant ces dernieres paroles elle la baisa au front , & incontinent elle remonta au mesme Ciel d'où elle estoit venuë.

Ariane estoit si troublée de ces merueilles , qu'elle ne pût luy respondre vn seul mot . la presence d'vne si grande diuinité , ses aduis & ses promesses , avec la creance qu'elle auoit , qu'elle luy vouloit parler de Melinte , occupoient son ame , & l'empeschoient d'estre en son repos. Epicharis estoit d'vn autre costé , s'estant esloignée de Diane par respect , & pleine d'admiration demouroit immobile. Le Ciel s'estoit refermé ayant receu Diane , mais il se r'ouurit pour faire descendre six petits Amours en volant , qui se soustenant en l'air tiraient leurs fiesches dans le bain , lesquelles entrant dans l'eau l'allumoient , & en faisoient sortir de legers

flames. Ce feu fit peur à Ariane , mais il ne l'offensa nullement , & vn peu apres les Amours reuolerent au Ciel. Alors la musique celeste recommença , chantant l'heur d'Ariane d'estre si fauorisée de la Deesse : Aussi tost Diane descendit pour la seconde fois , soustenant vn homme qui pareissoit vn Dieu , estant tout brillant d'or & de pierreries. Elle s'approcha encore d'Ariane , & luy dit ; Vertueuse Ariane , voicy l'Espoux que ie vous presente , ie cognois vostre courage & vostre sagesse : vous ne pouuez iamais satisfaire la generosité que vous donne la noblesse de vostre sang , que par les grands honneurs & les richesses qu'il possedera , ny voir vostre vertu contente que par celle qui l'accompagnera toute sa vie : receuez-le de ma main , & assurez vous que m'obeissant , vous iouïrez ensemble du plus grand bonheur qui se soit iamais gousté sur la terre. Ariane pleine d'vne nouuelle surprise , & voyant vne Deesse dont l'eclat & les discours rendoient son ame confuse , ne songeoit pas qu'elle estoit nuë deuant vn homme : mais quand r'assurant sa veuë elle reconnut que c'estoit Marcelin , alors elle reprit ses sens , & perdant tout respect pour la Deesse , sortit de l'eau , mettant vn grand linge autour d'elle , & toute mouillée se cacha dans le lit , s'envelopant en sorte qu'elle ne pouuoit estre ny veuë ny touchée. Diane remonta au Ciel , & laissa acheuer le reste à Marcelin , lequel ayant soin de la santé d'Ariane , voulut , auant que de luy parler , qu'Epicharis l'essuyast ; & cependant qu'elle s'employoit à cét office , il aborda sa Maistresse avec ces paroles. Pourquoi vous cachez vous demoy , diuine Ariane ? ie ne suis point effroyable : autre que vous au monde ne me fuit :

i'ay de la noblesse & des honneurs : Ne me mesprifez pas, belle Ariane , vous voyez que les hommes & les Dieux conspirent pour me rendre puissant & heureux . Je suis aimé non seulement de l'Empereur , mais encore de la Diuinité que vous adorez , comment luy oferez vous désormais adresser vos prieres , si vous ne faites pas ce qui luy plaist ? Vous connoissez de quelle sorte elle approuue la violente passion que i'ay pour vous : cruelle , feschiffez la cruauté de vostre cœur , & vous rendez sinon aux prieres des hommes , au moins au conseil des Dieux : pensez vous faillir en suiuant leur aduis , & espérez vous viure contente sur la terre en ne les suiuant pas ? Plus Marcelin continuoit son discours , plus Ariane se cachoit dans le liét : mais luy , voyant que ses paroles estoient inutiles , il continua celles-cy : Helas ! Ariane , ie ne veux point tirer aduantage du secours des Dieux ; ie veux estre redevable à vostre seule faueur de toute ma fortune : donnez moy quelque esperance qui soulage l'ardante affection qui me tourmente . Puis se couchant sur le liét comme mourant d'amour , il disoit ; Secourez moy , belle Ariane , donnez moy la vie ; ie me meurs de vous voir si cruelle , & ne suis réduit à ce poinct que pour vous adorer avec trop de respect . Mais Ariane estant sourde à tant de supplications , le contraignit en fin de s'escrier : O Dieux ! ô Amours ! accourez , & ne permettez pas que ie meure de la blesseure que vous m'avez faite . Alors le Ciel s'ouurit encore , & les six Amours descendirent ; dont trois demeurerent pour arrester Epicharis , & trois autres volerent sur le liét , se mettant en deuoir de decouvrir Ariane , & de la rendre au pouuoir de Marce-

lin. Cette Belle n'eut recours qu'à ses cris. Ah! Dieux, dit-elle, estes vous complices d'une telle meschanceté? Elle se deffendoit le mieux qu'elle pouuoit des efforts de Marcelin, taschant à luy deschirer le visage: mais ses forces eussent esté bien vaines, les Amours luy tenant desia les bras, sans le secours de Virginie, qui ouurit la porte de la chambre, suiuite de quelques filles qui auoient entendu la voix d'Ariane, & d'Epicharis appellans à leur ayde. Elle courut incontinent deuers Marcelin, & l'arrestant, luy dit; Ah! Dieux quelle fureur! est-ce là le serment que vous m'auiez fait? Allez, sortez d'icy, profane, ie renonce à vostre amitié pour iamais. Marcelin respondit à la Prestresse: Mon dessein estant legitime, & fauorisé des Dieux, les effects n'en pouuoient estre criminels: Mais puisque vous m'empeschez, ie retourne vers les Dieux, qui me vangeront, & mal-gré vous me donneront Ariane. Alors il remonta au Ciel, qui s'ouurit comme auparauant, & se referma. Cependant Ariane qui croyoit auoir esté diuinement secourüe, comme diuinement elle auoit esté surprise, ne sçauoit quelle Deité remercier, ny quelle detester, puisque Diane mesme estoit complice du mal-heur qu'elle auoit esté sur le point de souffrir: & pleine de confusion se laissoit habiller par Epicharis & ces filles, qu'elle iugeoit autant de Nymphes, & à qui elle faisoit mille excuses d'endurer l'honneur qu'elles luy faisoient. En fin elle les remercia de leurs secours: & pleine encore de desordre, de honte, & de despit, elle sortit du Temple pour se sauuer chez Maxime, où aussi tost elle conta son auanture à son frere & à Melinte. Chacun faisoit là dessus des iugemens differens:

Ariane estoit tellement preoccuppée de ces Diuinitez , & de ces lumieres , que d'un costé elle craignoit d'auoir offensé Diane ; de l'autre elle estoit bien resoluë de ne luy point obeïr . Epicharis assureoit que iamais Diane, & toutes les merueilles du Ciel n'apparurent si visiblement à personne qu'à elles . Palamede croyoit qu'elles ne controuuoient pas toutes ces particularitez , & s'estonnoit avec elles d'une chose si peu ordinaire . Mais Melinte qui auoit l'esprit plus penetrant , & qui ne pouuoit s'imaginer que Diane prist soin des affaires de Marcelin , qui estoit vn assassin & vn traistre , les pria de croire que ce n'estoit plus le temps de voir des Dieux en terre , & qu'il y auoit de la tromperie cachée là deffous . Ariane résista quelque temps à ses raisons , disant qu'elle n'estoit point alors endormie , ny Epicharis , & qu'il estoit impossible qu'un artifice peust faire soutenir en l'air vne Diane & des Amours : toutefois elle balançoit entre l'assurance qu'elle auoit en ses yeux , & le doute que luy apportoiert les considerations de Melinte : mais elle fut toute certaine de la verité quelques iours apres . Il s'estoit rencontré que Virginie estoit sœur de Marcelin , laquelle ne pouuant approuuer , ny ses meschans desirs ; ny le dessein d'espouser Ariane , bien qu'elle fust fort noble , afin qu'il se mariast à Rome dans vne famille Patricienne ; & connoissant l'auersion de cette belle fille pour son frere , se resolut vn iour qu'elle la vid au Temple , de luy descouurir tout l'artifice de Marcelin , pour faire que de son costé elle trouuast quelques moyens de le des tourner de son entreprise . Elle luy confessa que la premiere fois qu'elles parlerent ensemble , Marcelin estoit dans le

Temple ; & que lors qu'elle fut sortie il luy vint demander dequoy Ariane l'auoit entretenuë. Ce qu'elle luy declara aussi tost ; sur quoy il songea quelque temps, puis il la pria de luy permettre qu'il la peust voir dans le bain : que d'abord elle luy auoit dit que cela ne se pouuoit , mais que vaincuë par ses supplications importunes , elle luy auoit en fin promis : & que le lendemain Marcelin ayant resvë sur cette occasion , l'estoit venu trouuer , & luy auoit proposé de tromper Ariane, luy representant vne fausse Deesse , qui la persuaderoit de l'aimer. Virginie disoit qu'elle n'auoit point approuuë du commencement ce dessein , ne voulant point profaner le Temple par vne fraude : mais qu'il la sceut si bien coniuurer , luy representant à quel point sa passion estoit reduite , qu'elle luy permit en fin de dresser toutes ses machines ? & que pour luy en donner le temps elle auoit remise Ariane à huit iours apres. Puis elle luy dit que son frere auoit paie la chambre des richesses qui luy appartenoient , & qu'ayant choisi vn excellent Ingenieur pour dresser des Theatres magnifiques , & faire toutes sortes de representations, ils auoient ensemble aduisé de prendre la voûte de ce petit Temple , & en faire vn Ciel ; que là dedans ils auoient mis vne Musique, avec quantité de flambeaux qui rendoient cette lumiere , & que l'obscurité auoit esté causée par le moyen de certains draps que l'on auoit abbatus deuant les fenestres , pour rendre puis apres le lieu mieux esclairé par les flambeaux. Que la Diane estoit la plus belle & la plus fameuse Comedienne qui fust alors dans Rome ; les enfans estoient aussi accoustumez aux Theatres , & auoient leurs fies-

ches frottées d'une composition qui s'allumoit dans l'eau: que tout cela descendoit & montoit par le moyen de certaines machines en forme de nuages qui le soustenoient. Ariane estoit pleine d'estonnement d'entendre vne tromperie si bien conduite : mais elle fut bien honteuse quand Virginie confessa que Marcelin l'auoit veüe entrant dans le bain par des trous qu'il auoit faits auprès des tuyaux de la cuue , & qu'elle mesme auoit esté curieuse de voir tant de beautez , qu'elle auoia n'auoir eu iamais de pareilles. Apres cela elle l'assura que si elle eust pensé que son frere eust voulu se seruir de violence , iamais l'entrée du Temple n'eust esté permise à ses inuentions. Surquoy elle luy demanda pardon de l'auoir mise en ce danger , ayant esté trompée par les prieres & les assurances de son frere. Ariane luy respondit, qu'elle ne s'estonnoit point si elle auoit fait quelque chose en faueur de l'amitié qu'elle portoit à son frere , & pressée par ses importunitéz : qu'elle luy estoit bien obligée de quitter les interests d'une personne si proche pour auoir soin des siens , & de luy auoir descouvert cette fourbe qui l'eust tenuë en erreur & en trouble toute sa vie. Elles se separerent apres quelques autres discours ; & Ariane sortit du Temple , avec serment de ne chercher plus à se purifier dans Rome, où la chasteté estoit sujette à estre corrompuë par tant d'artifices. Elle confessa à Melinte qu'il auoit eu raison de soupçonner quelque tromperie , & apres luy auoir fait tout ce recit qu'il trouua luy-mesme estrange, ils iugerent qu'il falloit se deffier de cét homme qui n'en demeureroit pas là , puis qu'il recherchoit des moyens si puissans & si rares.

Cepen-

Cependant Marcelin voyant ses desseins , ou descouverts , ou au moins rendus inutiles , se resolut de demander Ariane en mariage à Aristide , n'esperant point soulager autrement sa passion. Il communiqua son dessein à Martian son pere , luy dit qu'elle estoit fille d'Aristide , vn des premiers de Syracuse , niece de Diocetarque , qui estoit le plus puissant dans cette ville , & n'auoit point d'enfans , & qu'ils tiroient tous deux leur origine d'une des plus nobles maisons de toute la Grece , estant descendus du grand Thimoleon de Corynthe. Son pere l'en voulut destourner à cause qu'elle estoit estrangere , mais il ne le pût , quelques remonstrances qu'il luy fist du tort qu'il se faisoit , pouuant pretendre vne des plus nobles filles de Rome. En fin Martian estant desia accoustumé de souffrir toutes les passions vitieuses de son fils , à cause qu'il seruoit à le maintenir auprès de Neron , il pût bien agréer celle-cy qui estoit honneste , & consentir à ce qu'il desiroit. Avec cette permission , Marcelin s'adressa à Maxime , l'ayant iugé propre pour manier cette affaire , luy declara son dessein , appuyé du consentement de son pere , & le pria d'en faire la proposition à Aristide , de qui il esperoit estre receu avec contentement , estant fils de Senateur , s'il pouuoit se resoudre à quitter sa fille à Rome , ou bien s'y habiter luy-mesme , & en ce cas qu'il luy feroit obtenir la qualité de Citoyen Romain comme auoit Palamede , & dans peu de temps le feroit Senateur : Que s'il auoit quelque familiarité avec Ariane , il le coniuroit aussi de la disposer à luy vouloir du bien. Maxime reconnoissant la qualité de Marcelin , son credit & son autorité auprès de l'Empereur , creut s'acquiescer en luy vn grand support

s'il luy pouuoit rendre quelque bon office, & trouuant cette proposition honneste, luy promit toute l'assistance qu'il pouuoit esperer.

Dés le iour mesme il en parla à Aristide, qui du commencement ne pouuoit consentir à quitter sa fille: toutefois la grandeur de ce party luy elbloüissant le iugement, il commença vn peu à ceder aux raisons de Maxime, & en fin luy promit d'en communiquer avec son fils & sa fille: mesme il en escriuit dès l'heure mesme en Sicile à Diccarque son frere. Maxime trouuant qu'il auoit beaucoup auancé, en aduertit Marcellin, qui voyant que son bon-heur dépendoit en partie de la bonne volonté d'Ariane, ne manquoit point de parestre au Temple, vestu superbement, avec vne grande suite, pour luy faire voir quel honneur elle posséderoit, lors qu'elle auroit consenty à ce qu'il desiroit, & ne laissoit pas de luy tesmoigner de grands respects, se seruant en mesme temps & pour mesme dessein de la pompe & de l'humilité.

D'un autre costé Aristide en ayant fait l'ouuerture à ses enfans, Ariane fut bien estonnée, voyant qu'il en parloit comme d'une chose qu'il desiroit: toutefois elle demeura muette aux raisons de son pere, & laissa prendre son party à son frere, qui ne pouuant souffrir qu'il fust parlé dauantage d'un homme qu'il auoit tant de sujet de detester, & sa sœur aussi pour l'amour de luy, fut contraint de dire qu'il ne croyoit pas qu'un si bon pere voulust marier sa sœur à un homme qui auoit par deux fois attenté sur sa vie: qu'il estoit forcé de luy confesser que c'estoit Marcellin qui l'auoit voulu assassiner avec vne troupe de gens, dont

les Dieux seuls l'auoient guaranty : que depuis feignant de luy enuoyer vn onguent pour les bleſſeures , il luy auoit enuoyé du poiſon , ne croyant pas qu'il euſt eſté aduertty qu'il auoit eſté le chef de ceux qui l'auoient attaqué la nuit : qu'il auoit eſté contraint de diſſimuler cette trahiſon , ſçachant meſmes que l'Empereur auoit eſté de la partie. Et quel ſujet , dit Ariſtide , auoit-il de vous vouloir tant de mal ? Seulement , reſpondit Palamede , pour vn faux rapport. Ariſtide demeura fort eſtonné de ces nouuelles , & ſe trouua bien empeſché , voyant que s'il auoit à deſirer ce mariage , il luy ſeroit mal-aiſé de ſatisfaire l'eſprit de ſon fils , & ſ'il s'en vouloit excuſer enuers Maxime , il ne luy en pouuoit dire les veritables raiſons ; ayant meſme approuué que Palamede euſt diſſimulé cette iniure faite par Marcellin , de peur d'en faire vn ennemy ouuert , & d'attirer ſur luy la haine de l'Empereur. De ſorte qu'il dit à ſes enfans que cela meritoit bien d'y penſer plus à loilir. Ariane ſe voyant fortiſiée par Palamede , pria ſon pere de ne la point reduire à viure avec vn homme qui auoit reſpandu le ſang de ſon frere , & qui s'eſtoit taché d'vne ſi laſche trahiſon , comme de le vouloir encore empoiſonner. Si ce que vous m'alleguez , dit Ariſtide , eſt veritable , iamais ie ne mettray tant de mal-heur en ma maiſon : Mais prenez garde , Palamede , que l'apprehenſion de quitter icy voſtre ſœur ne vous faſſe inuenter ces choſes ; pource que ie ne vous le pardonnerois iamais. C'eſt vn party plus releué que nous n'euffions iamais eſperé , & qui mettra voſtre ſœur en vn rang illuſtre , à la gloire duquel vous participerez. Il ne faut pas que de petites conſi-

derations vous destournent de ce bon-heur puis qu'il se presente ; nous pourrions bien quitter ce que nous auons en Sicile pour demeurer icy dans vne fortune qui seroit enuiée de tous ceux de nostre país. Mon Pere , dit Palamede , ie ne suis point ennemy de l'honneur , & de l'auancement de nostre maison : Je nevous desguise aucune chose ; Melinte a esté trop veritable tesmoin de ce que ie vous dis , & pourra vous assurer de la verité Aristide leur promet d'examiner à loisir toutes ces raisons , & de songer à leur bien commun : cependant il leur dit qu'ils pensassent aussi aux aduantages qui se presentoient , & ne les negligassent pas. Palamede aduertit aussi tost Melinte de ce discours , & luy tesmoigna qu'il s'opposeroit autant qu'il luy seroit possible à ce mariage. Melinte l'y porta autant qu'il pût , & en parla à Ariane pour sçauoir si elle pourroit s'y resoudre : mais elle l'assura qu'elle espouseroit plustost la mort. Toutefois elle fut bien estonnée quand son pere luy dit , que les raisons de son frere ne deuoient point les destourner d'accepter vn tel party ; qu'il n'auoit sceu que par des rapports assez legers , que c'estoit luy qui l'auoit voulu assassiner , & que peut-estre quelqu'un qui luy vouloit du mal, auoit enuoyé ce poison sous le nom de Marcelin : qu'il n'y auoit pas d'apparence qu'il fust auteur de cette meschanceté , l'estant venu visiter depuis avec assez de tesmoignages d'affection : & quand cela seroit, que les plus grands ennemis pouuoient deuenir amis ; & que le dessein qu'il auoit pour elle, comme sans doute il auroit esteint sa haine , deuoit aussi faire mourir celle de Palamede. Ariane connut bien qu'il estoit entierement resolu à ce mariage , & qu'il seroit

bien difficile de l'en diuertir : ce qu'elle portoit si impatientement , qu'elle maudissoit sans cesse son voyage de Rome : toutefois elle n'osa iamais contredire son pere ouuertement , mais lors qu'il luy eut commandé de faire bon visage à Marcelin en quelque lieu qu'elle le rencontrast , elle commença de desespérer , ne sçachant comment elle pourroit éuitcr ce mal-heur ; pource qu'elle ne pouuoit tesmoigner son auersion à Marcelin , Aristide l'accompagnant tousiours au Temple pour voir quelle reception elle luy feroit. Le trouble de Melinte n'estoit pas moindre , ne sçachant quel remede trouuer , & si son esprit luy en fournissoit quelqu'un , il ne pouuoit le faire reüssir que sa passion n'esclattast. Palamede sembloit le plus offensé , & tesmoignoit plus ouuertement son desplaisir. Ariane sçauoit bien que son pere ne la contraindroit pas , si elle luy declaroit absolument sa volonté : mais sa modestie ne luy permettoit pas tant de liberté.

En fin les lettres de Dicearque vindrent , qui estant d'un naturel ambitieux , & se voulant acquérir du support dans Rome , prioit son frere de ne laisser pas échapper un si grand bon-heur , & qu'il ne pensast plus aux richesses de Dioclés , au fils duquel il auoit destiné sa fille ; puisque la moindre qualité d'un Sénateur Romain estoit de plus grande consideration que tous les moyens du plus puissant d'une Prouince. Aristide fortifié de ce conseil , commanda à Ariane de se preparer pour receuoir Marcelin le iour d'apres. Cette nouuelle la saisit tellement qu'elle se mit au lit , & la paleur de son visage monstra bien tost quelle contrainte elle ressentoit. Aristide s'estonnant de son mal , elle luy dit que

c'estoit peu de chose , qu'elle le supplioit seulement de differer d'un iour cette entreueüe : ce qu'il luy accorda, & cependant il ne cessoit d'estre auprès d'elle, pour la fortifier de raisons , & la faire consentir à ce mariage. Mais le lendemain matin songeant aux moyens de diuertir Marcelin , & n'en trouuant point d'autre que de luy faire sçauoir son auersion , elle s'auiua de ceste ruse. Epicharis qu'elle auoit auprès d'elle, estoit vne ieune fille de son aage, qui luy estoit tres-fidelle, d'un esprit fort gentil , & qui sçachant les desplaisirs de sa Maistresse, eust voulu les soulager par la perte de sa vie. Tu sçais, luy dit Ariane , qu'il m'est impossible de dire à Marcelin ce que ie voudrois, pource que mon pere veut toujours estre tesmoin du traitement que ie luy fay. Je te prie, cependant qu'Aristide sera auprès de mon lit, de vestir ma robbe ordinaire, & te couurant du grand voile que ie porte, de t'en aller au Temple où Marcelin ne manquera pas de s'approcher de toy. Tu luy pourras dire d'une voix basse, & contrefaisant la mienne; qu'il perde toute esperance de m'espouser, que ie choisiray plustost la mort, quelque mine que ie fasse deuant mon pere, & que si de luy-mesme il se veut retirer de sa recherche sans me reduire à l'extremité, ie luy en auray beaucoup d'obligation. Epicharis bien aise de seruir Ariane, promit de luy obeir , & apres s'estre desguisée alla au Temple, où elle ne faillit pas de parler à Marcelin: & trouuant à son retour Ariane, impatiente de sçauoir ce qui s'estoit passé, luy dit qu'il auoit esté abusé fort plausiement : Toutefois son discours l'ayant estonné, qu'il n'auoit pas laissé de luy demander permission de la voir chez elle comme il auoit esté arresté; puis apres

qu'il songeroit aux moyens de luy obeir si sa rigueur continuoit. Elle se prepara donc à ce iour, & cependant les pensées dans cette maison estoient bien différentes. Melinte & Palamede meditoient de cruelles Tragedies, plustost que de consentir que ce mal-heureux possedast Ariane. Maxime ne cessoit de leur représenter les grandeurs de la maison de Martian, la faueur de Marcelin auprès de Neron, & en son ame conceuoit de belles esperances pour le bon office qu'il luy rendoit. Aristide croyoit déjà voir sa fille femme d'un Sénateur Romain, égalant la pompe & l'esclat des premieres de l'Empire. Mais Ariane ne se laissoit point gagner à ces vanitez, & prioit plus la moindre qualité de Melinte, que tous ces honneurs, où tant de mal-heurs estoient attachez: elle songeoit donc seulement aux moyens qui estoient capables de rompre ce coup. En fin ce iour arriue, que Marcelin deuoit venir au logis, où Maxime faisoit fort l'empresé pour receuoir vne personne de si grand mérite, & preparoit les autres à luy rendre des honneurs dignes de son rang. Ils disnerent tous ensemble avec beaucoup de silence, chacun meditant en son esprit ses desseins à part; puis ils retournerent en la chambre où ils deuoient receuoir cet Amant. Aristide entretint quelque temps sa fille des discours qu'elle luy deuoit tenir, à quoy elle n'estoit pas resoluë de satisfaire entierement: puis il donna sa place à Maxime pour la combattre des mesmes persuasions, & alla trouuer Palamede pour le disposer à tesmoigner vn visage fort content. Tous s'entretenoient ainsi, attendant Marcelin qui tarδοit vn peu. Palamede disoit qu'il estoit bien seant à la grauité Romaine de se faire attendre. Quelques heures se passent

encore ; en fin Maxime impatient de ce qu'il ne venoit point, enuoya au logis de Martian : qui manda qu'il n'auoit point veu son fils depuis le iour precedent, & qu'il en estoit en peine. Aristide commence de s'estonner de cette humeur de Marcelin, qui negligeoit vne chose apres l'auoir tant souhaitée. Toutefois on n'en entendit aucunes nouuelles : chacun fit là dessus des iugemens differens ; mais pas vn d'eux ne pouuoit reconnoistre le sujet de cette action. Les gens de Marcelin tesmoignoient estre fort en peine de luy, & l'un d'eux dit que le soir precedent il l'auoit accompagné assez près du Tybre, que là il luy auoit commandé de s'en retourner, & qu'il ne sçauoit pas si durant les tenebres de la nuit il ne se seroit point noyé. La peur de son pere s'augmenta là dessus, & tout le iour d'apres se passa encore sans que personne peust apprendre ce qu'il estoit deuenu. Aristide auoit soubçon que son fils voulant empêcher ce mariage, & se vanger, l'auroit traité la nuit passée de la mesme sorte qu'il auoit esté traité par luy quand il fut laissé pour mort, & l'auroit fait jeter dans le Tybre : toutefois il n'osoit pas luy en rien tesmoigner.

Sur le soir Melinte, Palamede, Ariane, & Epicharis estant ensemble, & ne sçachant pas à quoy attribuer la cause de l'absence de Marcelin : que pouuons nous penser, dit Ariane, qu'il soit deuenu ? Pour moy, dit Melinte, ie croy qu'en quelque lieu qu'il soit, il brulle de l'amour d'Ariane. Il me suffit, dit Palamede, qu'il soit noyé. Il semble, reprit Ariane, que vous en sçachiez quelques nouuelles ? En verité, luy auez vous

vous voulu rendre la pareille ? Ils protesterent tous deux qu'ils n'auoient point songé à luy faire de mal. Il est vray, dit Palamede, qu'auant qu'il vous eüst espoufée, il eüst peu luy arriuer quelque chose de semblable ; mais ie n'auois pas creu qu'il en fust encore temps. Ariane adiousta, qu'il soit noyé, ou brulé, ou que la terre l'ait englouty, il m'importe fort peu, pourueu qu'il ne paroisse plus. Epicharis les ayant escoutez quelque temps, ne peût s'empescher de leur dire : Ie m'assure que ie deuineray mieux que vous trois. Et que penses tu, respondit Ariane, qu'il soit deuenu ? Ie m'imagine, dit-elle, qu'il n'est ny brulé, ny englouty, ny noyé : mais qu'à present il meurt de faim. Ariane croyant qu'elle voulust rire ; Et sur quoy, dit-elle, fondes-tu cette creance ? dites plustost, respondit-elle, assurance : Si vous voulez luy donner de quoy manger, ie vous meneray en lieu où il en a autant besoin qu'il en eut iamais. Ariane la pressa de luy dire ce qu'elle en sçauoit. I'ay peur, dit-elle, que vous foyez tous trois plus doux que moy : car ie l'ay condamné à mourir, & si ie vous descouure de quelle sorte, vous luy sauuez peut-estre la vie, pour perdre puis apres la vostre. Cela les rendit plus impatiens d'apprendre ce qu'elle en sçauoit ; & ils la presserent tellement qu'elle leur dit : Vous sçauiez qu'au bout du iardin de ce logis, en vn lieu assez reculé, il y a vne petite loge proche de la porte qui rend sur le Tybre. Marcellin attend Ariane en ce lieu depuis auant hier au soir, & ie vous puis assurer que iamais Amant n'eut tant d'impatience de voir sa Maistresse. Ils estoient si estonnez de cette nouuelle qu'ils furent quelque temps

Q

sans parler : mais Ariane desirant sçavoir comment elle l'auoit peu attirer en ce lieu : Vous sçavez , dit Epicharis , que vous me commandastes d'aller au Temple avec vos habits & vostre voile ; ce que ie fis , & Marcelin n'osant presque m'approcher , ie leuay vn peu le voile , sans qu'il me peust voir , & luy fis signe de la main qu'il vinst à moy ; mais au lieu de luy dire ce que vous m'auiez commandé , ie commençay ainsi en parlant assez bas. Marcelin , iusques icy ie ne vous ay tesmoigné que froideur , non pas que ie ne reconneusse l'honneur que vous me faites , mais pour satisfaire vn frere qui ne vous peut aimer , & qui ne consentira iamais que ie sois à vous : ie veux pourtant vous faire parestre l'affection que ie vous porte , & vous me tesmoignerez la vostre , si cette nuict vous venez seul chez nous par la porte qui regarde le Tybre ; là vous receurez des assurances de ce que ie veux faire pour vous ; & ie feray resoudre mon frere à consentir à ce que ie desire , quand ie luy auray fait voir que vous estes desia mon mary. Marcelin me fit mille remerciemens de tant de graces , & me promit de ne pas manquer à se trouuer à l'heure que ie luy auois donnée. Ie reuins du Temple , & ne voulus point vous dire ce que i'auois fait ; mesme i'auois peur qu'il ne se doutast de quelque malice , & qu'il ne vinst pas ; mais le soir m'estant eschappée de vous , ie l'allay attendre à cette porte , où ie ne faillis pas de le trouuer , & l'ayant fait entrer ie luy dis que i'auois charge d'Ariane de le mettre en cette loge , en attendant que son pere ; & les autres , fussent endormis , où ie l'enfermay si bien que depuis il n'en est pas sorty : mesmes i'auois pris la clef

du iardin, de peur que quelqu'un allant de ce costé ne l'entendist crier; & i'auois resolu de l'y laisser mourir de faim, pour luy faire payer la tromperie, & la meschanceté qu'il vous fit dans le Temple, & pour vous deliurer de peine, comme ie croy aussi que vous le deuez faire; car cét homme vous causera en fin mille malheurs, & vous pouuez vous vanger tous trois des maux qu'il vous a faictz: il nous sera aisé apres de le ietter dans le Tybre, & iamais on ne sçaura qui l'aura ainsi traité, si quelqu'un de nous ne le descouure. Ils se estonnerent de son inuention, admirerent sa hardiesse, & la simplicité de Marcelin, mais ils trouuerent sur la fin trop de rigueur. Maintenant, dit Epicharis, vous en ferez ce qu'il vous plaira: l'ay rendu le seruice que ie deuois à ma Maistresse, & à vous; & pour le moins i'ay rompu le coup que vous apprehendiez tant. Ils se trouuerent alors bien empeschez pour laisser aller Marcelin, & le contenter ensemble; ne voulant pas le perdre, & redoutant aussi sa fureur lors qu'il seroit echappé. Je voy bien, adiousta Epicharis, qu'il faut que ie vous sauue du danger où ie vous ay mis, & que i'attire sur moy toute sa haine, puis qu'il vous plaist qu'il viue. Laissez moy donc aller, ie racommoderay bien l'affaire, ie feray qu'il n'aura soupçon que de moy, & iamais ne vous tourmentera. Melinte fut d'auis que l'on luy laissast cette conduite: pource qu'elle auoit l'esprit fort aduisé, & elle s'en alla à l'heure mesme vers la loge, où ayant ouuert à Marcelin, puis l'ayant conduit hors du logis, tout passe, & debile de ses ieunes, tenant la porte entr'ouuerte, elle luy dit, Sçachez que c'est Ariane qui vous donne la vie, & que c'est moy

seule qui auois resolu de vous la raur pour tant de peine que vostre recherche luy a donnée. Elle estoit resoluë de mourir plustost que de vous espouser, & i'ay bien mieux aimé que vous mourussiez qu'elle : car ç'a esté moy qui vous ay parlé sous le voile sans qu'elle le sceust, & vous ay donné l'assignation où vous vous estes rendu si facilement. L'auois fait dessein de ne vous tirer iamais d'icy viuant : mais lors que ie luy ay appris mon artifice, elle a voulu vous pardonner, à la charge que vous ne l'importunerez iamais ; vous le deuez faire si vous aimez vostre vie : car assurez vous que ie ne manqueray, ny d'inuention, ny de courage pour vous perdre, s'il vous arriue iamais de la tourmenter. Marcelin plein d'estonnement, & de debilité, l'ayant laissé dire quelque temps, faillit à entrer en furie contre cette fille, & luy eust volontiers arraché les yeux, & la vie, s'il eust eu plus de force pour pousser la porte : mais elle la ferma avec violence, le laissant dehors tout enragé, & vint aduertir Ariane de ce qu'elle auoit fait : que iamais elle n'auroit desplaisir de ce costé, & que toute la haine estoit tombée sur elle, dont elle se soucioit fort peu. Palamede & Melinte virent bien qu'ils estoient garentis de la recherche de Marcelin ; mais non pas de sa fureur, se doutant bien qu'il seroit sorty de là avec autant de desir de se vanger que de faim : toutefois le mal present estant éuité, il falloit se tenir sur ses gardes pour l'aduenir. Le lendemain l'on sceut qu'il estoit de retour en sa maison ; mais lors qu'on luy demandoit quel voyage il auoit fait pendant trois iours, il ne respondoit rien, tant il auoit de honte d'auoir esté si cruellement trompé par vne fil-

Je. Aristide ny Maxime , n'entendirent plus parler de luy, & tout son esprit s'employa à mediter quelle prompte & cruelle vengeance il pourroit prendre de tous ces Estrangers , auant qu'ils s'en retournassent en Sicile.

Fin du troisieme Livre de l'Ariane.







LE
 QVATRIESME
 LIVRE DE
 L'ARIANE



MELITE outrée d'affliction de ne voir plus Melinte, & connoissant que son mal n'estoit qu'un pre-
 texte pour ne la point visiter, commença à s'appercevoir de son mal-
 heur, & qu'il n'auoit entrepris sa recherche que pour fau-
 riser celle de Palamede : son a-
 mour ingratement reconnuë, sa
 beauté mesprisée, tant de quali-
 tez recommandables negligees, & toutes ses soigneuses
 assistances mises en oubly, assaillirent son esprit de tant
 de douleur, de de'pit, & de honte, qu'elle n'y peût resi-
 ster. La feinte maladie de Melinte luy en causa vne ve-
 ritable, & on eut nouuelle au logis de Maxime qu'elle

estoit à l'extremité, & peu de iours apres qu'elle estoit morte. Palamede vouloit aller visiter Camille pour la consoler : mais Melinte, bien qu'il eust vn extrême regret de cét accident, l'en diuertit, de peur qu'il ne s'engageast encore avec elle, & que cela n'apportast du retardement au dessein qu'ils auoient de partir, & il luy promit de satisfaire pour tous deux à ce deuoir enuers Camille quelques iours apres.

Mais comme innocemment ils caufoient du mal-heur aux autres, on se preparoit aussi à rendre leur innocence bien mal-heureuse. Marcelin ne voulant pas les laisser aller sans leur auoir fait sentir les effects de sa rage, commença de vanter à Neron la beauté d'Ariane, & luy en dit tant de merueilles, qu'il luy fit naistre le desir de la voir; puis luy ayant fait sçauoir qu'elle estoit d'une humeur trop retenue pour se donner à l'Empereur, & seruir à ses plaisirs; d'autre costé qu'elle ne sortoit iamais, & qu'il seroit difficile de l'enleuer, il luy fit desirer d'auantage la possession de cette Belle par ces difficultez: mais lors qu'il luy dit qu'elle estoit sœur de Palamede, & qu'ils logeoient ensemble avec Melinte, l'Empereur se ressouuint du sujet qu'il auoit de se vanger de ces deux amis, à cause de l'offence qu'il croyoit auoir receüe de Melinte, & de la blesseure qu'il auoit eüe la nuit du combat dont il portoit la marque en la main. Marcelin voyant le Prince dans ces ressentimens, luy dit, qu'il auoit trouué vn excellent moyen pour se vanger de Melinte, & de Palamede, & auoir Ariane. Il adiouta qu'il falloit la nuit mesme mettre le feu de tous costez en la maison où ils logeoient, & lors qu'ils penseroient sortir sans songer à autre chose qu'à se sauuer de la flamme, il seroit
aisé

aisé de les mettre au fil de l'espee dans le tumulte , & de ravir Ariane. Neron qui n'aimoit rien tant que ces inuentions furieuses, receut celle-cy avec ioye , & en loüa beaucoup Marcelin, qui prit la charge dès l'heure mesme de disposer des gens alenrour du logis , afin que pas vn d'eux ne peust elchaper. Cette resolution fut bien funeste à la ville de Rome : car la nuit estant venuë, lors qu'il creut que chacun estoit assoupy de sommeil, luy-mesme tenant vn flambeau en la main, le mit sous la porte de Maxime, & donna l'exemple aux autres d'en faire par tout de mesme. Incontinent le feu s'alluma avec tant de violence à cette maison, & en suite à toutes celles de la ruë, qu'il creut que iamais aucun d'eux ne sortiroit de là, & qu'ils seroient tous embrasez. Et de fait, lors qu'ils s'eueillerent, toutes les chambres estoient pleines de fumée; tout ce qu'ils peurent faire, fut de sortir avec leurs habits qu'ils prirent à la haste, & de se sauuer dans le jardin, attendant le remede que l'on pourroit donner à cét accident. Palamede & Melinte eurent soin de conduire Aristide & la belle Ariane, qui dans cét effroy laissa voir à Melinte des beautez, qu'à peine son imagination luy pouuoit représenter si parfaites. Le petit Damis ieune Esclaue de Maxime vint aduertir son Maistre qui estoit parmy eux, que se mettant à la fenestre il auoit apperceu vn homme qui tenoit vn flambeau en la main, & qui mettoit le feu à l'vn des costez du logis : cela les fit douter qu'il y auoit quelque trahison, & ils en eurent encore plus grande asseurance, lors que du costé du Tybre l'on entendit crier deux Esclaues de Maxime que l'on tuoit, qui estoient sortis pour aller querir de l'eau au fleuve. Melinte & Palamede sortirent pour les secourir, mais ils le trouuerent

assaillis par dix ou douze soldats, avec tant de furie, que le meilleur expedient fut de rentrer dans le logis en se deffendant. Melinte iugea qu'il n'y auoit que Marcelin qui peust estre autheur d'une si espouventable meschanceté : & ne sceut à quoy il se deuoit resoudre, voyant qu'ils estoient enuironnez de feu de toutes parts, & vne mort certaine, soit qu'ils demeurassent, soit qu'ils sortissent. Il regarda Ariane les larmes aux yeux, & outré de douleur qu'une beauté si accomplie perist d'une mort si cruelle, s'approcha tristement d'elle, & luy dit ; Madame, en quel mal-heur sommes nous reduits ? & comment le Ciel a-t'il permis que toutes les furies ensemble nous vinsent attaquer, pour rendre nostre perte ineuitable ? Est-il possible que ie ne puisse par quelque effort, ou mesme par ma perte, garentir vostre vie ? & ne puis-ie auoir au moins cette ioye en mourant, de vous voir hors de ce danger ? Melinte, respondit-elle, n'esperez de moy ny conseil, ny consolation : cét accident me trouble tellement qu'il ne me laisse que les pleurs & les plaintes : mais s'il est vray que Marcelin soit chef de cette conspiration, j'aine bien mieux mourir avec vous, que de furuiure, & de tomber entre ses mains. Puisque les Dieux ont souffert ce mal-heur, ie les prie qu'il ayt son cours entier, plustost que de me reseruer en vie apres vous, pour estre exposée à l'insolence de ces desesperes. Madame, reprit-il, ie ne sçauois croire que nous soyons destinez à vne fin si mal-heureuse, ny que les Dieux nous ayent tellement abandonnez : & bien que le feu semble de tous costez fermer le passage à l'esperance, le chemin du Ciel, d'où le secours nous peut venir, est encore libre. Esperons encore, Madame, & mode-

rez vos pleurs & vos plaintes, cependant que ie vay voir par quel moyen nous pourrions nous sauuer, & si quelque Dieu ne m'inspirera point ce que nous deuons faire en cette extremité. Elle ne luy respondit qu'avec vn soupir, & Melinte luy ayant baisé la main, la laissa, cachant ses larmes le mieux qu'il pouuoit, puis il regarda de tous costez, & apres auoir cherché en vain mille inuentions en son esprit; en fin passant par l'escurie, il s'aduisa de monter sur le plus fort & le plus viste de ses cheuaux. Il aduertit aussi Palamede, & les autres, de prendre ce qu'il y auoit de cheuaux, & apres auoir couuert la teste d'Ariane d'un linge, de peur que le feu ne l'offensast, il la prit doucement entre ses bras, & faisant ouuir les portes mit l'espée à la main. Alors donnant de l'esperon à son cheual il partit avec furie, & apres auoir abbatu d'un coup d'espée le bras d'un soldat qui luy voulut saisir la bride, il se sauua à la course, emportant cette chere Ariane au trauers des hommes armez, & des flames qui deuoroient desjà toutes les maisons voisines. Marcelin voyant passer Melinte qui tenoit Ariane, & qu'il n'auoit pû arrester, encore qu'il se fust ietté au deuant de luy, & qu'il eust animé les autres à le tuer, fut desesperé de voir qu'estant à pied il ne le pourroit atteindre: & se retournant il vid Palamede son principal ennemy, qui à l'exemple de Melinte vouloit sortir, emportant son pere; mais ils se serrent tellement pour l'en empescher, que Palamede voyant qu'il luy estoit impossible de les forcer, estant chargé du corps pesant de son pere, rentra, & donna Aristide à Hermes l'un des siens: puis ayant soigneusement recommandé à Arcas de sauuer Epicharis, il leur donna charge de le sui-

ure aussi tost qu'il se seroit fait vn passage avec son espée. Il prit vn bouclier, & en ressortant s'attaqua aux plus resolus de ceux qui le vouloient arrester, & les chargea avec telle furie, que de deux coups qu'il porta, il en abbatit deux à ses pieds; les autres le soustindrent avec beaucoup de resolution, & il eut bien de la peine à parer tous leurs coups: mais en fin se meslant parmy eux, il les mit tellement en desordre, qu'il donna le temps à Hermes de sortir & de sauuer Aristide: Arcas emporta aussi Epicharis, & les autres prenant le reste des cheuaux, sauuerent avec eux ce qu'il y auoit de plus precieux. Palamede voyant qu'ils estoient assez esloignez, se démesla de ses ennemis, & partit au galop apres eux.

Marcelin enragé de voir les meschans desseins ainsi ruinez, frapport les siens mesmes en les accusant de lascheté, lors qu'il vid passer vn Esclaue d'Aristide qui estoit party plus tard que les autres, ayant trouué en fin vn cheual apres beaucoup de peine: il luy donna de son espée sur la teste, & l'estendit sur la place. Alors montant sur son cheual il suiuit ceux qui se sauuoient, & donna charge à ses compagnons de trouuer des cheuaux, & d'estre bien tost à luy pour le soustenir.

Melinte ne trouuant aucune seurété dans la ville qu'il voyoit toute en feu, & pleine de ses ennemis, estoit sorty hors les portes; & se voyant en pleine campagne, ne pouuoit se plaindre de cét accident qui luy donnoit la faueur d'oser embrasser sa belle Ariane, qui le serroit aussi doucement de peur de tomber. Elle estoit demeurée si estourdie par la viffesse de la course, que Melinte ayant remis son espée au fourreau, & luy ostant le linge qui luy couuroit la teste, la trouua qui sembloit auoir perdu

route connoissance : mais iugeant que cela ne prouenoit que d'estonnement, & voyant sa belle gorge descouverte, pource que le mouchoir qui la cachoit estoit tombé par la violence du mouuement, il n'employa pour la faire reuenir que les doux & chastes baisers qu'il donnoit, tantost à cette gorge merueilleuse, tantost à ses yeux diuins, & à sa belle bouche. Il se palmoit dans ces plaisirs, puis plein de respect il s'accusoit de temerité, de desrober ces faueurs dont en vn autre temps il osoit à peine conceuoir le desir : & aussi tost auant que d'auoir resolu s'il manquoit, ou non, emporté par la puissance de ces admirables objets, il les rebaisoit avec tant de rauissement, qu'en cet estat la perte de son iugement excusoit celle de son respect; & ses sens occupez apres vne faute si douce, se mocquoient de sa raison, dont la seuerité charmée consentoit à leurs larcins, & ne refusoit pas de prendre part à ces delices.

Ariane apres vn grand soupir, ouurant en fin les yeux, bannit d'vn seul regard toutes les libertez de Melinte, & remit en leur place le respect aussi grand que iamais : puis elle luy dit ; Helas ! Melinte, où sommes nous ? Nous sommes, respondit il, en seureté : le suis seulement en peine d'Auillide & de Palamede, & si ie ne craignois de vous abandonner, ie retournerois pour les secourir. Lors qu'il parloit ainsi il apperceut à la clarté de la Lune & des flammes, vn homme qui couroit apres luy, qu'il iugea estre de leur troupe; de sorte que descendant de cheual, & mettant sur des gazons la douce charge qu'il portoit, il la pria de se reposer, attendant que les autres fussent venus. Ils commençoient à considerer cette grande ville embrazée, & à s'estonner de cét

accident, lors que voyant approcher celui qui les suiuoit, Melinte reconnut que c'estoit Marcelin: aussi tost remon- tant à cheual de peur d'estre surpris de son ennemy. Ah! traistre, dit-il, oses-tu bien en fin t'attaquer seul à moy? Marcelin, sans luy respondre, s'en vint droit à luy & luy porta vn coup d'espée; Melinte l'éuita, donnant du talon à son cheual, & gagnant aussi tost la croupe pensoit plonger son espée dans les reins de Marcelin: mais elle se rompit ayant rencontré des armes sous sa casaque. Je m'estonnois bien, dit-il alors, de ta vaillance, mais cela n'empeschera pas que ie ne paye tes trahisons: & voyant que Marcelin ne pouuoit manier son cheual à son gré, il mit pied à terre, & en mesme moment sautant en croupe, luy saisit le bras de l'un des siens, & de l'autre vouloit luy enfoncer dans la teste ce qui luy restoit de son espée: Mais Marcelin se debattant, Melinte fut contraint de se laisser couler en bas en le renuersant, & l'ayant estendu sur la terre luy arracha son espée: Il alloit le tuer, mais en mesme temps il entendit Ariane qui l'appelloit à son secours.

Cette belle auoit veu le commencement de ce combat, assez esperduë, mais bien qu'elle iugeast que si Marcelin demeueroit vainqueur, elle tomberoit entre ses mains, toutefois se fiant en la valeur de Melinte, elle ne pouuoit se resoudre à s'esloigner. Mais quand elle vid son espée rompuë, elle tomba esuanoüye, & elle ne fut pas plustost reuenue qu'elle se vid entre les bras d'un soldat qui estoit descendu de cheual pour l'emporter. Ce fut alors qu'elle appella Melinte; & cette voix qui demandoit secours fut en mesme temps secourable; pource que Melinte regardant où elle estoit, vid derriere luy deux hom-

mes à cheual qui l'alloyent tuer. Il se releua aussi tost, & soustint le premier ayant l'espée de Marcelin en vne main, & le reste de la sienne en l'autre.

Iamais homme n'eut tant de colere & de douleur ensemble. Il eust desiré se defendre de ceux-cy, & secourir en mesme temps Ariane; mais voyant qu'il ne pouuoit la sauuer que par la mort de ceux qui l'attaquoient, il donna vn tel coup à l'vn, que sans qu'il estoit armé, il luy eust separé l'espaule du corps; toutefois l'espée entra dans la cotte d'armes bien auant. Le second s'auança sur luy, & pensoit luy donner dans le ventre, mais Melinte para de la garde qu'il auoit en la main gauche, & en mesme temps luy porta vn coup au dessous de la cuirasse, & le fit tomber mort de son cheual. Celuy qu'il auoit frappé le premier, l'attaqua par derriere, & Melinte ne sceut si bien faire qu'il ne fust vn peu blessé à l'espaule; mais en se retournant, il donna d'vn reuers sur la teste du cheual, & l'ayant fait cabrer, il prit son temps, & poussa son espée dessous la cuisse de ce dernier, & la plongea iusques dans ses entrailles: ce mal-heureux tombant à la renuers se rompit le col, & cette cheute estouffa sa vie qui s'écouloit desia de tous costez avec son sang.

Melinte se voyant deliuré de ces deux hommes, & n'ayant auprès de luy que Marcelin viuant, qui auoit de la peine à reuenir de l'estourdissement de sa cheute, il negligea de l'acheuer de tuer pour courir deuers Ariane, qui auoit iusques-là empesché avec mille efforts que ce soldat ne la mist sur son cheual pour l'enleuer. Melinte luy cria de loin: Insolent, veux-tu pas laisser cette Dame que tu es indigne de toucher? mais celuy-là le voyant venir à luy, & le voulant preuenir, laissa Ariane pour remonter

à cheual, & aussi tost donnant del'esperon poussa deuers luy croyant le renuerſer. Melinte ſe deſtourna legèrement, & en paſſant luy fendit le bras gauche d'vne bleſſure ſi grande, qu'il emplissoit de ſang toute la place par où il couroit.

En meſme temps Marcelin recourant la force & le courage, ſe leua, & prenant l'eſpée d'un des morts, vint ſeconder celuy que Melinte auoit bleſſé, & pluſtoſt plein de rage que de reſolution, ſe rua ſur luy. Melinte meſnageant ſes forces & l'auantage qu'il auoit, après auoir paré deux ou trois coups, luy en porta vn dans la cuiſſe, & alloit redoubler lors que celuy qui eſtoit bleſſé ſe vint mettre entre deux pour garantir la vie de ſon Maistre: mais il paya de la ſienne, pource qu'il receut le coup que Melinte enfonça ſi auant qu'il enferra ſon eſpée dans ſes armes. Cét homme en mourant laiffa aller les reſnes de ſon cheual, qui ſ'enſuit, & Melinte ne voulant point quitter ſon eſpée, le ſuiuit, & en fin la retira avec peine, & de la violence avec l'eſtourdiſſement où il eſtoit, il tomba à la renuerſe.

Cependant Marcelin qui ſentoit diminuer ſes forces, voyant Ariane immobile, & troublée de tant d'apprehenſions, alla deuers elle l'eſpée au poing pour la tuer, afin que s'il mouroit, vn autre ne iouiſt point de ſes Amours. L'arriuée de ce furieux, & la lueur de l'eſpée reſveillerent les ſens eſperdus d'Ariane, & luy donnerent des aiſles pour courir deuers Melinte, qu'elle appella à ſon ayde; c'eſtoit au meſme temps qu'il eſtoit tombé, & Marcelin eſpera encore de le vaincre, croyant qu'il fuſt bleſſé; toutefois Melinte ſe redreſſa, & ce fut alors qu'ils recommencerent vn combat ſeul à ſeul, & plus é-

gal, encore que Marcelin fust armé, pource que le sang qui couloit par sa playe diminueoit cét aduantage.

Iusques là Melinte n'auoit combattu que pour sauuer sa vie, mais alors il vangeoit les iniures d'Ariane, & ce desir l'animant avec la presence de cette Belle, il croyoit voir bien tost la fin de cette auanture : aussi ayant paré quelques atteintes que luy porta Marcelin, il le renuersa d'un coup de toute sa force, avec lequel il luy fendit la teste. Vn autre soldat suruint qui couroit à toute bride, & Melinte lassé de tant de travaux, creut que iamais ce combat ne finiroit, & qu'il auroit bien de la peine à se deffendre de tous ceux qui luy viendroient ainsi sur les bras : toutefois il se resolut de l'attendre ; mais ce dernier voyant son courage, & tant de morts autour de luy, s'enfuit aussi viste qu'il estoit venu, & deliura en mesme temps Melinte de tant de peines, & Ariane de toutes ses apprehensions. Melinte ne voulut pas frapper dauantage Marcelin, voyant qu'il ne donnoit aucun signe de vie, & remerciant les Dieux de ceste victoire, essuya l'espée de Marcelin, & prenant le fourreau la mit à son costé.

Ariane respirant alors à son aise, considera Melinte, & l'admira de ce qu'apres auoir couru tant de dangers, & acquis tant de gloire, il pareissoit avec vne assurance si modeste, & vn visage qui n'estoit troublé d'aucun estonnement. Mais tout d'un coup elle vid qu'il passiffoit, & ayant peur qu'il ne fust blessé à mort, pource qu'il estoit tout couuert de sang, elle le soustint, & luy demanda s'il ne sentoit point quelque blessure. Madame, dit-il, ne craignez pas pour me voir plein de sang : ce n'est pas du mien, mais de coluy de mes ennemis; toute-

fois, en parlant ainsi, il se sentit luy mesme deffail-
 lir, & avec l'aide d'Ariane il se coucha doucement à
 terre.

Le sang qui couloit de l'espaule de Melinte fit bien
 tost retirer celuy des ioües d'Ariane, qui pleine de crain-
 te, & de soin le despoüilla aussi tost en cét endroit, &
 trouua vne playe, qui pour sa petitesse iettoit assez de
 sang: elle rompit son mouchoir, & avec beaucoup de
 peine en arresta le cours: puis le lia en sorte qu'il n'y
 auoit plus sujet de craindre.

Cependant qu'elle estoit occupée à ce triste deuoir,
 que Melinte receuoit avec vn grand respect, ils enten-
 dirent des cheuaux, & tournant la teste virent dix ou dou-
 ze hommes à cheual qui venoient encore à eux. Melinte
 sans s'estonner luy dit: Madame, quittez ce soin inuti-
 le, & duquel ie suis indigne; ie voy bien qu'il me faut
 mourir; mais ie veux que ce soit en vous deffendant
 iusques au dernier soupir. Seulement, Madame, souue-
 nez vous. La parole luy faillit en cét endroit, ne sça-
 chant comment il se deuoit descourir. Ariane viue-
 ment touchée d'une passion si respectueuse, & ne pou-
 uant resister à des coups de mal-heur si sensibles, se pas-
 ma de douleur: & apres auoir dit; Ah! Melinte, il per-
 dit la parole & la veü.

Cét Amant desolé croyant luy donner le dernier bai-
 ser, approcha sa bouche de celle d'Ariane, puis ramas-
 sant ce qui luy restoit de force & de resolution, la quit-
 ta en ce mal-heureux estat, pour remonter à cheual, ce
 qu'il fit avec peine: & plein de confusion & de defes-
 poir, alla l'espée à la main chercher vne mort assurée
 parmi ceux qui s'approchoient. Son arriüee ne les eston-

na nullement, & Melinte voyant qu'ils ne faisoient pas seulement estat de se deffendre, s'arresta, & les regardant avec moins de trouble, apperceut que c'estoient Aristide, Palamede, & le reste de leur troupe.

La ioye qui vint occuper tout à coup son ame, eut vn grand combat à l'entrée, avec toutes les afflictions qui la possedoient: toutefois elle en demeura maistresse, & luy faisant sentir ses douceurs luy laissa la liberté d'embrasser Palamede, à qui il conta son erreur & sa resolution. Puis ils coururent deuers Ariane, laquelle reuenant d'elle mesme de son esuanoüissement, vit en mesme temps esuanoüir ses douleurs par vne si chere veüe.

Après la commune resioüissance de s'estre heureusement retrouuez, Palamede s'estonna de voir tous ces morts avec leurs armes, & Marcellin mesme. Ariane luy fit recit de l'extrême valeur de Melinte, qui les auoit tous tuez avec vne force & vne adresse admirables; & quand ils eurent rendu les louanges deuës au courage de Melinte, ils iugerent tous que c'estoit vne punition des Dieux, que Marcellin fust venu chercher ainsi son mal-heur avec tant de haste.

Aristide qui ne sçauoit pas le sujet de sa rage, ne pouuoit penser ce qui l'auoit porté à tant de meschancetez: & se tournant deuers la ville, qui sembloit toute embrazée, ne cessoit de plaindre cette desolation, qui pareissoit encore plus effroyable dans l'horreur de la nuict. Mais ils iugerent qu'il falloit s'esloigner de ce lieu, & gagner la forest prochaine, de peur d'estre pris pour des meurtriers: que dans quelque lieu reculé ils passeroient tout le iour, de peur d'estre suiuis, & attendroient l'autre

nuict, pour gagner le port d'Ostie, & de là faire voile en Sicile. Ils se servirent des cheuaux de ces morts, sur l'un desquels ils mirent Aristide & Ariane, puis firent encore environ trois milles de chemin, pendant lequel Melinte & Ariane sceurent ce que Palamede auoit tesmoigné de valeur pour fauoriser la sortie de son pere & des autres; & le iour s'approchant ils entrerent dans la forest, où s'enfonçant dans vn lieu fort esloigné & obscur, ils resolurent d'y passer le iour.

Melinte, Palamede, & les autres accommoderent quelques lieux avec des manteaux & des branches pour se reposer; & le iour donnant moyen à Ariane de les considerer l'un apres l'autre, elle apperceut Epicharis qui auoit tous les cheueux bruslez; elle en fut marrie, & ne se pût toutefois empescher de rire. Epicharis s'en consoloit aisément, estant bien contente que tout le mal-heur fust réduit à ceste perte, & là dessus chacun commença à conter son auanture. On n'en trouua qu'un à dire, qui auoit esté tué par Marcelin: puis on pourueut aux choses necessaires, & ils enuoyerent vn Esclau au port pour leur arrester vn vaisseau, & Arcas, avec vn autre, au village prochain pour leur apporter des viures.

Sur le midy, Melinte & Palamede furent d'auis d'aller recognoistre les sentiers de la forest, afin de trouuer aisément le chemin pour faire leur retraitte la nuit, & n'estre pas reduits à errer incessamment; pource que la Lune se deuoit leuer assez tard. Arcas qui n'abandonnoit iamais son Maistre, le suiuit, afin de pouuoir mieux remarquer ensemble les destours, & s'en souuenir: Mais lors qu'ils eurent tout demeslé, & qu'ils furent hors du bois, ils apperceurent vne troupe de gens à cheual qui

venoient à eux, & retournoient deuers Rome. Ils furent contrainsts de se remettre à l'entrée du bois pour les laisser passer sans estre veus, & lors qu'ils furent fort près ils entendirent l'un d'entr'eux qui dit assez haut : Il faut de necessité que nous n'ayons pas pris le chemin qu'ils ont tenu, car nous en eussions eu des nouuelles: celuy qui a tué Marcelin & les autres, est vn homme assez remarquable, & a cette femme avec luy que nous deuions mener à l'Empereur : mesme lors que ie voulois vanger la mort de Marcelin & de mes compagnons, trois ou quatre hommes se sont ioints à luy qui m'ont obligé de, me sauuer.

Cet homme parloit trop clairement pour faire douter à Melinte si c'estoit luy que l'on cherchoit. Nous sommes perdus, dit Palamede, s'ils nous trouuent. Melinte luy fit signe de ne point faire de bruit, & de les laisser passer: mais le cheual de Palamede mal-heureusement se mit à hannir, & quelques vns de cette troupe voulant sçauoir ce que c'estoit, s'auancerent, & ayant reconnu que c'estoient trois hommes à cheual qui à leur abord se vouloient sauuer, ils appellerent leurs compagnons pour les suivre.

Melinte desesperé d'auoir esté descouuert, & d'estre reduit à fuir, dit à Palamede qu'il falloit aller par vn chemin tout contraire à celuy où estoient Aristide & Ariane, pource qu'on la cherchoit : leurs cheuaux estoient meilleurs que ceux qui les suiuoient, de sorte qu'ils s'esloignerent bien tost: Mais les autres estant en grand nombre, se separerent en diuerses troupes pour les enfermer, s'ils ne vouloient point sortir du bois; & ils ne furent pas trompez, pource que ces amis se rencontrant en vn che-

min qui se separoit en deux branches, Melinte & Arcas prirent par hazard vn sentier en courant, & Palamede l'autre, lequel croyant se reioindre bien tost à Melinte, fut surpris par quatre ou cinq soldats qui luy couperent chemin, & qui apres auoir soustenu sa premiere fureur le mirent hors d'espoir d'eschapper de leurs mains.

Melinte qui estoit hors de tout peril, entendant de loin ce bruit, se doura du mal-heur de son amy, & resolu de l'aller secourir, commanda à Arcas de se sauuer cependant qu'il s'en iroit à luy, & d'aller aduertir Aristide, & Ariane que c'estoit elle que l'on cherchoit, & qu'ils se gardassent bien de sortir du lieu où ils estoient que quand la nuit seroit venue; qu'alors il le chargeoit, quand mesmes il n'auroit point de leurs nouuelles, de les conduire hors du bois par les endroits qu'ils auoient remarquez, & de là droit au port, & de s'embarquer avec eux le plustost qu'il seroit possible pour aller en Sicile. Mon Maistre, dit Arcas, ne me commandez point de vous quitter, ie ne puis vous obeir avec tant de lascheté. Arcas, respondit Melinte, assure toy que tu ne me sçauois faire vn plus grand seruice que celuy que ie desire de toy: Si nous ne retournons deuers eux dans peu de temps, tu leur diras que nous auons esté arrestez par ces soldats qui nous ont pris pour nous mettre entre les mains de la iustice, de laquelle nostre innocence nous sçaura bien garantir: & sur tout n'abandonne point Ariane. Adieu, mon cher Arcas, dit-il en l'embrassant, puis il partit au galop, & alla vers le costé où il entendoit le bruit.

Ce pauvre seruiteur ne pouuoit se resoudre à le quitter, & le suiuiot encore, mais Melinte tournant la teste,

& l'apperceuant luy cria: Sçais tu bien Arcas, que tu me donnes la mort, & que si tu me suys dauantage ie ne seray pas viuant dans vne heure? Arcas fut ainsi contraint les larmes aux yeux de laisser son Maistre; qui arriua bien tost au lieu où estoit Palamede, enuironné de cinq ou six soldats à cheual, qui luy crioient qu'il se rendist, apres auoir veu deux de leurs compagnons estendus de sa main sur la place. Palamede s'estoit mis dans vn fort du bois, où il ne pouuoit estre surpris par derriere, & se deffendoit par deuant avec beaucoup de courage. Melinte l'ayant apperceu en ce danger, mit l'espée à la main, & entrant parmy eux se ioignit à son amy apres auoir abbattu l'espaule d'un soldat qui l'empeschoit de s'approcher de luy. Palamede se voyant fortifié de ce secours, redoubla ses coups, & Melinte en ayant blessé deux à mort, & ne croyant pas que les autres peussent leur resister, esperoit s'en deffaire bien tost, sans l'arriuée de dix ou douze soldats qui vindrent de tous costez les enuironner.

Leurs forces diminuoient, & leurs ennemis croissoient, car le nombre de ceux qu'ils mettoient à mort, estoit bien tost remply par ceux qui suruenoient: toutefois le grand courage de Melinte ne luy permit pas de desesperer, & s'animant d'une iuste colere, il en abbatit vn à ses pieds d'un reuers qu'il luy donna par le milieu du corps, au dessous du bras qu'il auoit leué pour le frapper: de là poursuiuant le premier qu'il rencontra il luy fendit le front, & le sang qui luy coula en abondance sur les yeux l'auueugla, & le mit hors de combat. Palamede rappelloit ses forces, pour seconder Melinte, & voyant un soldat qui auoit pris à deux mains son espée pour luy

fendre la teste, il le preuint, & d'un seul coup abbatir ses mains, & son espée, qui allerent inutilement frapper la terre. Cét homme, emporté par son cheual, & n'ayant plus de quoy retenir la bride, fut aussi tost renuersé, & tombant sur le visage, trouua à dire pour le garantir, les mains secourables qu'il venoit de perdre. Melinte d'un autre costé voyant deux de leurs ennemis qui le pressoient le plus, se mit au milieu d'eux, & haussant le bras pour frapper à plein celuy qui estoit à main gauche, & le voyant en desfiance, changea de dessein, & laissant aller un grand reuers, fendit la teste à celuy qui estoit à main droite, ayant enuoyé d'un seul coup la peur à l'un & la mort à l'autre. Celuy qui s'attendoit d'estre atteint, fermoit les yeux, & mettoit son espée au deuant de sa teste, & son cheual l'emportant en mesme temps, il ne vit pas une branche qui le renuersa: toutefois se releuant, & voyant Melinte qui retournoit à luy, il perça les flancs de son cheual, & l'estendit mort à terre. Palamede voulut le secourir, mais en mesme temps un soldat voyant ce qui estoit arriué à Melinte, tua aussi son cheual, ayant creu que c'estoit le seul moyen pour en venir about: tout ce qu'ils peurent faire, ce fut de n'estre pas accablez sous la cheute, & de se desgager pour combattre à pied: mais quelque vaillance qui fust en eux, les autres leur eussent bien tost passé les cheuaux sur le ventre, sans qu'il en suruint deux qui crierent qu'on ne les tuast pas, & qu'il falloit les mener prisonniers à Rome. Ce commandement arresta la furie de tous ces hommes qui estoient animez à se vanger, & fit resoudre Melinte & Palamede à se rendre.

Cependant Arcas alla porter à Aristide les tristes nouvelles


nelles du mal-heur de son fils & de Melinte. Aristide se mit aux plaintes & aux pleurs : mais Ariane tomba de douleur entre les bras de sa chere Epicharis, & lors que cette troupe desolée eut fait mille regrets, d'estre reduite à se cacher au lieu de les secourir, en fin quelques vns furent disposez pour faire sentinelle. Aristide lassé de travail, abbatu d'ennuy, & qui n'auoit point reposé la nuit precedente, s'endormit : mais Ariane qui auoit vn peu sommeillé le matin dans ce bois, & qui auoit bien d'autres soins, se retirant vers le lieu que Melinte luy auoit accommodé luy-mesme avec des branches, se coucha sur les genoux d'Epicharis, & fondant en larmes ne pouuoit receuoir aucune consolation.

Cette fille la voulut accuser de trop de foiblesse, & la pria de se donner du repos, mais elle luy dit : Cesse, ma chere fille, de me vouloir consoler : si tu scauois les pertes que ie fais, tu plaindrois autant que moy ma fortune. Il n'y a rien, dit Epicharis, de desesperé. Arcas vous a dit que l'on n'en vouloit point à leur vie, & qu'on les vouloit prendre seulement prisonniers. Et crois-tu, dit Ariane, que l'on n'aura pas voulu vanger la mort de ceux qu'ils ont tué en se deffendant ? & alors vn torrent de larmes luy empescha la parole. Je scais bien, dit Epicharis, que vous n'aimez rien tant au monde que ce frere. Tu le scais, interrompit-elle, mais tu ignores combien l'autre personne que ie perds avec luy, m'est chere ; & cette double perte fait que ie ne puis auoir assez de larmes pour te représenter ma douleur.

Epicharis vn peu estonnée la laissa quelque temps pleurer, puis elle reprit ainsi ; Madame dans vostre affliction i'ay quelque sorte de ioye, d'apprendre la verité d'vne cho-

se que j'ay toute ma vie souhaitée avec passion : car j'ay tousiours pensé que rien que vous n'estoit digne de Melinte, & que Melinte seul estoit digne de vous. Les Dieux sans doute favoriseront vne amitié si discrete & si vertueuse, & ne permettront pas que vous soyez long temps separez. Helas ! Epicharis, dit Ariane, que ie preuoy de mal-heurs si vne fois ie retourne sans luy en Sicile : & toutefois il me l'ordonne, ayant mieux aimé mourir que de me voir entre les mains de ces infames raiisseurs. Car assure toy, Epicharis, que iamais affection ne fut si parfaite, ny si respectueuse, que celle qu'il m'a portée. Il a tousiours tant apprehendé de me déplaire, sçachant que j'ay en horreur toutes ces cajoleries d'amour ; que si les Dieux n'eussent fait naistre en moy vne affection pareille à la sienne, qui luy a donné courage de m'en tesmoigner quelque chose, à peine en aurois-ie encore cognoissance : & ie ne sçay pas mesmes s'il m'auoüeroit de t'en auoir tant descouuert. Madame, respondit Epicharis, vous sçavez quelle fidelité ie vous ay vouée : ce seroit faire tort à la passion que j'ay pour vous, de me taire vos secrets, cognoissant combien ie desire vous seruir, & soulager vos peines : Ie croy qu'il ne seroit point marry que ie l'eusse appris, s'il sçauoit le desir que j'ay de vous voir tous deux bien-heureux. Chere Epicharis, reprit Ariane, connoissant nos humeurs, crois-tu pas que iamais personnes ne iouissent d'une felicité pareille, si cela pouuoit arriuer ? Mais tu sçais à qui ie suis destinée par mon pere, & ce dernier mal-heur est tel, qu'à peine puis-ie esperer de reuoir iamais en vie, ny luy, ny mon cher frere. Ariane renouuellant tousiours ses pleurs : & Epicharis connoissant que sa douleur se diuertissoit, lors qu'elle par-

loit de l'affection de Melinte, luy dit; Madame, les Dieux vous conserueront cét aimable Melinte, & puis qu'ils vous l'ont donné, ils ne souffriront point aucunes dispositions de la terre contraires à leur volonté. Viuez plus en repos, & vous assurez en leur bonté; cependant puis que vous ne pouuez dormir, ie tiendrois à tres-grande faueur si vous vouliez prendre la peine de me dire comment vous reconnustes la naissance de cette affection. Je veux bien, dit Ariane, employer à vn si cher entretien ce qui nous reste de iour auant qu'il faille partir: & ayant pris garde si personne ne les pouuoit escouter, apres auoit essuyé ses yeux, elle parla ainsi.



HISTOIRE DE MELINTE & d'Ariane.



Je veux croire ce que j'ay quelquefois ouï dire aux plus sçauans, que les Dieux ont estably certains Genies qui conduisent l'ordre de toutes choses, lesquels estant iustes & bons, ne permettent pas que l'artifice & l'oppression triomphent long temps de l'innocence; & tirent au iour les secrets plus cachez, pour donner en fin à la Noblesse & à la Vertu les honneurs & les recompenses qu'elle meritent: Je croy encore qu'ils en ont donné d'autres à chactin de nous, qui nous inspirent de secretes connoissances des qualitez que nous deuons acquerir, & nous font conceuoir des desirs dont nous ne

ſçauons point la cauſe , pour nous conduire à la poſſeſſion de ce qui nous eſt le plus honneſte & le plus vtile.

Tu trouueras ces remarques bien veritables en ce que ie te diray de la fortune eſtrange de Melinte , des perfections qu'il a eu ſoin d'acquérir , & de l'eſtime que nous faiſions l'un de l'autre auant melmes que nous nous fuſſions veus : Car tu dois ſçauoir que ie ne le cognoiſſois point deuant qu'il partiſt de Syracuſe pour aller à Athenes apprendre toutes les ſciences , & les exercices propres à vne perſonne de ſa condition. En quoy il reüſſiſſoit de telle ſorte que ceux qui reuenoient de Grece ne parloient que de ſes perfections , & de la facilité qu'il auoit à reüſſir en tout ce qu'il vouloit entreprendre. Vn iour mon frere m'apprit par ſes lettres l'amitié dont ils ſ'eſtoient liez , avec tant d'aduantageuſes paroles pour Melinte , & de reſſentimens de ioye pour luy , que ie iugeay bien que Melinte eſtoit quelque choſe par deſſus le commun , puis que mon frere n'eſtant pas des moins eſtimez , croyoit auoir acquis vn ſi grand bon-heur avec ſon affection. Je luy teſmoignay par ma reſponſe la part que ie prenois en ſon contentement ; & outre cela l'vtilité que i'en receurois , pouuant apprendre de ſes nouuelles chez Telephe pere de Melinte , lors qu'il ſeroit pareſſeux d'eſcrire. Palamede luy monſtra cette lettre , & il l'approuua pour certaine choſe qu'il diſoit luy plaire ; & depuis dans celles qu'il eſcriuoit à Telephe , il meſloit touſiours quelque choſe de Palamede & de moy : ſi bien que lors que i'eſtois en peine de la ſanté de mon frere , i'enuoyois chez Telephe , qui ne faiſoit point difficulté de me faire voir les lettres entieres de Melinte : Mais ie

t'auoüe que i'y voyois vne façon d'escrire si belle, & vn si grand respect qu'il portoit à Telephe, meslé toutefois d'une honnesté hardiesse, que i'eus vn grand desir de le cognoistre vn iour. D'autre costé i'escriuois à Palamede avec plus de soin; afin que s'il monstroit mes lettres à Melinte il peust faire de moy vn iugement fauorable. Ie ne fus pas trompée, & depuis il m'a tesmoigné qu'apres auoir veu ce que i'escriuois, & m'auoir cognüe par quelque recit que mon frere luy fit de moy, il eut vn extrême desir d'accomplir le temps qui luy estoit prescrit par Telephe, afin de me venir voir en Sicile.

Cependant il se passa des choses qui augmentèrent encore l'estime que nous commencions à faire l'vn de l'autre, pource qu'il emporta l'honneur de la course des cheuaux aux jeux Olympiques; & la gloire de faire mieux des vers, comme mon frere le prix de la harpe: si bien qu'ils rendirent nostre ville glorieuse sur toutes celles qui auoient enuoyé à ces jeux les plus excellens hommes qu'elles auoient en tous exercices. D'autre costé, vn prix ayant esté proposé dans Syracuse pour la plus belle, & en faueur de laquelle plus d'Amans se presenteroient, & reciteroient des vers: toutes celles qui pretendoient en beauté dans la ville se parerent pour parestre ce iour là sur les Theatres, & disputer cette victoire: pour moy la mesprisant, ou n'esperant pas l'emporter, ie m'enfermay dans la maison, quelque chose que l'on me peust dire pour m'y faire trouuer: toutefois quelques-vns qui recitoient, ayant plaint l'absence de leurs Maistresses, & m'ayant nommée, les iuges sans me voir m'adiugerent la couronne de fleurs, qui estoit le prix, & me l'apporterent au logis, lors que i'estois bien esloignée de cette

attente. Melinte ayant appris par la lettre que mon pere en escriuit à Palamede, la gloire que i'auois eüe apres le mespris que i'en auois faict, conceut encore vne plus grande estime de moy, & n'auoit point d'autre pensée que d'estre bien tost à Syracuse. En fin Palamede nous manda qu'il se preparoit à reuenir avec Melinte : mais ie te puis dire que ie me preparay avec beaucoup plus de soin pour les receuoir.

Toutefois la rencontre qu'ils firent de Corbulon qui alloit contre les Parthes, recula grandement ce retour; mais elle auança aussi, & rendit glorieuse la reputation de Melinte, qui l'ayant suiuy en Asie avec mon frere, fit des exploits si memorables dans cette expedition, qu'on ne parloit que de la valeur de Melinte: ce qui augmentoit merueilleusement l'estime que ie faisois de luy, & me faisoit iuger qu'il y auoit quelque sympathie entre son courage & le mien.

Lors que les occasions cessèrent de donner d'autres preuues de leur vaillance, ils partirent d'Asie, & abordant en Sicile, firent donner aduis de leur retour, pour estre receus comme vainqueurs des jeux Olympiques, selon le dessein qu'en auoient les Syracusains : mais ils auoient depuis adiousté beaucoup d'autres victoires avec bien plus de danger & de gloire, ce qui deuoit rendre la reception encore plus celebre.

Cette nouuelle fut receüe de tous avec grande ioye, & de moy avec surprise, considerant que ie verrois Melinte, de qui ie faisois vn si grand estat à cause de sa renommée. On abbatit vn pan de muraille, selon la coutume quel'on a de receuoir en tous les païs ceux qui ont gaigné l'honneur des jeux Olympiques : & ie disois que

depuis les sieges où ils s'estoient trouuez , ils s'estoient accoustumez de n'entrer que par des bresches dans les villes, & non plus par les portes.

Tout fut donc préparé pour les recevoir , & ceux de la ville furent d'avis d'aller au deuant d'eux pour leur rendre de l'honneur en eschange de celui qu'ils auoient acquis à leur païs. Je fus choisie pour leur donner les presens de la ville , à Melinte vn cheual blanc , & vne espée pendue à vne escharpe incarnate en broderie d'argent , & à mon frere vne casaque d'vn ouurage tres-riche , avec vn carquois garny de fleches dorées , , & vn arc de mesme.

Ils auoient esté aduertis de la reception qu'on leur deuoit faire : de sorte que Melinte , & mon frere vestus encore à la Grecque , parurent sur de beaux cheuaux à la teste de ceux de leur suite , & de quelques vns de leurs amis qui nous auoient deuancez. l'estois sur vne hacquenée pie , qui auoit vne housse blanche , i'estois vestué de blanc aussi , avec les cheueux espars , couronnez d'vne guirlande de fleurs , & allois à costé de mon oncle Diccarque qui estoit le chef de ceux de la ville : le cheual destiné pour Melinte , estoit conduit près de moy par deux hommes à pied qui le tenoient des deux costez , avec de grands cordons de couleur de pourpre qui seruoient de resnes ; puis vn autre homme suiuoit qui tenoit l'espée avec l'escharpe : ceux qui portoient la casaque , l'arc , & le carquois , alloient en ordre , & après vn nombre infiny de peuple.

A nostre rencontre Melinte descendit de cheual ; Diccarque en fit de mesme : incontinent deux hommes m'aiderent à descendre aussi , & Melinte nous ayant saluez ,

ie me preparay pour luy parler : mais i'estois si troublée de voir la personne dont i'auois desiré la connoissance, marcher auectant de grace, & si pleine d'esclat & d'honneur, que i'eus de la peine à me rassurer. Ie ne sçay pas s'il fut trompé en ce qu'il s'estoit imaginé de moy : toutefois il m'a depuis iuré que iamais il ne fut si rauy, me voyant dans l'esclat de tout cét appareil & de cette suite. Ie les remerciay de la part de tout le peuple, des honneurs qu'ils auoient acquis à leur país, pour reconnoissance desquels ie les priois d'accepter ces presens ; & alors on me donna l'un des cordons qui seruoient de resnes au cheual, que ie presentay à Melinte ; mais quand i'eus pris l'espee, & l'escharpe que i'auois chargée de luy ceindre, ie ne croy pas auoir iamais eu tant de rougeur, ny auoir esté faisie en ma vie d'un si grand tremblement : Et ie fus bien aise de passer deuers mon frere pour me remettre, en luy faisant le present qui luy estoit destiné. Ie sçay bien que Melinte m'auoit parlé pour me rendre graces de l'honneur qu'on luy faisoit : mais ie ne songeois pas à ce qu'il disoit tant i'estois confuse, & s'il m'eust fallu repartir ie fusse demeurée muette : Il m'a dit depuis qu'il m'auoit respondu ; que son país luy ayant donné la naissance, pouuoit s'attribuer comme sien tout ce qu'il feroit iamais, & qu'il luy en deuoit toute la gloire ; qu'il receuoit toutes ces presens, non pas comme des recompenses, mais comme de nouuelles obligations ; pour Palamede, ie ne me souuiens point de quelle façon il me remercia. Apres cela ie fus remise à cheual par Melinte, qui aussi tost monta sur celuy que ie luy auois donné, & m'accompagna tousiours en le maniant auec beaucoup de grace.

Ie ne

Je ne cessois d'admirer tout ce qu'il faisoit, & iem'apperceus bien qu'il n'estoit pas sans trouble de son costé: pource qu'il me regardoit quelquesfois d'un œil qui tesmoignoit de l'estonnement, & vne passion naissante; mais si modestement qu'il n'y auoit que moy qui le peust remarquer. Nous arriuasmes ainsi dans Syracuse, & il me conduisit iusques au logis, où il me quitta avec Palamede & Dicearque, & ses amis avec le reste du peuple le menerent chez Telephe.

Toute la nuit ie laissay errer mon imagination sur tout ce que i'auois reconnu de parfait en Melinte. Ce visage doux & assuré, cette taille libre, la grace en toutes ses actions, & sa façon de parler si pleine de douceur & de viuacité, me firent auoüer que ie n'auois iamais rien veu de si aymable: mais lors que ie concludois quelque chose à son aduantage, & que ie me surprinois en cette pensée, l'humeur desdaigneuse que i'ay si naturelle, me remplissoit de honte, & me fortifioit contre tant de merite. Puis voyant que mon pere inclinoit à me marier avec Amyntas fils de Diocles le plus riche de Syracuse, & que Melinte n'auoit pas de si grands biens qu'il y en auoit en nostre maison, mon courage ne pouuoit alors consentir que pour son sujet i'eusse de l'inquietude en mon esprit.

Diocles estant deuenu riche en peu de temps, à ce que l'on disoit alors, par l'acquisition qu'il auoit faite des biens de quelques bannis, se vouloit appuyer de l'autorité que Dicearque auoit dans la ville: mais mon oncle y repugnoit à cause que Diocles auoit tousiours esté de faction contraire à la sienne: toutefois Aristide y portoit son frere autant qu'il luy estoit possible, ne vo-

yant rien de plus aduantageux pour moy dans Syracuse.

Ce fut en ce temps-là que tu me fus donnée par Dicearque, qui t'ayant acheptée toute ieune sur la coste de la mer, t'auoit tousiours nourrie en espérance que sa femme Acidalie auroit des enfans, auxquels tu pourrois seruir de compagnie & d'entretien: mais Acidalie estant morte, il se resolut de te donner à moy, voyant que i'auois inclination à t'aimer. Je me souuiendray tousiours, interrompit Epicharis, de cét heureux eschange de ma condition: car ie puis dire que ie n'ay commencé à viure que depuis que ie suis à vostre seruice, lequel ie prefererois à la plus releuée condition qui soit sur la terre: car ie n'eus iamais que du tourment auprès de Dicearque & de sa femme, encore qu'ils m'esleuassent avec beaucoup de soin & d'honneur: mais depuis que ie suis avec vous, ma vie s'est renduë la plus heureuse que ie puisse souhaitter. Je sçay bien, reprit Ariane, quel contentement tu reçois estant assurée de mon amitié: mais laisse moy continuer, & tu verras si ie m'assure en la tienne; puis elle reprit.

Melinte de peur de parestre impatient, fut quatre ou cinq iours sans me voir, sinon vne fois au Temple; mais Palamede l'estant allé visiter comme il faisoit souuent, Melinte le pria de le conduire chez nous, & me le presenter. Il faisoit deslors vne estime de moy assez grande, & ie ne croyois pas qu'il y eust au monde vn esprit plus releué que le sien: De sorte que nous nous craignons tous deux à cét abord, & pour la bonne opinion que chacun de nous auoit de soy, nous desirions aussi tous deux nous faire craindre. Ayant sceu qu'il entroit chez

nous , ie rappellay tout ce que j'auois d'assurance , & Palamede l'amenant pour me saluer , me dit : Ma sœur, voicy vn homme qui merite que vous le receuiez aussi bien en particulier que vous auez fait en public , & lequel vous aimerez si vous m'aimez , car nous ne sommes qu'une mesme chose. Le luy respondis : Mon frere, ie ne manqueray iamais d'honorer ce que vous aimez, & si ie n'estimois les qualitez de Melinte, j'aurois peur d'estre seule de mon party. Madame , dit alors Melinte, quand vous seriez seule à faire peu d'estime de moy, vostre party seroit au moins le plus iuste , s'il n'estoit le plus grand. Melinte, interrompit mon frere , ne perdons point le temps à dire ce que vous valez ; ma sœur le sçait par le recit que ie luy ay fait de vous , & par vostre reputation. Il faut qu'elle confesse qu'il n'y a point d'homme sur la terre plus accomply que vous ; mais confessez aussi que j'ay une sœur bien aimable. Mon frere , luy dis-je , ne parlez point de moy , nous pouuons auoir de meilleurs entretiens : puis comment voulez vous que Melinte fasse iugement de ce qu'il ne cognoist pas encore ? Sur cela ie le conuiay de s'asseoir , & Melinte reprit : Madame , j'auois desia connu la beauté de vostre esprit par les lettres que receuoit de vous Palamede, & puis que celle du visage se connoist aussi tost qu'elle est veüe , permettez que ie puisse iuger de vous à cette heure , & que ie vous die que la renommée qui a de coustume d'accroistre le merite de tout ce qu'elle veut louer, a esté contrainte de diminuer le vostre , estant impossible de le publier aussi grand qu'il est. Le luy respondis : Je vous prie de laisser là ces louanges que la ciuilité vous oblige plustost de me donner , que la verité : ie ne croyois pas que vous

peussiez vous resoudre à flatter personne, selon l'opinion que i'auois conceuë de vostre vertu. Les louanges, reprit-il, ne sont flatteries qu'alors qu'on les employe à des sujets qui en sont indignes: mais la vertu mesme ne les refuse pas pour sa recompense. Il est vray, ce luy dis-je, mais ceux qui connoissent leurs deffauts comme moy, doiuent receuoir les louanges comme des reproches de n'auoir pas ces qualitez qu'on leur attribue, & il n'y a point de personnes qui les aiment que celles qui croient les meriter, ce qui est vne vanité insupportable. Il connut bien que ie ne souffrois pas les louanges, & qu'il falloit traiter avec moy autrement qu'avec beaucoup d'autres: ce que ie remarquay à l'estonnement qu'il fit parestre, & pource que changeant de ton de voix, il me dit; Pardonnez moy; Madame, s'il faut que ie vous loue encore, quand ie vous diray qu'il est vray que c'est vne marque de grande vertu, de ne pouuoir souffrir d'estre loué: & ceux qui ont vne ame bien née en rougissent ordinairement; ce qui tesmoigne quelque sorte de colere, & que l'on se sent offensé. Aussi ie n'eusse iamais entrepris de iuger de vous, si Palamede ne m'eust obligé de confesser que vous estiez bien aymable. Mon frere alors m'alla les railleries à ce discours, & dit qu'apres nous auoir long temps escoutez, il trouuoit que mon humeur estoit bien contraire à celle de toutes les femmes qu'il auoit pratiquées; & que la creance de Meliante estoit bien differente aussi de la sienne; car il ne croyoit pas faire vn plus grand plaisir aux femmes que de leur dire qu'elles sont parfaitement belles: qu'il n'estoit iamais paruenue à leurs bonnes graces que par cette entrée, & qu'apres leur auoir voulu persuader qu'elles n'auoient aucun

deffaut , il se le perfuadoit en fin luy mefme , & les trou-
uoit plus aimables. Il eft vray , répondit Melinte , que
fouuent on reüffit ainfi , pource qu'ordinairement il y a
du deffaut ; & de cette façon ce n'eft pas vaincre , mais
se laiffer vaincre de part & d'autre : & c'eft pluftoft
s'engager par foibleffe l'un à l'autre , que d'engager
par dextérité ce que l'on aime. Il n'importe , dit mon
frere , pourueu que l'on foit content. Auoüez , re-
prit Melinte , que vous n'avez iamais obtenu de faueur
par des moyens , que vous n'ayez trouué quelque def-
faut remarquable en celle que vous recherchiez , par le-
quel elle s'eft laiffé prendre. Il eft vray , repliqua mon
frere , mais iamais on ne vaincroit fi l'on ne trouuoit le
deffaut : & ie les aime bien mieux de cette sorte , que cel-
les que la feuerité rend inaccessibles. Elles vous font plus
propres , dit Melinte , pour ces faueurs que vous defirez ;
mais confessez qu'en vofre ame vous eltimez plus les au-
tres. Il n'y a point de doute , répondit mon frere , mais
ie les laiffe , pource qu'elles ne m'estiment pas assez. Je
les escoutois ainfi parler , & estois bien aife de ce que
Melinte approuuoit la modestie , & exprimoit avec tant
de grace & de sentimens vertueux les mefmes penfées
que j'auois. Le reste de la iournée se passa en quelques
discours semblables , par lesquels ie reconnus que l'esprit
de Melinte auoit vne grande sympathie avec le mien , &
il iugea aussi de quelle sorte il auoit à se conduire avec
moy , & qu'il ne falloit pas esperer de me gagner par des
flatteries.

Depuis cette veuë , il changea bien de propos : pour-
ce qu'au lieu de me parler ou de ma beauté , ou de son
amour , il paroiffoit fort esloigné de toute passion , &

rous nos entretiens estoient de celles des autres, auxquelles nous remarquions mille deffauts, & mille foibleffes d'esprit: & insensiblement nous nous enseignions l'un l'autre, comment il falloit estre selon nostre desir, pour aimer parfaitement, & se rendre aimable. En fin il sembloit en parlant des autres que nous nous disions: puis que vous auez ces pensées, ie vous aime bien ainsi. Iamais il ne m'osa dire qu'il m'aimoit, mais ses actions me le disoient assez: & lors qu'il croyoit n'estre veu que de moy, ses soins m'estoient trop intelligibles. Voyez comme nos humeurs sont estranges: mille deuoirs qu'il me rendoit m'estoient fort agreables: toutefois ie me fusse offensée du moindre tesmoignage d'affection qu'il m'eust donné par sa bouche, & luy eusse deffendu de me voir. De sorte qu'il estoit contraint de se descouvrir par d'autres moyens que ie trouuois assez agreables, comme par beaucoup de vers qu'il me donnoit, dont ie te dirois vne partie, si mon affliction me permettoit de songer à ces gentilleffes. Mais il faut au moins que ie te die la rencontre que ie fis d'un Amant bien different en toutes sortes de qualitez; c'est de l'orgueilleux Garamante, de qui tu as ouï faire assez de plaisans contes, mais tu n'as point scëu ce qui se passa entre nous, pource que l'affaire fut tenuë secrette. Il estoit originaire d'Affrique, & pource que nous ne sçauions point son extraction, il taschoit à en faire beaucoup accroire touchant sa naissance; & sur ce fondement il ne croyoit pas qu'il y eust personne en toute la Sicile qui luy osast disputer le rang: mesmes il deffendoit l'excellence de son humeur arrogante avec de certaines raisons, par lesquelles il vouloit prouuer que l'on ne pouuoit auoir bon courage, sinon ayant autant

d'orgueil que luy. l'estois importunée de ses visites; toutefois connoissant son humeur superbe & ridicule, il seruoit quelquefois à me faire rire, & souuent ie me plaisois à me inocquer de luy, feignant de croire ses vanitez. Luy au contraire pensoit que ie fisse vne fort grande estime de luy, & que ie creusse que le plus grand honneur qui me pourroit arriuer, seroit de me voir aimée d'un homme de telle importance:

Vn iour que i'estois seule il me vint voir, & ne voulant pas perdre cette commodité de me parler, il me dit froidement qu'il auoit vne nouuelle à m'en faire sçauoir qui ne me seroit pas desagréable. Je le priay de me la dire: C'est, poursuiuit-il, que j'ay rompu entièrement avec Aspasia (qui estoit l'une des plus belles de Syracuse.) Et en quoy, luy dis-je, cette affaire me peut-elle toucher? Pour ce, respondit-il, qu'il n'y auoit que la confidence que j'auois avec elle qui m'empeschast de me donner à vous. Voilà cette nouuelle qui me deuoit estre si agréable. Est-il possible, interrompit Epicharis, que cet homme fust si impertinent? Ne t'estonne pas de cela, reprit Ariane, écoute seulement le reste, puis elle poursuiuit; Je vultus l'entretenir en cette humeur vaine comme j'auois accoustumé, & luy dis; A la verité vous ne me pourriez pas apprendre vne plus agréable nouuelle, si elle estoit croyable, mais ie n'ose esperer que vous me vouliez faire tant d'honneur m'en reconnoissant indigne. Non, continuait-il, ie veux que vous le croyez, bien que vostre modestie en fasse difficulté; & j'espere que nostre intelligence sera tres-parfaite; car comme ie m'esloigne autant que ie puis de l'humeur de ces lâches, qui perdent les auantages de nostre sexe, se soumettant aux Dames par mille flat-



teries ; aussi ie ne voy point en vous l'arrogance de ces dédaigneuses, qui ne reconnoissent point les deffauts du vostre ; & ainsi ie trouue que nos esprits sont également defabusez des erreurs ordinaires, & demeurent dans les vrais sentimens de ce que chacun de nous deux doit penser de soy-mesme. Je sous-riois en le regardant, & admirois à quel point ce pauvre esprit se perdoit dans ses vaines rêveries. Luy au contraire croyoit que ie riois d'excès de ioye, de ce qu'il vouloit prendre la peine de m'aimer, & auoit cette folle opinion, que plus il me rabaisseroit, plus i'estimerois luy estre redevable. En fin voulant voir à quel point sa presomption pourroit atteindre, ie luy dis, que puis qu'il me vouloit rendre si heureuse, ie le priois de m'ordonner comment il luy plaisoit que ie vescu avec luy, afin de ne manquer iamais au respect que ie deuois à la grandeur de son merite. Ma mignonne (dit-il, en me prenant la main, & croyant m'obliger fort par cette douce parole) aimez moy seulement, & considerez ce que ie puis valoir, alors vous me rendrez tousiours assez d'honneur ; pour mon amitié vous vous en pouuez assurer tandis que vous viurez ainsi ; ie ne veux point vous tromper par mille sermens, comme font les autres, & par des soumissions qui seroient indignes de moy : vous voyez que ie ne suis point déguisé, & ce que ie dis, il faut de nécessité que ie le pense. En cela il auoit bien raison. Il y en a beaucoup, disoit-il, qui estiment orgueil, ce qui est en effect bon courage, & saine connoissance de soy-mesme : c'est signe que l'on sent en soy du deffaut, lors que l'on s'abaisse, & que l'on fait le complaisant : & parmy les hommes ce que l'on appelle courtoisie & honnesteté, ie l'appelle lacheré & bassesse : c'est tesmoigner que l'on ne
peut

peut subſiſter par ſoy meſme de rechercher ainſi la bien-
veillance & l'appuy des autres. Il ſemble que vous leur
vouliez eſtre obligé de ce qu'ils vous laiſſent en paix , &
que vous ſouſmettant à leur mercy, vous ne teniez la vie
que de leur grace. Je faiſois ſemblant d'approuver tout
ce qu'il diſoit, & d'admirer les bons ſentimens qu'il auoit
de toutes choſes. Pour moy, pourſuiuit-il, ie faiſ eſtat de
meſpriſer tout le monde, comme ſi ie deſſois vn chacun
de me nuire, & que ie fuſſe aſſeuré contre tant de perſon-
nes de ma ſeule force : Il ſemble que ie m'oppoſe tout
ſeul à tout le monde enſemble , & trouuant ceux qui
m'approchent dans le reſpect & dans le ſilence, ie me
plaiſ en moy meſme de me voir ainſi triompher de tous,
& que ma ſeule mine me rende ſi redoutable. Il me fit
encore mille diſcours de cette ſorte, mais l'eſtat où ie
ſuis qui ne peut ſouffrir les railleries, ne me permet pas
de les redire, ny meſme de m'en ſouuenir. Je te con-
feſſe, Epicharis, que j'auois bien du plaſir en moy-
meſme d'une ſi eſtrange folie, mais il me falloit vn tiers
auec lequel ie peuſſe rire, & me mocquer de luy, & ce
m'eſtoit vn deſplaſir extrême d'eſtre ſeule à ce bel en-
retien ; ſeulement ie le regardois fixement, ne vou-
lant employer aucune repartie, ny pour le deſabuſer,
ny pour conſentir dauantage à ſes diſcours. Je com-
mençois à me laſſer de luy, & ie l'euſſe en ſin chaſ-
ſé honteuſement, mais pour mon repos Melinte &
mon frere arriuerent : alors ie ne peus me contenir,
& auſſi toſt qu'ils furent aſſis, ie conceus à la verité v-
ne entrepriſe plus hardie que mon eſprit ne ſemble en
eſtre capable. Je voulus leur faire part de l'entretien de
Garamante, ſans le nommer, en ſa preſence meſme,

pour mon soulagement , & pour sa confusion : & ie leur dis ; l'estois en grande impatience de vous voir , pour vous dire vn grand bon-heur qui m'est arriué. Melinte me demanda quel il estoit. C'est , luy dis-ie, que i'ay acquis vn seruiteur de qui ie m'estime infiniment glorieuse. Il me tesmoigna qu'il s'en rejoüissoit pour l'amour de moy , & me demanda s'il n'y auoit point moyen de sçauoir son nom. C'est , luy dis-ie, ce que ie ne vous apprendray pas : mais ie veux bien vous dire de quelle sorte il m'a fait les offres de son seruice. Alors ie commençay à leur reciter les discours de Garamante le plus fidelement que ie peus , remarquant toutes ses fortises & ses impertinences : surquoy il rougissoit, il passissoit, & ie mourois de rire de voir comme il ne sçauoit en quelle posture se tenir. Melinte & mon frere ne pouuoient croire vn si grand égarement d'esprit , & à chaque mot me demandoient si cela estoit possible. Je voulus leur dire tout au long les beaux raisonnemens de Garamante , n'en voulant rien reseruer , tant ie me sentoie soulagée en les disant , & chaque extrauangance ne manquoit pas d'estre qualifiée des tiltres qu'elle meritoit, & c'estoient autant de coups sensibles à cet honneste homme qui estoit present , & qui se laissoit picquer ainsi sans crier. En fin Melinte me demanda si ie n'auois point inuenté vne chose si plaisante. Je luy dis pour combler l'autre de desespoir , & pour leur faire cognoistre de qui i'auois parle. Garamante me fera tesmoin si ie dis aucune chose qui ne soit veritable. Alors ils iugerent bien que c'estoit de luy-mesme de qui i'auois recité l'entretien , pource qu'en le regardant ils virent de quelle sorte il estoit interdit; & de plus, ils cognoissoient lon

humeur. Garamante se voyant descouvert , & réduit à parler , ne sçauoit quel party prendre , ou s'il deuoit s'offenser de ce que l'on se mocquoit de luy , ou s'il deuoit deffendre celuy qui auoit ainsi déclaré son affection : sa lascheté ne luy permettant pas le premier , il se resolut au second , pource qu'il pouuoit parler en tierce personne , & dit qu'il ne trouuoit point tant à redire qu'eux au procédé de cet homme , & que si chacun se gouuernoit ainsi , les Dames seroient contraintes de bannir cette grande seuerité qu'elles obseruent , & de confesser que les hommes les obligent en les aymant. Melinte prit alors la parole , se trouuant offensé en ma personne , & pour soutenir ma cause luy demanda, sur quel fondement il appuyoit cette vanité : Sur ce , dit-il , que pour vn aduantage qu'ont les femmes par dessus nous , qui est la beauté , les hommes en ont mille sur elles , qui sont bien de plus grande consequence ; comme la grandeur de courage , la prudence , la force & l'adresse du corps , avec vne infinité d'autres. Melinte luy respondit ; Quand mesmes nous aurions ces aduantages , ie les trouue bien foibles , puis qu'il faut que nous les soumettions tous au pouuoir de leur beauté : mais nous sommes bien esloignez de les auoir , car vne Dame tesmoigne plus de courage en la conseruation de son honneur , & plus de prudence en sa conduite , que nous ne pouuons faire en aucune action : elles ont de bien plus rudes espreuues à souffrir que nous , & plus de consequences à preuoir. Il faut qu'elles soient incessamment en garde , sans que dans vne si grande attention il paroisse aucune contrainte , & soit que cela se fasse avec peine ou



avec facilité, elles sont louables, ou d'un grand soin, ou d'une grande dextérité d'esprit. Au contraire nous laissons aller mille paroles, & faisons mille actions, qui feroient autant de crimes aux Dames, ce qui tesmoigne en elles une nature bien plus parfaite que la nôtre, & une plus grande pureté de vertu, en qui la moindre faute feroit une grande tache. Il ne nous reste que la force du corps, qui est un avantage bien petit pour s'en prevaloir : comme si le Lion devoit estre plus estimé que l'homme, pource qu'il est plus fort. L'esprit triomphe tousiours de la force. Les peuples les plus forts ne sont pas les plus renommez : les Grecs & les Romains ont tousiours vaincu les Barbares qui les surpassoient en force de corps. Aussi n'est-il point d'homme si puissant qu'une Dame ne domine : il ne faut qu'un regard ou une parole, nous voilà abbatus, alors il en faut venir aux prières & aux soumissions, ce qui est une marque infailible de leur avantage ; pource que celui qui recherche se trouve sans doute le plus foible. Garamante luy dit ; Vous allegueriez bien d'autres raisons contre celles-là si Ariane n'estoit presente, & il me desplaist de voir que nous sommes si lasches d'employer cette mesme force d'esprit par laquelle nous les surmontons, pour leur faire croire qu'elles nous surpassent. Au contraire, reprit Melinte, si Ariane n'estoit presente, ie ne me contenterois pas de ces raisons, par lesquelles ie la veux satisfaire, & non pas vous : mais son respect m'empesche de vous tesmoigner à quel point ie vous m'estime de contester cette cause si mal à propos en sa presence. La modestie de Melinte ne luy permit pas de le quereller

dauantage deuant moy, de peur de m'offenser; mais mon frere ne peut souffrir ce fol dans ma chambre, & luy dit: Vous prenez trop d'interest en cette cause, pour n'estre pas ce mesme impertinent & ce ridicule, qui luy auoit faict tous ces discours; Je vous conseille de sortir d'icy promptement, si vous ne voulez vous voir puny deuant elle de vos sottises, & de vos effronteries. Il fut ainsi contrainct de partir, estant mocqué de tous, avec la plus grande honte qu'un homme puisse receuoir: & cet arrogant fut si lasche, qu'il n'osa iamais repartir vn mot, seulement il rongeoit quelques paroles entre ses dents, que nous ne pouuions entendre.

Nous ne fîmes que rire de luy le reste de la journée, mais le soir il faillit à en arriuer vn grand malheur; pource que Melinte se retirant de chez nous fort tard avec mon frere, pour aller coucher ensemble, comme ils faisoient souuent, ils furent attaquez par douze ou quinze hommes, contre lesquels ils se defendirent si vaillamment estant tous deux à cheual, qu'apres en auoir tué quatre, ils mirent le reste en fuite. Les morts furent le lendemain reconnus pour estre soldats de Toxaris, qui estoit Preuost de Syracuse, & l'amy intime de Garamante. Ce Toxaris auoit fait l'amoureux d'Ericine sœur de Melinte, mais il auoit esté banny du logis de Telephe par Melinte mesme, qui ne le pouuoit souffrir à cause des volleries qu'il exerceoit luy-mesme, au lieu d'empescher les autres d'en commettre. Toutefois on ne peût accuser, ny Toxaris, ny Garamante de cette entreprise contre la vie de mon frere & de Melinte, pource qu'il n'estoit pas re-

sté assez de vie à ceux qui estoient demeurez sur la place pour en tirer la verité.

Deux iours apres , Melinte & mon frere receurent vn deffy de la part de ces deux amis , qui pour se vanger de l'affront qu'ils auoient receu , voulurent ioindre leurs querelles ensemble ; & ils sceurent qu'ils les attendoient seuls hors la ville en vn lieu où vn ieune garçon qui leur presentoit le cartel , les deuoit conduire. Melinte se deffioit de quelque trahison , ne pouuant croire que de si lasches personnes se portassent à se battre contr'eux franchement & sans aduantage : toutefois pour ne sembler pas reculer , ils se resolurent d'y aller avec dessein de se bien garder de supercherie. Ce garçon les mena hors la ville , vers de certains lieux cauez d'où l'on tiroit de la pierre , & leur monstra sur vne butte Toxaris & Garamante seuls , & en vn endroit où il n'y auoit point de sujet de craindre qu'il y eust des gens cachez , pource que c'estoit vn lieu plein , où l'on remarquoit aisément tout ce qui estoit bien loin autour. Le ieune homme leur dit , que puis qu'ils les voyoient , il n'auoit plus que faire avec eux , & se retira. Melinte s'auançant à cheual comme il estoit , pour aller droit à eux , vid que le chemin ordinaire estoit trauerfé d'arbres & de pierres , & qu'il n'y auoit qu'un sentier par où l'on pouuoit passer , qui estoit assez prés d'une carriere : il s'estonnoit de cela , mais Palamede sans songer dauantage , poussa son cheual vers le sentier , & Melinte fut bien surpris le voyant fondre tout à coup , comme si la terre l'eust englouty , & rien ne parut plus à ses yeux qu'une grande ouuerture par laquelle Palamede estoit

tombé avec son cheual. Incontinent Melinte courut à la descente de la carriere, pource que l'on y pouuoit aller librement estant à cheual ; & voyant quatre soldats qui alloient esgorger mon frere, il courut à eux l'espee à la main, & par ses cris les fit tourner deuers luy, cependant que mon frere reuenoit de l'estourdissement de sa cheute, de laquelle par bon-heur il n'estoit pas beaucoup blessé, & se desgageoit de son cheual qui en estoit mort. Desia Melinte en auoit abbattu deux à ses pieds, & plein de fureur de voir vne si grande trahison alloit aux deux autres, quand Toxaris & Garamante arriuerent, qui luy firent tourner visage deuers eux, & en mesme temps mon frere se trouua en estat d'attaquer les deux soldats qui restoient. Je ne scaurois vous rapporter les particularitez de ce combat, pource qu'ils sont tous deux trop modestes pour auoir recité ces preuues de leur valeur : seulement ie vous puis dire que mon frere s'estant desfait de ces soldats, & Melinte ayant percé les deux traistres de plusieurs coups, ils les contraignirent de prendre la fuite. Melinte ne voulut point les poursuivre de peur de laisser mon frere qui estoit à pied ; & voyant vn de ces quatre soldats qui respiroit encore, il luy fit confesser, que toute la nuit ils auoient accommodé ce trou avec des clayes qui n'estoient soutenuës que de petits bastons, & qu'ils les auoient couuertes avec de la terre, en sorte que l'on ne pouoit reconnoistre ce piege : puis apres qu'ils auoient rompu le chemin ordinaire pour les obliger à passer par cet endroit. Melinte remerciant les Dieux de les auoir deliurez de cette embulche, prit mon frere en croupe, & laissant expirer ce mal-heu-

reux , ils s'en retournerent à la ville. Mon frere fut quelque temps à se guerir d'une blessure qu'il auoit eue de sa cheute, & depuis nous n'auons point ouï parler de Garamante ny de Toxaris, seulement quelqu'un nous dit qu'ils estoient en vne maison aux champs , où ils auoient failly à mourir de leurs playes. Palamede me fit le recit de tout ce qui s'estoit passé : toutefois il me tesmoigna que Melinte ne desiroit pas que cela fust connu , de peur que l'on n'en voulust sçauoir la cause , & ie suis assuré que sa plus grande crainte estoit, que ie ne fusse comprise dans ce discours , sçachant combien ie craignois d'estre mellée dans les nouuelles de la ville.

Quelque temps apres il arriua que Diocles resucillant sa recherche pour son fils ; vn iour Palamede me vint dire en presence de Melinte , qu'il croyoit que Diocarque mon oncle consentiroit en fin au mariage d'Amyntas & de moy. Cette nouuelle me fit rougir , & rendit Melinte quelque temps muet. Toutefois ne voulant pas que mon frere reconnust son estonnement , il me dit , qu'il estimoit Amyntas bien-heureux : puis me demanda si ie le connoissois fort ; le luy respondis que ie n'auois point voulu m'enquerir de luy : estant resoluë de prendre les yeux fermez le mary que l'on me donneroit. Palamede qui vouloit rire, me dit; Vous le pourriez bien prendre la nuit les yeux fermez ; mais ie vous puis dire que de iour il ne vous fera point de peur. Melinte qui ne le vouloit pas contredire, me dit, que sans doute il estoit fort honneste homme: toutefois ce discours estant acheué, il sortit, à ce que ie reconnus , fort troublé : & depuis il fut quelque
temps

temps sans me voir. l'en tesmoignay de l'estonnement à mon frere , & il me dit qu'il ne l'auoit point veu aussi depuis moy : mais qu'il auoit oüy dire que Telephe & Diocles, qui auoient esté tant amis, s'estoient querellez, & que peut-estre Telephe auroit deffendu à Melinte de venir chez nous , à cause de la recherche que Diocles faisoit de moy pour son fils : toute fois pour en sçauoir plus de verité il l'alla voir. Sur le soir mon frere me vint dire que Melinte estoit arresté au logis par vne fièvre , & n'auoit esté retenu par autre chose. Le iugay aussi-tost que son mal ne venoit que de la resolution que ie luy auois tesmoignée pour ce mariage , pource qu'autrement il eust enuoyé aduertir mon frere de sa maladie. Quelques iours encore se passerent pendant lesquels Palamede me dit qu'il se portoit mieux : & vne apresdinée il vint chez nous , où il ne trouua que mon frere & moy : Palamede ayant quelque assignation pressée nous laissa seuls , & lors entrant en discours avec Melinte, il ne me respondoit que certains mots qui me tesmoignoient bien qu'il auoit l'esprit interdit. Je luy dis que sans doute quelque chose l'inquietoit. Madame, me dit-il, ie confesse qu'il y a quelque confusion en mon esprit, que ie ne puis démeller qu'en vous disant ce qui la cause : & toutefois quelque chose me deffend aussi de vous le dire. Je fus vn peu surprise, croyant qu'il me voulust declarer son amour : car il n'y a point de doute que ie l'eusse banny de ma veüe pour iamais : toutefois ie luy dis ; C'est à vous à iuger si vous me le deuez dire , ou non ; vous sçauetz mon humeur & vostre discretion. l'adioustay ces derniers mots pour luy oster la hardiesse de se descouurir : puis il me respon-

dit : Je suis contraint, Madame, de vous le dire, & peut-être autant que vous m'avez fait d'honneur, autant aurez vous sujet de m'en vouloir du mal. J'eus plus de peur qu'auparavant, étant fâchée qu'il m'allât obliger à ne le voir plus; ce qui fit que je luy dis : Melinte, ne mettez donc rien au hazard, & demeurons en l'estat que nous sommes. Il s'apperceut bien de ma crainte; toutefois il continua : Je veux vous tesmoigner, Madame, combien je vous honore, car je vay mettre ma vie en vos mains, & apres que vous aurez sceu ce que j'ay à vous dire, vous pourrez me rendre heureux, ou me perdre quand il vous plaira. Je croyois qu'il auoit entrepris de me mettre ainsi en peine, & j'eusse voulu qu'il ne fust entré de ce iour là chez nous. Je luy repartis; Melinte, je vous prie de ne m'en rien dire, de peur d'estre cause du mal qui vous pourroit arriver par la permission que je vous en aurois donnée. Alors, pour me remettre, il me dit d'un visage ferme: Je suis assuré, Madame, de ne point faillir en vous le disant; mesmes vous confesserez que j'y suis obligé, & je veux croire que vous ne me ferez point de mal, encore que je vous en donne le pouuoir : Je me connois trop, & vous aussi pour ne sçauoir pas ce qui vous peut desplaire. Sur ceste assurance je luy permis de parler, & il commença ainsi: Madame, je croyois auoir vn pere, mais je n'en ay plus; où si j'en ay, je ne sçay en quel lieu de la terre il est maintenant. Helas! luy dis-je, qu'est deuenu Telephe? Madame, continua-t'il se porte bien; mais escoutez s'il vous plaist ce que j'ay à vous dire. Il y a quelque temps qu'il eut quelque differend avec Diocles, dont il ne demeura pas satisfait, & hier étant allé

chez luy pour en tirer plus de raison , il reuint fort en colere , & m'ayant pris à part , me dit ; Il faut , Melinte , que ie vous descouure le plus grand secret qui m'importe , & à vous aussi : Iamais ie ne quitteray l'affection que j'ay pour vous depuis que vous estes au monde ; mais il est temps que ie quitte le nom de vostre pere , pour vous descouvrir vostre naissance. Ces paroles , dit-il , m'estonnerent fort ; mais pour me rassurer , il reprit. Courage , Melinte , ie ne vous apporte point de mauuaises nouuelles : escoutez seulement avec patience mon discours , puis il continua.

Sçachez que sur la fin du regne de l'Empereur Claude , tout le monde estant paisible , les Syracusains iouïssioient d'une pleine liberté : toute-fois Hermocrate & Dicarque auoient le plus d'autorité dans la ville , estant tous deux égaux en puissance , & en ancienneté de Noblesse : Hermocrate estoit descendu de Pyrrhe Roy des Epirotes , qui tiroit son origine d'Achille : car on dit que ce Prince après plusieurs victoires , ayant mesmes conquis la Sicile , deuint amoureux dans Syracuse de Coronis fille vniue de Parmenides , yssu du sang des anciens Rois de Sicile ; qui ayant sceu qu'Antigone estoit morte , permit que Pyrrhe , qui en estoit veuf , espousast sa fille en secret , iusques à ce qu'il fust de retour de l'Italie , ne voulant point faire parestre qu'elle estoit sa femme , pour ne la laisser pas à la mercy de quantité d'ennemis qu'il laissoit en Sicile. Mais cependant qu'il gaignoit des batailles contre les Romains , il perdit la Sicile , où il ne peût depuis retourner ; & ayant esté contraint après quelques pertes de se retirer del'Italie , il entreprit d'autres conquêtes où il fut tué.

Coronis eut vn fils de Pyrrhe , mais Parmenides n'osa faire sçauoir ce qu'il estoit , pource que les Syraculains s'estoient rebellez contre Pyrrhe , & auoient élu vn Roy. Il n'eut autre soin le reste de ses iours avec Coronis , que d'éleuer ce fils en le faisant souuenir de sa naissance Royale ; & ce Prince estant auancé en âge , se contenta de viure en particulier , à cause de la puissance des Romains , desquels son pere auoit esté si dangereux ennemy : mesmes il ne voulut point rechercher ses freres , craignant qu'ils doutassent de sa naissance : Toute-fois il fit dans la guerre des actions fort genereuses ; & ses descendans , desquels estoit Hermocrate , ont tous esté pleins d'une grandeur de courage digne de ce sang diuin.

Dicearque d'un autre costé estoit de la race ancienne de ce grand Thimoleon de Corinthe , qui auoit voulu autre-fois establir sa demeure à Syracuse , avec sa femme & ses enfans , qu'il fit venir de Corinthe , apres qu'il eut chassé tous les Tyrans de la Sicile , & défait la puissance des Carthaginois en plusieurs batailles.

Dicearque donc & Hermocrate , en toutes les resolutions des affaires publiques , estoient tousiours de contraires aduis , & auoient leurs ligues séparées. Dicearque estoit d'un naturel turbulent (pardonnez , dit-il , Madame , si i'vse des mesmes termes que Telephe) & n'espargnoit aucun artifice pour se maintenir , & surpasser Hermocrate en credit. Hermocrate estoit plus moderé , & se fioit plus en sa probité reconnue , & en la gloire qu'il auoit rapportée de ses actions de guerre sous Germanice , n'affectant autre auantage dans la vil-

le, que celuy que ses predecesseurs luy auoient acquis. Mais Dicearque, jaloux de la reputation qu'il auoit, & ne pouuant souffrir d'egal, songea aux moyens de le ruiner. Vn iour ayant ramassé tout ce qu'il peût d'armes, il les fit porter de nuit par dessus les murailles dans le iardin d'Hermocrate, & les disposer de rang comme pour s'en seruir en vne occasion. La mesme nuit il fit aduertir les principaux de la ville, qu'Hermocrate machinoit quelque chose. Ils delibererent d'entrer en sa maison dès le grand matin, & visiter ce qui s'y faisoit, où ayant trouué toutes ces armes, ils se saillirent de luy, & le menerent dans la forteresse, puis ils tindrent conseil pour resoudre ce qu'ils en feroient. La pluspart cognoissoit bien que c'estoit vn artifice de Dicearque, n'y ayant pas d'apparence qu'un seul homme voulust se faire tyran d'une si grande ville, qui estoit sous la domination de Claude qui regnoit alors, durant la plus grande force & tranquillité de l'Empire Romain. Le peuple qui aimoit Hermocrate, commençoit à se mutiner contre les accusateurs; ce que voyant Dicearque, il fut d'avis de renuoyer la cognoissance de ce crime supposé, au Gouverneur de la Prouince: mais les Syracusains ne le voulurent jamais permettre, de peur qu'il ne fust fait iniustice à Hermocrate; & alleguant les priuileges qu'ils s'estoient conseruez, de cognoistre de telles affaires, ils voulurent en estre les iuges: toute-fois n'osant pas aussi l'absoudre entierement, de peur que Dicearque ne s'en plaignist au Gouverneur, ils s'assemblerent dès l'apresdisnée, & se contenterent de le bannir pour cinq ans selon leur ancienne loy du Petalisme, qui auoit esté faite contre ceux qui affectoient la tyrannie. Dicearque

ne voulant point irriter le peuple , tesmoigna estre satisfait de le voir esloigné , & quinze iours apres Hermocrate fut contraint de sortir de la ville avec sa femme Euphrosine , qui estoit presté d'accoucher , & quelques-uns de ses amis , entre lesquels estoient Diocles & moy , ce dit Telephe , pour aller iusques à Lylibée , & de là s'embarquer pour passer à Carthage. l'auois bien ouï dire , dis-je à Melinte en l'interrompant , que Diocles & Telephe auoient esté de party contraire à mon oncle Dicearque : Cela , dit-il , se rapporte ; puis il reprit. Telephe adiousta , qu'Hermocrate quitta les larmes aux yeux son païs qu'il auoit tant aimé : & emportant ce qu'il auoit de meubles plus precieux , laissa à Diocles l'administration de tous les biens qu'il auoit en Sicile , & ayant souffert qu'il l'accompagnast vne iournée , ils se separerent ; mais Telephe l'ayant voulu suiure iusques à Lylibée , le soir les douleurs de l'enfantement prirent à Euphrosine , qui accoucha la nuit d'un fils , lequel à l'endroit du cœur se trouua marqué d'un autre cœur.

Hermocrate en manda de ioye la nouuelle à Diocles , & mesme l'aduertit de ceste marque , & depuis ne voulant point exposer cet enfant aux incommoditez de la mer , me pria , ce dit Telephe , de le remporter à Syracuse , & de le nourrir comme mien , attendant la fin de son bannissement ; mesmes il dit qu'il estoit bien-aise qu'il fust né en Sicile , & qu'il y fust aussi esleué. l'acceptay , continua Telephe , ceste priere avec ioye. Dieux ! ce dis-je , interrompant Melinte , que vous me faites entrer en de grands soupçons de Diocles , de Telephe & de vous ; & que ces nouuelles vont changer de choses ? Madame , dit Melinte , vous n'estes pas beaucoup trom-

pée; puis il reprit. Telephe me dit qu'après auoir demeuré quelque temps à Lylibée, attendant qu'Euphrosine peust souffrir la mer, il s'en retourna à Syracuse avec ce petit enfant, où ayant trouué Hyperie sa femme qui accouchoit aussi, mais d'un enfant mort, il luy supposa celuy-cy, de peur qu'elle ne mourust de desplaisir, si on luy disoit sa perte; ce qu'elle creut facilement, & ils le nommerent ensemble Melinte. A ce mot, Ah! Dieux! Melinte, m'escriay-je, est-il bien possible? Madame, dit Melinte, ie ne m'estonne point de vostre surprise; car la mienne fut bien plus grande, lors que Telephe me prononça ce nom; & adiousta: Depuis ma femme vous a tousiours esleué comme sien, & vous sçaez aussi si i'ay rien espargné pour vous faire apprendre tout ce qui pouuoit orner vostre naissance. Et qu'est deuenu Hermocrate, dit Melinte à Telephe. Depuis son embarquement, respondit Telephe, nous n'en auons point eu de nouuelles: il n'aborda point alors à Carthage; & maintenant Diocles le croyant mort, & ne sçachant point qui vous estes, a usurpé tout vostre bien. Je luy ay souuent dit qu'il ne deuoit point le pretendre, sanspourtant luy dire encore ce que vous estes. Et cesiours passez, voyant que par le moyen de ses richesses il recherchoit la nièce de Dicearque pour son fils, i'allay l'aduertir qu'il ne disposast de rien au preiudice d'Hermocrate, & de son fils qui estoit viuant, ce que ie luy ferois cognoistre: mais il ne fit que se moquer de moy, & me demanda si ie ne pretendois point quelque part en ce bien, pour la cognoissance que i'en auois; qu'il le garderoit bien tout seul, & que ie ne ferois point creu quand ie voudrois descouurir quelque

chose. Je sortis, dit Telephe, en l'appellant meschant, & l'assurant que la verité se descouvroiroit. Auiourd'huy ayant sceu qu'il auangoit tousiours ses affaires, sans se soucier de ce que ie luy auois dit, ie suis retourné pour l'assurer qu'il se repentiroit s'il se rachoit d'une si grande infidelité. Il a continué ses mocqueries avec tant d'orgueil & d'indignité, que j'ay resolu de vous descouvrir toute vostre fortune, afin d'auiiser ensemble aux moyens de nous opposer aux entreprises de cet homme, & aux desseins qu'il a de retenir ce qui est à vous. l'estois, ce dit Melinte, si confus de tant de nouveautez, que ie n'estois pas capable de choisir vn conseil : toute-fois ie luy dis, que si ces choses estoient vrayes, ie ne manquerois iamais de courage pour en tirer ma raison ; qu'il me donnast quelque temps pour penser là dessus, pource qu'il falloit y proceder avec autant de prudence que de resolution. Ayant approuué, ce dit Melinte, mon aduis, ie luy dis que ie ne laisserois pas de le nommer tousiours mon pere, & del'honorer comme tel, pour les grandes obligations que ie luy auois, & il me confirma toutes les assurances que ie pouuois desirer de son amitié ; me jurant que quand ie ne pourrois auoir raison de Diodes, il ne laisseroit pas de partager son bien entre sa fille & moy, comme ie l'auois creu auparauant : toute-fois qu'avec le soin que nous y deuions prendre, il esperoit que les Dieux me feroient iustice. Maintenant, continua-t'il, Madame, vous voyez comme i'estois obligé de vous aduertir de ce que j'ay appris. Je ne croy pas vous auoir offensée, sinon en parlant de Diccarque avec les termes de Telephe. Et vous voyez comme ie remets ma vie en vos mains :

main : pource que si Dicearque vient à sçauoir que ie suis fils de celuy qu'il n'a pas aimé , peut-estre cherchera-t'il ma ruine : mais vous en disposerez comme il vous plaira. D'un autre costé si i'ay à me declarer , ie merends ennemy non seulement Dicearque , mais Diocles encore , & tous ceux de leurs partis : mais ie ne craindray point toutes ces difficultez , pourueu que vous ayez agreable que ie me declare fils d'Hermocrate, dont nous auons oüy parler avec tant de regret du peuple ; & que ie sois reconnu descendant de ce sang illustre de Pyrrhe & d'Achille : toutefois auant que de dire ma resolution à Telephe , i'ay voulu vous supplier de me faire sçauoir vostre dessein : car si vous desirez espouser Amyntas , iamais autre que vous n'entendra parler de ma fortune : les biens que ie luy laisseray seront la moindre perte que ie feray dans son bon-heur. Ie vous demande donc conseil , Madame , de ce que ie dois faire , & vous prie de me dire ce que vous avez resolu sur ce mariage : ie vous promets de satisfaire à ce que vous m'ordonnerez , quand mesme vous me desdendriez de viure. Epicharis, continua Ariane, ie te iure que i'estois confuse d'estonnement & de ioye, de le connoistre d'une condition plus releuée que ie n'auois crû ; mais ie ne laissay pas d'admirer sa generosité , avec l'amour & le respect qu'il me portoit ; & ie luy dis ; Melinte , si ie vous trouue veritable , vous pouuez vous assurer que ie n'espouseray iamais un vsurpateur de vostre bien : vivez aussi certain , que iamais Dicearque ne vous voudra de mal par la connoissance que ie luy donneray de vous. Ie suis trop obligée à vostre franchise pour vous nuire : Ie ne suis qu'empeschée avec vous de la sorte que vous vous

conduirez parmy tant d'ennemis. Madame, dit-il, c'est mon moindre soucy, puis que vous receuez mon secret si favorablement; & j'espère qu'il vous sera vn iour si bien verifié, que vous ne vous repentirez pas d'auoir iane fait de graces à vne personne de ma condition. Melinte, luy dis-je, la connoissance que vous me donnez de vostre naissance illustre, adiouste fort peu à l'estime que ie faisois desia de vous: & vous me tesmoignez tant de confiance, que vous m'obligez de prendre désormais autant de part que vous mesme à tout ce qui vous touchera: mesmes ie vous ordonne de ne rien resoudre sans moy de vostre conduite; tant ie me veux interesser en toutes les choses qui vous arriueront. Il fut si rauy de ce tesmoignage d'affection, que de transport il osa bien me baiser la main par remercement: ce fut la premiere faueur qu'il obtint de moy, & la seule que ie luy aye depuis permise: nous aduisasmes alors qu'il falloit laisser passer quelque temps, pendant lequel beaucoup de choses se pourroient elclaircir. Pour l'asseurer, ie luy iuray de n'espouser iamais Amyntas, cependant nous trouuasmes plus à propos que Telephe ne le descouurist point, & qu'il s'acquist quantité d'amis pour se fortifier, comme il luy seroit aisé. Sur tout qu'il gagnast la bonne volonté du peuple (dequoy ces iours passez il auoit trouué vne occasion bien favorable, ayant obtenu de l'Empereur les exemptions des tributs) & qu'apres que toutes choses seroient préparées, on pourroit accuser Diocles, & verifier la naissance par tesmoins que Telephe pourroit fournir; puis luy demander les tiltres des biens qu'il auoit vsurpez, ce qu'il luy seroit impossible de représenter. Il me protesta de suiure mon con-

seil, & me fit des remercemens si passionnez, à cause du soin que ie prenois de sa fortune, qu'il me fut impossible de resister à tant d'affection; & deslors sans jamais nous parler d'amour, nous fumes assurez qu'il n'y en auoit point de si parfaite que la nostre. Nous fumes d'auis de ne rien dire à Palamede, à cause de son naturel trop prompt, qui se fust porté pour Melinte à des violences contre Diocles, que nous ne iugions pas necessaires. Melinte fit que Telephe consentit à ne le point descourir encore, & luy dit qu'il s'asseroit que Palamede scauroit bien empescher le mariage de sa sœur: pour moy ie fis scauoir à Amyntas que ie n'estois pas resoluë de me marier de plus d'un an, & qu'il se gardast bien d'en faire faire auparauant les propositions; à quoy il promit de m'obeir. Depuis, l'occasion s'estant présentée de l'Ambassade de Syracuse à Rome, Palamede voulut faire ce voyage, & ie fis resoudre Melinte de l'y accompagner, sur l'assurance que ie luy donnay couuertement, qu'en son absence il ne se passeroit rien à son preiudice: mesmes ie luy dis, qu'il pourroit trouuer occasion de seruir son pais, & de s'acquerrir du credit avec les Ambassadeurs par ses conseils, & ses entremises. En quoy tu as peu scauoir comment il a reüssi, & combien d'honneurs il eust receu à son retour en Sicile, si la fortune ne luy eust esté presentement si contraire.

Tu vois donc, Epicharis, si ie me fie en toy, te descourant le secret de Melinte, & le mien; mais ie prie les Dieux de ne luy point enuoyer d'autre malheur que celuy que ie crains de toy par indiscretion. Epicharis auoit esté si attentive à tout ce discours, & si rauie d'ap-

prendre tant de nouvelles , qu'elle sembloit auoir perdu l'usage de la parole : mais alors elle dit ; Madame , ie ne croy pas auoir iamais receu tant de contentement qu'en vous escoutant parler , tant pour auoir appris des choses si agreables , comme pour la confiance que vous prenez en moy. Je m'assure que des fortunes si belles , & des affections si vertueuses , n'auront point vne fin si mal-heureuse que celle que vous craignez : & l'honneur que vous me faites m'oblige à entreprendre tout pour vostre seruice , & pour celuy de Melinte. Helas ! Epicharis , reprit Ariane , à peine puis-je esperer de le voir iamais en lieu où ie puisse rien resoudre à son aduantage , ny où tu nous puisses seruir. Madame , dit Epicharis , en se releuant , ie vous supplie de me permettre que dès cette heure ie vous tesmoigne la passion que j'ay pour vous. Que peux-tu faire ? respondit Ariane. Il vous a , dit-elle , laissé Arcas , auquel il a donné charge de ne vous point abandonner : Donnez moy à luy en eschange , & souffrez que ie demeure en ce pais pour sçauoir ce qu'ils pourront deuenir , pour les assister , & vous en mander des nouvelles. Comment , dit Ariane , pourrois tu faire quelque chose n'estant qu'une fille , & encore toute seule en ce pais ? Madame , repartit-elle , la disgrâce qui m'est arriuée en la bruslure de mes cheueux fauorise mon dessein. Je me veux desguiser en garçon , & cette nuit il me sera aisé de m'eschapper d'entre vous en ce bois , lors que vous partirez. Epicharis , dit Ariane , tu es trop courageuse ; j'aurois peur que ta peine ne fust inutile , & ie serois cependant priuée de ta compagnie , & de tes consolations. Madame , dit-elle , j'ay pris cette resolution , & ie demeurerois icy

malgré vous quand vous ne l'aurez pas agreable : mais ie vous supplie d'y consentir. Ariane s'accorda en fin à ce dessein, & voyant qu'il restoit encore assez de iour avant qu'ils peussent partir , toutes deux s'endormirent.

Fin du quatriesme Livre de l'Ariane.







LE
CINQVIESME
LIVRE DE
L'ARIANE.



RISTIDE ne sçachant point le dessein d'Epicharis, apres auoir quelque temps sommeille, songea à tout ce qu'il auoit à resoudre sur cét accident: d'un costé il eust voulu retourner à Rome, pour deffendre la cause de son fils, s'il estoit entre les mains de la Iustice, & pour esmouuoir les Iuges & l'Empereur à compassion. D'autre costé il ne vouloit point y mener sa fille, ny la laisser aller seule en Sicile, puisque Neron la desiroit. En fin cognoissant qu'il estoit contraint de suiure l'aduis d'Arcas, & de sortir de l'Italie, où ils ne manqueroient point d'estre tousiours poursuiuis, il ne pou-

uoit se consoler d'abandonner son fils en vn si grand hazard de sa vie : toute fois il se resolut de laisser quelqu'vn dans le païs , qui pourroit songer aux moyens d'assister Melinte & luy, & de les garantir de mal-heur. Il n'en trouua point de plus propre qu'Arcas, & le pria de prendre cette charge : mais il luy tesmoigna qu'il n'auroit point de plus grand desir, sans qu'il s'estoit obligé par serment à Palamede de ne les point quitter qu'ils ne fussent en Sicile, & qu'il falloit donner cette commission à vn autre. Aristide choisit le plus aduisé d'entre les siens qui se nommoit Hermes, & l'ayant instruit des moyens qu'il falloit tenir au cas qu'ils fussent retenus par la Iustice, il luy donna le plus d'argent qu'il peût : puis la nuit arriuant ils se preparerent pour partir. Ariane donna aussi en secret à Epicharis quelques bagues qu'elle auoit pour luy seruir au besoin qu'elle auroit d'argent, & tous s'estant mis en chemin dans les destours de la forest, sous la conduite d'Arcas qui en auoit remarqué les sorties, ils se trouuerent en peu de temps dans la campagne, d'où ils commencerent à voir, & à sentir la fumée de la ville qui brusloit encore. Parmy cette horreur ils ne laisserent pas de s'auancer vers Ostie, & quelque temps apres Aristide s'approchant de sa fille, & ne voyant point Epicharis luy demanda où elle estoit. Ariane luy respondit, qu'elle croyoit qu'elle les suiuoit : on la chercha parmy les autres, mais ne se trouuant point, Aristide s'imagina qu'elle aimoit Hermes, & pource qu'il quittoit la troupe, qu'elle s'estoit eschappée pour le suiure. Ariane luy dit, qu'elle ne croyoit pas cela d'Epicharis : mais qu'elle se feroit esgarée dans le bois, & feignant d'en estre fort en peine, elle prioit qu'on y retournast pour la chercher.

Aristide

Aristide se mettant en colere, iura qu'il la laisseroit, puis qu'il luy auoit esté aisé de suiure les autres, si elle l'eust voulu; & quelque desplaisir qu'en tesmoignast Ariane, il ne voulut point retarder dauantage pour cette fille. Quelques vns retournerent sur leurs pas, mais ne l'ayant point trouuée, chacun continua son chemin. Ils arriuerent heureusement à Ostie, où ils virent vn homme, qui apportoit nouuelles que l'on auoit pris deux Siciliens, qui estoient accusez d'auoir mis le feu à Rome, & qu'ils estoient prisonniers; Cela les consola vn peu, sçachant qu'ils estoient viuans: ils ne laisserent pas de beaucoup apprehender pour eux; mais esperant en leur innocence, & ne pouuant alors y donner aucun remede, ils s'embarquerent dans le vaisseau qui auoit esté retenu pour eux, recommandant Palamede & Melinte aux Dieux, & passant le destroit d'entre Regge & Messine qui separe la Sicile de l'Italie, ils aborderent sans danger à Syracuse.

Lors qu'on les vid arriuer sans Palamede & Melinte, & que l'on sceut leur mal-heur, & fut vn duel public, pource qu'ils estoient tous deux fort aimez du peuple: Et la consideration de Diccarque, d'Aristide, & de Telephe, avec la bonne volonté que chacun portoit à ces deux amis, fit resoudre les principaux de la ville d'enuoyer en leur faueur vne Ambassade expresse à Neron & au Senat, pour représenter leur innocence, & obtenir leur grace, taschant de rendre à Melinte le bien-fait qu'ils auoient receu de luy lors qu'il auoit obtenu les exemptions. Diccarque voulut estre le chef de ces Ambassadeurs, & ils se hasterent de partir, pource qu'il n'y auoit point de temps à perdre: mais lors qu'ils furent

passiez à Regge pour aller par terre à Rome, ils y rencontrèrent Hermes, qui leur dit ces funestes nouvelles; que Palamede & Melinte ayant esté examinez en peu de iours, & se voyant prests d'estre condamnez par le commandement exprés de Neron, auoient voulu preuenir vne mort honteuse, & s'estoient precipitez dans le Tybre du haut de la tour où ils estoient prisonniers. Cette assurance qu'il leur donna les fit retourner sur leurs pas, & repassant à Messine, ils arriuerent par le mesme chemin à Syracuse, où ils remplirent tout de tristesse & de confusion.

Aristide arracha ses cheueux, & s'accusa d'auoir abandonné son fils: & sa douleur fut telle que bien tost apres elle le conduisit au cercueil. Dicearque ressentoit ce mal-heur, perdant la plus chere esperance de sa maison. Telephe estoit touché d'une aussi grande affliction pour Melinte, que s'il eust esté son propre fils, mais rien ne pouuoit égaler le deuil d'Ariane; qui sous le pretexte de la mort de son frere, pleuroit encore celle de Melinte, avec les plus ardantes larmes que l'amour fit iamais resplandre: tout retentissoit de ses plaintes. Helas! disoit-elle, c'est donc à cette heure que ie suis assurée de mon mal-heur. Mal-heureuse Rome! qui sers de tombeau à mes plus cheres esperances; faut-il encore que tu triomphes de nous? & que l'iniustice qui regne chez toy, ait fait perir vne si vertueuse innocence? Dieux! iusques à quand souffrirez vous cette cruelle tyrannie? que n'abîmez vous ce meschant peuple? ou que ces iours derniers ne l'avez vous laissé deuorer aux flammes qu'ils nous auoient préparées, pour les punir par leur propre meschanceté? Helas! il est assez resté de ces mal-heureux

pour perdre la plus belle amitié qui fut jamais. Cher frere, ie ne te verray plus, & ne te voyant point, ie ne verray plus ce que j'auois de plus cher au monde. Funeste voyage! mal-heureux conseil que ie donnay à mon frere, d'aller voir vne ville qui ne subsiste que pour la ruine de toutes choses! car depuis qu'il l'eut approchée, quelle suite de miseres auons nous esprouuée? & quelle aveugle fureur nous conduisoit l'un apres l'autre, pour aller chercher les mal-heurs en leur source, & le lieu où le vice & les crimes regnent avec tant de pouuoir & d'insolence? au moins lors que i'y fus arrivée, iustes Cieux, que ne me laissiez vous perir dans le feu avec eux, sans me faire suruiure à la seule personne qui me rendoit la vie heureuse & souhaittable?

Cette Belle ne feignoit point de faire ces regrets en presence de tous, pource quel'on en attribuoit le sujet à la grande amitié qui estoit entre son frere & elle: mais sa plus grande douleur estoit de n'auoir personne pour se soulager en luy disant sa plus secrette douleur. Elle n'auoit plus Epicharis sa chere consolation: toutefois elle esperoit encore vn peu iusques à ce qu'elle eust appris la verité de leur mort par la bouche de cette fille. Elle demanda en secret à Hermes s'il ne l'auoit point veüe, & il luy dit qu'il auoit aydé à la déguiser; qu'ils estoient entrez ensemble dans Rome; qu'elle luy auoit conseillé d'aller trouuer Maxime, & les amis que Melinte & Palamede auoient acquis, & que depuis il n'en auoit sceu aucunes nouuelles; ce qui la mit encore plus en peine d'Epicharis, de qui l'auanture auoit esté telle.

Auant qu'Aristide & Ariane partissent du bois, elle auoit aduertty Hermes de son dessein, pource qu'elle

s'asseuroit en luy ; afin qu'il l'attendist au mesme lieu , lors qu'elle se seroit eschappée des autres , preuoyant qu'elle en auroit besoin , tant pour sortir de la forêt , que pour auoir des habits , & auiser ensemble aux moyens de secourir Palamede & Melinte. Elle s'esloigna vn peu de la troupe , apres auoir baïsé & embrassé sa chere Maistresse : puis elle vint retrouver Hermes , qui luy coupa le reste de ses cheveux ; & le matin lors qu'ils furent au bord du bois , elle fut d'auis qu'il s'en allast luy acheter des habits à Rome , & apprendre ce qui s'y disoit. Elle l'attendit fort long temps , & iusques à la moitié du iour , pource qu'il y auoit quatre milles de chemin : en fin il reuint , & luy apporta des habits dont elle s'accommoda le mieux qu'elle peût , & cacha les siens. Il luy dit , que le bruit courroit que l'on auoit pris deux Estrangers que l'on accusoit d'auoir mis le feu à Rome : ils iugerent que c'estoit Palamede & Melinte , & à l'heure mesme monterent à cheual , & se mirent en chemin. Epicharis arriuant à Rome , fut contrainte de s'arrester aux portes , pour la quantité de ceux qui en sortoient avec beaucoup de pleurs & de gémissemens à cause de leurs pertes.

Toutefois prenant resolution , elle entra parmy la confusion de tant de personnes miserables , les vns portant ce qu'ils pouuoient sauuer , les autres pleurant leurs enfans & leurs parens bruslez : & il y en auoit aussi parmy eux qui emportoient ce qu'ils auoient pillé dans ce desordre , & tout estoit plein de cris & de tumulte. Il ne luy fut pas mal-aise d'estre inconnue dans ce trouble ; elle pria Hermes de conduire son cheual en quelque lieu : puis luy conseilla d'aller chez Maxime , & les

amis de leurs Maistres pour les faire employer à leur deliurance. Pour elle, s'estant enquisse de la prison, elle alla pour la reconnoistre, & sur le soir elle vid sortir vn vieillard avec vn ieune homme, & sceut que c'estoit le Geolier & son fils. Elle les suiuit pour tascher d'apprendre où ils alloient, & ce qu'ils cherchoient : puis comme la nuit s'approchoit, elle les vid entrer sous le portique de Liue, où il y auoit vne grande quantité de personnes qui se promenoient. Ce bon homme parloit à son fils comme ayant l'esprit fort attaché à ce qu'il disoit, & ce fils s'estant arresté pour voir quelque dispute, comme la ville en estoit pleine alors, Epicharis s'aperceut que le Geolier poursuiuoit son chemin, & ne cessoit point son discours, croyant encore parler à son fils, tant ses affaires l'occupoient. Elle se iognit subtilement à luy, & allant d'vn mesme pas, escouta ce que disoit ce vieillard, qui ne croyant pas auoir vn autre à son costé que son fils, dit en continuant son propos : Tu consideres bien que les hommes que l'on nous amena hier, paroissent des personnes de condition qu'il faut garder soigneusement. Nous ne pouuons pas nous deux songer à tout; j'ay besoin d'vne personne pour les veiller & coucher en leur chambre. Je verray si celuy qu'on m'a dit qui se veut vendre à l'entrée du Temple d'Isis me sera propre, & s'il se donnera à bon marché. Epicharis peût à peine s'empescher de rire de l'erreur de ce Geolier, & fut bien aise d'apprendre son dessein, puis voyant reuenir son fils, elle s'eschappa de luy, sans qu'il s'en apperceust à cause de l'obscurité; & courut en diligence à l'entrée de ce Temple, où elle trouua vn ieune homme qui estoit assis. Elle luy demanda s'il se vouloit vendre : il luy con-

feffa qu'il estoit là pour ce sujet ; elle conuint promptement de prix avec luy , & luy donnant vne piece d'argent , luy dit ; Va t'en m'attendre près du Temple de Minerue , ie te meneray de là chez mon Maistre. Il s'en alla bien content , & incontinent arriva le Geolier avec son fils , qui trouuant Epicharis assise , déguisée en homme , luy demanda si c'estoit luy qui se vouloit vendre. Epicharis leur dit qu'elle n'attendoit là pour autre chose. Ils la considererent , & la trouuant à leur gré luy parlerent du prix , & bien qu'ils offrissent peu , elle s'y accorda , à la charge qu'elle pourroit se racheter pour la mesme somme. Cela fut trouué raisonnable , & le Geolier voulant luy donner l'argent , elle le pria de le garder , pource qu'elle ne sçauoit où le mettre. Ce bon homme , bien content de sa franchise , la mena en la prison , & en chemin l'instruisit de tout ce qu'elle auoit à faire : En quoy elle promit de le seruir fidellement , & se fit appeller Eurylas.

Ils entrerent lors que l'on portoit à souper à Melinte & à Palamede , & l'on donna aussi tost vn plat à seruir à Eurylas , qui entrant dans la chambre , & s'approchant de Palamede luy marcha sur le pied , de peur qu'il ne fust surpris en la voyant ; puis il en fit autant à Melinte. Ils se douterent qu'on leur vouloit donner aduis de quelque chose , mais ils ne la recognoissoient point encore ; elle reserua donc à se decouvrir la nuit , lors qu'elle seroit seule avec eux dans la chambre. Le temps venu pour se coucher , elle fut laissée pour les seruir , & enfermée à la clef dans cette chambre avec de la lumiere. Alors commençant à les regarder & à soufrire : Ingrats , dit-elle , parlant assez bas , est-ce ainsi que vous mecoïnoissez

ceux qui courent tant de hazards pour vous ? Helas ! dit Palamede , c'est Epicharis : Melinte la reconnut aussi. Chere Epicharis, reprit Palamede, vous ay ie iamais obligée à vous mettre en ce danger pour moy ? & voulut l'embrasser : mais elle, le repoussant doucement, luy dit ; **T**e vous prie de ne point prendre de recompense au lieu de m'en donner, vous seruant comme ie fay. Melinte fut d'avis d'esteindre la chandelle, de peur qu'ils ne fussent veus, & apres il luy demanda des nouvelles d'Aristide & d'Ariane, & s'ils s'estoient sauuez. Elle dit qu'elle en auoit opinion : puis leur conta la resolution qu'elle auoit prise de se déguiser pour les seruir, en eschange d'Arcas qui ne vouloit point quitter Ariane ; qu'Hermes auoit esté laissé par Aristide pour les assister : mais qu'elle l'auoit perdu apres luy auoir donné aduis d'employer pour eux Maxime & ses amis : & elle leur dit en suite comment elle auoit abusé le Geolier pour se rendre dans cette prison. Ils admirerent la gentillesse de son esprit, & l'heur avec lequel ce vieillard auoit esté trompé, & se resolurent de bien mesnager ce bon-heur : Sur tout ils furent d'avis de ne se point parler de iour, & de remettre leurs conferences à la nuit, de peur qu'elle ne fust descouuerte. Elle leur demanda comment ils n'auoient point esté tuez à la rencontre des soldats qui les auoient pris, puis qu'il y en auoit eu de morts. **L**e vous iure, dit Melinte, qu'ils auoient trop de peur de nous desesperer, & que nous n'en tuassions encore quelques vn : nous fusmes contrainsts de nous rendre apres auoir combattu iusqu'à l'extremité, & depuis ils nous traiterent assez indignement, iusques dans cette prison, où nous sommes en attendant que le feu soit du tout esteint, & que le Senat puisse s'assembler pour

cognoistre des crings dont on nous accuse. Il faut, dit-elle, tascher à sortir d'icy auant qu'ils ayent ce loisir, & ie ne tarderay gueres d'en recognoistre les moyens: mais, dit Palamede en luy prenant la main, ie me dois bien loüer de mon mal-heur, qui m'a donné le bien de faire coucher en ma chambre mesme celle pour qui j'ay tant soupiré. Palamede, dit Epicharis, si ie me suis mise si franchement entre vos mains, n'en prenez autre aduantage que le tesmoignage que ie vous rends d'un desir honnesté de vous seruir, car si vous abusiez de ma franchise, ie scaurois bien vous punir, & moy mesme aussi d'auoir obligé vn indiscret. Elle prononça ces paroles vn peu esmeuë: mais Melinte luy dit; Non, non, Epicharis, ie seray son garand: assurez vous que Palamede n'a point tant perdu le iugement qu'il ne sçache combien nous deuons porter de respect à vostre sexe, & d'honneur à vostre courage. Elle sçait, reprit l'Alamede, si ie cognois bien son humeur, & si ie l'honore. Ie me suis instruit assez à mes despens comment ie dois viure avec elle, ayant plus appris de discretion aupres d'elle que mon esprit n'en sembloit estre capable: toutefois elle sçait aussi qu'il faut tousiours que ie rie. Ces occasions, dit-elle, ne permettent point la raillerie; Contentez vous que ie vous ayme comme mon Maistre, & Melinte comme mon frere. Melinte admira sa vertu & sa gentillesse, & la remercia de la bonne volonté qu'elle auoit pour luy, sans l'y auoir obligée. Melinte, dit-elle, vous valez plus que tous mes seruices, souffrez seulement que ie fasse pour vous ce que ie puis: & pour l'heure obligez moy de me laisser dormir; car iamais ie n'eus tant de besoin de repos. Melinte la pria de prendre leur

liet pour elle seule : pource qu'il estoit plus commode que le sien ; mais elle ne le voulut iamais , & se mit dans vn autre fort petit qui luy auoit esté préparé , apres les auoir priez de se souuenir qu'elle se nommoit Eurylas , & non plus Epicharis. Ils promirent d'y prendre garde , & alors ils se teurent tous trois pour dormir.

Le lendemain elle se leua deuant eux , & alla faire connoissance avec tous ceux de cette obscure maison ; puis ayant sceu qu'il y auoit quelques Romains qui desiroient parler aux deux amis , elle les alla trouuer pour sçauoir ce qu'ils desiroient. Ils luy tesmoignerent qu'ils leur venoient offrir leurs biens & leurs seruices. Epicharis alla demander au Geolier si elle les feroit entrer , mais il dit que cela estoit expressement deffendu , & elle leur fit response qu'il estoit impossible de leur parler ; mais qu'ils s'employassent enuers les Senateurs , pour faire connoistre leur innocence , & quelles auoient esté les actions de leur vie passée , ce qu'ils promirent , & s'en allerent apres qu'elle eut sceu le logis de quelques vns pour s'en seruir s'il estoit besoin.

Cependant , Melinte qui s'estoit resueillé long temps deuant Palamede , se mit à songer à son bon-heur , & louïa cét accident qui luy faisoit recevoir ce cher tesmoignage de l'affection d'Ariane , de luy auoir enuoyé sa fidele Epicharis pour l'assister avec son frere , ne pouuant elle mesme les secourir. Il ne douta point qu'il ne sortist de ce danger , se voyant fortifié d'une telle assistance , & employa toutes ses pensées au souuenir d'Ariane , & de la fortune de ses amours qu'il trouuoit en vn point tres-heureux. Car bien qu'il peust croire qu'elle n'eust enuoyé cette fille qu'à cause de son frere , il trouuoit cet-

te action trop gentille & trop genereuse pour paroir d'vne simple amitié, & n'estre pas vne inuention d'amour: puis s'arrestant sur cette pensée, il disoit en luy-mesme; Ose- ie bien aussi pretendre tant de bon- heur? & puis- ie croire sans presumption qu'elle m'aime? car si ie la croy toute parfaite, ie dois estimer qu'elle a le iugement excellent: & avec quelle vanité puis- ie esperer qu'elle me pense digne d'elle? toutefois puis qu'elle l'a si parfait, elle connoist à quel degré ma passion est paruenüe, & peut- estre veut elle bien que la perfection de mon amour se compare à la grandeur de son merite. Serois- ie bien si heureux que pour cette raison elle ne reconnuist rien au monde digne d'elle que moy? qu'elle m'eust separé de tous pour me choisir? & qu'elle eust arresté ce choix en son ame? Agreables pensées, mais trop ambitieuses, où me conduisez vous? osez vous bien me comparer à cette diuinité, à qui rien ne fut iamais comparable? où sont vos respects & vos craintes? demeurons dans la soubmission, & n'esperons sa grace qu'en l'adorant, & non pas en nous égalât à elle. Mais n'est- ce point aussi faire tort à la perfection de mon amour, de l'abaisser par humilité, au lieu de reconnoistre sa beauté & sa grandeur? Les choses qui sont arriuées à ce degré, sont d'une gloire trop esclatante pour souffrir qu'on les mesprise; elles veulent qu'on les admire, & qu'on les confesse aussi diuines qu'elles sont. Pardon, mon amour: j'aime mieux te laisser faire que de t'offenser: esgale toy si tu veux à tant de merites: c'est par toy seule que j'espere: peut-estre desia cette belle t'aime & t'embrasse, rauie de ta perfection; & quand nous en douterions, demeurons dans la creance que nous est la plus agreable, & ne refusons pas au

moins les contentemens del'esperance.

Ces douces rêveries l'entretenoient avec beaucoup de plaisir, lors que tout à coup il se sentit embrassé par Palamede, qui luy disoit: Pardon, Epicharis; hélas! Epicharis, ie te demande pardon. Melinte l'embrassa aussi, & luy parla pour luy faire continuer ce discours qu'il faisoit en dormant: mais Palamede s'esucilla, & confessa à Melinte qu'il songeoit auoir esté surpris par Epicharis, lors qu'il faisoit des protestations d'amour à Camille, & qu'il s'estoit ietté à ses genoux pour luy crier mercy. Puis regardant dans la chambre, & voyant qu'elle estoit sortie, il continua: Il n'y a point de doute que l'amour de cette fille vient tousiours reprendre sa place en mon ame, quelque legereté dont elle soit pleine: car ie l'ay aimée deuant que d'aller à Athenes, où vous sçaez combien ie seruis de Maistresses: à nostre retour dans Syracuse ie ne l'eus pas si tost veüe qu'elle m'asservit mieux qu'auparauant: estant venu à Rome i'ay aimé Camille, & vous auez veu combien froidement ie me suis seruy de l'aduantage que vous m'auiez acquis, depuis qu'elle fut arriüée avec ma sœur: maintenant elle rouure ma playe plus que iamais par le soin qu'elle prend de nous, & par mille gentilleses que son esprit produit à tous momens. Pour moy, dit Melinte, ie ne puis croire qu'elle soit née de condition seruite, elle à trop de belles qualitez pour vne naissance si mal-heureuse: & ie vous iure que ie ne blasmeray iamais vostre affection, de se laisser vaincre à tant de perfections. Ie ne croy pas que vous voulussiez faire ce tort à ceux dont vous estes sorty, de pretendre à l'espouser, & vous ne deuez pas aussi rien desirer d'elle qui puisse offenser son honneur: mais ie vous estimeray

touſiours, d'aimer & honorer ce que vous remarquez en elle : pouuant dire avec vous, que ie n'ay gueres trouué de perſonne plus aimable. Ie vous confeſſe, reſpondit Palamede; que j'ay ſouuent ces meſmes penſées, & ie les flatte encore d'une certaine eſperance, qu'un iour elle ſe pourroit faire connoiſtre iſſuë d'un lieu qui ne me feroit point de des-honneur, tant ie voudrois que la raiſon ſe peuſt accommoder à mes deſirs. Eſt-il poſſible, dit Melinte, que Dicarque n'ait point appris des Pyrates, où ils l'auoient priſe? Iamais, dit-il, mon oncle ne nous a dit ce qu'il en ſçauoit : toutefois il l'a touſiours fait nourrir autrement qu'une Eſclauce, & comme ayant connoiſſance qu'elle fuſt venue de perſonnes libres : meſmes un iour qu'il fut parlé de la marier avec Aſylas, ieune Eſclauce, né dans ſa maiſon, il ne pût ſ'empêcher de dire : Les Dieux ne me pardonneroient iamais d'auoir meſlé ſon ſang avec un autre ſi indigne d'elle. Cette parole m'engagea dauantage à l'aimer, & ie veux bien vous dire comment ie me laiſſay prendre. Vous ne ſçauriez croire, reſpondit Melinte, combien ie m'intereſſe dans ſa fortune, & quel plaiſir vous me ferez de me conter un peu de ſa vie. Ie vay donc, dit-il, vous dire ce qui ſ'eſt paſſé entre nous, & il reprit ainſi.



Histoire de Palamede & d'Epicharis.



E ne ſçay ſi ie me dois eſtimer heureux, ou malheureux del'affection où ie me ſuis engagé pour elle, ne trouuant aucune eſperance de la poſſeder, ny comme Maĩtreſſe à cauſe de ſa vertu, ny comme

legitime espouse à cause de sa condition : mais ie vous en laisseray iuger , apres que ie vous auray fait le recit de nos amours. Vous sçaurez donc qu'Epicharis estant nourrie avec beaucoup de soin par Acidalie femme de Dicearque, & se rendant de iour en iour plus recommandable par sa beauté & son agreable humeur , fut aimée par ce ieune Asylas de qui l'esprit estoit fort simple & pesant : toutefois se voyant avec quelque credit dans la maison , à cause qu'il estoit fils de Cromis & de Menalippe, deux Esclaves qui auoient en gouuernement tout le mesnage de Dicearque , & qu'Epicharis estoit fort aimée de leurs Maistres ; il creut qu'il ne pouuoit mieux faire que de pretendre à l'espouser , & premierement il se resolut d'acquerir ses bonnes graces : mais elle qui sentoit son cœur noble, ne pût souffrir vne telle recherche , & le traitta tousiours avec vn extrême mespris.

Vn iour l'estois entré dans le iardin de Dicearque , & estois prest de m'endormir dans vn cabinet ombragé de feüillages , lors que ie la vis arriuer fort près de là en dessein de cueillir des fleurs. l'estois desia assez touché d'affection pour elle , & n'eusse pas manqué de l'aller surprendre : mais ie fus preuenü par Asylas, qui cherchant la commodité de luy parler , l'aborda , toutefois avec crainte, & d'vne façon assez simple, s'offrit à luy cueillir les fleurs qu'elle desiroit. Elle le remercia, & dit qu'elle prenoit plaisir à les cueillir elle mesme. C'est plustost, dit-il, que vous refusez mon seruiçe. Auez vous, respondit-elle, vn seruiçe à donner ? Ouy, reprit-il, & ie vous en fay present. Vous donnez, dit-elle, ce qui n'est pas à vous ; & ie vous le rends de peur d'estre accusée de larcin. Pourquoy cela ? repartit-il. Pource dit-elle, que vostre seruiçe est au Maistre que

nous seruons, & ie n'y veux rien pretendre. Il demeura vn peu court, pource qu'il n'auoit pas la repartie si prompte : puis il reprit. Encore que ie sois à luy, ie puis vous faire present de quelque chose qui est à moy. Et dequoy? dit-elle. De mon cœur, respondit-il. Et comment feriez vous, repartit-elle, pour me le donner? Vous demandez, dit-il, bien des choses : qu'auetz vous affaire de le sçauoir? Encore, dit-elle, seroit-ce bien la raison que ie le sceusse, & acheuoit tousiours de cueillir ses fleurs. Ce ieune homme ne sçauoit par où faire sortir son cœur pour luy en faire present: Et ie voyois qu'elle s'en vouloit aller ayant fait son bouquet : ce qui m'obligea de sortir du lieu où i'estois pour l'arrester. Elle rougit de honte d'auoir esté escoutée durant ce discours : & Asylas s'estant esloigné de nous par respect, ie luy dis; Gentille Epicharis, ie vous sçay bon gré de traicter ainsi des personnes si indignes de vous : elle me respondit ; Pource que nous seruons vn mesme Maistre, il croit toutes choses égales entre nous; mais il y a cette difference, qu'il est Esclaue de nature, & moy de fortune : Car la nature ne peut iamais se changer, & la fortune peut me rendre la liberté qu'elle m'a ostée. S'il ne tient, luy dis-je, qu'à vous donner vne liberté pour vous rendre heureuse, ie vous offre la mienne. Et que seriez vous apres, respondit-elle? Vostre Esclaue, luy dis-je. Et qui pourroit, repartit-elle, causer ce changement ? L'amour, luy repliquay-je, que ie vous porte. Je veux bien, dit-elle en riant, faire cet eschange pourueu que vous me disiez ce qu'il faut que ie fasse. Que vous m'aimiez, luy dis-je: Et quoy, reprit-elle, vous dites que l'amour fait perdre la liberté; ie reuiendrois tousiours en ma premiere condition. Il vaut mieux,

luy respondis- ie , que nous partagions le tout entre nous : ainsi nous aurons vne seule liberté pour nous deux , & vne seule seruitude. Nous serions , dit-elle , trop empeschez à sçauoir qui seroit le Maistre. Parlons , luy dis ie , serieusement , Epikharis , ie vous aime avec passion , & vous prie aussi de m'aimer. Je veux bien , respondit-elle , vous parler aussi serieusement : Palamede ie vous honore avec respect , & vous prie de ne rien desirer de moy davantage : puis en me laissant , & voulant rire , elle adiouta : le vay trouuer Acidalie ; si vous desirez continuer ce discours , vous n'aurez qu'à le reprendre quand ie seray auprès d'elle. Lors qu'elle s'en alloit , ie demeuray quelque temps immobile , estant rauy de la gentillesse de ses propos , & resolu de l'aimer veritablement , esperant qu'elle se laisseroit vaincre. Je luy continuay tousiours à ce dessein les assurances de mon affection , iusques à vn iour qu'estant ensemble aux champs en la maison de mon oncle , ie creus qu'il n'y auoit qu'à trouuer vne occasion bien fauorable , & qu'elle se laisseroit gagner à mes prières & à la commodité. Je l'allay surprendre vn matin dans son liét , où ie la trouuay assoupie d'vn doux sommeil , couchée sur le dos , ayant vn bras sur sa teste , que la chemise peu soigneuse auoit abandonné tout entier à ma veüe ; l'autre estendu negligemment sur le liét , en sorte toutefois qu'il empeschoit qu'on la peust descourir. Son sein que cette façon de dormir laissoit reposer & se souleuer à son aise , n'estoit couuert que del'extremité du drap , qui par hazard s'y estoit rencontré ; le reste estoit composé fort modestement. Je demeuray confus la voyant si belle : car il sembloit que ses yeux despirez de n'estre pas ouuerts pour la garentir de moy , perçassent leurs

paupieres pour me blesser, tant ie me sentis esmeu. Toutefois n'estant pas content de ce que ie voyois, ie luy decourris doucement tout le sein : mais ie t'auouë, Melinte, que ie n'ay iamais rien veu de si beau. Je ne pûs dauantage me contenir alors, & y portant la bouche, ie le pressay plus que ie ne deuois, & la fis esueiller. Ce fut vn surfaict estrange que le sien, lors qu'à son reueil elle se vid entre mes bras, & s'en deliurant aisément, pource que ie ne la voulois pas fascher à cét abord, elle s'enuelopa de ses draps, & apres auoir blasmé ma hardiesse, d'estre entré en la chambre lors qu'elle dormoit, me pria d'en sortir. Alors honteux de perdre vne si belle occasion, ie me mis sur son liect, & en l'embrassant la pressay par toutes les prieres dont ie me pûs auiser de soulager mon amour ; & cependant ie la tourmentoys vn peu, esperant obtenir ce que ie desirois par vne douce violence : mais elle, apres auoir quelque temps resisté, se releua en fin, & me dit d'vn visage asseuré ? Palamede, ie ne vous crois point si peu raisonnable, que vous pretendiez de m'oster par force ce que i'ay de plus cher au monde : peut-estre esperez vous que ie me laisseray vaincre à vos importunitez, mais sçachez qu'il n'y a point de supplice si cruel, que celuy que ie choisirois pour vous & pour moy, apres la perte de mon honneur. Ma condition n'a rien osté de mon courage : qu'il vous suffise donc de l'auoir entrepris : le crime en est assez grand ; & ie ne vous le pardonneray iamais, si vous ne me laissez dès cette heure autant en repos, que i'estois auant que vous vinsiez icy. Si vous continuez vn dessein si meschant, tous vos efforts seront inutiles, & la difference de nos fortunes ne m'empeschera point de vous oster la vie, pour punir vostre indiscretion. Elle dit

ces mots d'une façon si feure que ie n'eus pas l'assurance de la presser davantage : le la suppliai d'excuser le transport de mon amour , & ne voulus point la laisser qu'elle ne m'eust pardonné. Depuis i'estimay tousiours sa vertu , & ne manquay point de luy rendre tous les seruites que ie pouuois , iulques au voyage que ie fis à Athenes.

Le vous iure , interrompit Melinte , que ie suis bien aise d'apprendre les tesmoignages d'un courage si genereux : voyez vn peu comme le vice sert à releuer la vertu : car il n'y a point de doute que sans le desir mauuais que vous eustes d'entreprendre sur son honneur , iamais peut-estre n'eussiez vous cogneu à quel point elle le cherissoit. Le vous auoueray , reprit Palamede , que depuis ce temps-là ie l'ay respectée autant que la plus releeue de nostre condition ; & plus ie l'ay pratiquée, plus i'ay remarqué de qualitez en elle , qui ne pouuoient estre produites que d'une belle naissance , comme vous sçavez par cette suite ; puis il continua.

Auant mon départ pour Athenes , i'auois recognu qu'Epicharis , voyant mon humeur trop libre changée en respect , & ma passion violente en vne amour vertueuse , auoit aussi vn peu moderé sa trop grande rigueur pour m'obliger d'une amitié honneste , & il ne se presentoit point d'occasion de meseruir , qu'elle ne le fist avec beaucoup de soin : mais si modestement que ie ne pouuois iuger que ce fust pour m'acquiescer davantage. Il sembloit seulement qu'elle tesmoignast m'auoir quelque obligation de l'affection que ie luy portois : & durant mon voyage ie receus tousiours d'elle des preuves qu'elle se souuenoit de moy. A mon retour i'eus vn grand con-

tentement, lors que ie sceus que mon oncle auoit dessein de la donner à ma sœur, & le iour qu'elle deuoit partir de sa maison, i'y allay pour la voir: mais en y entrant i'apperceus en vn coin le pauvre Asylas, empesché apres vn grand calcul, auquel il estoit si attentif qu'il ne me voyoit pas: il auoit vn petit liure dans lequel il regardoit; puis il supputoit tantost avec ses doigts, tantost avec des jettons, mais ie voyois bien qu'il ne trouuoit point son compte. En fin i'en eus pitié, & luy demanday ce qu'il faisoit. Il fut honteux d'auoir esté surpris en cette occupation: toutefois ie m'offris de si bonne façon à l'assister, qu'il me pria de calculer pour luy. C'estoit vn nombre d'années où il y auoit quantité de iours à adiouster, & beaucoup aussi à diminuer: mais ie voulus sçauoir ce que cela vouloit dire. Il me confessa qu'apres auoir long temps recherché les bonnes graces d'Epicharis, en fin il n'en auoit peu obtenir autre chose, sinon qu'apres six années de seruice, elle pourroit receuoir son affection: Et qu'ils auoient de plus mis en l'accord, que selon la quantité des seruices, elle pourroit diminuer quelques iours, & qu'elle en pourroit aussi adiouster à son gré, quand il seroit quelque chose qui luy desplût, soit par volonté, soit par mal-heur; qu'à cet effect il s'estoit seruy de ce petit liure, pour en tenir compte fidellement: mais qu'Epicharis allant demeurer hors du logis, il auoit voulu voir en quel estat estoient leurs affaires. Le me mis à rire en moy-mesme, voyant sa naïfueté, & ce trait de l'esprit d'Epicharis pour se mocquer de luy. Apres donc auoir compris son dessein, ie regarday dans celiure, & vis que chaque iour qui se passoit, estoit diminué, & que quelquefois il estoit escrit, pour vn seruice quatre iours à oster, mais incontinent apres estoit mis d'une autre main, pour n'auoir pas salüé de bonne

grace dix iours à adiouster : pour auoir parlé indifferettement quinze iours , & ce qui estoit ainsi à augmenter , estoit écrit de la main d'Epicharis. Je m'empeschay de dire le mieux que ie peus ; & apres auoir bien supputé , ie trouuay qu'il auoit encor plus de huiet années à seruir , & il y en auoit desia deux de passées depuis qu'ils auoient fait ce marché. Lors que i'eus arresté son compte , & qu'il se vid si reculé , il se mit à pleurer : ie le voulus consoler , & luy promis de faire en sorte enuers Epicharis qu'elle diminueroit souuent des iours pour l'amour de moy. Mais il ne cessoit de pleurer , & disoit qu'il ne trouueroit plus tant d'occasions de la seruir : & ieluy respondis , qu'il n'en auroit pas tant aussi de luy desplaire.

Après l'auoir vn peu remis , i'allay dire cette rencontre à Epicharis , avec laquelle ie ry fort long temps de l'affliction d'Asylas , pour s'estre trouué bien loin de son compte. Elle me confessa qu'elle auoit trouué ce moyen pour se deffaire de luy & passer le temps quelquefois quand elle en auoit eue. Mais en fin ie luy dis , Et pour moy , combien m'ordonnerez-vous d'années ? Il en faudroit , dit-elle , beaucoup : pource que peut estre trouueriez-vous souuent moyen de m'obliger , & i'aurois peur que vous ne me despleussiez iamais. Si cela estoit , luy respondis-ie , vous deuriez souhaitter que le terme finist bien tost , pour posséder celuy qui ne vous desplairoit pas. Voyez-vous , dit-elle , il faut vne autre personne que moy pour vous rendre heureux ; mais ie vous iure aussi que ie ne me donnerois pas à moins qu'à vous. Et si la fortune ne me remet en condition plus releuée , vous estes assuré que iamais personne ne me possedera en celle où ie suis. Le plus grand de mes souhaits est arriué , de pouuoir demeurer avec

la diuine Ariane vostre sœur. C'est avec elle que ie veux finir mes iours dans vn extrême felicité. Ie vous iure, Melinte, que la voyant parler avec tant de courage, ie ne sçay ce qui me retenoit de la raur à mes parens, pour luy donner la liberté, & l'espouser apres : Mais sçachant qu'elle mesme n'y eust iamais consenty, de peur de fascher Dicearque, Aristide & Ariane, ie ne faisois qu'augmenter mon amour par la connoissance de sa vertu.

Quelque temps apres elle me plût encore de telle sorte, que ie faillis à perdre toute consideration. Ie croy que vous estiez aux champs en la maison de Telephe, lors que ma sœur fit vne danse d'Egyptiennes. l'ay ouy parler, interrompit Melinte, qu'il se fit quelque chose en mon absence, que ie seray bien aise d'apprendre. Vous sçauetz, reprit Palamede, comme Epicharis chante & iouë du luth agreablement. Nous estions tous assemblez chez mon oncle Dicearque, pour receuoir cette masquarade ; ie la vis entrer avec trois autres, du nombre desquelles estoit ma sœur, & lors que le bruit fut appaisé, elle recita ces vers en chantant.

Nous sommes quatre sœurs de l'Egypte venues

Pour parestre en ces lieux.

Cypris nous enfanta des amours inconnues

Du messager des Dieux.

Nostre pere en naissant nous laissa pour partage

La souplesse des mains :

Et Venus nous donna la beauté du visage

Qui charme les humains.

Nous voulons faire voir que nul dedans ces villes

Ne nous peut eschapper:

S'il éuite nos mains, nos yeux bien plus habiles

Sçauront bien l'attraper.

l'estois des plus prés regardans, & si rauy de la voir & de l'entendre, que i'auois perdu l'vsage des autres sens, pour rendre seulement heureux ceux de la veüe & de l'ouye: ce qui fit que ie ne pris pas garde qu'une d'entr'elles mit cependant la main dans ma poche, & m'osta ce que i'y auois.


Lors que le recit fut finy, & en suite la danse; ceux qui auoient veu que i'auois esté desrobé, firent semblant de voir s'ils n'auoient rien perdu avec ces larronnesses. l'en fis autant, mais ie m'escriay aussi tost que i'auois esté volé, & courus vers Epicharis pour la prier de me rendre ce qu'elles m'auoient pris; puis à ma sœur & aux autres: mais toutes desnierent le larcin, & ie n'en eus point de nouuelles que le lendemain au matin, quand ie vis entrer dans ma chambre vn ieune garçon que ie ne connoissois point, qui m'apporta ce que i'auois perdu, avec vn billet où estoient escrits ces mots:

Les Egyptiennes se contentent de vous faire voir qu'elles sçauent plus acquiescir, qu'elles ne veulent retenir. Reconnoissez leur pouuoir, & remerciez leur courtoisie.

Ie pressay ce ieune enfant de me dire quil'auoit enuoyé, mais iamais il ne voulut l'aduouer, & tout ce que i'en pûs obtenir fut quil me donnast loisir de faire réponse, i'alay escrire ainsi,



A LA PLUS GENTILLE des Egyptiennes.

 *I vous eussiez eu d'ssein de me renvoyer tout ce que vous m'auiez pris, j'eusse trouué un cœur avec ce qu'il vous a plu me rendre ; mais s'il vous est agreable, ie consens qu'il vous demeure, pour gage de la fidelité que ie vous iure.*


Toutes ces gentilleſſes me donnerent du tout à elle : Toutefois depuis ce temps-la, ie la ſeruis avec beaucoup de reſpect ; pource que la commodité chez nous eſtant plus grande pour entreprendre ſur elle, ie m'apperceuois qu'elle ſe retenoit plus de me teſmoigner de la bonne volonté, de peur que ie ne priſſe plus de hardieſſe : & ie vous confeſſe que quelque traitement qu'elle me fiſt, ie ne laiſſois pas de louer touſiours en mon ame ſa conduite. Ma ſœur eſtoit bien aiſe de mon affection, reconnoiſſant cette fille fort ſage, & iugeant qu'elle ſçauroit moderer mon humeur trop prompte ſi ie prenois plaſiſr à luy obeïr. Elle me traitoit donc touſiours fort ſerieuſement : mais vn iour lors que ie l'aſſeurois de l'amour que j'auois pour elle, Puis-ie, me dit-elle, en tirer vne preuve ? Je fus eſtonné, & enſemble bien aiſe qu'elle deſiraſt quelque ſeruiſe de moy, & luy offriſt tout ce que ie pouuois pour luy plaire. ſçachez, me dit-elle, s'il ſe peut, de Di-

cearque quelle est ma naissance , car ie croy assurément qu'il la sçait : Ce n'est pas que ie m'ennuye de viure ainsi , car pour seruir Ariane ie quitterois la condition du monde la plus libre : mais ie serois bien aise de luy rendre mes deuoirs par bonne volonté purement, & non point par necessité. Je louay son desir, & luy promis d'y employer toutes mes prieres , puis i'adioustay : Pleust aux Dieux, ma belle fille, que nos conditions peussent en quelque façon s'approcher; i'aurois autant de sujet de me resioiur de cette reconnoissance que vous mesme: Car ie ne crois pas pouuoir iamais disposer de moy que ie ne voye ce que la fortune aura resolu de vous : Je ne veux point, respondit-elle, vous tesmoigner combien ie suis obligée à vostre affection, car cela seroit inutile: mais si iamais l'estat de ma vie pouuoit se changer, vous sçauriez que ie n'oublie vn seul de vos respects. Je la priay de croire que ie la seruirois toujours ainsi : & m'offris au cas que mon oncle me donnast quelque lumiere pour sçauoir ce qu'elle estoit , d'aller plustost aux extrémitez de la terre, afin d'en apprendre la verité. Mais lors que i'eus mis Dicearque sur ce discours, iamais ie n'en peus tirer aucun esclaireissement. Il me dit bien qu'il l'auoit eüe des Pyrates sur la coste de la mer, vers Camarine : mais cela ne me rendoit pas plus sçauant, & ie fus bien fasché de n'auoir rien appris dauantage pour satisfaire au desir d'Epicharis. Incontinent apres l'occasion de venir à Rome se presenta, & lors que ie luy dis adieu, elle medit. Prenez garde que la fortune sur la mer ne vous fasse de ma condition , & en vous esgalant à moy ne nous separe pour iamais. Je voudrois, luy dis-je, aux despens de quatre ans de seruitude acheter vostre liberté & mon contentement. Je n'aurois point de plus grand desir que de me

rencontrer à seruir vos parens pour recompenser les seruites que vous auez rendus aux miens. He Dieux ! que ie serois heureux , si à la fin ie les pouuois connoistre , & leur donner aduis du lieu où vous estes , pour nous rendre tous deux libres par vn agreable eschange : ie ne regretterois point d'endurer, ny les fers, ny les plus cruelles peines des Esclaues pour acquerir tant de bien. Voila , interrompit Melinte , des paroles bien puissantes & bien affectonnées pour vn infidelle comme vous estes. Car vous ne fustes pas plustost icy, que vous oubliastes toutes ces protestations pour aimer Camille. Ie vous supplie , reprit Palamede , de ne me point faire ce reproche : car l'affection que i'ay pour Epicharis semble estre vne passion puissante & assurée qui va tousiours son chemin, laissant passer à la trauerse ces petites legeretez sans s'estonner, & i'espere qu'elle paruiendra ainsi vn iour à la fin qu'elle pretend.

Palamede vouloit acheuer ce qui restoit à dire de ce depart, lors qu'Epicharis rompit leurs discours en entrant, & les trouuant encore au lit, les accusa de paresse. Palamede luy dit en riant qu'ils n'auoient encore que trop de temps pour le chemin qu'ils auoient à faire cette iournée. Puis elle leur dit ce qu'elle auoit fait avec leurs amis : Pour Maxime , qu'encore qu'il deust estre mal satisfait d'eux à cause du dommage qu'il auoit souffert à leur occasion, s'estant sauué du feu apres eux avec beaucoup de peine ; & bien qu'il eust assez à songer à ses propres affaires, il n'auoit pas laissé de luy promettre toute sorte d'assistance pour eux ; que le feu dela ville n'estoit pas encore esteint, mais qu'il ne falloit point perdre les occasions qui se presenteroient de se sauuer: Qu'il luy seroit aisé de leur appor-

ter vne corde fort deliée, avec laquelle ils en pourroient tirer vne plus grosse qu'elle auroit par le dehors de la tour, laquelle elle auoit déjà toute preste, d'une logueur excessiue, pource que la hauteur estoit tres-grande. Il n'y auoit que la difficulté de se rendre au haut de cette tour, pource qu'on les tenoit tousiours enfermez dans leur chambre. Trois ou quatre iours se passerent encore à deliberer sur quelques moyens, cependant que l'embrasement continuoit toujours. Mais ils furent surpris vn matin, estant mandez pour parestre deuant les Senateurs. Epicharis se desesperoit d'auoir tant tardé à trouuer vn moyen de les sauuer, & craignoit qu'ils ne fussent condamnez dès le iour mesme. Melinte & Palamede moins estonnez, furent conduits au Senat, où estant entrez avec vne assurance modeste, on les mit sur des sieges assez bas. Le Consul ayant commandé aux accusateurs de parler, Martian sortit de la compagnie, pource qu'en cette cause il estoit partie: Et alors ils furent accusez avec vne grande vehemence, d'auoir par vn abominable dessein mis le feu dans Rome, & d'estre cause de la plus grande ruine & desolation que cette ville eust iamais soufferte: Que non contents de cette horrible meschanceté, ils y auoient adiousté l'assassinat de Marcelin & de plusieurs autres; dequoy faisoit preuue l'espée de Marcelin, dont Melinte auoit esté trouué saisi, & de ce qu'il estoit plein de sang. Pour ces crimes il fut conclu par l'accusateur qu'ils meritoient les plus cruels supplices. Melinte voyant que personne ne se presentoit pour eux, demanda permission de se deffendre; & l'ayant obtenue, il regarda quelque temps en terre pour penser à ce qu'il auoit à dire, puis leuant les yeux vers les Senateurs, il parla ainsi:

ESSIEURS,

Si j'auois à parler deuant des Iuges moins equitables, j'auois grand sujet de craindre que nostre innocence ne fust opprimée. Je considere l'austorité de nos accusateurs, toute Rome animée contre nous; Et si les crimes que l'on suppose estoient veritables, vous mesmes, Messieurs, estes interessez par vos pertes à nous punir. Contre toutes ces puissances deux Estrangers abandonnez de toutes choses pretendroient-ils se deffendre? toutefois nous ne nous estimons pas delaissez, ayant au Ciel les Dieux pour tesmoins de nostre vie, Et en terre la Iustice que nous esperons trouuer parmy vous. Nous n'auons que la verité pour deffence: Et cette verité estant nuë Et simple, ie vous feray simplement aussi le recit de nostre mal-heur, dont les causes se peuvent aisément verifier.

Estant arrivez dans Rome, sans autre dessein que de voir ses grandeurs Et ses merueilles, Et nous faire connoistre pour personnes desireuses des choses honnestes, nous entraimes pour nostre mal-heur en la connoissance de Marcelin, qui apres nous auoir fait paroistre une grande amitié, conceut enfin une cruelle jalousie contre nous à cause d'une femme, Et delibera de nous faire mourir. Ceux qui l'ont connu scauent s'il estoit capable d'une telle entreprise. Vne nuit nous nous trouuasmes attaquez par une quantité

d'hommes qui nous laisserent pour morts ; & sans le secours d'Emilie & de Camille , deuant le logis de laquelle le bruit auoit esté entendu , nous ne serions plus en peine de deffendre nostre vie. Camille sera tefmoin de cette verité, & tous ceux de sa maison , en laquelle nous fusmes portez ; qui diront aussi que Marcelin ne croyant pas que nous eussions sceu sa trahison , enuoya d'un onguent à Palamede qui fut reconnu pour poison : Toutefois nous auisâmes de dissimuler , & de nous esloigner d'icy l'ayant pour ennemy. Depuis Aristide pere de Palamede estant venu icy avec Ariane sa fille , sur le bruit du danger de son fils , Marcelin deuint amoureux d'Ariane , & eut dessein de l'espouser. Mais Palamede l'ayant en horreur comme son mortel ennemy , & Ariane le fuyant comme meurtrier de son frere , son amour mesprisée se tourna en rage , & sçachant que nous deuions partir pour retourner en Sicile , il iura nostre mort , mais la plus cruelle dont il se pût auiser. Pour ne nous laisser pas aller sans se vanger , il enuironna de gens armez la maison de Maxime où nous demeurions , & y mit le feu de tous costez , ayant fait dessein de nous y brusler , ou de nous tuer en sortant , lors que nous ne songerions qu'à nous sauuer des flammes. Ceux de la maison de Maxime peuent tefmoigner comme ils ont veu ces furieux mettant le feu avec des flambeaux en la main , & que deux Esclaves furent tueZ allant querir de l'eau au Tibre. Pour moy , ie me resolus de prendre un che-

nal, & de me sauuer à la course au trauers des flammes & des espées. Palamede en fit de mesme, mais il prit vn chemin different. Marcelin voyant qu'il estoit à pied, & que ie m'esloignois, se fit donner vn cheual pour me suiure, & m'atteignit tout seul, où m'attaquant avec furie, i'eus le bon-heur de le tuer, encore qu'il fust armé. Deux autres suruindrent qui demurerent sur la place. Depuis Palamede s'estant reioint à moy, nous auons esté pris, apres que nous nous sommes long temps deffendus; & maintenant nous sommes accusez de la mort de ces hommes, & d'auoir mis le feu à la ville.

Ceux qui nous ont connu icy, sçauent si nous eussions pû seulement conceuoir vne entreprise si detestable: de quelle rage faudroit-il estre possedez? & quelle ingratitude seroit la nostre, d'auoir voulu sans sujet perdre cette grande ville, de laquelle nous auons eu l'honneur d'estre faits Citoyens, & pour la gloire de laquelle nous auons combattu tant de fois? Mais encore quelle apparence y a-t'il, que nous eussions voulu commencer par nostre logis mesme, estant enfermez dedans avec ce que nous auions de plus cher, & d'où nous auons eu bien de la peine à nous sauuer? Pour le meurtre, il est bien vray que ie me suis deffendu d'un homme armé qui vouloit ma vie, laquelle i'ay encore garantie de deux autres hommes & de quelques soldats: Il n'y a rien de si iuste que de repousser la force par la force: mais en tout cela qu'a fait Palamede? ayant esté assailly de nuit, il y demoura pour mort:

Il a couru danger d'estre empoisonné : voyant brusler la maison où il estoit il s'en est sauué; & m'est venu retrouver, ne sçachant que deuenir apres auoir perdu son pere & sa sœur : & maintenant il est accusé avec moy pour meurtrier & boute-feu; au lieu que nous deuions demander iustice d'auoir esté bruslé & assassiné. Toutes ces choses se pouuant iustifier; i'implore, Messieurs, non point vostre pitié, mais vostre iustice: non point cette clemence qui vous a fait pardonner si souuent à vos plus grands ennemis, mais l'integrité de cét Auguste Senat, que rienn'a iamais sceu esbranler. Ou si nostre malheur merite quelque peine pour auoir esté la cause, sans dessein, du desastre de Rome, laissez vous toucher à la pitié qui est deuë aux estrangers, à nostre ieunesse, à nostre innocence, & à tant de blessures receües pour l'honneur de l'Empire Romain. Et s'il faut encore quelques victime pour estre sacrifiée à la satisfaction du peuple, contentez-vous de ma vie, & n'irritez point les Dieux contre vous par la condamnation de Palamede, le plus innocent de tous les hommes.

Après qu'il eut cessé de parler, ils'esleua vn petit bruit parmi les Senateurs, les vns admirans l'assurance & la grace qu'il auoit eüe à parler; les autres sa generosité & son amitié enuers Palamede. La plus part disoient qu'il n'y auoit point d'apparence qu'ils fussent coupables : Il n'y auoit d'animez contr'eux que ceux qui estoient gagez par Martian. En fin le Consul fit signe à Palamede qu'il parlaist, & d'une façon assurée, il dit ainsi:



ESSIEURS,

Melinte ayant représenté au Senat tout ce que ie pourrois dire pour faire voir nostre innocence, ce n'est plus contre nos accusateurs que j'ay à me deffendre, mais contre luy-mesme. Je me plains premierelement de luy, de ce qu'il trahit nostre cause, en nous confessant subietz esloignez du mal-heur de Rome, & parlant de victimes à immoler au desir du peuple, pour s'offrir tout seul à la mort, & m'en garantir. Je l'accuse encore de contreuenir aux loix de nostre amitié qui nous rendent inseparables: & il a tort d'affecter par dessein nostre diuision, qui ne seroit excusable que par mal-heur. S'il estoit coupable, ie le serois aussi: mais puis qu'il est innocent, ie pretends aussi l'estre. J'ay tousiours si bien tasché de l'imiter, le reconnoissant si vertueux & si accompli, que ie ne craindrois point d'estre accusé de ses fautes, mais ie m'estimeray glorieux d'estre reconnu sans faute avec luy. De nous deux rien ne peut estre diuisé: nos volontez unies ne font qu'une ame; laquelle reglant toutes nos actions, il semble que nous ne soyons aussi qu'un corps: de façon que ce n'est qu'une seule personne que vous devez condamner ou absoudre. Toutefois si pour des causes separées de nous, & où nostre volonté n'a rien contribué, nous meritions quelque supplice, lequel s'en peut dire plus digne que moy? Je suis le seul objet de la jalousie de Marcelin, & de sa haine; Melinte n'auoit rien à démesler avec luy: A moy seul il a

enuoyé le poison : l'ay seul empesché son mariage avec ma sœur : l'ay seul animé sa vengeance contre nous, qui est la cause de toutes ces miseres : Melinte s'est trouué seulement engagé dans ses trahisons sans y penser, & ainsi n'a rien commis, soit par mal-heur, soit par dessein. Je demande donc que nous soyons tous deux renuoyez absous comme innocens, ou que ie sois seul exposé au supplce : & vous tesmoignerez, en ce iugement l'equité qui vous rend recommandables par toute la terre.

Melinte vouloit repliquer, mais vn des Consuls luy imposa silence. Alors tous les Iuges demeurerent ravis de voir vne si parfaite amitié, & touchez par la consideration de tant de vertu & d'innocence, commençoient à deliberer pour les absoudre. Ils furent encore interrogez separément, & toutes leurs responses furent trouuées conformes : mais sur ces entrefaites, Neron leur enuoya commander de surseoir le iugement, iusques à ce qu'il leur eust escrit sa volonté. Ils furent ainsi renuoyez dans la prison, où la desguisée Epicharis, impatiente de sçauoir le succez du iugement, leur demanda ce qui s'estoit passé. Mais ayant sceu pour quel sujet ils auoient esté renuoyez, elle commença d'apprehender le pouuoir absolu de Neron, & sortit incontinent pour aller s'enquerir d'un amy de Melinte, si l'Empereur auoit depuis escrit sa volonté au Senat. Il luy dit les larmes aux yeux, qu'il venoit d'apprendre d'un Senateur, que le Prince vouloit qu'ils mourussent : pour ce que Martian pendât le iugement s'estoit allé iecter à ses pieds, & luy auoit fait promettre de les faire punir de sô autorité.

Epicharis desespérée, retourna leur porter ces mauuai-

ses nouvelles : & s'estant enfermez, ils delibererent sur ce danger. Elle leur disoit : C'est chose estrange que depuis que ie suis entrée icy, ie n'aye peu me servir de cette bonne fortune, n'ayant sceu trouuer ny inuention, ny occasion de vous en tirer. Pour moy, dit Palamede, ie me precipiteray plustost du haut de cette tour dans le Tibre, que de me soumettre à vn honteux supplice. Je voudrois, dit Melinte, que nous fussions en estat de nous precipiter, il n'y auroit rien à deliberer ; car nous trouuerions bien moyen de descendre : mais l'importance est d'arriuer au haut de la tour. Melinte a raison, dit Epicharis : car la corde est toute preste, & ie vous apporterois bien de quoy la tirer à vous. Toutefois, dit Melinte, le haut de cette cheminée respond au haut de la tour : sur le milieu de la nuit nous pourrions bien nous ayder l'un l'autre, & nous monter par là ; ie croy que nous pourrons nous sauuer, pourueu seulement que l'on ne sçache point que vous soyez sortie, & quel'on n'enferme personne icy au lieu de vous : Il faudroit que vous allassiez acheter vn bateau, avec quelques autres habits pour nous deguïser, & retournant icy vous nous apporteriez cette corde deliée, pour tirer l'autre à nous par dehors. Je trouue cela, dit Epicharis, fort bien imaginé ; & pour faire en sorte que l'on ne s'enquiere point de moy, ny de vous pour cette nuit, aussi tost que ie seray sortie ce soir hors de cette chambre, vous n'aurez qu'à fermer la porte aux verroux, & l'on vous enfermera sans voir dedans si i'y suis. Cette resolution estant ainsi prise, Epicharis aussi tost alla se pouruoir d'un bateau, de quelques habits, & de la corde qu'elle auoit fait faire d'une grosseur & d'une longueur estrange. Ayant cominis toutes ces choses en la garde d'un ieune
garçon

garçon qu'elle cognoissoit , & qui ne sçauoit point à quel dessein elle s'en vouloit seruir ; elle reuint leur apporter vne corde deliée , & les aduertir que tout estoit préparé. Apres les auoir veu souper , elle prit congé d'eux pour les aller attendre au pied de la tour : Incontinent ils s'enfermerent ; & sur la minuit , lors qu'ils peurent iuger que chacun estoit endormy , Melinte prit le drap qui seruoit à leur lit , & pria Palamede de monter le premier dans la cheminée , pource qu'il luy pourroit aider , & qu'il portast ce drap avec lequel il pourroit puis apres l'attirer en haut : Palamede en faisoit difficulté , & luy vouloit rendre cét office pour demeurer le dernier : mais Melinte luy dit que ces contestations n'estoient pas de saison , & fit en sorte que Palamede mit le pied sur vn siege , puis sur son espaulle , & de là peu à peu se rendit iusques au haut , portant le drap , avec lequel il pourroit tirer son amy. Melinte ne tarda pas beaucoup à l'aller trouuer , encore que ce fust avec vn peu de peine ; puis ils ietterent en bas la petite corde , à laquelle Epicharis attacha la grosse qu'ils tirerent à eux , & l'ayant liée à vn creneau de la tour avec la petite mesme , en sorte qu'il estoit impossible qu'elle se laschast ; Palamede demanda à Melinte où estoit l'honneur en cette occasion , de passer deuant , ou apres ; Melinte luy respondit , qu'il falloit plustost songer à sauuer l'honneur , & se dépêcher : Passez donc deuant , reprit Palamede , afin que vostre honneur soit le premier sauué : le veux , dit Melinte , faire la retraite : Iamais , repartit Palamede , il ne sera dit que ie vous ay laissé dans le danger. Ah ! repartit Melinte , que de ceremonies ! nous auons contesté pour monter , à present il faut encore perdre du temps pour descendre. Mais , dit Palamede , pourquoy voyez-vous que ie vous cede

toufiours en affection. Je veux , continua Melinte, que vous vous laiffiez aller le premier , puis vous me porterez fur vos efpauls iufques au bas. A cette charge , dit Palamede , ie le veux ; & il prit la corde : Mais Melinte le laiffa aller , car il fut impoffible à Palamede de fe retenir ; & Melinte l'auoir ainfi voulu tromper pour le voir partir , & fçauoir que la vie de fon amy eftoit en feureté auant qu'il peult fonger à la fienne. Il eust auffi receu ce contentement fans l'eftrange accident qui arriua : Car lors que Palamede entroit dans le bâteau, le creneau auquel la corde eftoit attachée, foit à caufe de fa vieilleffe, ou de la pefanteur du corps de Palamede & de la groffeur de la corde mefme, fut emporté en bas avec elle; & fans qu'à mefme instant le bâteau fe recula de luy mefme, Palamede & Epicharis euſſent eſté écreſez ſous ces ruines.

Il eſt difficile de iuger qui furent les plus eſtonnez, ou de Palamede, & d'Epicharis, qui ſe ſentirent accablez de l'eau dont cette cheute les couurit, & de voir la corde en bas ſans pouuoir plus ſecourir Melinte; ou de Melinte mefme qui creut qu'ils eſtoient aſſommez, & qui ſe vid priué de tout moyen de ſe ſauuer. Il fut quelque temps à croire que rien ne le pouuoit garentir de la mort, & il ſe reſoluoit de ſe precipiter pluſtoſt que de demeurer entre les mains de ſes ennemis: Toutefois eſtant d'un courage qui ne ſ'eſtonnoit point pour le danger, & d'un eſprit qui trouuoit incontinent des expediens, il regarda autour de luy, & apperceuant le drap avec lequel il ſ'eſtoit monté, il ſongea ſ'il le deuoit couper en pluſieurs longueurs, qu'il attacherait l'une à l'autre, mais tout cela n'eust peu arriuer à la moitié de la hauteur de la tour; toutefois il ſe reſolut de ſe lancer en l'eau, de l'extremité où il ſeroit, & prit le bout du drap pour com-

mencer à le couper: Mais vn vent qui se leua assez grand, faillit à luy emporter son drap, & toute son esperance. Celale fit penser à vn moyen assez estrange, & à chercher son salut en ce qui auoit failly à le perdre. Ayant outy parler de quelques personnes que le vent auoit soustenuës en l'air par le moyen de leurs vestemens, & posées en terre doucement, il se delibera, puis que le vent le fauorisoit, de faire vn voile de son drap, & apres l'auoir laissé enfler, de se laisser aller en le tenant par les bouts, esperant que le vent le soustiendroit assez pour tomber en bas moins rudement. Le pis qui luy pouuoit arriuer c'estoit d'estre noyé, & il aimoit bien mieux perdre ainsi la vie, que par la main d'un bourreau. Songeant donc aux moyens de se bien accommoder, & tournant le dos au drap, il en prit par derriere deux des coins, dont il se fit comme vne ceinture, qu'il arresta pardeuant, avec ce qui luy restoit de la petite corde, & laissant passer tout le reste par dessus sa teste, il estendit ses bras, & prit les deux autres bouts avec ses mains qu'il lia encore, de peur qu'ils ne vinssent à manquer, en sorte toutefois qu'il s'en peust deffaire, puis se mettant sur les creneaux à l'opposite du vent, il le laissa engouffrer dans ce drap, & ce vent l'enleuant presque par force, il se laissa aller, se recommandant aux Dieux. La pesanteur du corps fut assez soustenuë par l'air qui enflait le voile, pour faire que la cheute fust moins rapide, & il se sentit descendre peu à peu iusques en bas, où Palamede, & Epicharis estoient, admirant à la clarté de la Lune cette machine, & ne sachant ce que ce pouuoit estre.

Fin du cinquiesme Liure de l'Ariane.



C. F. G. 1780

Del. G.

Aut. P. 1780



LE
SIXIESME
LIVRE DE
L'ARIANE.



A ioye d'Epicharis & de Palamede fut extrême, lors que Melinte estant tombé dans l'eau, & s'estant deffait de son drap, ils le virent venir à eux en nageant : mais celle de Melinte ne fut pas moindre, lors qu'entrant dans le batteau, & se voyant aidé par eux, il fut assésuré que les ruines du creneau ne les auoient point offensez. Apres les communes resioüissances d'estre eschappez de tant de dangers, ils songerent à celuy qui restoit, & resolurent de sortir de la ville par le mesme fleuve, pour n'estre pas surpris. Ils descendirent assez facilement iusques bien loin hors la ville, & sur le matin se trouuerent esloignez enuiron de quatre ou cinq milles de Rome. Ils quitterent là leurs habits, & les ayant remplis

de pierres les ietterent dans l'eau , puis ils furent d'auis de se mettre par terre , & de prendre vn chemin tout contraire à celuy où ils auoient esté pris : pource que suiuant le Tibre ils alloient se rendre à Ostie , & que s'ils estoient suivis on ne manqueroit pas de les chercher le long de la riuiera. Il fut donc arresté qu'ils gagneroient le port de Cajette : pource que celuy de Regge estoit trop esloigné , & qu'ils ne marcheroient que la nuict , de peur d'estre pris pour la seconde fois. Eurylas qui s'estoit lauë dans l'eau , parut si agreable avec les nouueaux habits qu'il auoit vestus , que Palamede auoit de la peine à cacher les nouuelles blessures qu'il receuoit. Lors qu'ils n'estoient veus de personne , il luy aidoit à marcher avec Melinte : pource qu'Epicharis n'estoit pas accoustumée à faire tant de chemin , & ils desiroient s'auancer iusques en quelque lieu , où ils peussent passer la iournée. Cependant ils s'entretenoient de leurs auantures , & trouuoient que c'estoit vn bon-heur que le creneau fust tombé : pource que la corde fust demeurée , ce qui les eust fait suiure : & que l'on croiroit qu'ils se seroient precipitez , leur sortie par la cheminée se pouuant reconnoistre par quelques sieges , dont ils s'estoient seruis pour monter. Apres auoir fait beaucoup de chemin en parlant ainsi , ils arriuerent à vn village , où ils prirent quelques viures , & de peur d'estre surpris continuerent leur voyage : puis ils passerent à trauers vn champ pour s'esloigner du chemin , & trouuerent vn lieu assez reculé , où il y auoit vn buisson , auprès duquel ils s'assirent à l'ombre des saules. Apres auoir fait leur repas , ils se mirent encore à s'entrettenir de leurs fortunes , & des apprehensions qu'auoient pour eux Aristide, Ariane, Telephe , & tous leurs amis de Syracuse ; qu'à cette

occasion il ne falloit point perdre de temps à se rendre en Sicile , pour amoindrir d'autant leurs desplaisirs. Cette consideration les fit resoudre à continuer de marcher ; ce qu'ils faisoient assez incommodément , pource qu'ils ne suiuoient que de petits sentiers , de peur d'estre connus sur les grands chemins. En fin sur le soir ils arriuerent près d'une maison qu'ils iugerent assez belle : Eurylas eust bien desiré d'y pouuoit estre receu pour se reposer la nuit , & n'estre pas reduit à n'auoir que le Ciel pour couuert : mais ils iugerent qu'il ne falloit pas se mettre au hazard de tomber en quelques mains dont ils ne pourroient sortir ; & voyant assez près de là vn petit bois , ils furent d'avis d'y entrer , & d'y choisir quelque ombrage , où estant assis , Eurylas vaincu de sommeil & de trauail , s'endormit incontinent : les deux autres de peur de l'interrompre ne faisoient aucun bruit , & ce silence les fit insensiblement dormir aussi.

Lors qu'ils estoient le plus enseuelis dans le sommeil , vne ieune Dame Maistresse de la maison qu'ils auoient veüe , prenant sur le soir la fraischeur du bois , passa assez près d'eux en se promenant. Ils ne pouuoient estre veus de ceux qui eussent esté par les routes du bois : Mais Eurylas se retournant d'un costé sur l'autre , remua quelques feuilles , & fit vn peu de bruit. Corinne (cette Dame se nommoit ainsi) curieuse de voir si c'estoit quelque beste , s'auança doucement , & trouua le bel Eurylas dormant d'une façon si agreable , que cette veüe la raut : la delicatesse & la blancheur de son teint, sa bouche vermeille , ses cheveux bruns , mais deliez & ondez qui luy couuroient les espauls , & sur tout l'aimable proportion des traits de son visage , la toucherent de coups

bien sensibles pour la faire parestre insensible : car elle demeura sans mouuement, & tellement arrestée à considerer ce beau dormeur, qu'il eust semblé qu'il luy eust communiqué de son assoupissement, si ses yeux n'eussent esté ouuerts : mais elle croyoit n'auoir pas assez de veuë pour le bien regarder, tant elle voyoit de beautez, dont la moindre estoit capable d'occuper ses yeux, & de les remplir de merueille. Elle mit vn genouil en terre comme pour luy rendre hommage, & s'approcha doucement pour le baiser sans qu'il s'esueillast : mais Eurylas en mesmetemps se souleua, & tira vn grand soupir de son estomac, ce qui la contraignit de se retirer, croyant qu'il s'allast esueillir, & luy fit voir assez près de là Melinte & Palamede dormansaussi, qu'elle n'auoit point encore aperceus, à cause qu'elle estoit trop attentive à regarder Eurylas. Cela luy donna vn peu d'apprehension, le voyant seule entre trois hommes: toutefois les considerant elle iugea que c'estoient des personnes honnestes, & à voir leur equipage qu'on leur auoit fait quelque desplaisir. Elle s'auisa de s'en aller pour reuenir avec quelques vns de ceux de sa maison avec lesquels elle les pourroit prier de prendre le couuert chez elle : & en s'esloignant, elle ne pouuoit s'empescher de regarder la beauté d'Eurylas : toute-fois elle le quitta en fin, & estant au logis elle persuada son mary d'aller se promener ensemble dans le bois, afin que luy-mesme les amenast chez luy. Quelque temps apres qu'elle fut partie Epicharis s'esueillast, & laissant dormir Melinte & Palamede, se voulut leuer, & apperceut quatre ou cinq personnes qui venoient à eux: elle iugea que c'estoit de ceux qui demeuroient dans la maison prochaine,

ne, & qui se promenoient ainsi le soir en liberté. Ils firent esueillir Melinte & Palamede à leur abord, & ils s'enquirent d'elle ce qu'ils faisoient là: à quoy elle respondit qu'ils estoient trois freres, qui auoient perdu dans l'embrasement de Rome ce qu'ils auoient de plus cher; & à qui on auoit volé encore ce qui leur estoit demeuré, & qu'ils estoient contrains de coucher ainsi sur la terre en gagnant peu à peu la Sicile, où ils ne manqueroient pas de commoditez. Corinne feignit d'en estre touchée de pitié, & pria Curion son mary de les retirer pour vne nuit. Cét homme qui estoit assez bon, le voulut bien, ne les pouuant prendre pour des voleurs à voir leur façon, mesmes qu'ils n'auoient point d'espées, & il leur dit, que s'ils vouloient venir en sa maison ils y seroient bien receus: Melinte & Palamede s'y accorderent, voyant cette franchise, & le remercierent le plus courtoisement qu'ils peurent. Ils s'en allerent ainsi de compagnie, Melinte contant à Curion des nouuelles de Rome avec sa douceur ordinaire: & estant arriuez ils soupperent tous ensemble: mais il estoit impossible à Corinne de dissimuler l'affection qu'elle auoit pour Eurylas, lors que son mary nela voyoit point; & Palamede qui auoit conceu quelque bonne volonté pour Corinne, la voyant fort gentille, & d'une humeur assez libre, remarquoit mieux les regards qu'elle enuoyoit à Eurylas: ce qui luy faisoit souhaitter que cette affection s'adressast plustost à luy, pour se seruir de ce bon-heur. Ce qui acheua de la perdre fut qu'Eurylas, trouuant vn luth, le prit, auquel accordant sa belle voix il chanta ces vers.

*Tandis que l'aimable ieunesse
Allume en nous de beaux desirs;*

*Essayons des plus doux plaisirs
Que la fortune nous adresse,
Et ne laissons couler vn iour,
Sans les delices de l'amour.*

*Cette saison de nostre vie
Se doit passer vilement,
Qui nous donne si librement
Le pouuoir avecques l'enuie,
De ne laisser couler vn iour
Sans les delices de l'amour.*

*Ceux dont la rude fantaisie
Blasme ces heureux passe-temps,
Malicieux, ou mal-contens,
En ont de sprit ou ialousie.
Mais ne laissons passer vn iour
Sans les delices de l'amour.*

Peus'en fallut que Corinne transportée d'amour n'allast baïser cette belle bouche qui chantoit avec tant de charmes; mais la presence de son mary, & des autres luy seruoit de contrainte. Il n'estoit pas mal-aïse à Eurylas de la persuader par sa chanson en cette humeur, de se seruir de l'occasion en amour, & il sembloit qu'il luy donnast aduis de ce qu'elle auoit à faire, & à Palamede encore qui ne cessoit de regarder Corinne, cependant que Melinte entretenoit le bon Curion, qui se laissoit aller à faire vne estime bien grande de ses hostes. Lors qu'il se fallut coucher, Curion & Corinne les menerent dans vne chambre proche de celles où ils couchoient separément, en laquelle il y auoit deux lits. Melinte & Palamede choisirent le plus

grand; pource qu'ils dirent qu'ils ne se separoient jamais, & laisserent le plus petit à Eurylas. Corinne fut bien aise de cette resolution, & en les laissant donna vn bon soir à Eurylas, qui luy fit bien cognoistre qu'il y auoit de la passion mellée. Palamede consideroit toutes ses actions, & ayant appris qu'elle couchoit en vne chambre, & son mary en vne autre, il iugea que si de nuit il luy pouuoit faire croire qu'il estoit Eurylas, il la pourroit posseder aisément: de sorte qu'il se resolut de se leuer d'aupres de Melinte, & d'entrer secrettement en la chambre de Corinne, s'imaginant que sans doutel'amour qu'elle auoit pour Eurylas, l'empescheroit de dormir, & qu'il luy seroit facile d'estre receu auprès d'elle. D'autre costé Corinne estant retirée avec son mary eut le mesme dessein de se leuer de son lit, & de venir coucher avec Eurylas, ne le croyant pas d'humeur à refuser vne belle Dame; & Curion voulant que l'on enfermast ces Estrangers dans leurs chambres de peur d'accident, elle n'en fut pas d'auis, & dit que ce seroit ouuertement se deffier d'eux; qu'il suffisoit de bien fermer les portes de la maison, & qu'ils n'oseroient rien entreprendre. Cela estant arresté, Curion par mal-heur voulut coucher avec sa femme, à qui cette resolution desplaisoit fort: toutefois quand il fut endormy, elle se leua & poursuiuit son dessein. Corinne & Palamede sortirent en mesme temps de leurs chambres sans faire bruit, & se rencontrant parmy les tenebres dans vn passage, se heurterent au front si rudement, qu'ils faillirent à tomber à la renuerse: toutefois ayant chacun des desseins assez scandaleux, & ne voulant pas estre descouverts, ils s'empescherent de crier, & de tesmoigner la douleur de ce coup: Tous deux ne vouloient point entrer dans leurs chambres de peur

d'estre recognus. Palamede ne sçachant ce qu'il deuoit faire demeura au mesme endroit, & s'appuya contre le mur; & Corinne sçachant mieux les destours se coula par le degré. Palamede se rassurant, & croyant que ce fust quelque valler, ne laissa pas d'entrer en la chambre de Corinne, & elle n'entendant plus celuy qu'elle auoit rencontré, remonta & entra dans la chambre d'Eurylas. Elle s'approcha de son lit, puis se mettant dessus sans faire bruit, elle embrassa Eurylas, & le baïsa pour le faire esueiller doucement. Epicharis sentant à son resueil quelqu'un qui la pressoit ainsi, s'escria & se voulut deffaire de ses mains: mais Corinne tascha de la faire taire, & luy dit qu'elle estoit Corinne, qui touchée de son amour s'estoit venue rendre à son lit, pour luy offrir toutes les faueurs qu'il pouuoit desirer d'elle. Melinte s'éueilla à ce bruit, & ne sentant point Palamede aupres de luy, creut qu'il vouloit entreprendre quelque chose contre Epicharis, & alla deuers le lit, pour l'en empêcher. Corinne l'entendant venir s'eschappa, & s'enfuit dans sa chambre, où elle rencontra deux personnes à terre qui la firent tomber & donner de la teste contre son lit, où elle se frappa si cruellement qu'elle ne se peût releuer. Elle cria & demanda de la lumiere, & cependant elle entendoit vn homme qui disoit, Mon frere, ie croy que vous resvez: ie suis Palamede que vous tourmentez ainsi: En fin on apporta de la lumiere; Melinte & Eurylas accoururent aussi, & trouuerent trois personnes estendus sur la place; Corinne blessée, & Curion avec Palamede qui se tenoient embrassez sans se vouloir deffaire, & qui se tourmentoient l'un l'autre. Toutefois quand Curion reconnut Palamede, il fut bien estonné, & luy demanda pourquoy il estoit venu à son lit. Palamede de son

costé fit l'esbahy de se voir dans cette chambre , & dit à Curion qu'il auoit creu entrer dans la sienne , & se remettre dans le lit auprès de son frere ; & qu'il auoit eu sujet de s'estonner pourquoy Melinte le ferroit ainsi , si ce n'estoit qu'il resvast. Curion luy demanda pardon , & luy dit qu'il auoit creu que c'estoit quelque voleur qui le vouloit tuer, ayant senty vn homme à son reueil qui luy tenoit les bras. Epicharis & Melinte auoient bien de la peine à s'empescher de rire, les voyant en ce desordre. Corinne mettant la main sur les blessures de son visage , & s'appuyant le front disoit, qu'ayant entendu du bruit sur les degrez, elle auoit voulu sçauoir ce que c'estoit , & qu'au retour elle les auoit ainsi trouuez qui l'auoient fait tomber. Le soupçon que Curion pouuoit auoir de sa femme, se changea en pitié la voyant en tel estat, & apres qu'ils se furent tous releuez, & que l'on eut mis quelque remede à deux ou trois blessures qu'elle auoit au visage , & à celles de Curion & de Palamede, pource qu'ils estoient tombez du lit l'vn sur l'autre, Palamede leur demanda pardon de ce que son erreur estoit cause de tout ce mal-heur , & chacun se retira en sa chambre, où Melinte , Palamede & Epicharis s'enfermerent, de peur que l'on n'entendist leurs esclats de rire , qu'ils retenoient autant qu'il leur estoit possible. Palamede sceut que Corinne auoit esté pour surprendre Eury'as, que c'estoit elle qu'il auoit heurtée dans le passage, & qu'elle auoit esté contrainte de s'enfuir à l'abord de Melinte. Il leur confessa aussi que voulant aller trouuer Corinne , & se mettre sur son lit, il auoit au lieu d'elle embrassé cet homme qui s'estoit esueillé, & l'auoit saisy au corps à l'instant ; que iamais il n'auoit esté si estonné que de sentir vne barbe, & vn homme qui ne luy permettoit pas d'eschapper quoy

qu'il peult faire : qu'en se debattant ils estoient cheus du lit, que Curion estoit tombé deffous, & qu'il falloit que sa cheute l'eust bien estourdy, puis qu'il ne songeoit pas seulement d'appeller au secours : qu'en fin il auoit pensé qu'il deuoit faire semblant qu'il s'estoit abusé, & de l'appeller son frere, luy voulant faire croire qu'il le prenoit pour Melinte, & qu'il s'estonnoit qu'il resvast si fort, que de ne le vouloir pas laisser aller, quoy qu'il taschast à eschapper de ses mains. Ils ne cesserent de rire le reste de la nuit de ces plaisantes rencontres : Toutefois Melinte fit des reproches à Palamede d'auoir songé à cette entreprise. Il s'excusa sur l'exemple de Corinne, dont le dessein n'auoit pas esté plus chaste, & pria Epicharis de luy pardonner ce crime, ce qu'elle fit volontiers, ne pouuant, disoit-elle, s'offenser d'une chose qu'il l'auoit tant fait rire.

Sur le matin ils s'endormirent, & ne se resveillèrent qu'il ne fust près de midy : & estant leuez on leur dit que Corinne estoit demeurée au lit. Ils allerent la voir pour sçauoir comment elle se portoit ; & rencontrant Curion dans la chambre ils luy tesmoignerent encore le desplaisir qu'ils auoient d'estre cause de son mal, & s'approcherent du liét, où ils la trouuerent qui auoit le front bandé, toutefois fort proprement, & qui parmy le desordre de son visage n'auoit pas laissé d'auoir soin d'estre parée. Palamede luy fit mille excuses de son mal-heur : & vn peu apres s'estant esloigné avec Melinte pour entretenir Curion, Corinne prit la main d'Eurylas, & luy dit : Que ferez vous pour vne personne qui a esté ainsi traitée pour l'amour de vous ? Madame, dit-il, tout ce que ie puis faire au monde, ie vous l'offre ; vous assurant que ie vous suis trop redeuable, & ie meurs de regret de n'auoir pû

receuoit les faueurs que vous vouliez me permettre. Palamede voulut fauoriser le contêtement & l'agreable tromperie de Corinne; car il tira Curion de l'autre costé du liét, en luy parlant; & Corinne se seruant de l'occasion, dit à Eurylas; le voy bien qu'il faut que vous me quittiez, mais promettez moy de retourner vn iour icy, & vous sçaurez combien ie vous aime. En disant ces paroles, elle approchoit la teste d'Eurylas de la sienne, & le baisoit avec beaucoup de transport: mesmes elle se descouuroit tout le sein pour luy donner de l'amour dauantage. Eurylas auoit de la peine à s'empescher de rire, & pour la recompenser de pareilles faueurs, il eust bien pû luy en monstrier autant: mais il se contentoit de luy rendre ses baisers, & luy promettoit de n'estre pas long temps sans la venir reuoir. Il fallut en fin cesser ce doux exercice, de peur d'estre surpris par le mary, qui vint reprendre Eurylas pour le mener disner. La douceur de l'entretien de Melinte auoit entierement gagné cét homme: & sur le disner il luy dit, qu'ils auoient encore quelques bagues qu'ils auoient cachées: mais qu'il leur seroit difficile de les changer pour les choses qui leur seroient necessaires, comme des cheuaux, & quelques hardes. Curion promit de les accommoder: & incontinent ils s'en allerent à son escurie où ils choisirent trois cheuaux, pour lesquels Epicharis luy donna vn diamant qui vallôit beaucoup plus, voulant le recompenser du bon traitement qu'ils auoient receu chez luy. Curion leur donna encore à chacun vne espée, & quelque peu de prouision pour manger le reste du iour: puis ils allerent prendre congé de Corinne, qui pleura voyant partir Eurylas: toutefois elle cacha ses larmes, & Curion les ayant veû monter à cheual,

les laissa aller avec regret.

Ils ne furent pas si tost esloignez, qu'ayant la liberté de rire ils se mirent à se moquer de l'erreur de Corinne, & de son adieu si passionné. Les rencontres aussi de Palamede ne leur seruirent pas d'un petit passe-temps: & Epicharis se moquant de luy, de ce que les desirs auoient esté ainsi punis: le trouue, dit-il, qu'il n'y a rien de si agreable que ce qui arriue en amour: pource que si l'on a ce que l'on desire, il n'est rien de plus heureux; & la plus grande disgrâce qui puisse arriuer n'est que matiere de rire. Ouy, dit Epicharis, mais le mal est que l'on rit à vos despens: ie vous trouue seulement heureux, de ce que vous estes d'une humeur qui ne se rebutte point pour les accidens. Il est vray, dit Melinte, pource que ie ne croy pas que iamais homme ait esté si souuent trompé & puny que luy. Dans Athenes il a fait son apprentissage par mille fourbes qu'on luy a iouées: dans Rome il a faillily d'y mourir: & icy voyez quelle aduanture de s'aller ietter entre les bras d'un mary, & d'en estre quitte pour vne legere blessure au visage. C'est encore, reprit Epicharis, un plus grand mal-heur pour luy de ce que l'experience ne le rend point sage. Vous voila tous deux bien d'accord, dit Palamede, pour mespriser mon humeur: mais dites moy, de qui estimez vous le courage meilleur, de celuy qui se met en beaucoup de hazards, qui reüssit en quelques vns, qui est blessé en d'autres & ne se rend iamais; ou de celuy qui n'entreprend aucune chose? Voudriez vous qu'apres auoir esté blessé en un combat, on quittast pour iamais les armes, & que l'on se rendist sage par experience? Vous avez raison, respondit Melinte, de faire comparaisson de l'amour à la vail-

lance:

lance : mais comme la vaillance est vne vertu , vous luy deuez aussi opposer vne amour vertueuse, qui ne s'attache qu'à vn objet beau, & parfait, comme la valeur qui n'a pour objet que l'honneur, & n'a pas différentes considerations pour faire son deuoir : ainsi en amour celuy qui n'aura qu'un dessein, & qui le maintiendra toujours, sera plus courageux, que celuy qui changera de sujet continuellement. Palamede reprit, si vous voulez bien comparer l'amour à la vaillance, il me semble qu'elle s'attache à différents sujets, & à diuerses rencontres, tantost à vn siege de ville, tantost à vne bataille, tantost à vn combat particulier. Mais tousiours, interrompit Melinte, ce n'est qu'une valeur : aussi, respondit Palamede, n'est ce qu'une amour qui me fait cherir tout ce qui est aimable. Mais cette valeur, dit Melinte, n'a qu'un objet qui est l'honneur. Et cette amour, reprit Palamede, n'a qu'un objet qui est le plaisir. Le plaisir, dit Melinte, ne peut estre l'objet d'une amour vertueuse : & si vous voulez m'escouter, ie croy que vous en demeurerez d'accord. La vertu n'a iamais pour objet qu'une chose parfaite & asseurée, & pour ce sujet elle est elle-mesme sa fin & sa recompense, car il n'y a rien au monde de parfait & d'asseuré qu'elle. Ainsi la vaillance n'a point de satisfaction qu'en soy-mesme; & c'est ce que nous appellons honneur, qui n'est autre chose que la gloire qui est en nous de ne manquer iamais à ce que la vaillance nous ordonne, quelque disgrâce qui puisse arriuer; pource que la fortune n'a point de pouuoir sur les vertus: celuy qui a ceste qualiré en perfection, est aussi vaillant estant vaincu comme estant victorieux, & ressent en soy-mesme vne pareille gloire : la victoire & les honneurs ne peuuent estre ses objets

principaux , pource que ce ne sont pas des choses que l'on soit assuré d'acquiescer. De mesme , l'amour honneste ne peut auoir le plaisir pour son but principal , pource qu'il n'est pas assuré , dépendant de la volonté d'autrui : pour cette raison sa fin ne peut pas estre aussi d'estre aimé , pource que ce sont des choses hors de nous , & dont nous ne disposons pas : mais son seul object certain , c'est d'aimer parfaitement ; ainsi la fin de cette amour parfaite est en elle-mesme , & elle ne luy peut iamais manquer. S'il arriue que l'on soit aimé , & que l'on recoiue du contentement , ce sont seulement des fruits de l'amour , & non pas sa fin , comme la victoire & les honneurs sont à la vaillance : autrement il seroit necessaire qu'apres les satisfactions que l'amour receuroit , & les honneurs que possederait la vaillance , l'une & l'autre cessassent & n'eussent plus d'action , comme estant arriuées à leur fin. Vous voyez que les amours imparfaites , qui n'ont que le plaisir pour but , meurent aussi tost qu'elles sont paruenues au plaisir , & cela vous doit seruir d'une raison infaillible , pour croire qu'il faut une fin bien plus noble & plus assurée que le plaisir , pour rendre une amour parfaite & durable.

Je croy , dit Epicharis à Palamede , que vous aurez bien de la peine à respondre à ces raisons. Il luy est bien aisé , dit-il , de vaincre un ennemy qui sent sa conscience blessée , ayant à deffendre une mauuaise cause : car toutes les rencontres que j'ay eues , & la raison avec cette dispute mesme , m'apprennent qu'il ne faut aimer qu'une chose parfaitement aimable , & pour ce sujet que c'est vous seule que ie dois aimer. Je vous prie , dit Epicharis , ne vous seruez point des armes de Melinte contre moy.

Je ne seray pas toutefois marrie qu'il vous instruisse, & lors que vous aurez eu le temps de vous rendre sçauant, ie luy demanderay ce que ie dois eroire de vous. Iurez, dit Palamede, que vous vous en rapporterez tousiours à luy. Je veux bien, dit-elle, tant ie me fie en luy, qu'il en soit le iuge avec Ariane. Melinte dit, qu'il y auoit esperance d'amendement en Palamede, & que pourueu qu'Epicharis y ioignist sa peine, il se promettoit d'en faire vn iour vn parfait Amant pour elle, ayant vn Maistre fort affectionné, & vne Maistresse bien aimable. Soyez assurez, repliqua Palamede, que ie sçay desia fort bien aimer, quelque chose que ie die: car ie n'aime que la belle Epicharis; ie l'aime parfaitement, & l'aimeray ainsi tousiours. Croyez vous que ces petites recherches que ie fay des autres, soient des infidelitez? Qu'est-ce donc, dit Melinte. Je voudrois bien sçauoir, adiousta Palamede, si pour aimer parfaitement, vous vous absteniez de toutes sortes de plaisirs, comme de la chasse, des passe-temps, des exercices, & de tout ce qui peut donner du contentement? Cela ne seroit pas raisonnable, respondit Melinte. Aussi, dit Palamede, ces petites faueurs, sont de ces plaisirs que l'on ne doit pas fuir. Quand on trouue quelque Belle, d'vne humeur à accorder quelque grace, avec laquelle on peut passer quelques douces heures, pourquoy refusera-t'on ce bon-heur? pourueu que l'on ne fasse point de dessein de quitter celle que l'on aime, & d'aimer celle-cy en sa place? Je croy que c'est le seul moyen de viure heureux; pource que le choix que l'on a fait vne fois, demeure tousiours en l'esprit; & l'on attend ainsi avec patience que les rigueurs de celle que l'on recherche cessent, & que le temps puisse apporter

quelque soulagement aux desirs. Ie treuve, dit Epicharis, cette façon d'aimer fort aisée; & si chacun estoit de vostre humeur, on n'entendrait iamais toutes ces plaintes & ces desespoirs de ceux qui aiment, puis qu'ils trouueroient si facilement de quoy se soulager. Ce n'est point en moy, reprit Palamede, vne humeur particuliere, mais la raison qui me fait aimer de la sorte: chacun se trouue ainsi content; pource qu'ayant vne Maistresse cruelle, ie cherche de la consolation au traitement qu'elle me fait, & cependant ie la laisse en repos. En fin, reprit Melinte, vous nous persuaderez que vous aimez grandement, mais, que vous desirez mediocrement; & si vous pouuez accorder ces deux choses, vous auez raison. Encore, dit Palamede, que ie ne poursuiue pas ces desirs avec ardeur, croyez vous que ie desire moins? au contraire i'honore plus celle que i'aime, de ne la pas tourmenter, la voyant resoluë à ne me rien accorder, & i'appaise où ie puis la violence de mes desirs. Mais, repliqua Melinte, ce ne sont pas les desirs que vous auez pour elle que vous soulagez autre part, c'en sont d'autres. Quelquefois, respondit Palamede, ie m' imagine soulager ceux-la mesmes, me persuadant la tenir, & en receuoit ces faueurs. Ah! Dieux, s'exclama Melinte, que de crimes ensemble. Pourquoi, dit Palamede, suis- ie si criminel? Premièrement, reprit Melinte, pour rechercher ces faueurs des autres, vous vous seruez des mesmes paroles & des mesmes sermens, dont vous vsez avec celle que vous aimez: voila prophaner les plus beaux moyens que vous ayez de vous faire aimer, les employant indifferemment à mille sujets indignes du dessein vertueux que vous deuez auoir: quelle lascheté de mentir? & laquelle de toutes vous deura croire, n'ayant part tout que

les mesmes assurances à donner ? apres cela si vous n'aimez qu'une personne, pouuez vous encore trouuer autre chose aimable, & y arrester vos yeux : car pour les passe-temps que vous auez alleguez, on les peut rechercher sans faire tort à son amour ; mais vne beaulté peut faire comparaison avec vn autre, & si vous en pouuez cherir vne encore avec celle que vous aimez, c'est infidelité : mais quel crime peut estre plus grand, que celuy que vostre imagination commet dans les faueurs d'une autre ? doncques vostre fantaisie-veut bien que ce soit elle à qui vous parlez, qui reçoit vos discours avec affecterie, qui se rend avec foiblesse, ou se prostituë avec effronterie ? & vous aimez parfaitement celle que vous vous imaginez avec tous ces deffauts ? Vous me poursuiuez, dit Palamede, bien criminellement, & ie vous iure que ie n'ay point l'intention si mauuaise. Non, non, poursuit Melinte, il faut vous resoudre ou de croire vostre affection bien imparfaite, ou de la purger de toutes ces erreurs, si vous desirez la rendre parfaite. Voila desia, dit Epicharis, vne bonne leçon, & si tous les iours il en reçoit vne pareille, ie croy qu'il pourra se remettre en bon chemin. A vous entendre tous deux parler, reprit Palamede, il semble que j'aye esté instruit en vne mauuaise escole d'amour, & que ie doie tascher à oublier les mauuais preceptes que j'y ay appris, mais ie sens encore quelque chose en moy qui repugne à l'austerité de vos regles : Touresfois j'honore tant mon Maistre, & aime tant ma Maistresse, que ie recouray leurs enseignemens sur leur parole, sans les examiner ; & obeïssant à vos raisons, ie feray que vous m'aurez encore obligation de la peine dont ie me deliure de chercher des raisons contraires. Ils se trouuerent alors à vn

passage de ruisseau assez difficile, ce qui empescha Melinte & Eurylas de luy repartir, pour longer à l'endroit le plus aisé pour passer. Palamede ayant sondé le gué le premier, & étant de l'autre costé se mit à chanter.

*Amour est vn enfant volage,
Qui change de lieu tous les iours:
Dedans les Cieux il fait son cours,
Puis sur la terre il se fait rendre hommage.
Si mon cœur change ainsi de lieu,
Peut-il pas imiter vn Dieu?*

*Vn mesme suiet l'importune,
Il aime de diuers attraitz:
Et se seruant de plusieurs traits,
Blesse tantost ou la blonde ou la brune.
Si ie m'adresse en plus d'un lieu,
Puis-je pas imiter vn Dieu?*

*Amour n'a point d'autres delices,
Qu'à faire quelque coup nouveau:
Puis il se rit sous son bandean,
De tous les maux que causent ces malices:
Cherchant à rire en plus d'un lieu,
Puis-je pas imiter vn Dieu?*

Il nous sera bien difficile, dit Epicharis à Melinte, de gagner quelque chose par instructions sur son esprit: car le voila desia retourné à sa premiere erreur. Vous ne iugez pas bien, respondit Palamede, de mes intentions; car ie veux faire sortir par ma bouche ces fausses opinions, com-

me vn poisson ou vne mauuaise nourriture que i'aurois prise, & ie n'ay point d'autre moyen pour m'en deffaire. Vous deuez iuger ainsi de tout ce que ie diray deormais de contraire à la fidelité, en respondant à vos raisons: car ie receuray les vostres en les escoutant, & me defferray des miennes en vous les disant. Voila, dit Epicharis, vn moyen assez gentil pour nous contredire toute sa vie, sous le pre-texte de faire sortir ses raisons. l'ay bien peur, repartit Melinte, que les nostres ne sortent aussi facilement de son esprit. Donnez les moy, dit Palamede, assez bonnes & assez fortes, afin qu'elles s'y attachent si bien, que rien ne les puisse esbranler pour sortir. Prenez garde, repliqua Melinte, que ce ne soit pas le deffaut des raisons, mais du lieu qui est peut-estre si glissant, que rien n'y peut demeurer ferme. Ils adoucissoient l'ennuy du chemin par ces discours qui les entretindrent iusques au soir; & rencontrant vn lieu assez propre pour manger ce qu'ils auoient apporté, ils mirent pied à terre, & laisserent paistre l'herbe à leurs cheuaux; & apres auoir souppé ils se resolurent d'allertoute la nuit pour auancer leur chemin.

Estant remontez à cheual ils entrerent dans vne forest vn peu deuant que le Soleil se couchast, & ils n'en auoient pas encore trauersé la moitié quand la nuit commença d'approcher. Palamede & Epicharis estoient ensemble & alloient deuant; Melinte estoit esloigné d'eux enuiron de vingt pas, & entretenoit ses resveries, lors qu'un fantosme s'apparut à luy sur vn grand cheual noir, ayant le visage d'une noirceur espouuanteable, le corps couuert d'un poil long & herissé, & tenant vne massue sur son espaule.

Vn homme moins assuré que Melinte eust esté bien effrayé d'une vision si affreuse; mais luy sans s'estonner.

s'arresta , & luy demanda avec vne parole assée , s'il auoit quelque chose à luy dire. Sçache , respondit le Spectre , que ta mort approche. Tunc m'apprens rien de nouueau , reprit Melinte , ie sçay bien qu'elle approche tous les iours. Ce monstre sans repartir luy voulut descharger vn coup de massuë sur la teste ; mais il l'euita en pliant le corps & mitaussi-tost l'espée à la main. Alors il vit encore venir à luy vn autre monstre à cheual semblable au premier ; & sans se troubler de se voir parmy ces démons , il commença à charger celuy qui luy auoit parlé , & en mesme temps il songea à faire en sorte que l'autre ne le peust offenser. Palamede & Epicharis qui virent que Melinte ne les suiuoit plus , retournerent sur leurs pas , & ils furent bien estonnez de le trouuer attaché au combat contre des fantosmes effroyables. Epicharis fut saisie d'horreur , mais Palamede qui n'eut pas redouté d'attaquer toutes les puissances de l'enfer pour secourir son amy , mit l'espée à la main , & assaillit celuy qui estoit venu le dernier. En mesme temps Melinte perça de plusieurs coups celuy auquel il s'estoit adressé , en euitant avec souplesse les coups de sa massuë , & le fit en fin tomber de son cheual. Palamede se deliura aussi en peu de temps de celuy auquel il s'estoit attaché , & ces deux amis furent bien aises de voir que ces fantosmes auoient vne vie à perdre , puis qu'ils versioient beaucoup de sang estant tombez à terre , & qu'ils n'auoient plus aucun mouuement. Ils descendirent de cheual , & trouuerent en les considerant que c'estoient des hommes qui auoient noirci leurs visages & leurs mains , & s'estoient reuestus de peaux pour espouuanter peut estre les passans , & les tuer plus facilement.

Epicharis s'estoit esloigné , saisie de frayeur , & ils eurent bien

bien de la peine à la rassurer , & à la faire approcher pour voir ces corps morts. Elle s'auança en fin , & s'estonna fort de ce que Melinte n'auoit point eü de terreur à l'abord de ces fantosmes. La Lune leur donnoit assez de clarté pour ne se pas esgarer , de sorte qu'ils se resolurent de continuer leur chemin , & de prendre bien garde s'ils ne se-toient point encore attaquez par quelques monstres pareils ; tout e-fois ils sortirent du bois sans danger sur la fin de la nuit ; & le iour commençant à parestre , ils rencontrerent vn homme à pied , qui les voyant venir , leur demanda en s'estonnant , s'ils n'auoient point rencontré les deux demons qui auoient tué tant d'hommes depuis sept ou huit iours. Ouy, respondit Melinte , mais il ne nous ont point fait de mal. Je m'estonne bien , reprit cét homme , qu'ils vous ayent espargnez. A la verité , dit Melinte , ils nous ont fait bien de la peur ; mais d'où croit-on qu'ils sont venus ? On dit , repartit-il , que ce sont des Dieux infernaux qui ont esté contraincts de quitter le Temple de Proserpine de Rome qui a esté brulé , & qui ne cesseront point de tuer , qu'on ne leur en ait rebasty vn autre. Pour moy ie ne suis pas si hardy que vous , car ie m'en vay faire le tour de la forest pour aller à Rome , de peur de tomber entre leurs mains. Mon amy, luy dit Melinte en soufria-nt , ces Dieux n'estoient donc pas immortels : ne feignez point de passer par la forest , vous trouuerez sur la place leurs corps que nous auons priuez de vie , & assurez vous que c'estoient seulement des voleurs qui s'estoient desguisez en demons , pour tuer & despoüiller les passans avec plus de facilité apres les auoir effrayez. Cét homme ne le voulut point croire : ils luy iurerent tous trois que cela estoit vray , & que s'il se laissoit d'al-

ler à pied, il trouueroit peut-estre vn des cheuaux de ces mal-heureux, sur lequel il pourroit monter : mais il ne pût-estre persuadé, quelque assurance qu'ils luy donnassent; & ne voulut point prendre le chemin de la forest, tant la peur & la creance des contes fabuleux s'ostent difficilement des ames vulgaires.

Ils continuerent leur chemin, & apres auoir assez parlé de cette rencontre, ils reprirent leur entretien du iour precedent, pour instruire Palamede aux loix de la fidelité. Epicharis luy demanda, s'il vouloit que Melinte luy donnast encore vne leçon d'amour. Je l'aime-rois, dit-il, bien mieux de vous : car des la premiere ie serois maistre. Il ne luy faut point, dit Melinte, d'autre instruction que de bien examiner sa vie passée, & il trouuera que les mauuais desirs ne luy ont rien apporté que de la honte & du mal-heur, & qu'il n'a trouué de la douceur que dans les amitez vertueuses : car ie veux qu'il me confesse, que les honnestetez de la sage Eriphile, & ses doux entretiens dans le refus, luy furent plus agreables, que les faueurs qu'il croyoit en auoir receuës dans la tromperie qu'on luy ioua. Mais, dit Epicharis, ne puis-je point sçauoir cette histoire ? Je beniray, reprit Palamede, cette tromperie toute ma vie, puis qu'elle fit naistre l'amitié de Melinte & de moy. Vous me donnez, dit Epicharis, encore plus d'enuie de l'apprendre : car c'estee que ie n'ay point encore sceu ; & si Melinte vouloit prendre la peine de me faire ce recit, ie croirois le seruice que ie vous ay rendu bien recompensé. Palamede, repartit Melinte, vous en pourroit mi-ux dire les particularitez : mais puisque ie me puis acquitter à si bon marche de ce que ie vous dois, ie n'en veux pas perdre

l'occasion. Epicharis luy dit, Si c'est trop peu de chose, meslez-y du vostre dauantage, & me dites tout ce qui vous est arriué dans Athenes, & dans vostre voyage en Asie. C'est la raison, dit Melinte, que vous sçachiez comment s'est passée la vie que vous nous auez conseruée. Ce recit, adiousta Palamede, vous sera fort agreable, pourueu qu'il vous die toute la gloire & les aduantages qu'il acquit: car i'ay peur qu'à ce sujet il ne vous cele les plus belles rencontres. Vous voudriez bien, dit Melinte, que ie vous laissasse cette occasion de parler pour satisfaire Epicharis, mais vous aurez d'autres seruices à luy rendre. Je serois bien marry, repartit Palamede, de la priuer de vous oüir: mais trouuez bon, si vous oubliez quelque chose, que ie vous en fasse souuenir. Melinte s'y accorda, apres auoir rejetté les louanges qu'on luy donnoit, & quelque temps apres il reprit ainsi.



HISTOIRE DE MELINTE, Eriphile, & Palamede.



Il y a des rencontres fort heureuses en la vie des hommes, desquelles sçachant se seruir à propos, on est porté facilement à la vertu & à la gloire: & ie treuve que la fortune sert extrêmement aux bons desceins, fournissant les moyens pour entreprendre, & pour executer les entreprises.

fuiure ceux de nostre condition : de sorte que l'un enscignoit à l'autre ce qu'il sçauoit , & apprenoit de l'autre ce qu'il ignoroit : c'estoit là vne escole bien douce. Apres que ie luy auois fait part de mes estudes , ie luy monstrois le profit que ie faisois en nos exercices. Je faisois des armes en sa presence, ie luttois, ie lançois le jaelot ; & Ephialtes, qui estoit des premiers de la ville , ayant tousiours de beaux cheuaux outre les miens , ie les exerçois deuant elle , & lors que l'en estois approuué , ie croyois ma peine bien recompensee. Du commencement ie l'aimois comme ma mere, mais acquerant plus d'âge & de sens , ce qui me donnoit plus de credit auprès d'elle & me dispensoit de si grandes submissions, ie l'aimay comme ma sœur : de sorte qu'entrant dans sa confidence, elle n'auoit plus de secret qu'elle me cachast. Palamede estoit aussi alors dans Athenes, & employant plus de temps aux exercices qu'aux estudes, il y reüssissoit avec beaucoup d'adresse & de grace. Nous faisions tout à l'enuy l'un de l'autre, sans nous connoistre autrement, sinon que nous estions d'une mesme ville. Palamede confessera avec moy que l'un de nous deux souffroit avec quelque desplaisir les louanges que l'on donnoit à l'autre, & cet éguillon seruoit encore à nous rendre plus soigneux de bien faire, de sorte qu'il n'y en auoit point qui nous surpassassent.

Mais laissons ce discours de nos exercices, pour parler de son humeur amoureuse. Apres auoir aimé quelques Dames dans Athenes , où l'on ne manque point d'en trouuer d'assez faciles, & se lassant de faueurs si aisées, comme celles qu'il acqueriroit à ses despens, il vid vn iour Eriphile, & en deuint amoureux; incontinent il luy resmoigna son amour, par les soins qu'il prenoit de la voir en tous les lieux

où elle pouuoit aller: mais il connut bien qu'il auroit de la peine à en obtenir ce qu'il desiroit; car sa modestie estoit tres-grande, & elle ne luy donnoit iamais prise par ses paroles, pour luy faire auoir la hardiesse de luy proposer aucune chose qui offensast son honneur. Toutefois ayant sceu qu'elle hantoit quelquefois chez vne femme de moyenne condition qui se nommoit Harpalice, mariée à vn affranchy d'Ephialtes, & que cette femme estoit fort artificieuse & auare, il esperâ la gagner par son auarice, & qu'elle pourroit gagner Eriphile par son artifice. Il s'adressa donc à elle, & cette femme le receut, en l'assurant qu'il n'y auoit qu'elle qui eût pouuoir sur Eriphile, & qui fust capable de le seruir. Elle l'entretint quelque temps d'esperance; puis vn iour luy dit, qu'Eriphile ayant perdu vne chaisne d'or fort riche, & redoutant que son mary le sceust, il auoit vn beau moyen d'acquiescer ses bonnes grâces, en luy en faisant present d'une pareille. Palamede la promit aussitost, & Harpalice luy ayant représenté de quelle façon estoit cette chaisne, il la commanda à vn Orfèvre. Mais l'ayant, il eut peur qu'Harpalice ne la donnast point à Eriphile, de sorte qu'il la pria qu'il en fust le porteur luy-mesme; afin que cela luy donnast occasion de la voir en particulier, & qu'Eriphile en cherchast le moyen. Harpalice fut vn peu surprise; toutefois elle luy dit qu'elle le scauroit d'elle, & deux iours apres l'assura qu'Eriphile auoit promis de venir chez elle; qu'elle feindroit de faire vne assemblée de Dames, où quelques hommes aussi se pourroient trouuer, puis elle les feroit entrer dans vne chambre à part, où il luy feroit le present en main propre, & que là il pourroit tascher de la vaincre par prieres. Palamede attendit ce iour avec beaucoup de ioye, & Harpalice ne

manqua pas de faire son assemblée : mais auparavant que la compagnie arriuaſt elle fit entrer Palamede dans vne chambre proche de celle où l'on ſe deuoit aſſembler. Ie m'y rencontray auſſi conduiſant Eriphile, & Harpalice allant dans la chambre où eſtoit Palamede, luy fit remarquer par les fentes ceux qui eſtoient dans l'autre chambre, & entr'autres Eriphile & moy. Voyez vous pas, diſoit-elle, qu'Eriphile rougit, & eſt toute reſueuſe, ayant le deſſein de vous venir trouuer ? Palamede ſ'imaginoit auſſi que cela fuſt, & elle luy dit en le quittant ; Vous pourrez voir quand ie la prendray par la main pour vous l'amener, mais elle veut que i'oſte la lumiere, de peur que vous ne ſoyez veus enſemble dans cette chambre par les meſmes fentes. Palamede y conſentit, puis qu'il le falloir ainſi, & peu de temps apres elle vint prendre Eriphile par la main, la voulant mener, diſoit-elle, pour voir ce qui eſtoit dans vne autre chambre. Elle luy fit mettre le pied dans celle où eſtoit Palamede, qui eſtoit ſi obſcure qu'Eriphile ſe retirant dit aſſez haut, où me menez-vous, Harpalice ? Cette artificieuſe entra peu de temps apres, amenant dans l'obſcurité vne autre femme, inſtruite de ce qu'elle deuoit faire, & dit à Palamede en la luy donnant. I'ay eu bien de la peine à la faire reſoudre, ſeruez-vous de l'occaſion ; mais ie vous prie, parlez bas : ie ſerois des-honorée ſi on vous entendoit, puis elle les enferma tous deux. Palamede pourroit mieux vous dire que moy quels teſmoignages il luy rendit de ſon contentement, & combien il ſ'eſtimoit ſon redeuable de ce qu'elle luy auoit accorde cette faueur, comment en ſuite il pourſuiuit cette pointe, & quelles victoires il obtint : mais ie vous puis dire qu'il trouua bien moins de reſiſtance qu'il n'auoit creu ; & pour remerciement il luy

donna la chaisne : puis Harpalice reuenant la prendre dans la mesme obscurité, ils se separerent avec mille protestations suiues d'autant de baisers. Palamede ne fut point deliuré de là que la compagnie ne fust sortie; & Harpalice luy demanda alors si elle sçauoit bien obliger : il luy fit mille remerciemens, avec quelque present, & apres il s'en alla fort satisfait. Je ne sçay, continua Melinte s'adressant à Epicharis & regardant Palamede, si i'oserois vous dire quelle faute il fit. Je vous prie, dit Palamede, n'oubliez rien de ce qui m'est arriué, ny mesme nostre combat, pour ce que sans cela le conte ne vaudroit rien, & n'auroit aucun suite : ou bien vous m'obligeriez à reprendre moy-mesme vostre discours. Je vous diray donc, reprit Melinte, qu'il ne pût taire cette faueur, & la publia. Eriphile fut aduertie de cette vanité, & me la faisant sçauoir, me tesmoigna le sensible desplaisir qu'elle en receuoit. Je l'aimois d'une affection si honneste, que i'en fus touché autant qu'elle, de sorte que ie me resolus de la vanger. Le lendemain ie le rencontray au par des exercices, & letirant en vn lieu où nous ne pouuions estre veus, ie luy dis qu'il auoit mesdit d'une Dame, qu'il falloit qu'à l'heure mesme il s'en desdíst, & qu'il publiast le contraire, ou que ie l'en ferois repentir. Et ie feray, dit-il, que tu ne te repentiras pas long temps de ces paroles. Alors nous mîmes tous deux l'espée à la main, & estant instruits depuis si peu de temps en toutes les ruses de l'escrime, nous n'en oubliâmes vne seule, soit pour attaquer ou se deffendre. Il sembloit que nous fussions tous deux bien contens que cette occasion se fust présentée de mettre nostre art en pratique, de sorte que si nous auions eu autrefois de l'equilibration lors que nous ne combattions que par exercice,

nous

nous estions alors bien autrement animez , pensant que le prix & le hazard, estoient l'honneur & la vie. Apres que ce combat eut esté assez disputé sans aucune blessure de part & d'autre, Palamede impatient de ce qu'il duroit tant, me porta vn coup avec telle furie , que l'ayant euité , le pied luy manqua , & il vint tomber auprès de moy. Je me iettay sur luy, & saisissant son espée ie le voulus forcer de se desdire de ce qu'il auoit inuenté contre Eriphile : mais il me dit d'vn courage asseuré , qu'il ne se desdiroit iamais d'vne chose veritable. Je le menaçay de le tuer s'il continuoit ces paroles , surquoy il me dit ; Melinte ie confesse que i'ay eu tort d'en parler ; mais si ie vous fay voir qu'elle me fauorise , aduouërez vous pas que ie ne puis m'en desdire ? Si vous pouuez , luy dis-ie, le verifier, ie me confesseray vaincu par vous : mais si cela n'est point ie veux vous obliger à me satisfaire deuant elle , & à publier le contraire. Je reçoy, dit-il , ces conditions , avec serment de vous contenter auant qu'il soit trois iours : alors ie le laissay releuer , & nous nous en allasmes ainssi heureusement , sans auoir respandu du sang l'vn de l'autre.

Vn iour apres il pria Harpalice de luy faire auoir encore la mesme commodité de voir Eriphile : elle qui n'aspiroit qu'à ses presens, luy promit , & le lendemain elle l'aduertit de venir le soir. Aussi tost il me vint trouuer , & me dit : i'ay cherché le moyen de satisfaire à ma parole ; ce soir si vous vous trouuez chez Harpalice en compagnie, remarquez en quelle chambre Eriphile entrera sans lumiere puis vous m'en pourrez voir sortir, si vous demeurez le dernier au logis. Je fus vn peu estonné, ne sçachant si ie deuois encore soupçonner Eriphile : toutefois ie luy pro-

mis de m'y trouuer , & sans en parler à Eriphile mesme , ie l'y accompagnay le soir. Harpalice ne manqua pas de luy mener la mesme femme, qui luy fut courtoise comme auparauint : pour moy qui n'auois point quitté Eriphile dans la compagnie , ie me mocquois en moy-mesme de Palamede, & m'en allay avec elle sans l'attendre. Le lendemain il me vint trouuer au matin, & me demanda pourquoy ie ne l'auois pas attendu le soir precedent pour le voir sortir. Pource, luy dis- ie , que i'auois tousiours esté avec Eriphile , & que ie pouuois bien respondre d'elle. Il commença à rire, mais voyant que ie me mocquois aussi de luy, il commença à se deffier d'Harpalice : puis il me dit, il faut que l'un de nous deux soit bien trompé. Mes yeux, luy dis ie , sont bien certains. A la verité, reprit-il, les miens ne me pouuoient pas aider au lieu où i'estois ; car il estoit trop obscur : mais i'en seray pourtant esclaircy ; & sans me dire autre chose il sortit, & s'en alla chez Harpalice, qu'il obligea par les mesmes charmes des recompenses à luy faire auoir la mesme faueur. Elle luy dit, qu'il estoit impossible d'auoir si souuent compagnie : toutefois qu'elle la feroit bien venir, pourueu qu'il demeurast d'accord qu'il n'y auroit point de lumiere dans la chambre ; pource qu'Eriphile craignoit mesme d'estre veüe par ses domestiques: cela le fit deffier d'elle plus qu'auparauint : toutefois il s'y accorda, & le soir venu, il se trouua dans la mesme chambre, où cette femme étant entrée, pariny leurs carresses il luy coupa de ses cheueux, & bien qu'elle le sentit & voulust l'empescher de les retenir, il les emporta de force. Aussi tost qu'il fut au logis, & qu'il peust auoir de la lumiere, il regarda en

tremblant ce qu'il tenoit, & vid des cheueux noirs, bien differens de ceux d'Eriphile. Alors reconnoissant comme il auoit esté trompé, & songeant comment il se vengeroit d'Harpalice, il passa le reste de la nuit avec beaucoup de despit. Le matin il me vint voir, & me dit. Melinte, ie suis prest de vous satisfaire, & me desdire de ce que j'ay publié contre l'honneur d'Eriphile; mais il faut que ce soit en sa presence. l'enuoyay sçauoir si elle auroit agreable de recevoir cette satisfaction, ce qu'elle voulut bien, pourueu que i'y fuisse. Palamede entrant s'alla ietter à ses pieds, & luy dit. Madame, ie vous viens demander pardon de la faute que j'ay commise contre vous, & vengeance d'une meschanceté par laquelle on a donné sujet à mon offense. Eriphile le pria de se releuer pour luy conter plus à son aise ce qu'il auoit à luy dire. Elle nous fit asseoir, & alors Palamede monstrant ce qu'il auoit coupé, luy dit. Madame, ces cheueux noirs vous feront voir la plus noire meschanceté quiait esté inuentée contre deux personnes; & sur cela il nous fit le recit de toutes les ruses d'Harpalice, qu'Eriphile & moy ne cessions d'admirer. En fin il luy demanda tant de pardons, & adiousta tant de protestations de l'honorer, & de publier par tout l'artifice d'Harpalice, avec vn tel excés de soubmissions & de respects, que nous fusmes plus contens de ses satisfactions, que nous ne pensions en auoir esté offensez. Eriphile luy pardonna tout, & ayant sceu nostre combat pour son sujet, elle voulut que nous demeurassions amis, puisque nous estions d'une mesme ville, d'un pareil age, & adonnez esgalement aux honnestes exercices. Je ne me fis pas beaucoup prier, pource que i'estimois extrêmement toutes les qualitez de Palamede. Il nous

tesmoigna aussi qu'il s'estimoit fort heureux, de tirer cét aduantage, disoit-il, de son imprudence. Nous nous embrassâmes, & iurâmes deuant elle vne perpetuelle amitié. Elle fit mettre puis apres Harpalice entre les mains de la Iustice; & cette mal-heureuse fut condamnée à estre liée sur vn asne, la teste tournée vers la queue qu'elle tenoit pour bride, & promenée par les quartiers d'Athenes, le bourreau la fouettant, & les enfans la poursuivant à coups de pierres. Depuis ce temps-là Palamede rendit tant de devoirs honnestes à Eriphile, qu'elle l'eut en grande estime: elle nous fauorisoit esgalement, ne cessant de nous faire confirmer nostre amitié. Et sur ce sujet Palamede fit des vers, dont ie croy que ie me souuiendray bien, il me semble qu'ils estoient tels.

*L'ame d'une amour la plus sainte,
La plus parfaite d'icy bas.
Le Dieu qui m'a blessé d'une si douce atteinte
Ne m'en veut point guerir, & ie ne m'en plains pas.*

*Elle m'aime, & ie n'ose attendre
Un seul bien qui me rende heureux;
Car se laissant aimer, elle sçait se deffendre
Par la mesme vertu qui me rend amoureux.*

*Un riuail obtient mesme place,
Dont l'heur ne me rend point ialoux:
Et ie n'ay point regret s'il reçoit mesme grace,
De voir si peu de biens partagez entre nous.*

*Ie ne la nomme point cruelle,
Et n'en veux point estre vainqueur.*

*Et ce n'est point deffaut, ny de beaultez en elle,
Ny d'amour en mon cœur.*

Le treuve, dit Epicharis à Melinte, que vous estiez vn seruiteur bien modeste, & vn amy bien honneste, de faire ainsi part de l'amitié de cette belle Eriphile. Vous voyez, respondit Melinte, comme nous auons tousiours partagé ensemble la bonne & la mauuaise fortune; Mais il faut vous dire comme nous separasmes aussi entre nous presque tout l'honneur des jeux Olympiques: Puis il reprit. Le temps en estant escheu on se rendoit à Pise de toutes parts, les vns pour parestre aux jeux, & disputer les prix; les autres pour estre seulement spectateurs. Je voulus aspirer à vn honneur bien haut: car voyant que les plus grandes villes de la Grece, & mesme quelques Rois auoient enuoyé des cheuaux excellens avec des chariots legers, pour emporter le prix de la course, ie voulus aussi me mettre sur les rangs pour Syracuse, & ayant dés long temps dressé les cheuaux d'Ephialtes & les miens pour ce sujet, & fait faire vn chariot doré tout esclattant, & representant celuy du Soleil: ie fis peindre six beaux courriers que i'auois, d'une façon qui n'auoit point encore esté veüe: puis vestu comme Apollon, & couronné de rayons ie parus sur les rangs avec les autres qui ne manquoient pas aussi d'esclat & de magnificence: Palamede se contenta de pretendre au prix de la harpe.

Eriphile pour nous animer tous deux à bien faire, nous auoit donné à chacun vne faueur, à Palamede vne harpe, de laquelle il deuoit iouer, & à moy vn carquois avec l'escharpe qu'elle mesme auoit faite. Chacun de ceux qui deuoient courir, fit dans son chariot le tour de la place où se

faisoient les jeux, & salua les Dames en passant, de qui l'on receuoit aussi des faueurs & des souhaits; puis se vint ranger en la place qui luy auoit esté ordonnée. l'auois dressé mes cheuaux à partir à la troisieme fois que les trompettes sonnoient, sans estre obligé de les animer du foüet ou de la voix, reseruant ces esperons pour le milieu de la course. Ils ne manquerent pas de partir à temps, & les menageant sur le commencement, ie coulay subtilement entre deux qui s'estoient precipitez, & qui me deuançoient; & ayant cet auantage, ie me contentay de le conseruer iusques sur la fin: alors voyant faire à mes riuaux quelques efforts pour m'atteindre, ien'espargnay plus mes cheuaux, mais leur laschant les resnes, & laissant les autres derriere moy, ie paracheuay legerement ma course, m'acquerant vne victoire qui ne pouuoit estre disputée. Alors les trompettes commencerent à sonner de toutes parts: puis les cris & les applaudissemens du peuple suiuirent, & apres ie fus proclamé vainqueur. Ayant receu le prix, ie repassay au milieu de la place dans mon chariot côme en triomphe, & voyant que l'on alloit commencer d'autres jeux, ie le conduisis près le theatre où l'on deuoit disputer des vers; delà ie sautay dessus, où l'on me donna le premier rang, à cause de la victoire que ie venois d'obtenir. Je recitay vne Ode qui vous seroit ennuyeuse si ie vous la redisois, pource qu'elle estoit assez longue. Enfin i'emportay encore le prix, & ayant ouï peu de temps apres proclamer Palamede vainqueur pour la harpe, ie vous assure que i'en eus plus de ioye que de mes victoires mesmes.

Incontinent ceux de Syracuse ayant appris l'honneur que nous leur auions acquis, nous enuoyerent des lettres de reconnoissance & de remerciemens; & nous

conuierent de retourner deuers eux , pour receuoir les honneurs qu'ils desiroient nous faire. Nous ne peusmes refuser des prieres si iustes, & si aduantageuses pour nous, & prîmes resolution de partir avec beaucoup de regret de quitter Eriphile. Je ne vous diray point l'ennuy qu'elle receut d'entendre que nous auions ce dessein : mais elle me tesmoigna plus de desplaisir que la sagesse mesme de son esprit ne sembloit souffrir; & ie vous confesse aussi que pour me separer d'elle, il fallut que ie fisse vn grand effort sur moy-mesme : car i'auois vescu avec elle dans vne si grande douceur & vne telle confidence, que ie me priuois de beaucoup de plaisirs & de consolations. Sa vertu & ses belles qualitez m'auoient tousioursourny des entretiens si viles & si agreables, que ie doutois si ie me pourrois iamais trouuer autant heureux, & rencontrer quelque chose qui approchast de ce que ie perdois en la quittant : toutefois il fallut consentir à ce départ, & Palamede qui prend, comme vous sçaez, ses consolations & ses diuertissemens si aisément, en eut du commencement quelque regret, & le perdit aussi tost. Mais au lieu de retourner en nostre pais, l'ardeur de la guerre nous emporta. Corbulon ce sage & victorieux Capitaine Romain vint aborder aux costes de la Grece avec les forces qu'il conduisoit, pour passer de là en Asie, & aller faire la guerre aux Parthes. Nous prîmes cette occasion de tesmoigner nostre courage, & l'allasmes trouuer: puis nous le suivîmes en toutes les conquestes qu'il fit, où nous acquisîmes quelque gloire, & quand la paix fut faite nous nous separâmes de l'armée. Est-ce ainsi, dit Epicharis en l'interrompant, que vous parlez en passant, d'une valeur admirée de tout l'Empire,

& si redoutée des Barbares. Je veux que vous me contiez quels exploits vous fîtes tous deux: car c'est le plus grand plaisir que je puisse recevoir. Permettez, respondit Melinte, que ie ne vous face point ce recit de batailles & de sieges, qui ne vous pourroit estre qu'ennuyeux; puisque les termes de s'exprimer vous en sont mesmes inconnus: contentez-vous que nous vînquîmes en quelques rencontres, nous fûmes blesez en d'autres, nous courûmes beaucoup de dangers, & en fîmes courir aux autres, & qu'à la fin les Romains demeurèrent victorieux. Au moins souffrirez-vous, dit Palamede, que ie vous soulage, & que ie luy recite seulement ce qui se passa aux prises d'Artaxate & de Tigranocerte; & si vous apprehendez d'entendre vos loüanges, vous n'aurez qu'à vous esloigner de nous de quelques pas: aussi bien il arriueroit vne chose bien estrange, qu'à force d'estre modeste, vous m'interrompriez à tout moment. Puis il est raisonnable que ie macquitte aussi bien que vous enuers Epicharis des obligations que ie luy ay, tandis qu'elle est en humeur de recevoir des histoires en payement. Je trouue, dit Epicharis, que Palamede a raison: il luy sera plus seant qu'à vous de me dire ce qui c'est passé à vostre auantage; & il ne me scauroit faire vn plaisir qui me soit plus sensible que de me faire part des bonnes fortunes qui vous sont arriuées. Alors quoy que Melinte peust alleguer, il fut contraint de se retirer quelques pas pour laisser parler Palamede, qui commença ainsi son discours.

HISTOIRE DES PRINCESSES
Araxie & Zelinde.



O vs iugerez qu'il estoit à propos que Melinte s'elloignast de nous , pour me laisser la liberté de vous dire vne partie des effects de sa merueilleuse generosité : car il est certain que iamais homme ne souffrit si peu d'estre loué, & ne s'exerça tant à faire des choses loüables. Apres que nous fusmes entrez avec l'armée des Romains dans l'Armenie , Corbulon n'eut autre dessein que d'attirer Tiridate à vn combat general : mais ce Roy qui croyoit auoir plus d'auantage à nous incommoder par de frequentes escarmouches , voloit incessamment autour de nos legions avec les Parthes qui n'ont presque autre façon de combattre. Melinte & moy nous nous estions mis dans la Cauallerie , où il se signala souuent en repoussant les ennemis en plusieurs occasions , & acquit vne grande reputation, pour ne se laisser iamais surprendre par eux, & pour ne manquer pas à leur porter autant de coups d'espée qu'ils nous auoient enuoyé de fleches quand ils nous venoient attaquer. Corbulon assiegea quelques places pour faire resoudre Tiridate à donner bataille : mais il nous les laissa prendre toutes , & ne fit mine de s'esmouuoir sinon lors qu'il fut resolu qu'on iroit droit à Artaxate capitale de l'Armenie. En ces occasions Melinte acquit par trois fois la Couronne mura-

le ; & ie ne scaurois vous dire de combien d'adresse estoit secondé son courage , mais à peine les eschelles estoient dressées qu'on s'estonnoit de le voir desia sur la muraille , & quelque desir que i'eusse de monstrier ce que i'auois de valeur , c'estoit tout ce que ie pouuois faire que de le suivre.

L'armée eut ordre allant à Artaxate , d'estre preparée & pour le chemin & pour le combat ; & de ne point s'esbranler quelques saillies que fissent sur nous les ennemis , si Tiridate ne nous attaquoit de toutes les forces. Les troupes du Roy s'espandirent autour de nous de toutes parts , taschant de faire destacher nos bataillons de diuers costez pour aller à eux , & de nous mettre en desordre : mais Tiridate voyant que rien ne branloit , & que l'armée continuoit tousiours son chemin en bon ordre , perdit l'esperance de nous deffaire ; & ne pouuant se resoudre ny de renfermer dans Artaxate des troupes qui n'estoient propres qu'à voltiger autour d'un camp , ny de souffrir la honte de la laisser prendre à sa veüe , il se retira à vne des extrémitez de l'Arménie.

Artaxate abandonnée par Tiridate se rendit à discretion , & l'armée Romaine y entra : mais auant que vous dire ce que ie veux vous conter de cette prise , il faut que vous sçachiez que bien que Melinte n'eut aucun commandement dans l'armée , il estoit celuy toutefois qui apres Corbulon y auoit le plus d'autorité : Lors que nous estions campez , la tente que nous auions commune estoit tousiours pleine des plus honnestes gens qui fussent parmy les Romains ; tous admirant sa sagesse , sa courtoisie & sa valeur. Tous les soldats aussi l'auoient

en veneration : cars'il falloit faire quelque travail , on le voyoit le premier la main à l'ouvrage , hastant les tardifs , loüant les laborieux & animant chacun par son exemple. Mesmes ce que Corbulon luy choissoit du plus riche butin dans la prise des places pour honorer son courage , il le partageoit entre les soldats qu'il voyoit auoir le mieux fait : & d'une mesme action il recueilloit deux fruits , estant loüé en mesme temps & pour sa valeur & pour sa liberalité. Aussi nul n'auoit tant de gracen y de bonheur que luy à reprimer vn desordre ou vne mutinerie & cestut vn de ceux qui seruit le plus à Corbulon , qui estant fort scuer à faire obseruer la discipline militaire , se trouua bien estonné , quand à son abord dans l'Asie il trouua des legions , dont la pluspart des soldats auoient vicilly dans l'oisiueté de la paix , & ne se pouuoient ranger à l'ordre ny aux fonctions de la guerre.

Melinte donc dans la prise de cette grande ville , ne s'employa qu'à empescher les desordres & les violences des soldats , priant les vns , promettant aux autres , & chastiant quelquefois ceux qui s'emportoient à des insolences. Cependant qu'il estoit occupé à ce difficile employ , vn ieune homme , vestu d'un simple habit d'Esclau , mais dont le visage démentoit son vestement , ayant remarqué toutes ses actions , s'approcha de luy avec peine dans le tumulte , & l'ayant prie de l'escouter , luy dit ; Seigneur , que me donnerez vous , & ie vous feray recevoir la plus grande gloire que vous puissiez acquerir en toute cette guerre. Mon amy , respondit Melinte , ne sera-ce pas assez pour vous d'auoir part dans cette mesme gloire , puisque ie ne la recurray que par vostre moyen ? Avec cela , dit-il , le

vous demande encore l'honneur de vostre amitié , de laquelle peut-estre ne m'estimerez-vous pas du tout indigne. Asseurez vous , repartit Melinte , que ie ne refuse point mon amitié aux honnestes personnes, & vous auez fort la mine d'estre de ce nombre. Mais quelle est donc la gloire que vous me voulez faire acquérir ? Celle , reprit-il , de sauuer l'honneur à trois Princesses du sang des Arsacides , & aux filles de leur suite : Il y a long temps que ie cherche parmi les Romains : mais ie n'ay trouué que vous qui me semblast capable d'une si genereuse action. Je vous suis bien obligé , dit Melinte , de cette bonne opinion que vous auez de moy , & ie tascheray de ne rien faire qui en soit indigne. Dites-moy donc où sont ces Princesses , afin que ie mette l'ordre qui sera nécessaire pour les garentir. Seigneur , dit-il , elles se sont renfermées dans ce Palais que vous voyez , où il y a assez de biens pour reconnoistre ceux qui leur conferueront ce qu'elles ont de plus cher au monde. Pour moy , reprit Melinte , j'acquiers assez de bien quand j'acquiers de l'honneur : toutefois il ne sera pas mal à propos d'en promettre quelque chose aux soldats dont ie me pourray seruir en cette occasion. Aussi tost il ietta les yeux sur les Romains qui estoient autour de luy ; & voyant que la pluspart estoient de ceux qui luy estoient les plus affectionnez ; il dit tout haut. Qui sera genereux me suiue. Incontinent il commença à marcher avec ce ieune homme vers le Palais, où environ cent soldats le suivirent , outre deux Escuyers qui l'accompagnoient ; & estans proche de là, il leur dit : Compagnons , pource que ie vous ay veus.

la plupart deferer à la priere que ie vous ay faite de n'yfer icy d'aucune violence , ie veux recompenser vostre modestie , & vous faire auoüer que les plus modestes se trouuent en fin les plus riches: faites ce que ie vous diray , & nulle troupe de l'armée ne se trouuera si chargée de biens par le pillage , que ie vous en feray icy presenter par les mains mêmes des vaincus. Alors ils le remercierent & promirent de luy obeïr exactement. Il les rangea tous aux enuironz du Palais pour le bien garder , & laissa vn de ses Escuyers pour auoir l'œil sur eux , auquel volontairement ils se soumirent ; & apres que le ieune homme eut fait ouurir la porte , il entra avec luy , suiuy de son autre Escuyer ; & fut conduit dans vne chambre , où dès qu'il fut entré , deux ieunes Dames se vindrent ietter à ses pieds en pleurant , & les luy embrasserent ; & plusieurs autres filles en mesme temps se jetterent à terre , toutes implorant sa pitié , & le priant de les vouloir garentir d'outrage. Cette veüe si sensible l'obligea de mouïller ses yeux de quelques larmes ; & apres les auoir asseurées que leur honneur ne couroit aucun danger , il les pria de se releuer & de se vouloir asseoir ; & de croire qu'apres qu'il leur auroit dit ce qu'il desiroit faire pour leur seruice , elles auroient suiet de chasser toute crainte. Elles luy baisèrent les mains toutes deux , & les luy mouïllerent de pleurs en se releuant: puis elles le firent asseoir avec elles pour entendre ce qu'il auoit à leur dire.

Cependant celuy qui l'auoit amené estoit entré dans vne autre chambre ; & Melinte voulant luy demander où estoit la troisieme de ces Princesses , pour luy rendre aussi le respect qu'il luy deuoit , se tourna , & en mesme

temps vit sortir de cette autre chambre la personne qu'il cherchoit, non plus en habit d'Esclaue ny d'homme, mais vestuë d'vneriche simarre Persienne, & d'vne façon plus majestueuse que pas vne de celles avec qui il estoit. Me voicy, luy dit elle, pour acheuer le nombre de celles qui ont besoin de vostre secours. Melinte mit vn genouil en terre, pour luy demander pardon d'auoir manqué de luy rendre l'honneur qu'il luy deuoit; & luy dit, qu'il s'estimoit bien-heureux d'auoir à rendre à vne Princesse, le seruice qu'il croyoit n'auoir promis qu'à vn Esclaue. Seigneur, respondit la Princesse, mesœurs & moy & tout ce que vous voyez icy est à vous; & s'il vous plaist nous sommes toutes vos Esclaues. Iamais, dit-il, mon ambition n'a esté si haut, que de pretendre à me faire seruir par des Princeses; & ie voy par les auantages de vostre sang & de tant de belles qualitez qui sont en vous, que ma fortune sera bien grande si vous souffrez seulement que ie vous serue.

Cependant la belle Araxie, qui estoit l'aînée de ces Princeses & celle quiluy parloit, tenoit les yeux attachez sur luy, comme ie sceus depuis de Zelinde qui estoit la plus ieune; & admirant sa grace merueilleuse & en sa mine & en son parler, conceuoit desia de l'affection pour luy: & sa passion naissante se sentoît flattée par ces paroles, par lesquelles il sembloit luy offrir son seruice, bien qu'en effect elles ne parussent que de la ciuilité. Si bien que luy voulant faire conceuoir vne estime d'elle & l'esperance de pouuoir meriter son amour, elle luy dit. Ie veux croire, Seigneur, par ce que ie voy de vous, & par les genereuses actions que ie vous ay veu faire, que vous estes d'vne naissance illustre; estant impossible qu'vne

vertu si haute que la vostre , se soit voulu loger que dans vn sang qui la peust faire esclater ; & qu'ainsi vous meritez, non seulement que des Princesses , mais encore que toute la terre vous obeïsse : aussi veux - ie croire qu'une grandeur de courage comme est celle qui est en vous, qui ne voit rien au dessus d'elle , & qui merite que tout le monde luy cede, se plaist à releuer la noblesse & la vertu quand elle les trouue abatuës par la fortune; & pour les rehausser & les remettre dans le lustre veut bien s'abaisser au dessous d'elles par la modestie & la civilité. Mais pour vous faire connoistre si nous meritons que vous preniez soin de nous , sçachez que nous sommes nieces du Roy Tiridate , & filles de sa sœur qui fut mariée à vn Prince de sa race, nommé Vonones le plus puissant entre les Parthes apres les trois freres, Vologesès, Tiridate & Pacore qui partagerent les trois Empires des Parthes , des Medes & des Armeniens; & pource que l'Armenie estoit escheuë au plus ieune qui estoit Tiridate , & qu'elle estoit disputée par les Romains , Vonones mon pere , qui estoit vn expérimenté Capitaine , luy fut donné pour luy servir de conseil & auoir la principale conduite de ses affaires & de ses armées. Mais Tiridate se laissant gouverner par quelques ieunes gens, qui luy persuadoient que Vonones prenoit plus d'autorité que luy-mesme , commença à ne plus suivre ses conseils , & non seulement le mesprisa , mais encore voulut le perdre pour n'auoir plus vne personne de telle consideration qui peust controller ses actions. En ce dessein voyant que Corbulon s'aprochoit d'Attaxate, il luy commanda de la garder avec peu de forces qu'il luy donna , cependant qu'il tiendroit la campagne, croyant bien que mon pere periroid dans le dessein

de conseruer cette ville, ayant trop de courage pour la rendre qu'après de grands combats ; mesmes il laissa auprès de luy quelques Chefs pour luy nuire en tout ce qu'il voudroit entreprendre ; l'un desquels nommé Misdate, a esté si traistre, qu'aux approches qui se sont faites ce matin par les Romains, feignant de tirer vne fiesche contre les ennemis, il a percé le corps de mon pere, qui a esté rapporté dans la ville tirant les derniers souspirs. Cette nouuelle m'a esté apportée par vn de ceux de la suite de mon pere, & m'a donné tant de douleur, que laissant icy pleurer mes sœurs, ie m'en suis allée au lieu où Vonones expiroit, n'ayant pû estre porté iusques-en ce Palais. La mort venoit de luy fermer les yeux lors que ie suis arrivée, & estimant superflu de parler à vn corps qui estoit priué de sentiment, i'ay tourné ma fureur contre Misdate, qui pour m'abuser & contrefaire l'innocent, feignoit de pleurer deuant moy cette perte. Tandis qu'il tenoit vn mouchoir deuant ses yeux comme pour essuyer ses larmes, il n'a pû voir que i'ay tiré l'espée qui estoit encore au coste de mon pere, & la poussant dans le corps du traistre, ie luyay dit pleure ta propre mort maintenant avec des larmes veritables ; puis va-t'en là bas donner cette consolation à mon pere, que ta trahison n'a gueres tardé à estre punie par son espée mesme. L'effroy a esté si grand dans la ville, tant pource qu'elle estoit desia enuironnée de Romains, que pour la mort si soudaine de Vonones & de Misdate, que chacun n'a plus songé qu'à se rendre. I'ay fait ce que i'ay pû pour animer les Chefs qui restoiēt, à soustenir au moins quelques assauts auant que d'en venir à cette extremité ; ils ont enuoyé deuers Corbulon mal-gré moy luy dire qu'ils
se

se rendoient à discretion. Alors apres auoir employé quelques paroles pour les diuertir d'une si lasche resolution, ie me suis ainsi entretenuë en moy-mesme: A quoy penses-tu, Araxie? & à quoy te porte ton courage contre tes propres ressentimens? pour qui veux-tu conseruer Ataxate? pour Tiridate, qui a causé la mort de ton pere? songe-plustost à faire en sorte pour te vanger qu'il perde tout son Royaume; & si tu dois penser à conseruer quelque chose dans ce desordre, ne pense plus qu'à conseruer ton honneur & celuy de tes sœurs. Aussi tost ie m'en suis allée dans la maison d'un homme qui estoit au service de mon Pere, où ie me suis reuestuë d'un habit Esclau; & ressortant en mesme temps i'ay trouué que les Romains estoient desia dans la ville. Ceux qui m'accompagnoient ont esté si effrayez qu'ils m'ont perduë dans le tumulte. Pour moy ie me suis sentie fortifiée d'une certaine resolution, qui m'a fait perdre toutes sortes d'apprehensions; & ie croy que dans les plus grands dangers quelque Deité fortifie ainsi ceux dont le Ciel a soin, par l'assistance de laquelle ils se sentent plus fermes que dans la prosperité mesme. Ie me suis meslée d'un œil asseuré parmy les troupes Romaines; & là i'ay iugé des actions des vns & des autres, avec autant de tranquillité d'esprit, que si i'eusse esté sur un theatre pour iuger de quelques combats de plaisir. La plupart ne pensoient qu'à entrer dans les maisons pour les piller & pour faire quelque insolence au sexe qui a la pudeur pour son plus cher partage: Mais ie n'ay trouué que vous, Seigneur, disoit elle à Melinte, qui prit peine d'épescier les desordres & les violences; & bien que i'eusse trouué en vous ce que ie cherchois, & que ie n'eusse point de temps à perdre, i'ay esté surprise d'une telle ad-

miration de vostre vertu, que ie me suis arrestée quelque temps à vous considerer, ne pouuant me lasser de voir avec combien d'adresse, meslée d'une certaine autorité qui n'appartient qu'aux seuls vertueux, vous rangiez les esprits des soldats à faire tout ce qu'il vous plaisoit. En fin ie me suis adressée à vous, & ie me loüe moy-mesme maintenant du beau choix que i'ay fait pour nous garentir d'outrage. Maintenant disposez de tout: il y a ceans des richesses pour contenter & vos soldats, & vous mesme, puisque la valeur ne mesprise pas de s'enrichir de ce qu'elle acquiert; & si tous ces biens ne fussient, il nous reste encore de plus grands tresors dans Tigranocerte, nos personnes mesmes sont à vous, & vous pouuez nous employer dans les moindres seruices: de tout ce que nous possedions nous ne vous demandons que la reserue de nostre honneur, pour la conseruation duquel nous vous abandonnons toutes choses.

Melinte auoit escouté Araxie, considerant sa noblesse, son courage, sa vertu & son agreable façon de parler: & voyant qu'elle auoit finy le discours, il le reprit ainsi. Madame, ie reconnois par ce que ie viens d'entendre, & vous le reconnoistrez aussi avec moy, que les Dieux qui disposent absolument de toutes les choses humaines, changent l'estat de la fortune des hommes comme il leur plaist; & bien souuent renuersant vn establissement que nous iugions heureux & assuré, font naistre nostre plus grád repos, du plus grád malheur que nous pouuions apprehender, & la pluspart de ceux qui iugent temerairement de tout, attribuent à vne bijarrerie de fortune, ce qui est veritablement vn effet de la prouidence diuine: Pouuez-vous craindre vn plus grand malheur, que celuy de vous trou-

uer dans vne ville prise par les Romains, anciens ennemis des Parthes, abandonnée de tout support apres auoir perdu vostre pere, & exposée aux insolences & aux outrages des victorieux? Cependant vous trouuerez que Tiridate estoit plus vostre ennemy que nous; que les Romains & nous qui les suiuous, sçauons mieux respecter la noblesse & la vertu, mesmes en nos ennemis, & dans la licence mesme acquise à la victoire, que n'eust fait Tiridate vostre Roy & vostre parent, qui apres auoir fait mourir son beau-frere & son fidele seruiteur pour vne legere jalousie, eust peut-estre encore porté sa haine contre sa race. En fin vous trouuerez que parmy nous vostre rang, vostre honneur & vos biens vous seront conseruez, & que vous en iouïrez avec autant d'esclat & de seureté que vous eussiez fait dans vne profonde paix parmy les vostres; & qu'au contentement de cette paisible jouïssance vous adiousterez encore celuy de voir de quelle sorte nous allons vanger vos injures sur Tiridate: Pour moy, i'ay vne maxime, qu'aux vertueux la vertu ne peut estre ennemie en quelque sujet quelle se rencontre. quelque party differend que l'on suïue, & avec quelque opiniastreté que l'on combatte l'un contre l'autre pour l'intérest & l'honneur de son Païs, les vertueux sont tousiours amis les vns des autres, & ne manquent point à se donner reciproquement tous les honneurs & les assistances qu'ils meritent. Viuez donc en cette assurance que vous estes aussi libres & aussi assurées de vostre honneur, que vous fustes iamais dans le plus ferme estat de la fortune de vostre pere; & bien que Corbulon peust pretendre peut-estre de vous mener à Rome captiues & pour seruir à son triomphe, assurez-vous que ie feray en sorte qu'au contraire

d'y penser il ne pensera qu'à adiouster des hōneurs au don qu'il vous fera de vostre liberté. Pour vos biens dont vous me voulez faire present, ie vous les remets, & vous prie de croire que quand ie suis venu à la guerre, ce n'a point esté à dessein d'acquérir des richesses, mais de l'honneur seulement; & ie n'en pouuois acquérir vn plus grand, que celuy de vos bonnes graces, & de vous pouuoir rendre seruice.

Toutes ces paroles qui ne pouuoient partir quē d'une vertu bien confirmée en Melinte, rauirent tellement ces Princesses & de ioye & d'admiration, qu'en mesme temps elles se ietterent encore toutes trois à ses pieds, & luy baisèrent les mains pour le remercier, & quand il les eut releuées, Araxie luy dit. l'aurois bien conceu en mon esprit quelque idée de vertu, mais iamais ie n'en auois pū imaginer vne si haute ny si solide que la vostre: que le Ciel luy donne la recompense qu'elle merite; car tous nos biens ny tous ceux de la terre ne sont pas capables de la reconnoistre. Faites donc enuers Corbulon ce qu'il vous plaist nous promettre; & permettez au moins que ie reconnoisse les soldats que vous auez amenez pour defendre ce Palais, & que ie satisfasse ensemble & au desir que i'ay d'honorer leur modestie, & à la parole que vous leur en auez donnée.

Cependant, poursuiuit Palamede, estant entré dans la ville par vne autre porte que Melinte, ie le cherchois par tout; & passant pardeuant le Palais ie reconnus son Escuyer, qui en gardoit l'entrée avec les soldats qu'il luy auoit commis. Ie sçeus de luy qu'il estoit dedans & aussi tost i'y entray avec quelques vns de ma suite. Les Princesses entendant du bruit, & voyant des person-

nes inconnuës, eurent peur que Melinte ne fust pas le plus fort & ne peust les garantir de violence. Mais il les rassura, & leur dit que i'estois vn autre luy-mesme, & que sans doute j'aurois vne pareille passion que luy à les servir.

Après quelques complimens, par lesquels ie voulus leur confirmer ce que Melinte auoit dit de moy, ie consideray ces trois Princesses. Palamede s'arresta sur ces paroles & commença à resuer. Continuez, luy dit Epicharis, vous considerastes donc ces trois Princesses. l'ay peur, dit-il, qu'insensiblement ie ne me sois engagé dans vn recit, d'où il me sera difficile de me démesler sans parler à mon desauantage; Quel desauantage, dit-elle, pouuez vous receuoir de vostre discours. Je crains, reprit-il, de faire tort au dessein que i'ay de me faire aimer de vous. Non non, repartit Epicharis, ne feignez point de me dire le tout; & ne craignez point qu'aucune chose soit capable de faire tort à l'estime que ie fay de vous: ou bien si vous voulez ie diray cè que vous craignez de dire; vous deuinstes amoureux d'une de ces Princesses; & si vous voulez encore ie deuineray de laquelle des trois. Ah! mauuaise Epicharis, dit-il, c'est assez de iuger par ce que vous auez connu de mon humeur, que ie deuins amoureux, comme il faut que ie l'auoüe; mais de deuiner de laquelle, c'est trop; & ie vous en desfie. Je m'assure pourtant, dit-elle en le regardant fixement, que ce fut de la plus ieune. Palamede rougit, & luy dit, sans doute c'est pource que vous regnez dans mon ame maintenant, & que vous y voyez toutes mes pensées, & tout ce qui s'est passé de ma vie; car sans cela iamais vous ne l'eussiez deuiné, puisque personne ne vous en parla iamais. Pala-

mede, respondit-elle, cen'est point que ie regne dans vostre ame; mais vostre ame mesme se descouure si facilement, que la moindre de vos paroles me fait connoistre tout ce qu'elle pense; & croyez vous que quand vous m'auiez dit que la plus ieune vous auoit appris qu'Araxie auoit conceu de l'affection pour Melinte, ie n'aye pas bien iugé que cela ne s'estoit dit que dans vne grande confidence, & quel'on ne va point conter de telles nouuelles d'une sœur à vne personne indifferente. En cela au moins, dit Palamede, vous n'auiez pas bien deuiné; car il est vray que ie l'aimay, mais elle me traitta tousiours, non seulement avec indifference, mais encore avec mespris: car c'estoit la plus glorieuse Princeesse qui fut iamais: toutefois elle estoit d'une humeur fort libre, ce qui est bien rare aux orgueilleuses; pource que de crainte de se communiquer, elles sont ordinairement les serieuses: le naturel de celle-cy estoit fort gay; mais elle auoit conceu vne si haute opinion de la noblesse de son sang, qu'elle ne croyoit pas qu'aucun homme deust oser la rechercher, sinon ceux de son sang mesme: surquoy nous eusmes peu de temps apres quelques discours que ie ne feindray point de vous dire.

Je iettay donc d'abord les yeux sur elle, car encore qu'Araxie fust sans doute la plus belle, & que Candace qui estoit la seconde semblaist aussi la seconder en beauté; Zeline auoit à mon goust quelque chose de plus riant & de plus picquant dans le visage, & la nature sembloit n'auoir fait ses yeux plus petits qu'aux deux autres qu'à fin de les rendre plus perçans. Je remarquois aux aînées vne tristesse modeste, & en Zeline vne resolution temeraire, avec laquelle elle sembloit auoir tout à mespris dans son

infortuné mefine, & cela s'accordoit plus à mon humeur. Me voila donc pris par elle auffi toft que ie l'eus veüe, & voyant qu'elles estoient occupées à se faire apporter quantité de vases d'or pour les distribuer aux soldats, ie m'employay à mettre à part ceux qui auoient esté touchez de la main de Zeline; & voyant, par ce petit office & par les regards que ie luy enuoyois, luy faire assez connoistre que c'estoit elle à qui mes vœux s'adreffoient.

Melinte fut d'avis que l'on fist venir tous les soldats les vns apres les autres, à chacun desquels ces Princesses feroient present d'un de ces vases, puis qu'ils accompagneroient les Dames iusques au camp où estoit encore Corbulon, en portant chacun le present qu'on leur auoit fait. Il fut aussi d'avis que l'on mist à part vn grand buffet de vaisselle d'or que l'on chargeroit sur vn chariot doré pour en faire present à Corbulon; Melinte n'ayant autre dessein que d'obtenir la liberté de ces Princesses, & d'empescher qu'elles ne fussent menées captiues à Rome: Cela fut ainsi executé, & les Princesses s'estant fait amener de beaux cheuaux avec des houffes riches, furent mises dessus par Melinte & moy. Cinquante soldats furent ordonnez pour aller deuant deux à deux, portant chacun en main le vase d'or qui leur auoit esté donné, à la teste desquels estoient deux de nos Escuyers: en suite le chariot doré, chargé du grand buffet de vaisselle d'or, estoit traîné par six cheuaux blancs: Ataxie & Candace alloient apres, ayant au milieu d'elles Melinte, dont la vertu sembloit estre menée en triomphe: Zeline les suiuoit, & i'allois à cheual à costé d'elle, l'entretenant avec le plus de tesmoignages d'affection que ie pouuois: les filles de la suite des Princesses alloient aussi à cheual deux

à deux apres nous , & apres-elles les autres cinquantes soldats marchoiẽt en pareil ordre que ceux de deuant, & à leur queue le reste de la suite des Princesses & de la nostre.

Les troupes Romaines qui estoient espanuës par la ville, croyant que cette belle bande fust conduite au General par son ordre, laisserent passer paisiblement ce petit triomphe, en admirant & la beauté des Dames & la grandeur des richesses qui estoient portées. Nous arriuasmes ainsi au camp où Corbulon tenoit alors son siege, pardeuant lequel passa tout cẽt ordre iusques à nous. Alors Melinte fit arrester deuant luy le chariot ; les soldats s'espandirent à l'entour du Tribunal des deux costez, tenant leurs vases ; & Melinte descendant de cheual en fit aussi descendre les Princesses, qui allerent s'incliner aux pieds de Corbulon auquel il adressa ainsi sa parole.

Je vous presente, Seigneur, des Princesses qui ne doiuent point estre traitrees comme captiues, mais comme amies du peuple Romain, puis qu'elles sont ennemies de ses ennemis ; Je vous presente les personnes les plus viles pour l'agrandissement de l'Empire, puisque par la haine qu'elles ont sujet de porter à Tiridate, non seulement elles sont cause que cette puissante ville est en vostre puissance, mais encore elles se promettent de vous rendre Maistre de la grande Tigranocerte, où elles ont plus de credit que le Roy mesme. Vous voyez deuant vous des Princesses du sang des Arsacides, filles du vaillant Prince Vonones Gouverneur de Tigranocerte, beau frere des Rois Vologese, Pacore & Tiridate, que ce dernier a fait mourir auourd'huy meschamment par vne ialousie. Elles sacrifient à l'honneur de l'Empire tout ce qu'elles possèdent,

& leurs

& leurs propres ressentimens, avec lesquels elles vous acquerront plus de villes que nous ne pourrions faire avec trente Legions. Elles vous demandent seulement cette grace, qu'en receuant ce present, vous permettiez que ces soldats iouissent de celuy qu'elles leur ont fait; & que Rome qui est assez riche de gloire, souffre que son tresor soit diminué de ce peu de richesses, en recompense desquelles elles luy promettent des Villes & des Provinces. Corbulon l'ayant oüy parler, luy respondit. Si vn autre que Melinte me faisoit ce discours pour ces Princesses, ie pourrois craindre qu'il ne fust mélé d'artifice, & qu'il ne fust fait seulement à dessein de les raur à mon triomphe: mais connoissant sa sagesse, & que sans doute il prefere l'honneur & le bien du peuple Romain à toute autre consideration; ie veux croire tout ce qu'il me dit sans l'examiner. Princesses, iouissez donc parmy nous pour l'amour de luy & pour vostre propre merite, & de vostre rang & de la liberté que vous desirez: & si dans la condition où ie vous remets, il vous plaist donner quelque preuve de vostre affection au peuple Romain, nous en serons redevables à vostre seule bonne volonté, & non à aucun service que nous vous ayons rendu.

Les Princesses ayant admiré l'adresse dont Melinte s'estoit seruy pour obtenir ce qu'elles desiroient, & voyant si bien réussir son discours, se ietterent pleines de contentement aux pieds de Corbulon pour le remercier, & luy iurerent qu'elles satisferoient bien tost à ce qu'elles luy auoient promis par la bouche de Melinte. Elles le supplierent seulement de traiter humainement les habitans d'Artaxate, afin que cette douceur seruist à persuader ceux de Tigranocerte à se rendre aux Romains; & ainsi

en songeant à se vanger de Tiridate, elles songeoient encore à la conseruation de ceux de leur país. Le General accorda leur priere, tant pour l'amour d'elles que pource qu'il se deuoit à luy-mesme, & adiousta qu'il receuoit pour le peuple Romain les richesses qu'elles luy offroient, non pas comme leur rançon, mais comme presens, & comme marques de leur liberalité: qu'il agreoit aussi que les soldats retinssent ce qu'elles leur auoient donné; & qu'elles possédassent paisiblement tout ce qui leur restoit & de biens & de suite, pour la conseruation desquels & de leurs propres personnes, il leur alloit donner vne bonne escorte pour les conduire à Tigranocerte.

Ils se separerent ainsi tous extrêmement satisfaits de Melinte, Corbulon croyant luy estre redevable de ce qu'il leur auoit acquis ces Dames pour auancer leurs progresz; Les Princeesses estimant luy estre obligées de la conseruation de tout ce qu'elles auoient de plus precieux au monde, les soldats pensant tenir de luy seul les presens qu'on leur auoit faits; puisque sans son adresse tout ce qui se prenoit dans les villes estoit acquis au tresor de Rome: Pour moy ie croyois que l'obligation que ces Dames auoient à Melinte, redondoit sur moy, & que dans la satisfaction qu'elles receuoient ie pourrois plus aisément m'insinuer aux bonnes graces de Zelinde. Mais ie croy que de tous nul n'estoit si satisfait que Melinte mesme; m'imaginant qu'il n'y a point de plaisir si parfait, que celuy qu'y ne vertu sublime recoit de ses propres actions.

Nous fusmes choisis Melinte & moy pour commander l'escorte qui leur fut donnée; le lendemain furent faites les funerailles de Vonones où nous assistâmes, & le iour d'a-

pres nous partîmes avec elles pour les conduire iusques à Tigranocerte. Le second iour Araxie se trouuant seule dans le chemin avec Melinte, luy dit apres quelques discours sur le fuiet de ce qui leur estoit arriué. Je veux croire, Seigneur, que vous ne m'estimez pas si despourueü de sentiment, que vous ne iugiez bien que ie me sens extrêmement vostre redevable : mais ie veux encore que vous croyez que iamais ressentiment ne fut si vif que le mien, & que vous vous estes acquis par vostre vertu non seulement tout ce que ie possède au monde, pour en disposer comme il vous plaira, mais encore ma personne mesme & toutes mes passions, avec lesquelles ie veux vous servir toute ma vie. Madame, luy respondit-il, ce que i'ay fait pour vous est si peu de chose, & le moindre Chevalier est si obligé de servir ainsi la moindre Dame du monde, que ie ne puis croire que vostre ressentiment soit bien grand, s'il n'est qu'egal au service que ie vous ay rendu : mais ie veux bien croire que vostre cœur est si grand & si genereux, que la moindre assistance le picque sensiblement, & luy fait concevoir des desirs de se reuanger au delà mesme du merite de ceux qui ont eu l'honneur de vous servir. Melinte, dit-elle, vous perdez le temps de me vouloir diminuer vostre merite : ce que i'en ay connu me fait concevoir en vous la plus belle image de vertu qui fust iamais : pardonnez moy si ie vous loue à vous mesme ; ie sçay bien que vous le souffrez avec quelque peine : mais permettez moy de vous dire, qu'il n'y a point de Prince sur la terre, quand mesme il seroit capable d'adiouster de nouveaux Empires aux siens, à qui ie voulusse vouër ma vie comme à vous ; & ne croyez point que ie vous veuille recompenser par les plus flatteuses paroles que ie puisse inuenter,

mais que ie vous parle encore bien plus du cœur que de la bouche.

Il est vray, dit Palamede à Epicharis en pourſuiuant ſon diſcours, que cette Princeſſe qui eſtoit fort vertueuſe, & qui non ſeulement ſe ſentoit obligée à Melinte de la conſeruation de ſon honneur & de ſon rang, mais encore admiroit de moment en moment ſa ſageſſe ſi noble & ſi releuée, conceuoit de plus en plus vne ſi ardente & ſi honneſte paſſion pour luy, qu'elle ne pouuoit ſ'empêcher de luy teſmoigner ſes reſſentimens par ces termes affectueux : mais elle ſe maintint ſi bien dans les loix de ſon honneur, que iamais elle ne ſ'emporta à vne declaration ouuerte d'amour ny à luy faire faire aucune propoſition de mariage ; & aima mieux ſe laiſſer conſommer peu à peu, que de faire aucune action, ny dire vne parole, qui peult bleſſer ny la vertu de Melinte ny la ſienne propre : D'autre coſté bien que Melinte ne manquaſt pas de courage pour porter ſes deſirs iuſques à la recherche d'une Princeſſe ſi belle, ſi noble & ſi ſage ; toutefois ſoit que le Ciel ne l'eût pas deſtiné à auoir de l'amour pour elle, ſoit que meſurant toutes choſes par la raiſon ſans aucune ambition deſreglée, il ne iugeaſt pas que ce fuſt vne alliance ſortable que celle d'un Gentil-homme Sicilien avec vne Princeſſe du ſang des Parthes ; Iamais par ſes diſcours il ne luy teſmoigna qu'un deſir honneſte de la ſeruir ; & à tous ceux de la Princeſſe, qui bien que paſſionnez pouuoient ſ'interpréter pour marques d'un extrême reſſentiment, il ne reſpondoit que par des termes pleins de ciuité.

Quant à moy, l'eſtat de mes affaires eſtoit bien d'une autre ſorte ; car au contraire ie faiſois toutes les auances,

& Zelinde reiettoit toutes ses offres. Sur le chemin, l'ayant destournée de toute autre compagnie, & voulant luy faire quelque proposition d'amour, ie commençay par quelques propos de civilité, ausquels elle respondit assez honnestement; mais quand impatient de luy descouvrir le dessein que j'auois de l'aimer, ie m'expliquay plus ouuertement & selon mon humeur; ie vous prie de croire, me dit-elle froidement, que nous ne vous auons point abusez, quand nous vous auons dit ce qui estoit de nostre naissance: Je suis Princesse, & comme telle il n'y a que des Princes de qui ie puisse escouter de semblables discours. Je fus extrêmement surpris de voir de quelle sorte elle se vouloit releuer, & m'abaisser au dessous de sa grandeur: toutefois mon humeur libre n'estant pas capable de rien dissimuler, ie voulus bien luy faire perdre cette opinion qu'elle auoit si haute d'elle & si basse de moy; de sorte que sans autre adoucissement, ie luy dis. Croyez vous, Madame, qu'un Gentil-homme qui a pour ancestre le grand Thimoleon, exterminateur des Tyrans de la Sicile, n'ose s'esgaler à ce qu'il y a de plus grand parmy des peuples Barbares? & que ceux qui possèdent l'honnesteté, le sçauoir, les arts, la politesse & la vraye generosité, au point que nous les auons par dessus le reste du monde, soient pour n'oser aspirer à ce qui a esté produit par certains Satrapes, qui sous vne pompe extérieure d'habits cachent des mœurs rudes, vne ignorance grossiere & vne valeur fuyarde? Non non, Madame, laissons à part nostre Noblesse, car la mienne ne cede à nulle autre qui soit sur la terre, & pardonnez moy si ie vous parle avec cette franche: vous m'y auez vous mesme obligé, en me voulant faire perdre la hardiesse

de vous offrir mon affection: autrement, vous laissant dans l'opinion où vous estes, il m'eust fallu faire mourir mes desirs, ce qui m'est desormais impossible.

Si ses paroles m'auoient surpris, les miennes la surprirent bien autant, n'ayant sans doute iamais esprouué vne liberté de parler pareille à la mienne. Elle rougit & apres auoir demeuré quelque temps interdite, elle me repartit. Je croiray de vostre noblesse ce qu'il vous plaira, mais il vous sera difficile de compter comme moy vingt Rois de rang parmi vos ancestres; & qu'est-ce d'auoir deliuré vne Ile de tyrannie en comparaisón d'auoir acquis & conserué vn Empire qui a tousiours disputé de gloire avec celuy des Romains: car pour cette politesse, ces sciences & ces arts dont vous vous vantez, les Princes des Parthes les bannissent de leurs terres avec grande raison. C'est par là que les esprits des peuples se subtilisent de telle sorte qu'ils en deuiennent rebelles & ambitieux, & cherchent mille inuentions pour secoüer le ioug de ceux qui les commandent; & cette valeur fuyarde que vous nous reprochez, est celle toutefois qui a surmonté les Crasses & les Antoines. En fin ie vous prie que nous demeurions tous deux dans la saine opinion que chacun de nous doit auoir de soy, & n'attendez de moy que beaucoup de ciuilité & point d'amour. Je voy bien, luy dis-je, que la haute opinion que vous auez de vostre noblesse, & le mespris que vous faites de nous, est vne maladie qui se rendroit incurable, si ie n'employois pour la guerir des remedes vn peu violens, & qui peut estre vous desplairont: mais au lieu des submissiõs & des respects dont il se faut seruir pour acquerir les autres; il faut au contraire releuer son merite aupres de vous, & faire en sorte que vous conten-

tant des qualitez particulieres qui sont en vous en vn haut degré, comme la beauté, la grace & les dons d'esprit, vous perdiez cette grande estime de vostre sang qui ne vous permet pas seulement de considerer ceux qui recherchent vostre affection. Croyez-vous, adioustay-ie, que Themistocle ce Capitaine Grec, qui n'auoit autre titre pour la naissance, que celuy d'estre Citoyen d'Athenes, quand il vint offrir son seruice à Xerxes, dont l'Empire estoit dix fois plus grand que celuy des Parthes, & qu'il receust de luy le reuenu de tant de villes pour le seul entretien de sa personne, avec le commandement d'une puissante armée, eut esté estimé indigne d'auoir vne de ses filles en mariage, puis que c'est le partage ordinaire des Satrapes, dont les plus grands furent si ialoux de le voir tellement esleué au dessus d'eux? Vous aimeriez donc mieux estre l'espouse d'un Satrape, c'est à dire l'Esclaue d'un esclaue, puis qu'ils sont tous ainsi estimez de vos Princes, & partager avec cent autres femmes l'amitié d'un Barbare, puis qu'ils font gloire d'é auoir vn tel nombre, que de vous voir seule aimée par vn homme de condition noble & libre, qui possède assez de biens pour vous rendre heureuse, & qui a assez de courage pour acquerir par les armes vn rang qui pourra contenter vostre ambition? Vn simple Citoyen Romain s'estime plus que les Rois & les Princes de la terre, lesquels on void souuent à leur porte pour leur faire la cour; le moindre d'entr'eux estimeroit se faire tort de s'allier à vne Princeesse estrangere, & vous auez peu sçauoir combien ils mespriserent Antoine de s'estre attaché à l'amour d'une Reine d'Egypte: Cependant ce titre de Citoyen Romain ne nous peut estre refusé à Melinteny à moy, pour les seruices que nous auons rendus aux Romains; & avec ce titre nous pouons aspirer aux premie-

res Charges du monde & à des gouuernemens aussi grands que tout l'Empire des Parthes, & à l'Empire mesmes de Rome, puis qu'il se donne par election. Je voy bien, dit-elle, en m'interrompant, que vous me ferez seulement connoistre par vos discours que vous nous estimez indignes de vous, autant que nous vous estimons indignes de nous; & que chacun sur cesuiet se peut flatter autât qu'il luy plaist. Je n'ay pas peu obtenu, repris-je, si ie vous ay fait connoistre pour le moins, que cette opinion dont vous vous flattez, n'est pas receuë de tout le monde; & peut estre renuersée par d'autres toutes contraires. Ne croyez pas, repartit-elle, auoir rien obtenu; car il n'y a point de raison qui soit capable de me faire changer d'opinion, ny de vous faire iamais rien obtenir de moy. Entendistes vous iamais, belle Epicharis, vne plus plaisante façon de parler d'amour: aussi ne fus-je iamais si estonné que de me voir reduit par elle à suivre des maximes toutes contraires à celles qui sont ordinaires aux Amans: car au lieu de l'humilité flatteuse, avec laquelle on a de coustume de s'abaisser au dessous de ce qu'on aime, & dont on se sert à repousser les louanges excessiues que l'on se donne l'un à l'autre; chacun de nous au contraire cherchoit à parler auantageusement de soy & au desauantage de l'autre; & il sembloit plustost que i'eusse dessein de la querreller que d'acquiescer son amour. Toutefois elle estoit d'une humeur si libre qu'elle ne s'offensoit point de tous mes discours, au contraire elle en rioit souvent, & se contentoit de se maintenir dans son opinion, & de l'auantage qu'elle croyoit receuoir de n'auoir point esté persuadée. Nous eusmes ainsi sur le chemin plusieurs propos, & acquismes l'un sur l'autre vne si grande liberté de nous parler, que
bien


bien souvent nous nous emportions iusques à nous dire des paroles aucunement iniurieuses. Elle m'appelloit temeraire ambitieux , ie l'appellois orgueilleuse barbare ; & nos discours s'eschaufferent de sorte quelquefois qu'ils furent en fin entendus ; si bien que ce nouveau procédé d'amour fut connu de Melinte & des deux autres Princesses , qui se mellant dans nos entretiens se plûrent à nous aigrir l'un contre l'autre sur ce sujet , & à nous faire tenir des propos dans nos agreables coleres qui ne leur donnoient pas peu de diuertissement.

Avec ces conuersations si differentes , modeste & respectueuse entre Araxie & Melinte , & turbulente & gaye entre Zelinde & moy , nous arriuasmes à Tigranocerte, où Araxie ayant fait voir à Melinte celuy des liens qu'elle luy enuoyeroit quand elle auroit pratique ses intelligences dans la ville , auquel il pourroit prendre toute creance , & ayant fait parestre en cette separation autant de douleur & versé autant de larmes que pourroit faire la plus passionnée Amante du monde , nous les laissasmes apres les ciuilitéz de part & d'autre avec esperance de bien tost nous reuoir.

Quelques iours apres nostre retour au camp de Corbulon , lors qu'il estoit prest de faire partir d'Artaxate ses troupes qui s'y estoient assez rafraichies , pour aller vers Tigranocerte , nous vismes arriuer en nostre logis vingt chameaux chargez qui estoient enuoyez à Melinte par les Princesses , avec vne lettre qui luy fut donnée par l'homme de creance dont elle luy auoit parlé. Sa lettre estoit celle.




ARAXIE AV PLUS GÈNE-
reux de tous les hommes.

 *I vous auez mesprisé les richesses que nous vous auons présentées, au moins ne refuserez vous pas quelques raretez de l'Orient & des parfums de l'Arabie que les Dieux mesmes ne refusent pas. Souffrez, sage Melinte, que vostre courage relasche un peu de sa sèuerité pour soulager nos ressentimens; & croyez que c'est offenser cruellement les personnes que l'on a sensiblement obligées, de ne permettre pas qu'elles se reuengent en aucune sorte. Receuez donc ces petits presens comme des hommages que nous offrons à vostre vertu. Je voudrois que tout ce que nous possedons fust de la nature de nos vœux & de nos affections, qui bien que vous les refusiez, ne laisseront pas d'estre eternellement à vous.*

Le receus aussi vne lettre de la part de la gentille & superbe Zelinde où ie leus ces mots.

ZELINDE AV PLUS AVDA-
cieux qui viue.

 *I e n'eusse eu quelque crainte de combler vostre vanité qui n'est desja que trop grande, i'eusse fait mettre à part quelques presens pour vous, afin de satisfaire à quelques petites obligations que ie vous ay. Mais sçachant que Melinte vous aime plus que vous ne meritez, ie me suis asséeurée qu'il ne vous feroit que trop bonne part de ce que nous luy enuoyons. Ne trouuez donc pas estrange si l'on retranche mesme les choses deuës, à ceux qui pretendent plus qu'ils ne doivent.*

Melinte apprit de l'homme de creance, qu'Araxie auoit fait en sorte que les Romains seroient receus dans Tigranocerte; qu'il n'y auoit que ceux du Chasteau qu'elle n'auoit pû gagner; mais que voyant l'armée Maistresse de la ville, ils se rendroient bien tost. Il alla soudain porter ces nouuelles à Corbulon; & pour satisfaire ensemble à son courage & à celuy de la Princesse, il tesmoigna à celuy qu'elle enuoyoit qu'il acceptoit ses presens: mais il les fit conduire au logis de Corbulon, à qu'il les presenta de la part d'Araxie, & luy fit part des bonnes nouuelles. Corbulon estant bien satisfait & se doutant bien que ce present estoit plustost de sa liberali-

ré, que de la Princesse enuers luy, tira à part l'homme de creance & apprit de luy qu'il auoit esté adreſſé à Melinte. Alors il le loua deuant tous des grands ſeuices qu'il rendoit à l'Empire & de ſa grande moderation pour les richesses : puis il adiouſta en ſouſriant, que c'eſtoit trop entreprendre que de faire de tels preſens à ſon General : que c'eſtoit meſme faire le General & le ranger à eſtre recompensé par luy comme vn ſimple Cheualier : toutefois qu'il vouloit bien que la gloire de Melinte allaſt iuſques à ce point, & que le treſor de Rome ſ'enrichiſt, non ſeulement des fruits de ſa valeur, mais encore de ceux de ſa liberalité : qu'au moins ils partageaſſent ces richesses, & qu'il en fiſt remener dix chameaux en ſon logis. Melinte apres auoir repouſſé toutes ces louanges avec vne grande modeſtie, conſentit à ce qu'il deſiroit ; & ayant fait deſcharger ces chameaux chez luy, trouua dans de grands coſſes ſix emmeublemens d'eſtoffes Perſiennes d'or & de ſoye, pluſieurs robes à la Medoiſe, vn nombre infiny de plumes Indiennes, & mille autres choſes rares & inconnues encore aux Romains : mais quand il fir deſplier ce qui venoit d'Arabie, nous fuſmes tous remplis des odeurs les plus agreables que nous ſentifmes iamais. Je croy qu'il y auoit dans mille pacquets dequoy embaumer toute la terre, avec vne abondance de liqueurs & d'vnguents precieux, & vne quantité innombrable de peaux parſumées. Melinte me fit part de toutes ces choſes ; puis en enuoya à tous les Chets de l'armée, meſmes il n'y eut ſoldat à qui il ne donnaſt quelque piece de ce qui luy auoit eſté apporté, ſi bien qu'inſenſiblement il ne luy reſta rien, & il fut contraint d'en prendre de la part meſme qu'il m'auoit faite, afin qu'il gar-

daſt quelque choſe du preſent de la Princeſſe , à qui il fit cette reſponſe.



MELINTE A LA PLUS LIBE-
rale Princeſſe de la terre.



AGNIFIQUE PRINCESSE,

*Vos preſens ont eſté receus avec au-
tant de ſatisfaction que vous le pouviez
deſirer : mais pource que c'eſtoient des
marques de vos reſſentimens , & que Corbulon &
ſes troupes auoient part avec moy en la conſerua-
tion de voſtre honneur , ils ont ſeruy de recompenſe
à toute l'armée. Conſiderez iuſqu'où eſtoit allée vo-
ſtre liberalité, d'auoir voulu enuoyer à vn ſeul hom-
me ce qui a eſté ſuffiſant pour en reconnoiſtre cinquante
mille. Pour l'honneur de voſtre amitié qu'il vous plaiſt
m'offrir, c'eſt ce que ie reſerue à moy ſeul ſans le vou-
loir partager avec perſonne. Vous ne trouuerez pas
mauuais que ne m'attachant qu'à cette noble recom-
penſe, ie reſiette tout le reſte, qui pour riche qu'il ſoit,
ne peut entrer en comparaiſon avec vne ſi precieuſe
choſe, que ie cheriray toute ma vie, comme la plus gran-
de gloire que la guerre me puiſſe iamais faire acquerir.
Pour moy l'eſcriuis celle-cy à Zelinde.*

PALAMEDE, A LA PLUS OR-
gueilleuse des Barbares.



ELLE PRINCESSE,

De quelque mespris que vostre lettre soit pleine, c'est pourtant une lettre que vous avez fait tenir à celui qui vous a offert son cœur, & qui est une marque que vous l'aimez mal-gré vostre fausse ambition. I'ay seulement reconnu que vostre orgueil a escrit celle que vostre amour vous forçoit de m'enuoyer. Continuez bien cette feinte, elle n'est pas mauvaise: mais prenez garde que celui qui combattoit si rudement vos ridicules opinions, mesmes en recherchant vostre affection, ne vous traite bien plus rigoureusement quand il s'aperceura que l'amour vous aura rangé à sa mercy. Toutefois consolez vous, & esperez que i'auray pitié d'une Barbare, qui n'a commencé à auoir du iugement, que depuis qu'elle a eu l'honneur de ma connoissance.

Nous renuoyasmes celuy qui nous auoit esté enuoyé avec ces lettres & quelques présens que nous luy fismes; & Melinte luy dit de la part de Corbulon, qu'il assurast Araxie que nous serions bien-tost à Tigranocerte. L'armée

partit incontinent, & nous arriuasmes en peu de temps à cette grande ville, malgré les courtes des Parthes qui voulurent trauerfer nostre chemin. Nous y entraſmes par vne porte qu'Araxie nous fit ouurir, & incontinent nous alasmes en son Palais Melinte & moy: les Princeſſes vindrent au deuant de nous iuſques à la porte, & ie ne vous puis representer les larmes de joye qu'Araxie reſpandit quand elle reuit Melinte. Pour Zeline, elle ſe mit à rire auſſi toſt qu'elle me vit, & me dit. Voicy ce preſomptueux, qui ne ſe contente pas d'aspirer à plus qu'il ne merite, ſans adiouſter à ſa folie l'imagination d'eſtre aimé de celles qui le meſpriſent. Ie me puis abuſer, luy reſpondis-ie, ſi ce n'eſt pas vn teſmoignage d'affection, que de receuoir des lettres de celle que l'on aime. Si vous prenez, me dit-elle, des lettres de meſpris pour des faueurs, vous pouuez pretendre d'eſtre touſiours ainſi fauoriſé de moy. Ie commence à m'apperecevoir, luy dis-ie, que vous auez bien poly & ſubtiliſé voſtre eſprit depuis que ie vous hante: Car eſt-il vne plus grande fineſſe, que de ſçauoir cacher ſous des meſpris des teſmoignages de bonne volonté: pour me meſpriſer, au lieu de meſcrire, il falloit pluſtoſt ne me point eſcrire: car quelque diſcours que contienne voſtre lettre, c'eſt vne marque aſſeurée que vous penſiez bien en moy, quand vous priſtes reſolution de mettre pour moy la main à la plume; & ſi vne Dame m'eſcriuoit de propos deliberé la premiere, & me mandoit, Ie ne vous aime point, & ie vous deſſends de vous trouuer à la promenade où ie me rendray ce ſoir; que pourrois ie penſer autre choſe ſinon qu'elle penſe tout le contraire de ce qu'elle me mande, c'eſt à dire qu'elle m'aime, & qu'elle deſire que ie me rende au lieu qu'elle m'enſeigne. Cét

exemple, me dit-elle, ne me conuient pas, car l'estois obligée de vous escrire, pour vous tesmoigner que si ie manquois d'affection pour vous, ie ne manquois pas au moins de civilité. Auec de pareils discours nous nous entretenismes long temps: puis à cause que le Chateau ne se vouloit point rendre, bien que l'armée fust dans la ville, nous les laissâmes pour aller à l'assaut. Araxie employa tout ce qu'elle pût de raisons pour destourner Melinte de s'y trouuer; l'assurant que c'estoit se hazarder pour vne chose qui ne tarderoit pas vn iour à estre entre nos mains: mais elle ne pût iamais persuader ce grand courage; & le voyant resolu de la quitter, elle luy donna vne riche escharpe brillante de laines d'or & d'argent, afin qu'elle le peust au moins remarquer des fenestres de son Palais, d'où elle voyoit les murailles du Chasteau.

Nous nous separâmes ainfi d'auec elles, & nous armant de casques & de rondaches, nous allâmes planter les eschelles, & montâmes dessus à l'enuy les vns des autres. Je ne scaurois vous redire les actions particulieres de Melinte, pourceque nous estions sur différentes eschelles: mais ie sceus depuis qu'après auoir monstré de grandes preuues de sa valeur, & telles que nul ennemy n'osoit plus se presenter deuant luy sur la muraille, lors qu'il pensoit monter dessus, l'eschelle se rompit par la pesanteur de ceux qui le suiuients, & il tomba tout froissé de la hauteur de plus de trente coudées. Ah! Dieux, s'escria Epicharis à ces paroles; le doute mesme comment il peut estre encore viuant. Puis Palamede poursuiuit. Incontinent les ennemis recommencerent à paroistre sur la muraille, & jetterent vne infinité de traits
& de

& de pierres sur ceux qui auoient esté renuersez, desquels fut tué vn des Escuyers de Melinte, qui vouloit releuer son maistre lequel n'auoit aucun sentiment. Ce fut alors vne chose merueilleuse, que de voir arriuer en ce lieu dangereux la Princesse Araxie qui l'auoit veu tomber, & qui sans aucune crainte de la gresse continuelle de flesches & de cailloux, vint couvrir de son corps celuy de Melinte, & à l'aide de quelques-vns des siens qui l'auoient suiue, ayant sa robbe percée de trois flesches, l'emporta iusques dans son Palais.

• Apres que nous fumes entrez de force dans la Place; ie sceus l'accident qui estoit arriué à Melinte; & ie courus aussi tost pour le voir. Je le trouuay entre les bras de la Princesse, qui fendoit en larmes de voir qu'il ne donnoit encore aucun signe de vie, & qui à force de remedes essayoit de le faire reuenir. Helas ! disoit-elle, mal-heureuse que ie suis, d'auoir attiré en cette ville la plus grande vertu qui fut iamais pour la faire perir à ma veüe: c'est donc là la recompense que ie t'ay donnée, ô le plus genereux du monde, pour les sensibles & incomparables faueurs que tu m'as faites! faut-il que pour m'auoir sauuée de mille outrages & d'une captiuité honteuse, ie sois cause que tu perdes la vie? Dieux, s'escrioit-elle, rendez à la terre ce tresor qu'elle possedoit; rendez-moy ce qui m'a rendu toutes choses; ou ne permettez pas que ie le suruiue. Araxie se plaignoit ainsi, perçant le cœur à tous les assistans par ses pleurs & ses sanglots. Pour ma douleur, chere Epicharis, vous pouuez vous l'imaginer, sçachant assez combien m'est cher cét incomparable amy. Les deux autres Princeses estoient aussi autant affligées & le secouroient avec autant de soin

qu'elles eussent fait vn frere bien aimé ; & chacun dans ce Palais estoit outré d'affliction , & eust semblé aussi mort que luy , s'il n'eust esté resveillé par le desir de le reuoir viuant. le ne m'estonne pas , continua Palamede regardant Epicharis , de vous voir respendre de si grosses larmes ; moy mesme ie ne puis retenir les miennes , songeant aux viues douleurs que ie sentoie alors. En fin le poux luy reuint. Ah ! dit Epicharis avec vn grand soupir , vous me rendez la vie en la luy redonnant. Et vn peu apres , adiousta Palamede, il ouurit les yeux , ce qui fit renaistre nos esperances : mais il fut plus de deux iours sans pouuoir parler. le ne vous diray point tous les accidens de cette longue maladie, qui nous firent cent fois desesperer de sa guerison , & qui ne sembloient arriuer , que pour faire admirer la vertu constante de Melinte , & son égale moderation & dans les maux & dans la bonne fortune : mais ie vous feray seulement sçauoir que la sensible Araxie l'assista avec des soins si assidus , que iamais elle ne partit d'aupres de son lit ; & en deux mois ne dormit pas dix heures.

Melinte mesme la coniueroit souuent de s'aller reposer , & luy tesmoignoie son desplaisir de voir qu'elle se feroit mourir : ses sœurs & moy nous y mettions encore nos prieres pour la vaincre : mais rien ne la pouuoit diuertir de ses veilles & de ses soins obstinez. Quoy ? disoit-elle , que i'abandonne la conseruation de la vie de celuy qui a eu tant de soin de la conseruation de mon honneur & de ma liberté ! iamais ie ne seray si lasche ny si mesconnoissante ; & i'aime mieux mourir en l'assistan , que de viure avec ingratitude. Mais à mesure que Melinte se guerissoit , la santé d'Araxie diminuoit ;

& lors qu'il eut assez de force pour se leuer, la Princesse vaincuë de lassitude & de debilité se mit au lit, où sentant la laigueur qui luy alloit faire perdre toute connoissance, & voyant Melinte qui l'assistoit avec autant de soin que luy pouuoit permettre sa santé en core foible & renaissante; d'une voix douce & mourante elle luy parla ainsi en luy prenant la main. Melinte, croyez que ie meurs avec des contentemens que ie ne puis vous exprimer. Celuy d'auoir eu le bon-heur de connoistre le plus vertueux des hommes m'est extrêmement cher : celuy d'auoir esté si heureuse que le Ciel m'ait fauorisée d'un tel secours dans les plus grands dangers de ma vie, m'est infiniment sensible : l'adiousteray encore celuy de vous voir remis en estat de vous bien porter, qui m'est bien doux : mais rien ne peut égaler celuy que ie ressens d'auoir conceu pour vous une amitié aussi vertueuse, si i'ose dire, que vous mesme ; puis qu'elle est égale au sujet où elle s'est attachée ; & si vous m'assurez que ie meurs iouissant de celle qu'il vous a pleu me promettre, ce sera le comble de tous mes contentemens.

Il n'y auoit personne autour du lit qui ne versast des larmes, entendant ces paroles, & Melinte essuya ses yeux pour luy respondre. Madame, si vous desiriez iouir de cette amitié que ie vous ay promise & que vous auez si bien acquise par vostre vertu, pourquoy auez-vous tant prodigué vostre vie, & pourquoy n'essayez-vous pas encore de viure avec nous? Croyez, Madame, que si vostre contentement dépend de mon amitié, vous pourrez viure la plus heureuse du monde. Il vouloit continuer, mais elle luy dit en l'interrompant : Melinte, ie n'attendois plus pour mourir, que d'auoir oüy l'agreable son de ces che-

res paroles. Adieu, la vertu mesme, dit-elle en luy serrant la main, puis elle ferma les yeux & expira doucement. Helas ! dit Epicharis, il semble que i'expire moy-mesme doucement avec cette sage Princeesse. Ainsi mourut Araxie, continua Palamede, pour auoir esté trop sensible aux obligations, & pour auoir conceu vne amour pour Melinte, qui n'estant point soulagée par vne ardeur reciproque, & n'osant sortir au dehors, retenüe par sa modestie, tourna sa violence contr'elle-mesme, & fit perir peu à peu celle qui l'auoit conceüe. Nous ressentîmes tous vne grande affliction pour cette mort ; & toutes ces maladies ayant esteint les gaytez de Zelinde & les miennes, esteignirent aussi l'amour que i'auois pour elle : toutefois durant cette tristesse elle m'aima comme vn frere : nous communiquions ensemble avec vne grande confidence ; & ce fut dans ces entretiens qu'elle ne feignit point de me dire ce qu'elle auoit reconnu de la naissance & du progres de l'affection de sa sœur pour Melinte.

Durant ce temps l'accord entre les Romains & Tiridate fut fait par l'entremise de Vologese, à condition que Tiridate iroit à Rome receuoir la Couronne de l'Armenie de la main de Neron ; si bien que les funeraillles d'Araxie ayant esté faites avec toute la pompe qui se peut imaginer, & Melinte sentant sa santé assez bien confirmée, nous prîmes congé des deux sœurs.

Epicharis qui sentoît ses yeux encore humides des larmes qu'elle auoit respanduës entendant le recit de la mort de cette Princeesse, & voyant que Palamede auoit finy son discours, appella Melinte qui alloit deuant eux en resuant, & luy dit venez vn peu pleurer avec nous la

mort d'Araxie , & plus encore que nous mesmes , puis-
 que vous en fustes la cause. Palamede, luy demanda Me-
 linte en s'approchant , vous a-t'il entretenu de cette pi-
 toyable histoire? le ne croy pas que l'on me puisse accu-
 ser de cette mort, ma maladie seule ayant produit sa com-
 passion, qui fit qu'elle m'assista avec trop de soin. Il n'est
 pas raisonnable, dit Epicharis, d'accuser vn homme d'vne
 chose dont il n'est coupable que par trop de merite. Non,
 Melinte, tant s'en faut que ie vous accuse, ce que ie viens
 d'oïr ne fait que me faire admirer de plus en plus vostre
 grande sagesse, qui produit de si merueilleux effects; &
 ie m'estime infiniment redevable à Palamede, qui m'a fait
 sçavoir des auantures si agreables, bien qu'elles soient
 meslées de tristesse, & qu'elles m'ayent fait respendre des
 larmes : mais ce sont des larmes bien douces que celles
 que l'on verse au recit des accidens pitoyables. Mainte-
 nant, Melinte, vous pouuez me continuer vostre dis-
 cours & me parler de ce que vous fistes apres auoir laissé
 Tigranocerte, & si vous ne repassastes point par Athenes
 pour voir cette belle Eriphile, qui vous auoit aimez tous
 deux si vertueusement.

Ayant quitté l'armée, reprit Melinte, nous nous em-
 barquasmes & vinsmes passer près de la Grece. le voulois
 me destourner pour aller à Athenes, & reuoir encore Eri-
 phile, mais Palamede qui l'auoit entierement oubliée, ne
 me le voulut iamais permettre, & ne songea plus qu'aux
 receptions qu'on nous feroit à Syracuse pour la victoire
 des jeux Olympiques, lesquelles furent plus honorables
 pour nous que nous n'eussions pû l'imaginer. l'ay sceu,
 dit Epicharis, cette reception de celle mesme qui vous fit
 les presens: mais bien qu'elle fust magnifique, ie puis dire

qu'elle ne surpassa point le merite des personnes que l'on receuoit. Voila donc, continua Melinte, ce que vous auez desiré sçauoir de nous, qui est bien peu de chose pour les obligations que nous vous auons: mais il nous suffit que vous soyez satisfaite, quelque monnoye que nous vous donnions. Vous payez trop bien, dit Epicharis, & ie dois estre bien contente, puis qu'en vous seruant i'ay desia beaucoup de plaisir, & de plus vous m'en auez donné vne agreable recompense: car iamais ie n'entendis rien avec tant de ioye, comme vostre belle & heureuse instruction, la sagesse d'Eriphile, la tromperie que l'on fit à Palamede, & la naissance de vostre amitié, avec tous vos honneurs, & vos gloires: mais ne trouuez pas mauuais si ie vous dy, que le discours que Palamede m'a fait de vous, m'a esté encore plus agreable que le vostre mesme; & que s'il n'est bien sage, au moins sçait-il bien remarquer les auantages de la sagesse, & luy donner les loüanges qu'elle merite. Je vous iure que tant de beaux euenemens remplissent encore mon ame de satisfaction, & si ie passois souuent de pareilles heures i'estimerois ma vie bien-heureuse.

Ils s'entretindrent long temps sur toutes ces rencontres, & cheminerent en parlant ainsi iusques à ce que le Soleil fust bien haut: alors ils se retirerent en vn lieu escarté. Palamede s'en alla seul au village le plus proche pour auoir quel que prouision, & laissa Melinte & Epicharis, qui discoururent quelque temps des gentilles qualitez de Palamede, auquel ils reconnoissoient beaucoup de choses qui parloient d'un esprit aimable, & d'une grande noblesse de courage: pour son humeur gaye & un peu portée aux plaisirs, ils confessoient que cela se

meuriroit bien tost , & ne l'en estimoient pas moins; puis Melinte donna conseil à Epicharis de se reposer vn peu pour cheminer apres, ne croyant pas qu'il y eust plus de danger d'aller de iour. Palamede arriuant, Melinte luy fit signe de ne la pas esveiller , mais de dormir aussi, pour aller ensemble apres plus gayement.

Fin du sixiesme Livre de l'Ariane.







LE
SEPTIESME
LIVRE DE
L'ARIANE.



Vss i tost que le sommeil eut
abandonné Melinte, Palamede,
& Epicharis, ils firent vn repas
leger, & se mirent en chemin :
puis au soir arriuerent à Cumes,
où ils ne furent pas d'auis d'en-
trer, pource qu'ils fuyoient les
villes le plus qu'ils pouuoient.
Ils chercherent autour quelque
lieu pour se retirer, & se cache-
rent en fin dans l'antre de la Sibylle Cumée avec leurs che-
vaux. Epicharis auoit quelque frayeur d'y entrer, ayant
ouï dire beaucoup de choses qui estoient arriuées en ce
lieu, & que la Sibylle auoit conduit par là Enée aux en-
fers : Toutefois apres que Melinte l'eut assurée, luy di-

Pp



ſant que ces choſes eſtoient fabuleuſes ; elle fut la plus hardie, & ſe mit le plus auant : mais elle ſe repentit de ce courage, pource que ſ'auançant dans la profondeur de cét antre, & eſtant eſloignée de Melinte & de Palamede, elle entendit quelques plaintes qui ſortoient des plus creux cachots de ce lieu: elle entreſſaillit de peur, & courut deuers Melinte, qu'elle prit par les bras, ſe croyant bien fortifiée : Elle luy dit le ſujet de ſa frayeur, ils s'approcherent pour oüyr ce que c'eſtoit, & entendirent quelque voix qui leur fit iuger que c'eſtoient peut-eſtre des voleurs qui ſe ſeroient là retirez : mais preſtant l'oreille plus attentiuement, ils oüyrent ces paroles. Ah ! fortune que tu es traiſteſſe, & qu'il eſt plus auantageux d'eſtre mal-heureux au commencement, que non pas heureux, puis que tu eſſi changeante ! Que les faueurs que tu m'as faites eſtoient cruelles, puis qu'elles ne ſeruent qu'à me donner plus de regret : & que tu eſtois malicieuſe de me mettre en eſtat digne d'enuie, pour me reduire apres ſi miſerablement à faire pitié. Mais quelle pitié? de qui la puis-ie attendre? des hommes? ils m'ont abandonné: des Cieux? il n'en ont point: de la terre? à peine me donne-t'elle cette retraite; & de la mer? elle ma refusé le ſecours que i'eſperois d'elle, quand i'ay cherché la mort dedans ſon ſein. Helas amour! que veux-tu que ie faſſe? me laiſſes-tu viure pour auoir vn perpetuel ſouuenir du bien que i'ay poſſedé, & du mal-heur qui l'a ſuiuy, tous deux également faſcheux à ma memoire?

Je croy, dit Epicharis à Melinte, que cét homme eſt inſenſé de parler ainſi ſeul. Vous ne ſçauéz pas, répondit-il, à quoy peut reduire vn deſeſpoir; & ſi vous ſçauiez ce que c'eſt quel'amour, vous excuſeriez bien ces extra-

uagances: alors ils entendirent qu'il reprenoit : Mais puis qu'il faut que ie souffre, courage, remettons le fer dans nos playes. Cruels ressouuenirs, ie vous irrite, afin que vous me reblessiez de vos plus sensibles pointes. Doux entretiens, chere confidence, agreables plaisirs, autrefois les joyes, maintenant les bourreaux de mon ame; & vous, sermens d'amour qui deuez estre inuiolables, venez à moy, traistres, & s'il me reste quelque lieu à meurtrir, n'y espargnez pas vos plus rudes coups: rongez-moy de rage, de despit & de honte; & rendez en moy la souffrance eternelle, commel'amour qui la cause.

Epicharis admiroit le transport de ce mal-heureux, & la violence de son mal, qui le forçoit à se desesperer ainsi; & peu de temps apres il continua encote. Il semble que i'espere soulager mes douleurs par ces inutiles paroles: mais qu'elles sont impuissantes pour vn tel excez de maux; & à quoy ces plaintes, puis que toutes choses me sont sourdes? & que quand elles voudroient y apporter du remede, cela est desormais impossible? Ah! Dieux, que faites vous dans le Ciel? & comment abandonnez vous les hommes à tant de miseres? à quoy seruent nos encens & nos sacrifices, puis que les plus innocens sont les plus misérables? car ie ne veux plus croire que vous ayez soin de nous: quelle assistance visible nous faites vous recevoir? que sont deuenus les secours de vos Oracles pour les mal-heureux? Sommes nous plus meschans que nos peres, à qui vous donniez quelquesfois par vos aduis, ou du remede, ou au moins du soulagement. Et toy, sainte Sibylle dont i'occupe la demeure, s'il est vray que tu ne sois plus qu'une voix, que ne la fais-tu parler en ma faueur, & que ne me fauorises-tu de quelqu'une de tes propheties, pour m'en-

seigner quelle consolation ou quelle fin ie dois esperer.

Epicharis dit à Melinte, qu'elle auoit pitié de ce pauvre Amant, & qu'elle estoit resoluë de contrefaire la voix de la Sibylle pour le faire resoudre d'aller retrouver ses parens, parmy lesquels il pourroit recouurer plus aisément son bon sens. Melinte approuua son inuention; mais elle luy dit qu'il falloit parler en vers, & qu'elle n'en sçauoit pas faire. Melinte luy respondit; haltez vous de prononcer tout haut ceux que ie vous diray en l'oreille, & dites chaque vers apres moy, ce qu'elle fit ainsi d'une voix deliée.

*Amant d'inuincible constance ;
Tu verras finir ton tourment,
Si tu retournes promptement
Aux lieux où tu pris ta naissance.*

Ce pauvre homme ayant ouï cette voix, & ne doutant point que ce ne fust celle de la Sibylle, tomba sur ses genoux, & s'escria : Sacrée Sibylle, ie te rends graces de la pitié que tu as eüe de mes maux : ie suiuray tes aduis, car ta sainte voix fut tousiours veritable ; & si par ton secours ma vie se trouue plus heureuse, tu seras désormais la seule Diuinité que j'adoreray. Souffre seulement que pour cette nuit ie demeure encore en ta grotte. I'y veux bien receuoir le sommeil que i'en auois tousiours chassé, & demain ie me mettray en chemin pour aller chercher l'effect de ton Oracle.

Melinte & Epicharis furent bien aises que leur artifice eust si bien reüssi : mais Palamede leur dit ; si vous desirez qu'il croye entierement cét Oracle, il ne faut pas qu'il nous entende, ny qu'il nous trouue demain icy. Epi-

charis dit qu'elle estoit d'avis de sortir, ne se pouuant aussi bien resoudre de dormir dans cet antre; & qu'elle aimeroit mieux passer la nuit à l'ombre de quelques arbres, où elle eust moins de crainte. Ils suivirent cette resolution, & apres estre sortis se mirent sous des peupliers, où ils lierent aussi leurs chevaux. Le lendemain Palamede alla au port de Cajette, pour voir si quelque vaisseau ne parloit point qui les peust descendre en Sicile; Melinte & Eurylas veirent passer auprès d'eux vn homme fort passe, & qui auoit la veuë esgarée; toutefois qui paroissoit de bonne mine, & qui sembloit auoir quelque satisfaction en l'esprit, encore que l'estat où il estoit ne fust pas croire qu'il en eust beaucoup de sujet. Il venoit du costé de la grotte à eux, & ils iugerent que c'estoit celui-là mesme qu'ils auoient entendu, & à qui Epicharis auoit donné l'Oracle, qui pouuoit estre l'occasion de son contentement. Eurylas eust bien voulu qu'il se fust arresté à eux pour sçauoir sa fortune: mais il s'en esloigna quand il les apperceut, fuyant la rencontre des hommes: & bien qu'Eurylas l'appellast pour luy parler, il continua tousiours son chemin d'un pas assez foible. Que voulez-vous apprendre, luy dit Melinte? le monde est plein de ces trauerses d'amour: il est si pressé de partir à cause de vostre Oracle, qu'il n'y a pas d'apparence qu'il retarde pour nous: & s'il est parfaitement amoureux, iamais il ne vous dira sa fortune; car ie iuge de luy par moy-mesme, qui en vne pareille occasion ne conteroïs pas mes affaires à tout le monde.

Epicharis regardant Melinte, luy demanda, Si vous aimez, ne voudriez vous point auoir de confident? Je n'ay, dit-il, encore connu personne en qui j'osasse m'af-

seur d'un secret si important. Et ne croyez vous pas, respondit-elle, que Palamede vous aime assez pour ne vous pas tromper ? l'aurois tort, dit-il, d'en douter ; mais il pourroit bien estre trompé luy-mesme, & descouvrir sans y penser ce que j'aurois bien de la peine moy-mesme à tenir caché. Et de moy, reprit-elle, penseriez vous que jamais on en peust apprendre quelque chose, si vous m'auiez confié un secret qu'il fallust couvrir avec discretion ? Je vous confesse, repartit Melinte, que vous estes la seule personne en qui j'oserois m'asseurer pour une chose qui me seroit si chere. Ne soyez donc pas marry, dit-elle en luy prenant la main, que ie sçache tout le secret de vostre vie ; mais vivez aussi bien assuré, que ie souffrirois plustost la mort que l'on m'eust arraché une parole de ce que vous ne voulez pas que l'on sçache. Et sur-ce qu'il demeura fort estonné elle adiouta : Melinte, ie ne vous aurois pas parlé si librement, si ie n'auois dessein d'employer ma vie pour vous servir : mais ie vous prie de croire qu'il n'y a point d'homme que j'honore tant que vous, & que ie n'auray jamais l'esprit content, que le vostre ne le soit aussi, puisque vos interests sont si meslez avec ceux de ma Maistresse. Melinte voyant qu'elle en sçauoit tant, luy dit ; Est-il possible, Epicharis, qu'elle vous en ait dit quelque chose ? de moy ie ne croy pas que vous en ayez rien appris, non pas mesme par mes yeux. Ne vous informez point, dit-elle, comment ie le sçay : qu'il vous suffise que ie n'ignore point ny ce que vous estes, ny combien vertueusement vous l'aimez ; & ie n'ay point plus de ioye, que quand j'espere que ie ne vous seray pas inutile. Doncques, respondit Melinte, mon ame & ma vie sont entre vos mains : mais ie n'en

ay point de regret , vous assurant qu'après elle n'y a personne que i'estime comme vous, ny de qui ie desire plus estre estimé. Melinte, repartit-elle, croyez que i'ay des affections pour vous qui ne sont point communes ; & si ie ne vous rends de grands seruices , ce ne sera point faute d'y auoir employé toute que i'ay de pouuoir. Je sçay bien, dit-il, dequoy vous estes capable , & ie feray seulement bien-heureux que vous en ayez la volonté. L'arriué de Palamede rompit ce discours , qui vint leur dire, qu'il n'y auoit point de vaisseau au port , & que l'on n'y en attendoit point, toutefois ils se resolurent de demeurer en ce lieu assez desert , iusques à ce qu'il en arriuaist quelqu'un. Sur le midy Epicharis se promenant , rencontra vne petite maison appuyée au dos de la montagne, en laquelle entrant , elle trouua vn vieil homme avec sa femme de pareil aage, qui gaignoient leur vie à faire quelques vstensiles de bois, qu'ils portoient vendre à Cumes. Après s'estre enquis de leur façon de viure , elle apperceut qu'ils auoient deux ou trois lits , & leur demanda s'ils auoient des enfans. Incontinent les larmes vindrent aux yeux de ces bonnes gens , & Epicharis voulant sçauoir la cause de leur desplaisir, apprit qu'il ne leur estoit resté qu'une fille dont le mary estoit mort depuis vn an, qui luy auoit laissé deux enfans ; & qu'il y auoit enuiron vn mois que les ayant dans le bois auprès d'elle , vne louue les auoit emportez pour les deuorer , apres auoir estranglé la mere. Epicharis plaignit avec eux cet accident , & pour arrester leurs pleurs, leur donna quelque argent : puis elle leur demanda s'ils vouloient luy prester ce qui leur restoit de lits pour deux ou trois iours. Ils luy offrirent toute leur maison , & Epicharis bien contente d'auoir trouué de-



quoyloger, attendant qu'ils peussent partir, alla aduertir Melinte & Palamede de son aduanture, & les mena dans cette pauvre maison, dans laquelle ils s'accorderent le mieux qu'ils peurent. Ils vécurent de ce qu'ils apportoyent de iour en iour de la ville de Cumes, & tantost Melinte, tantost Palamede alloient à cheual iusques au port, pour voir s'il n'y auoit point quelque vaisseau. Ils passerent ainsi huit ou dix iours avec beaucoup d'incommodité & d'ennuy : car ce retardement leur estoit bien fascheux, & différoit de grandes ioyes pour eux, & pour ceux qu'ils desiroient aller oster de peine en Sicile.

Vn iour que Palamede estoit au port de Caiette, il apperceut vn homme à cheual, qui le regardoit tout estonné : il reconnut que c'estoit Arcas, & approcha son cheual du sien pour l'embrasser. Le pauvre Arcas estoit si esperdu, qu'il n'osoit encore s'asseurer que ce fust Palamede, & luy dit : Helas ! est-ce bien vous que ie cherche mort, & que ie trouue viuant ? C'en'est point, respondit Palamede, vne ombre que tu vois, mais le bon amy de ton maistre. Et qu'est-il deuenu, reprit Arcas ? Il n'est pas bien loin d'icy, repartit Palamede, & j'ay impatience qu'il ne te voye. Arcas ne pouuant sortir de son estonnement, Palamede le pria de venir trouuer Melinte. Que les Dieux, dit Arcas, fauorisent tous vos desseins pour les bonnes nouuelles que vous m'apprenez : Helas ! mon maistre vit donc encore, & les Dieux ont eu soin de vostre innocence ? il me tarde que ie ne le voye, & que ie n'embrasse ses genoux, apres tant de craintes & d'ennuis qui m'ont trauaillé pour l'auoir creu mort. Ils se mirent en chemin, pour aller où estoit Melinte : cependant Pa-
tamede

lamede sçeut que son pere & sa sœur estoient heureusement arriuez à Syracuse, & n'auoient eu autre mal que l'extrême desplaisir de le laisser en si grand danger. Mais Arcas reserua le recit du voyage qu'il auoit fait depuis leur abord à Syracuse, où il les auoit laissez aussi tost, pour retourner secourir son Maistre, s'il pouuoit estre si heureux que d'y venir à temps. Ils alloient avec vne telle diligence, qu'ils arriuerent bien-tost à la petite maison, à la porte de laquelle estoient Melinte & Eurylas, qui voyant venir vn homme de loin avec Palamede, ne sçauoient que iuger : mais lors qu'ils reconnurent Arcas, ils allerent de ioye au deuant de luy. Il se ietta aux pieds de son maistre, & luy embrassoit les jambes sans s'en pouuoir retirer. Helas! disoit-il, mon cher maistre, ie vous voy donc encore. Melinte se baiissoit aussi pour l'embrasser, & d'excès de contentement luy tenoit la teste avec les mains: en fin il luy demanda comment on se portoit à Syracuse. Fort bien, respondit Arcas, & quand ils vous reueront viuans, ils se porteront encore mieux : Mais, adioust-il, avec vn grand soupir, comment est-il possible que vous soyez eschappez de la tour? Par l'assistance de ce ieune homme, dit Palamede en montrant Eurylas, à qui nous deuons nostre vie. Helas! dit-il en le regardant, qu'il s'est bien acquis les Dieux & les hommes pour amis, en vne si heureuse action. Eurylas rioit de ce qu'Arcas ne le connoissoit point encore. Melinte & Palamede admiroient aussi son aueuglement ; En fin Melinte luy demanda, s'il n'auoit iamais rien veu qui ressemblast à Eurylas, Non, dit-il, si ce n'est Epicharis; en mesme temps il la reconnut, & l'alla saluer : alors ils eurent impatience de sçauoir qu'elle auoit esté sa fortune. Aussi tost, dit-il, que ie fus arriué au

port de Syracuse, ie vis vn vaisseau qui partoit pour venir en Italie: Je priay Aristide & Ariane de me permettre que ie retournasse pour vous secourir; ce qu'ils trouuerent bon, & à l'heure mesme ie me rembarquay, & en trois iours arriuy sans fortune au port d'Ostie: de là trouuant ce cheual, i'allay iusques à Rome suiuant la riuere, & entrant dedás, ie vy beaucoup de peuple qui couroit pour voir quelque nouveauté. l'estois alors curieux de nouvelles, & cherchois à apprendre ce que vous estiez deuenus, & esperant que quelqu'un parmy la confusion m'en diroit quelque chose, ie suivis ceux qui alloient ainsi avec beaucoup de haste, mais i'en appris de bien plus malheureuses que ie ne les eusse desirées: car estant sur le bord du Tibre, avec les autres qui estoient accourus, on me dit que deux Siciliens qui deuoient estre condamnez ce mesme iour par le Senat, s'estoient precipitez dans le fleuve du haut de la tour, où ils estoient prisonniers. Iugez quel ie pûs deuenir alors; mais quand j'appris vos noms, & que ie sceus mon mal-heur veritable, ie ne vous diray point ny mes plaintes ny mes desespoirs: en fin ie me ressolus d'assister quelques-vns qui cherchoient les corps au fond de l'eau pour vous donner au moins sepulture: mais routes nos peines se trouuant inutiles, & croyant que l'eau vous auroit emportez, j'entrepris de suiure le cours du fleuve, au long duquel j'ay erré quelques iours, pour voir si l'eau ne vous auroit point iettez à quelque bord.

Ie me rendis à Ostie sans apprendre aucunes nouvelles de ce que ie desirois, de sorte que desesperant de pouoir trouuer vos corps, ie delibray de retourner en Sicile, costoyant tousiours le bord de la mer, pour voir si dauanture vous n'aurez point esté iettez en

quelque riuage. Suiuant ce triste dessein, l'arriuay à Cajette, ou j'ay trouué Palamede, dont l'heureuse rencontre a changé ma tristesse en vn excés de contentement, Mais, continua-t'il, ne puis-je point sçauoir comment ce beau garçon a esté si heureux que de vous sauuer? Alors Palamede luy conta ses gentilles inuentions pour entrer dans la prison, & les fortunes estranges de leur sortie, qu'Arcas escoutoit avec beaucoup d'admiration. En fin il fut arresté que l'on n'attendroit point en ce lieu : mais que l'on gagneroit le long de la mer le port de Regge, où l'on ne manqueroit point de trouuer des vaisseaux, & apres auoir pris congé de leurs hostes qu'ils laisserent apres les auoir bien recompensez, ils monterent sur leurs cheuaux, & ne craignirent plus de loger en quelques maisons, depuis qu'Arcas les eut asseurez qu'on ne les suiuoit point, & qu'on les croyoit morts.

Les lieux par où ils passoient estoient assez fascheux; pource que costoyant la mer, ils rencontroient quantité de montagnes & de vallées, & la plus part des chemins estoient d'un circuit ennuyeux. Cela estoit cause qu'ils auançoient peu, pour le grand desir qu'ils auoient de sortir d'Italie, principalement Melinte, qui impatient de reuoir Ariane, maudissoit incessamment cette longueur de voyage; & vn iour entretenant ses resveries, sur ce sujet, il fit ces vers.

*Chemins d'effroyables espaces,
 Païs infiny, qui surpasses
 L'ennuy des Lybiques sablons:
 Cruelles mers qui me venez enclore,
 Fascheux destours, que vous me semblez longs;
 Allant reuoir ce que j'adore.*

*Monts qui me presentez vos cymes,
Vallons qui m'ouurez vos abyssmes,
Pour m'arrester en ces deserts;
Je ne veux pas, d'un desir inutile,
Monter aux Cieux, ny descendre aux enfers,
Je veux aller en la Sicile.*

*'Amour, porte moy sur tes aïles,
Et soulage vn des plus fideles
Que tu sceusses iamais brusler.
Je suis leger, n'estant plus rien que flame;
Mais las ! ic croy qu'il ne sçait plus voler,
Depuis qu'il se loge en mon ame.*

*Pensez qui dressiez vostre course
Vers celle où mes biens ont leur source,
Et reuenez en vn moment;
Faites d'un coup finir tant de supplices,
Et m'emportez d'un pareil mouuement,
Au doux sejour de mes delices.*

*Mais ces ingrats, qui dans l'absence
Font si bien valoir leur puissance,
Aiment mieux me voir en ces lieux;
N'ignorant pas qu'en cette autre demeure
Il faudra bien qu'ils cedent à mes yeux
Le bien de la voir à toute heure.*

*Soleil qui plein d'un heur extrême,
Vois maintenant celle que j'aime,*

*Fais que par son divin pouuoir,
Je voye en toy par vn effet bien rare,
Cette beauté comme dans vn miroir,
Malgré tout ce qui nous separe.*

*Mais tout est sourd à ma priere:
Acheuons donc nostre carriere,
Suiuons le fil de nos travaux:
O Dieux ! ô Ciel ! belas ! est-il possible,
Que m'ayant fait sensible à tant de maux,
Tout soit à mes maux insensible ?*

Tous les entretiens de cette troupe estoient si agreables qu'ils les diuertissoient assez ; & sans la passion extrême de Melinte , qui ne luy pouuoit permettre aucun contentement , estant absent d'Ariane , la gentille humeur de Palamede & d'Eurylas eust esté capable de chasser sa tristesse : & bien qu'il la courüst le mieux qu'il luy estoit possible , il ne laissoit pas de se plaire à entretenir souuent ses pensées , & se separoit exprés de la troupe durant le chemin ; tantost les deuant , tantost les laissant aller quelques pas deuant , n'ayant rien de plus cher que le souuenir des faueurs d'Ariane qu'il auoit receuës d'elle en luy enuoyant Epicharis ; & il prenoit bon augure que sa Maistresse l'eust entretenuë de sa passion ; & de ce qu'il estoit ; y ayant apparence que ce discours ne s'estoit pas fait à son desauantage. Ils'estimoit encore fort heureux d'auoir cette fille affectionnée pour le seruir , puis qu'elle luy estoit si necessaire , & se promettoit à son retour vn grand changement en sa fortune , voyant

tant de choses contribuer à son contentement. Quand mesme ce voyage eust esté plus long, ces doux entretiens l'eussent diuertý assez agreablement, ayant tant de sujets d'esperance; & lors qu'il trouuoit son ame en vn estat heureux, il vouloit bien l'y laisser, & venoit avec vn visage gay se mesler dans les discours des autres, auxquels il donnoit tousiours telle regle qu'il luy plaisoit, par la force des raisons que son esprit luy fournissoit. En fin ils arriuerent à Regge, où ils ne furent pas long temps sans trouuer vn vaisseau, dans lequel ils se mirent, & en peu d'heures perdirent la veüe de cette terre, où ils auoient couru tant de fortunes, contre laquelle ils firent mille imprecations.

Estant arriuez à Messine, ils baïserent leur terre natale, & la prierent de leur estre plus fauorable. Le lendemain ils partirent de bonne heure, & en trois iournées arriuerent assez près de Syracuse; mais la nuit les surprit, & le iour d'apres passant près de la maison que Dicearque auoit aux champs, Palamede demanda s'ils vouloient s'y arrester, pour reuoir les lieux où il auoit passé de si douces heures avec Epicharis. Melinte n'en fut pas d'avis, & dit qu'il ne falloit point perdre de temps pour se rendre à Syracuse. Ils continuerent leur chemin, & approcherent d'une butte assez releuée, accompagnée d'un bois; & de là ils commencerent à descouurir vne plaine où ils alloient descendre, & Syracuse mesme.

Melinte qui alloit enuiron trente pas deuant, apperceut trois hommes à pied, armez & masquez, qui faisoient marcher avec grande rudesse vn vieillard qui auoit les yeux bandez, & le contraignoient d'entrer dans ce bois. Il poussa son cheual pour voir ce qu'ils vouloient

faire de cét homme , & se rendit auprès d'eux lors qu'ils alloient tuer ; aussi tost il mit l'espée à la main , & heurtant de son cheual celuy qui alloit donner le coup , il le renuersa par terre : les deux autres l'attaquerent par derriere ; mais se retournant deuers eux il fendit la teste de l'un d'eux d'un coup de reuers , & l'estendit mort à terre. L'autre vint à luy avec assez de courage : mais Melinte n'en fit pas de conte , n'ayant que luy à combattre , & luy donna quatre ou cinq grands coups d'espée : cependant celuy qui auoit esté renuersé s'estoit releué , & eust fait de la peine à Melinte , sans Palamede qui ayant veu son amy partir au galop , s'estoient douté de quelque rencontre & l'auoit luyuy. Il arriva lors que ce dernier venoit à Melinte , & il n'eut pas beaucoup de peine à s'en deffaire : car l'ayant porté par terre pour la seconde fois , il le foula aux pieds de son cheual , & le perça de trois ou quatre coups d'espée , en mesme temps que son amy acheuoit de tuer l'autre. Melinte descendit aussi tost de cheual , & leur osta leurs masques , pour voir s'il ne les connoistroit point : & il fut bien estonné quand il vid que c'estoient Garamante & Toxaris leurs anciens ennemis , de qui sans y penser ils auoient puny les trahisons ; puis il alla deuers ce vieillard qui paroissoit fort venerable , & qui estoit si esperdu , n'attendant que la mort , qu'il ne songeoit pas à se desbander les yeux estant demeuré seul. Melinte & Palamede luy deffirent le linge qui luy couuroit le visage , & furent dans un extrême estonnement lors qu'ils virent que c'estoit Dicearque , qui esbloüy de la lumiere qu'il voyoit tout à coup , & ayant encore l'image de la mort deuant les yeux , leur dit : Helas ! voulez vous que ie me voye mourir ? toutefois sa veüe se rassurant ,

il reconnut Melinte & Palamede qu'il croyoit morts ; ce qui le rendit encore plus plein de trouble : ne sçachant plus si luy mesme auoit desia esté tué , & s'il se trouuoit avec eux dans les champs Elizées , ou si leurs ames l'estoient venu secourir. Ce qui luy causoit cesdoutes , estoit qu'eux mesmes estoient estonnez de leur costé , & ne luy parloient point : mais en fin Palamede luy dit. Hé Dieux ! mon oncle, en quelles mains estiez vous tombé ? Dites moy plustost, respondit-il , en quelles mains ie suis à present : car ie ne sçay si ie suis parmy les morts, ou les viuans. Nous ne sommes point morts, dit Melinte, les Dieux ont conserué nostre vie pour sauuer la vostre aujourdhuy ; Et i'admire mon bon-heur de m'estre rencontré si à propos lors que l'on vous alloit plonger vn poignard dans le sein. C'est donc vous , reprit Dicearque , qui auez empesché ce mal-heur ? que les Dieux vous puissent rendre ce bien-fait : mais ie ne sçay si vous pourrez aussi bien secourir Ariane ma niece, qui est dans ce vallon entre les mains de plus de vingt soldats avec Erycine vostre sœur. Allons, s'escria Melinte, empescher que l'on ne leur fasse violence, & il vouloit partir en mesme temps, sans Dicearque quiluy dit; Attendez yn peu que nous auisions à ce qui est à faire : ie suis assuré qu'ils ne leur feront aucun mal, pource qu'ils attendent le retour de ceux-cy que vous auez tuez ; & i'auray bien le loisir de vous dire le sujet de ce qui est arriué , afin que nous prenions conseil ensemble : alors ils se teurent, & il poursuuiuit. Sçachez que celuy-cy , monstrant Garamante , voyant qu'Ariane ma niece auoit assez de biens , estant demeurée seule heritiere d'Aristide & de moy , à cause de la mort de Palamede que l'on tenoit toute assurée , fut si insolent que

que de me la faire demander en mariage par cét autre qui se nomme Toxaris , & qui faisoit en mesme temps l'amoureux d'Ericine vostre sœur, dit-il, à Melinte. Je m'en excusay le plus honnestement que ie pûs : mais eux attribuant ce refus à mespris , me firent dernièrement menacer qu'ils s'en vängeroient : & ils en ont eu tel despit, qu'aujourd'huy , pour vous abreger , ayant sceu que ie deuois aller en ma maison des champs avec ma niece & Ericine qui l'accompagnoit , ils nous ont attendus dans ce vallon , où ayant arresté nostre chariot, ils m'en ont fait descendre avec vne extrême insolence, & ont resolu de me venir esgorger dans ce bois; pource, disoient-ils, que ie chercherois tousiours à me vänger d'eux, & que pour viure à leur aise il me falloit oster du monde. En ce dessein ils ont donné charge aux autres soldats qui les accompagnoient de les attendre, & de bien garder Ariane & Ericine , iusques à ce qu'ils fussent de retour d'icy. Voyons donc à present ce que nous auons à faire : car bien que vostre valeur soit grande , il vous sera difficile d'aller attaquer tant d'hommes. Il n'importe, ce dit Palamede, j'espere que nous les estonnerons, veu mesme qu'ils n'ont plus de Chefs. Je médite, reprit Melinte, quelque autre chose qui ne sera point mal à propos: reueilons nous des cottes d'armes de ces morts , & prenons leurs masques & leurs fausses perruques ; puis nous irons les trouuer , sans qu'ils se puissent douter que ce soient d'autres que Toxaris & Garamante qu'ils attendent ; & nous meslant parmi eux , nous en auons tué beaucoup deuant qu'ils se soient apperceus de ce que nous sommes.

Palamede trouua cette inuention fort bonne; Diccarque l'approuua aussi ; & Arcas estant alors arriué, Melinte

luy dit, qu'il se vestist d'une de ces cottes d'armes, comme Palamede & luy, pour aller executer ce qu'ils auoient resolu, cependant que Dicearque & Eurylas garderoient leurs chevaux.

Ils s'habillerent ainsi tous trois en diligence, & prirent les masques & les fausses perruques, & n'oublierent pas mesmes les brodequins: puis Dicearque les recommandant à la bonne fortune, les laissa aller, & s'alla mettre en un lieu avec Eurylas, d'où ils pouuoient voir ce qui leur arriueroit sans estre veus. Melinte estant au milieu de la descente du vallon, s'arresta, & dit à Palamede: Jamais ie n'eusse pensé à chercher un autre moyen que celuy de la force, contre ceux que nous allons trouuer, si abandonnant nostre vie, nous ne mettions aussi au hazard celle de nos sœurs, & leur honneur encore, qui est ce qu'elles ont de plus cher: mais ie suis d'avis qu'en leur consideration nous laissons tout à fait reposer nostre valeur, & que, nous les sauions par un moyen plus doux, & qui est infailible. Ceux que nous allons trouuer, ne pouuant se douter que nous soyons autres que leurs Chefs, nous leur commanderons ce qu'il nous plaira, & ie suis d'avis qu'approchant du chariot nous ayons nos espees nuës, qui sont sanglantes, comme si nous venions de tuer Dicearque: & les remettant au fourreau nous ferons signe aux soldats qu'ils nous attendent encore là: alors nous prendrons; vous, dit-il à Palamede, Erycine, puisque vous auez les habillemens de Toxaris qui la vouloit rair; & moy Ariane, puisque j'ay ceux de Garamante. Nous tesmoignerons que nous voulons les emporter dans ce mesme bois, pour ne point differer nos contentemens, & nous laisserons les soldats en ce mesme

endroit, puis nous viendrons avec elles retrouver Dicearque & Eurylas ; & aurons bien moyen de nous sauuer sur nos cheuaux dans la maison de Dicearque, auant qu'ils se doutent d'aucun artifice. Cette ruse, dit Palamede, est tres-bonne, & si ma sœur & Erycine font quelque resistance, nous n'aurons qu'à leur dire à l'oreille qui nous sommes. Au contraire, dit Melinte, il faut se laisser tourmenter par elles, pour rendre la feinte meilleure. Cela estant approuué, ils descendirent & s'approcherent avec assurance de ces soldats, qui à leur abord se separerent, & les laisserent passer au chariot. Melinte se saisit d'Ariane, & Palamede d'Erycine, & ils dirent tout haut d'une voix contrefaite, comme celle qui sort de dessous vn masque; Nous ne voulons pas differer davantage à nous satisfaire, puisque nous en auons le moyen: ce bois prochain est bien cominode pour vne telle occasion. Ariane se mit aux cris, & Melinte la prit de force, apres auoir fait signe aux soldats de l'attendre au mesme lieu: mais elle se debattant taschoit à luy deschirer le visage, & l'outrageoit autant que ses forces le pouuoient permettre: puis voyant qu'il luy tenoit les mains en sorte qu'elle ne pouuoit plus se deffendre ny l'offenser: Ah! cruel, dit-elle, ne te contentes-tu pas d'auoir tué mon oncle, sans vouloir m'oster encore par force ce que ie ne puis perdre sans la vie? tuë moy, barbare, aussi bien ne suruiuray-ie guere à mon honneur; & tu ne iouyras pas long temps des fruits de ton insolence. Erycine d'un autre costé estoit emportée par Palamede: mais son humeur douce ne luy permettoit que les pleurs & les cris; & Arcas les suiuit en les aydant, & defendant aux soldats qui vouloient faire cette office, de partir de là. Au milieu de

la montagne, Melinte s'arresta pour prendre haleine, & Ariane reprit de nouvelles forces pour le travailler, & l'empescher de paruenir iusquès au haut; mais Melinte rendant tous ses efforts inutiles, elle ne pût s'empescher de crier: Ah! pauure Melinte, où es-tu maintenant? Si tu estois en vie, tu n'aurois pas manqué d'elre icy à mon secours, ou tu ne furuiurois guere à mon defastre: mais ie t'iray bien tost trouuer, sinon avec vn corps pur, au moins avec vne ame bien nette; & toy, boue infame, assure toy que les Dieux me vangeront, & ne laisseront pas ta faueur impunie. Que toutes ces paroles estoient douces à Melinte: iamais iniures ny outrages ne furent receus si agreablement. Cependant il se rendit au haut de la montagne, où Dicearque accourut; & Melinte l'ayant mise sur ses pieds, osta son masque, & se fit voir à elle.

L'estonnement d'Ariane seroit difficile à représenter; tantost regardant Dicearque, tantost Melinte, deux personnes qu'elle croyoit mortes; & ne sçachant si elle se deuoit estimer sauuee, ou entre les mains de quelques démons qui eussent pris ces figures pour l'abuser, elle chanceloit entre la ioye & la peur. Dicearque luy dit: Ne doutez point ma niece de ce que vous voyez: Voila Melinte & Palamede que nous croyons morts, qui m'ont aujourd'huy sauué la vie, & à vous l'honneur. Ariane à ces nouuelles, fut saisie d'un tel excès de ioye & d'estonnement, qu'elle perdit le peu de force qui luy restoit apres tous ses efforts: elle se laissa aller entre les bras de Melinte, & tomba doucement sur l'herbe: puis d'une voix douce elle luy dit. Ah! Melinte, est-ce bien vous que ie voy, ou vostre démon qui prend soin de moy apres vostre mort

mesme? Madame, respondit Melinte, assurez vous que ie suis encore en vie pour vous seruir; mais il ne faut pas tarder icy dauantage, si vous desirez vous garentir des mains de ces volleurs. Ariane regardant Palamede qui tenoit Erycine, l'appella, & luy dit: Mon cher frere, si vous desirez que ie ne doute point du bon-heur que l'on me veut persuader, venez au moins que ie vous embrasse. Alors Palamede s'approcha d'elle; & Dicearque voyant que leurs caresses duroient trop long temps, aduertit Melinte de se mettre à cheual, & de prendre Erycine. Pour luy il monta sur celuy d'Arcas; Palamede fit resoudre Ariane de s'esloigner de ce lieu, & de se mettre sur son cheual avec luy, & Arcas se mit en croupe derriere Eurylas.

Ils se resolurent d'aller au pas sans se precipiter, sinon au cas qu'ils fussent poursuivis, & de gagner la maison de Dicearque, où ils se mettroient le plustost en seureté. Palamede demanda à sa sœur si elle connoissoit ce beau garçon qui estoit avec Arcas. Je sçay bien, dit-elle, que c'est ma chere Epicharis: mais ie n'ose deuant mon oncle luy tesmoigner la ioye que j'ay de la reuoir: ie ne doute point qu'elle ne vous ait assiste avec beaucoup de soin. Helas! ma sœur, respondit Palamede, sans elle nous serions morts à present par vn honteux supplice. Comment cela, reprit-elle? vous pourriez bien me dire en chemin de quelle façon vous vous estes garantis: car chacun croit que vous vous soyez precipitez de la tour. Ils le croient aussi à Rome, luy dit-il, & ie veux bien vous faire le recit de nostre heureuse, ou plustost miraculeuse sortie; mais auparauant dites moy pourquoy ie vous voy veltué de deuil? Helas! mon frere, repartit-elle, les larmes luy

venant aux yeux, faut-il, pour le secours que j'ay receu de vous aujourdhuy, que ie vous donne de si tristes nouvelles? Ma sœur, reprit-il, que j'apprehende pour mon pere sur le recit de ma mort. Vos apprehensions, luy dit-elle, se doiuent tourner en assurances: car il ne pût résister aux desplaisirs qu'il ressentit des nouvelles de vostre mal-heur, estant principalement touché du regret de vous auoir laissé; & se disant auteur de vostre mort, puis qu'il vous auoit abandonné. Alors quelque temps fut donné aux pleurs, apres lesquels ils se firent le recit de tout ce qui leur estoit arriué, pendant qu'ils auoient esté esloignez l'un de l'autre. Melinte entretenoit aussi Erycine qui estoit rauie de voir ce frere qu'elle honoroit tant; & il apprenoit d'elle ce qui s'estoit passé à Syracuse, apres luy auoir dit en peu de mots comment il s'estoit sauué. Arcas contoit aussi à Dicearque vne partie de leurs auantures, allant à costé de luy, & ils arriuerent ainsi en la maison, où se voyant en seureté, leurs esprits ressentirent entierement les ioyes, n'estant plus trauersés de craintes. Melinte fût d'auis que les Dames se reposassent, cependant qu'ils songeroient à aller charger ces soldats qui estoient demeurez, pour retirer le bagage qui estoit entre leurs mains. Dicearque ne vouloit point qu'ils se missent en ce danger, puisque ces hommes n'en valoient pas la peine; les Chefs estant tuez, & que leur butin estoit peu de chose. Toutefois Melinte ne changea point de resolution, & cabant son dessein à Dicearque; il assemblea avec Palamede quelques païsans, auxquels il fit prendre les armes, & se faisant leur Chef se mit en chemin pour aller trouuer ces soldats, dont quelques vns impatiens de ce que leurs hommes tardoient tant dans ce bois, estoient allez voir

ce qu'ils y faisoient , & les ayant trouuez morts , ils reuenoient en aduertir leurs compagnons , lors qu'ils furent assaillis par Melinte & Palamede : quelques vns furent tuez , & ils en amenerent cinq ou six prisonniers dans le chariot mesme , & reuindrent trouuer Dicearque qui les receut comme triomphans , leurs captifs estant traînez à leur suite. Ariane & Erycine se leuerent de leur lit , pour voir ce qui entroit ; & voyant par les fenestres Melinte & Palamede à la teste de cét equipage , elles admirerent leur courage , de n'auoir pas voulu que rien qui fust à eux , restast entre les mains de ces soldats : & ces prisonniers furent gardez seurement pour estre menez à Syracuse , lors qu'ils y retourneroient.

Dicearque reconnoissant l'obligation qu'il auoit à Melinte , le prit à part , & luy demanda s'il ne pouuoit rien desirer de luy , en recompense de la vie dont il luy estoit redeuable. Il n'ay rien fait , respondit Melinte , à quoy ie n'aye esté obligé : toutefois ie neveux pas mespriser ce qu'il vous plaist de m'offrir ; & ie ne vous demande autre grace , sinon que vous ne me vouliez iamais de mal , quelque animosité que vous ayez eüe contre mon pere. Il vous confesse , repartit Dicearque vn peu honteux , que nous auons eu autrefois quelques differens Telephe & moy , à cause que nous estions de party contraire : mais à present les choses sont changées ; & tant s'en faut que ie voulusse songer à vous vouloir du mal , ie vous promets d'employer ce que vous m'avez conserué pour vous seruir en tout ce que ie pourray. Il vous supplie , reprit Melinte , de m'en faire serment entre les mains de Palamede. Il le veux bien , repliqua Dicearque , & l'ayant appelé , Melinte luy dit. Dicearque me veut faire la faueur de me pro-

mettre qu'il n'aura iamais de mauuaise volonte pour moy, quelque mal qu'il ait voulu à mon pere. Je m'estonne, reprit Dicearque, que vous en vouliez douter, apres l'obligation extrême que ie vous ay; mais puisque vous le desirez, i'en fais serment entre les mains de mon neveu, & prie les Dieux de me punir si i'y manque iamais. Palamede, adiousta, Melinte doit bien s'asseurer de ce que vous luy promettez; car il vous est impossible de ne vouloir du bien sans l'aimer aussi, puisque ie ne veux iamais auoir de bien sans luy; & il a trop de merite pour luy refuser de la bonne volonté. Apres ces communes assurances d'amitié, Dicearque les mena dans la chambre de sa piece; où entrant le premier à l'impourueu, il fut bien surpris de trouuer vn ieune homme sur son lit qui l'embrassoit, & qui le voyant descendit aussi tost, & s'en alla deuers le lit où estoit Erycine. Dicearque dit à Ariane: Hé quoy, ma niece, ce que i'ay veu est-il bien possible? Ariane soufrioit, toutefois honteuse, & ce ieune garçon aussi. Dicearque s'estonnant de quoy ils rioient ainsi, reprit. Qu'est-cecy, ma niece; qu'est deuenu cet honneur & cette vertu? Quoy, mon oncle, dit-elle, pour l'oster d'erreur, vous ne connoissez plus Epicharis; (car c'estoit elle encore desguisée, qui embrassoit sa chere Maistresse, laquelle ne se pouoit saouler de luy rendre les caresses pour les agreables seruices qu'elle luy auoit rendus;) alors Dicearque la regardant, fut honteux luy-mesme de les auoir accusées, & dit qu'un autre y eust esté trompé comme luy. Apres s'estre resioüy de la reuoir, & d'apprendre leurs fortunes, il s'enquit d'Ariane comment elle se portoit de la lassitude & de l'effroy qu'elle auoit eu; elle l'assura que le retour de son frere l'auoit

l'auoit guerie de tous ses maux. Je veux bien, dit-il, vous laisser avec ce bon frere, & Melinte avec Erycine (qui estoit dans vn lit d'vn autre costé) car vous n'auiez pas peu de choses à vous dire, & il sortit en mesme temps. Palamede dit à sa sœur, nous auons eu assez de loisir de nous parler en chemin, & pour moy ie trouue les entretiens des sœurs vn peu froids : il vaut mieux nous separer ; & il s'en alla aussi tost se ietter sur le lit d'Erycine, laissant Melinte avec sa sœur. Ariane pour se vanger luy dit. Mon frere, j'admire vostre humeur, d'estre si tost tonsolé de ce que vous auez appris : ce souuenir l'abbait tout à coup, & arresta les libertez qu'il commençoit à prendre avec Erycine & Epicharis, qui auoient de la peine à s'en deffendre. Melinte prenant cette occasion, dit à Ariane ; Madame, j'ay appris avec vne extrême douleur cette perte, qui vous aura esté bien sensible. Il ne falloit pas, dit-elle, que ie fusse exempt de mal-heurs, cependant que vous & mon frere estiez si cruellement poursuivis de la fortune : mais ie vous iure que i'estois assez tourmentée des craintes que j'ay eues pour vous deux, sans que cét accident m'arriuaist encore. Je ne croy pas que mes yeux ayent seché depuis que ie vous laissay ; vous voyez vn visage qui monstre assez la part qu'il a prise aux ennuy de mon ame : & mesme songez vn peu à quoy i'en estois reduite, lors que j'ay esté deliurée par vos mains, & quelles pensées ie pouuois auoir entre celles de ces volleurs : Apres auoir perdu vn frere comme ie croyois, dont la mort auoit esté suiuite de celle de mon pere, ie voyois qu'on estoit allé esgorger mon oncle, le seul support qui m'estoit resté, & moy delaissée de tout, & condamnée à souffrir la rage de ces bourreaux, sans

vostre secours, à qui ie suis redevable de tout ce que j'ay de plus chet au monde. Madame , respondit Melinte; nous vous devons premierement l'honneur & la vie , puisque vous nous avez sauué l'un & l'autre par le moyen d'Epicharis, que vous nous avez enuoyée ; & si depuis nous vous auons assistée , vous deuez vous remercier seule de vostre salut : mais ie ne sçay pas comment vous me pardonnerez iamais les frayeurs que ie vous ay données , en vous allant raiir parmy ces soldats. Mais plustost ; reprit-elle , comment me pardonnerez vous les coups que ie vous ay donnez ? c'estoit ainsi que ie payois tant de peine que vous preniez pour me sauuer. Ah! Madame, repartit-il, que ces coups m'estoient agreables ! mais oseray- ie vous faire souuenir d'une per-
 sonne que vous avez appellée à vostre secours ? Ariane
 mougit, & luy dit vn peu apres : ie m'en souuiens assez , & vous permits de prendre les paroles que j'ay dites, autant à vostre auantage qu'il vous plaira. Melinte luy prenant la main d'excès de ioye, poursuuiuit. Sur cette assurance , Madame , pourray- ie desormais, sans offence, vous dire mes pensées ? Il dit ces mots d'une voix tremblante, & avec vn visage si palle , qu'Ariane connut bien l'extreme respect qu'il luy portoit , & la crainte qu'il auoit de luy dire quelque chose qui luy despleust : mais pour le rassurer elle luy respondit. Melinte, j'ay assez esprouué vostre amitié par vostre discretion ; ie ne veux pas que vous employez vne seule parole à m'en assurer davantage. Il fut si rauy , que se baissant , & mettant la bouche sur la belle main qu'il tenoit, il fut quelque temps ainsi sans rien dire tant il estoit transporté de contentement. Ariane estoit bien aise de le voir si saisi , mais en

fin il se releua ; & luy dit : Que penserez-vous de moy, Madame, de me voir muet apres vne telle faueur ? aussi est-elle si grande, qu'il n'y a point de paroles qui puissent vous exprimer ny l'excès de ma ioye , ny combien ie vous suis redevable. Ariane luy respondit ; Melinte si nous mesurons les obligations , celles que ie vous ay sont sans doute beaucoup plus grandes : mais vous devez estre satisfait de moy ; puisque pour m'acquitter ie vous donne mon ame , qui est tout ce que ie puis. Vostre ame , Madame , repartit Melinte ; oſé-je bien croire ces auantageuses paroles ? mais pourquoy ne les croirois-je pas, puisqu'elles partent de vostre bouche qui ne peut estre que veritable : cette belle ame veut donc bien se donner à moy , pour animer vn corps si indigne d'elle ? & vous voulez bien recevoir la mienne en sa place ? Melinte , dit Ariane, ie ne l'entens pas ainsi ; cét eschange vous seroit trop desauantageux : mais au moins ie vous donne vne partie de mon ame , qui est ma volonté , de laquelle ie veux que vous disposiez desormais, en eschange de la vostre que ie ſçay bien que ie possède.

Melinte estoit si rauy de ces cheres assurances, que les esmotions de son cœur troubloient son ame, & estouffoient ses pensées ; & la connoissance de ce desordre assseuroit bien mieux Ariane de sa passion & de sa ioye , que n'eussent fait mille paroles. En fin il reprit : Il m'est impossible, Madame, de vous tesmoigner combien ces faueurs sont cheres à mon ame ; plus ie les ressens, moins ie vous le puis dire : mais il vous suffit de connoistre la grandeur de mon affection , pour estre assurée combien elles me comblent de ioye , & vous sçaurez avec combien de soumission ie les reçoÿ , par le respect inuiolable qui m'ac-

compagnera toujours auprès de vous; lors que j'auray fait voir ce que ie suis, ie me souviendray sans cesse de l'estat où j'estois, quand vous m'avez esté si fauorable. Melinte, interrompit Ariane, cette reconnoissance est à quoy deormais vous devez penser; & ie suis d'avis que vous vous declariez à mon frere. Vous ne devez point différer davantage, si vous le iugez à propos: puis nous aduifrons ensemble aux moyens qu'il faudra tenir; pource que depuis la mort de mon pere, il est arriué de Corinthe Pisistrate fils de Callistene, qui estoit oncle d'Acidalie, par le seul moyen duquel mon oncle l'auoit espousée apres vne recherche de plusieurs années. Ce Pisistrate attiré plustost par la reputation de quelques biens, que d'aucune beauté qu'il die estre en moy, a apporté des lettres de son pere à Dicearque, par lesquelles il le prie de faire pour son fils enuers moy, ce qu'il auoit fait autrefois pour luy enuers sa niece Acidalie. Pisistrate appuyé de cette faueur ne croit pas auoir fait vn voyage inutile: mais qu'avec les devoirs qu'il rend à mon oncle, & l'affection qu'il me tesmoigne, il m'espousera bien tost, & m'emmenera à Corinthe dans le mesme vaisseau qui l'a conduit icy, & qui l'attend encore à ce dessein. D'autre costé Diocles recherche mon oncle plus que iamais, & il les entretient tous deux d'esperance, ne sçachant à quoy se resoudre: car encore qu'il ait de grandes obligations à Callistene, il craint de m'esloigner de luy en me donnant à Pisistrate: aussi le voyant possesseur de grands biens, & d'une maison bien plus illustre qu'Amyntas, il a de la peine à le refuser. Sur ces incertitudes, il sera bon que vous declariez premierement vostre naissance, puis apres vostre recherche. Madame, repartit Melinte, vous me faites vne fa-

ueur tres-grande de m'instruire de toutes ces choses, & ie suis bien aise que vostre conseil s'accorde au dessein que i'auois : mais i'eusse desiré qu'il n'eust point preuenu la permission que ie vous voulois demander de faire cette declaration. Elle sera bien receüe, comme ie l'espere; car les Syracusains ont sujet de m'aimer, & Dicearque s'est obligé par serment de ne me vouloir iamais de mal à cause de mon pere. La vie, dit Ariane, que vous luy auez sauüé, l'y doit bien plus obliger encore; & ie n'ay qu'un regret que tout ce que nous resoudrons desormais à vostre aduantage, sera plustost estimé deuoir & reconnoissance, que non pas affection. Je croiray tousiours, repliqua Melinte, que ce sera pure grace : car à peine tous mes seruices ont osé iamais me faire esperer vne seule des paroles dont vous me fauorisez.

Ces agreables entretiens cesserent par l'arriüée de Dicearque, qui vint prendre Melinte pour luy faire voir avec son neveu les beautez de sa maison, auant que la nuit arriuaist : aussi estoit-elle rare pour ses merueilles : mais encore plus recommandable pour son ancienneté : car on tenoit que c'estoit la mesme dont les Syracusains firent present à Thimoleon, pour l'arrester parmy eux avec sa femme & ses enfans qu'il auoit fait venir de Corinthe, & laquelle il receut pour iouir luy-mesme le reste de ses iours de la paix & de la liberté qu'il auoit acquises à toute la Sicile : mesmes pour marques de cette antiquité Dicearque auoit laissé en vn lieu reculé quelques ruines qu'il fit voir à Melinte, où estoient encore des colonnes entieres de ce bel ordre de Corinthe : mais depuis quelques années il auoit rendu luy-mesme cette maison la plus belle qui fust en la Sicile ; car outre la richesse des bastimens,

la beauté des iardins & des promenoirs estoit si agreable, à cause de la quantité des fontaines & des canaux; que Melinte ne cessoit d'admirer ce beau lieu, & ne manquoit pas à remarquer ce qui estoit de plus estimable pour plaire à Dicearque : toutefois il ne pût s'empescher d'admirer plus que toutes choses les raretez d'un grand parc, où reserué seulement que l'Art auoit dressé les allées, la Nature se faisoit voir en sa pure richesse. Les sources qui sortoient en plusieurs endroits, les petits ruisseaux qui en naissoient, & les belles prairies qui en estoient arroulées, flatterent tellement l'humeur de Melinte, que Dicearque connut bien qu'en ce lieu il auoit quitté la complaisance, pour estimer ce qu'il aimoit le mieux. Palamedel'ayant aduertie de laisser là Melinte, pource qu'il n'aimoit rien tant qu'à se perdre dans de si belles solitudes, peu à peu ils s'éloignerent de luy comme s'ils eussent eu à s'entretenir, & Melinte feignant de fauoriser leur entretien par discretion, se separoit d'eux avec beaucoup de ioye, pour s'entretenir avec ses pensées en l'estat heureux où il estoit.

Aussi-tost qu'il les eut perdus de veüe, il choisit un lieu propre pour se reposer, & se coucha sur l'herbe près d'une source qui luy plaisoit; & là son ame luy representa sa fortune au point le plus élevé & le plus doux qu'un Amant la puisse souhaiter. Son cœur n'auoit pas assez de place pour contenir toutes les ioyes qui s'y assembloient. Les agreables paroles d'Ariane venoient encore frapper ses oreilles avec tant de douceur, qu'il n'y a point d'harmonie qui puisse causer tant de rauissement. Ce charme rendoit sa passion si contente, portoit ses esperances si haut, & mettoit son ame dans un ciel de plaisirs si di-

uins qu'il faillit à mourir dans cét agreable extase. En fin se retirant de cét abyfine de ioyes , pour considerer ses biens chacun en particulier , il n'en oubliâ vn seul, pour mieux voir en combien de sortes il estoit heureux ; & apres s'estre long temps entretenu de si cheres imaginations , il employa le temps qui luy restoit à faire ces vers :

*Cheres delices de mon ame,
 Espoirs amis de mes desirs,
 Qui flattez de si doux plaisirs
 L'ardeur de mon heureuse flamme :
 Agreables auant-coureurs
 Du bien pour qui dans mes fureurs
 Je plaignoïs ma perseuerance ;
 Ne cessez de m'entretenir,
 Ou changez-vous en assurance,
 Si bien-tost vous voulez finir.*

*Hélas ! à peine puis-je croire :
 La felicité de mon sort :
 Dieux ! que ie sens yn doux transport !
 Quel heur se compare à ma gloire !
 Ses yeux , autrefois sans pitié,
 Changent en regards d'amitié :
 Leurs influences rigoureuses ;
 Et se desarment librement
 De leurs pointes plus dangereuses
 Pour me blesser plus doucement.*

*Ce front dont la maiesté sainte :
 Donnoit à mes yeux de l'effroy,*

Deuient plus doux, & met en moy
 L'assurance au lieu de la crainte.
 Son ame, pour mieux s'admirer,
 Qui pareissoit se retirer
 Dans vn rampart inaccessible,
 Se laisse gagner dans ses Forts,
 Et ne se rend plus invincible
 A mes respectueux efforts.

De nos volontez bien vnies
 Le doux & le parfait accord,
 Mesprise du temps & du sort
 Les orgueilleuses tyrannies.
 Son cœur plein d'une chaste amour,
 Choissant en moy son séjour,
 A mon souhait me fauorise;
 Et rend le mien trop satisfait,
 Pourueu que le Ciel authorise
 Le present qu'elle m'en a fait.

Belles sources, vertes prairies,
 Ruisseaux dont le bruit est si doux!
 Dieux! qu'un Amant avecques vous
 Entretient bien ses rêveries:
 Mais adieu, ie vous vay quitter:
 Le iour se va precipiter.
 Heures, qui durez des iournées,
 Hastez vous donc, filles du Temps;
 Iours qui me semblez des années,
 Amenez moy l'heur que j'attens.

Melinte ayant acheue ces vets , quitta ce lieu pour retourner à ceux qu'il auoit laissez, lesquels il trouua dans vn grand parterre , qui l'attendoient pour le mener souper. Ariane & Erycine se leuerent pour leur tenir compagnie, s'estant accommodees de simples habits , qui dans la negligence ne laissoient pas de leur estre fort aduantageux. Plus Melinte auoit sujet de s'approcher d'Ariane , pour iouir de l'vnion parfaite où ils estoient, moins il l'osoit; permettant à peine à ses yeux de la regarder souuent; toutefois il scauoit bien gouuerner sa discretion , pour ne tesmoigner pas sa contrainte ; & ne pas trop affecter la dissimulation. Toutes leurs auantures leur fournirent assez d'entretien durant le souper ; & apres qu'ils furent sortis de table , Dicearque qui commençoit d'admirer l'esprit de Melinte , & qui ne pouuoit assez à son gré l'entendre parler , le separa des autres pour l'entretenir; & voulant essayer s'il estoit capable de manier aussi bien les affaires publiques, comme de traiter d'autres discours où il paroissoit habile , il tourna insensiblement tous ses propos sur ce sujet : mais Melinte sembloit ne s'estre messé d'autre chose toute sa vie , & non seulement satisfit Dicearque sur ce qu'il luy demandoit, mais encore sur chaque proposition adiousta de si belles considerations qu'il n'auoit iamais eues , qu'il fut contraint d'auouer , qu'un si puissant Genie metiroit plus qu'un gouuernement public , & sembloit estre né pour soutenir vne Couronne & vn Sceptre. En fin ils se separerent tous pour s'aller coucher, & les Dames s'estant retirées , Melinte fut conduit en vne chambre superbement meublée. Il demanda à Dicearque si c'estoit celle où couchoit ordinairement Palamede, pource qu'ils auoient fait serment de ne cou-

cher iamais séparément, quand ils setrouueroient en mesme lieu. Apres quelques ciuilitéz, Dicearque les laissa en leur liberté: puis estant demeurez ensemble, & s'estant mis au lit, lors qu'ils furent seuls, Melinte demeura quelque temps sans parler, & vn peu après vint embrasser Palamede, & luy dit: Il est temps, cher amy, que vous sçachiez le secret de ma vie, que vous auez ignoré iusques icy. Est-il possible, dit Palamede, que vous m'ayez caché quelque chose? Vous confesserez, reprit Melinte, que i'ay deu vous le taire, & n'en ferez point marry, quand vous sçaurez que l'excès de l'affection que vous me portez m'y a obligé. Mon cher Melinte, respondit Palamede, hastez vous donc de me le dire, & assurez vous que quand ie vous pourray seruir, ie ne songeray pas à vous faire des reproches. Alors Melinte luy declara tout ce qui estoit de sa naissance; ce que Palamede escoutoit avec tant de contentement, qu'il n'eust pas si bien resenty vn pareil bon-heur qui luy fust arriué. Il ne cessoit d'admirer vne fortune si peu ordinaire, & ne doutoit point que Diocles ne se trouuast conuaincu par les moyens qu'ils en auoient: qu'en fin s'il estoit besoin de violence, il ne seroit pas homme pour leur resister. C'est, reprit Melinte; ce qui m'a empesché iusques icy de me descouurir à vous, car l'amitié que vous me portez, vous eust fait desirer de faire cette reconnoissance, auant peut-estre qu'il en eust esté besoin; & maintenant vous confesserez qu'il est bien plus à propos. Melinte passa tout ce discours avec assez d'assurance: mais quand il eut dessein de luy descouurir l'affection qu'il auoit pour sa sœur, à peine osa-t'il prononcer le beau nom d'Ariane. Palamede cognoissant apres quelques mots, d'où luy venoit cette difficulté de parler, le

voulut soulager, & luy dit : Mon cher Melinte, il n'est pas besoin que vous me disiez ce que ie scay aussi bien que vous; & vous auez sceu de moy-mesme, combien ie souhaite ce bon-heur autant pour mon contentement que pour le vostre: Si ie me pouuois lier à vous par vne alliance encore plus estroite, ie la rechercherois, tant j'ay peur que nous ne soyons pas assez vnis: permettez donc que dès cette heure le nom de frere nous soit commun: nous sommes desia freres de volonte, & i'espere que nous le serons bien tost en effet. Je ne doute point que ma sœur ne reconnoisse vostre merite, & le reconnoissant, qu'elle ne vous aime, outre les obligations qu'elle vous a; Et pour mon oncle il m'a fait tantost vn discours, lors que nous vous auons quitté dans le parc, qui m'a tesmoigné que son dessein se pourra rencontrer avec les nostres. Obligez-moy, dit Melinte, de me faire sçauoir ce qu'il pense de moy. Vous ne scauriez croire, repartit Palamede, combien l'assistance qu'il a receuë de vous auourd'huy, luy donne de ressentiment; & il ne souhaite autre chose que de vous rendre vn iour, s'il se peut, vn plaisir aussi grand. L'occasion, interrompit Melinte, s'offre à luy, pource qu'il pourra de mesme m'obliger de la vie. Il n'en est pas éloigné, respondit Palamede, pource que n'ayant point de plus grand dessein que de se conseruer l'autorité qu'il a dans Syracuse, il m'a dit, que bien que Telephe ne luy eust pas esté amy, il ne voyoit personne plus propre que vous pour appuyer le credit que nous y pourrions auoir; pource que desia l'amour du peuple estoit grande enuers vous, & que nous auions vn beau moyen de nous lier ensemble pour iamais par vne personne qu'il semble que vous mesme ayez ac-

quise, l'allant ravir entre les mains de ces soldats: & qu'il croyoit aussi qu'elle n'y resisteroit pas; pource qu'il luy estoit eschappé certaines paroles lors qu'elle vous a reconnu, qui luy faisoient iuger qu'elle ne vous haïssoit point, & que vous auiez aussi de l'amour pour elle. Qu'il estoit bien aise de ne s'estre point engagé dauantage avec Diocles, ny avec Pisistrate de Corynthe, qui est venu icy, attiré par la reputation de ma sœur; & de ce qu'il se trouuoit encore libre pour delibérer sur nostre bonheur & sur le vostre, qu'il rechercheroit autant qu'il luy seroit possible, pour satisfaire à ce qu'il vous doit.

Peu s'en falloit que tout ce discours ne fust aussi agreable à Melinte, que l'entretien mesme d'Ariane: en fin il sceut qu'il ne restoit en l'esprit de Dicearque qu'une difficulté, sur ce que ses biens n'estoient pas si grands que ceux d'Ariane: mais Palamede adiousta que les nouvelles qu'il luy venoit d'apprendre, feroient que rien ne pourroit plus empescher leur commun contentement. Melinte s'estima bien heureux de l'opinion que Dicearque auoit conceuë de luy; & apres auoir passé vne grande partie de la nuit en cès discours qui leur estoient si chers, ils s'endormirent tous deux, & ne s'esueillèrent point qu'il ne fust assez tard.

Mais au lieu qu'ils auoient donné le commencement de la nuit à leur entretien, Ariane & Erycine qui s'estoient couchées ensemble, y donnerent la fin: elles se mirent à parler s'estant esueillées deuant le iour, & lors qu'il parut, Erycine apperceut Ariane qui auoit eloigné le drap de dessus elle, à cause de la chaleur, & qui luy fit voir tant de merueilles, qu'elle ne pût s'empescher de dire: Qui sera vn iour l'homme heureux qui possedera toutes ces beau-

tez? Ariane en souffrant luy respondit: Peut-estre vne personne où vous auez de l'interest. Erycine rougit, croyant qu'elle voulust parler d'Amyntas qu'elle aimoit, & de qui elle estoit aimée; & voulant faire la fine luy dit: Je ne prens point d'interest en ceux qui n'en prennent point en moy. Ariane cognoissant qu'elle s'abusoit, reprit; Et de qui pensez vous que ie veuille parler? d'Amyntas, repartit-elle, pource que vous auez ouï dire qu'il m'auoit aimée. Assure-toy, chere Erycine, dit Ariane, que ie suis bien éloignée de penser à luy: c'est vn homme à qui ie ne parlay iamais, & que ie ne veux connoistre de ma vie. Toutefois, repliqua Erycine, ces iours passez on croyoit vostre mariage resolu. Iamais, dit Ariane, on n'en est venu iusqu'à ce point, pource que ie ne prens pas ainsi mes resolutions; & quand i'eusse peu y consentir, le retour de mon frere & du vostre me donne bien à present d'autres pensées. Mais, continua t'elle, comment Amyntas a-t'il pense à ma recherche, apres vous auoir aimée? d'où venoit ce refroidissement? estoit-ce de vostre costé ou du sien? Ny de l'un ny de l'autre, respondit Erycine, & si vous m'assurez que vous n'espouserez iamais Amyntas, ie ne feindray point de vous dire tout ce qui s'est passé entre nous. Je puis bien vous le iurer, reprit Ariane; & si vous auez quelque dessein l'un pour l'autre, soyez certaine que l'empescheraï bien que nous ne soyons tous trois mal-heureux: mais vous me ferez vn extrême plaisir de m'apprendre vn peu de vostre vie; & ie vous prie d'y employer le temps qui nous reste auant qu'il nous faille leuer. Cette assurance, dit Erycine, & vostre amitié, m'obligent à ne vous celer aucune chose: alors elle commença ainsi son recit.



HISTOIRE D'AMYNTAS, & d'Erycine.



Es affections qui naissent avec nous, & que nous auons presque succées avec le lait se tournent en habitudes si fortes, & prennent des racines si profondes, qu'on ne les peut arracher qu'avec des violences qui sont autant de coups mortels; & ie croy plustost qu'il est impossible de s'en deffaire; pource que la passion se trouuant accreüe auant la naissance de la raison, se void avec tant de force lors que celle-cy paroist, qu'elle la maistrise tousiours, non seulement comme aînée, mais comme supérieure. Je vous confesse que c'est ce qui est cause que j'ay souffert beaucoup d'ennuis avec opiniastrété, malgré les traueses que les affections d'Amyntas & de moy ont receuës, & pour vous dire leur commencement, il faut que ie vous die celuy de ma vie.

Depuis la naissance de mon frere Melinte, Hyperie ma mere auoit esté grosse plusieurs fois de quelques enfans qu'elle ne pût mettre au monde en vie: mais en fin ayant fait quelques vœux à Lucine, elle accoucha de moy. Ce fut vne resioüissance bien grande en la maison; & Diocles qui estoit le principal amy qu'eut Telephe mon pere, vint se resioüir avec luy, & amena son fils Amyntas, qui en ce temps-là n'auoit que cinq ou six années; on luy dit par maniere de passe-

temps que ie serois sa Maistresse , à quoy il s'accorda , & demanda à me baiser. Ie croy que pour lors il ne me pût faire vne offre de seruice bien eloquente ; aussi ne luy donnois-je pas grand sujet d'amour ; pource que i'estois vne Maistresse bien desagreable & bien importune , n'ayant que des cris pour tout entretien. Son pere l'instruisoit des devoirs qu'il auoit à me rendre , & quelquefois rioit avec Telephe de la façon dont il s'y prenoit ; tous les matins il enuoyoit sçauoir de mes nouvelles , puis il me venoit voir , & me baisoit la main : tantost il m'apportoit vn bouquet , tantost vne plume de couleur que l'on m'attachoit à la teste , en esperance qu'vn iour ie luy serois ainsi porter de mes faueurs. Lors que ie commençay à parler il tesmoigna du contentement , n'ayant plus à entretenir vne muette ; & voyant que ce qu'il aimoit commençoit à s'animer , il sembloit en augmenter son affection : aussi le trouuant complaisant à tout ce que ie desirois , i'auois de l'amitié pour luy ; pource que les enfans se plaisent avec ceux qui ne les contredisent pas. Nous auions mille sortes de jeux , où ie faisois la maistresse , & luy le seruiteur : le luy commandois avec douceur , il m'obéissoit avec ioye , & les plus tendres de nos années se passerent ainsi avec mille plaisirs innocens. Ie ne puis vous redire tous nos discours d'enfans , mais lors qu'il eut dix-sept ou dix-huict ans , l'aage qui a accoustumé de changer toutes choses , n'eut pas ce pouuoir sur luy : car au lieu de diminuer peu à peu cette affection qui n'auoit eu aucun fondement , l'accoustumance luy seruit de matiere d'amour , & luy fit poursuiure le dessein de m'aimer. Pour moy , acquerant vn peu plus de

connoissance, ie reconnus que ces petites libertéz n'estoient point honnestes, & voulus me retirer de luy. Il ne s'en estonna pas trop, pource qu'il est d'une humeur qui ne s'afflige & ne s'esmeut de rien, comme vous le verrez par la suite; & il se contenta de me dire vn iour: Il semble, ma belle Maistresse, que vous n'aimez plus vostre seruiteur. l'eus bien alors assez de iugement pour luy respondre: ie vous prie de quitter ces noms qui ne sont plus propres ny pour l'un ny pour l'autre. Luy, sans m'accuser de changement, ny se mettre aux plaintes, me dit: Il est désormais impossible que nous perdions ces qualitez, puis que ie n'en ay ny la volonté ny le pouuoir. Si cela ne vous est pas possible, luy dis-je, il est bien possible à moy; & dès cette heure ie veux quitter le nom de vostre Maistresse. Cela, respondit-il, ne dépend pas de vous. Et de qui donc? repartis ie. De moy, poursuiuit-il; pource que demeurant tousiours vostre seruiteur, il faut de nécessité que vous demeuriez ma Maistresse. Et si ie vous le desfends, repliquay-je. Vous pretendez donc, reprit-il, quelque pouuoir sur moy, & ainsi vous demeurez d'accord vous mesme d'estre ma Maistresse. Interpretez, luy dis-je, mes paroles comme il vous plaira; mais ie ne veux plus que vous traittiez ainsi avec moy. Puisque vous me permettez, respondit-il, de donner à vos paroles tel sens que ie voudray; ie veux qu'elles signifient que vous m'aimez, mais que vous ne desirez pas en rien faire parestre. Voyez vous, repris-je, ie vous ay aimé comme enfant; mais les choses sont changées. Je ne me plains pas, repartit-il, de ce changement: car dans ce premier aage vous disiez deuant tous que vous m'ai-


miez,

miez ; & il n'en estoit rien ; & à present vous voulez m'aimer en effect , & n'en rien dire. Flattez vous, luy dis-je , tant qu'il vous plaira , pour moy ie sçay bien ce que j'ay resolu : ainsi ie le quittay , & m'allay mesler parmy d'autres filles , pour euites ses reparties ; pource que mon ieune aage ne me fournissoit pas des raisons assez fortes pour le vaincre , & ma foiblesse le rendoit plus hardy.

Quelque temps apres , Diocles qui s'estoit peu à peu enrichy sans faire bruit, se déclara possesseur des grands biens qu'il auoit acquis ; & Amyntas croyant que rien ne luy pouuoit estre refusé avec les aduantages qu'il auoit, pareissoit plus assuré que iamais de mon affection. Le creus que mon honneur m'obligeoit à luy tesmoigner encore plus de froideur , de peur qu'il ne semblast que ie le cherchois à cause de ses richesses ; de façon que ie me retiray de luy entierement, ne voulant point permettre qu'il me parlât en particulier. Je croy qu'il s'apperçeut bien de mon artifice ; car sans s'estonner de ma resolution , il voulut m'escire. Vn iour qu'il me vint voir , lors que i'estois en compagnie, ie ne sçay comment il pût mettre vne lettre dans ma poche , & s'en estant allé i'y mis la main par hazard , & fus bien surprise sentant cét escrit qui n'y deuoit point estre. Toutefois ie dissimulay ce qui estoit arriué , & ayant impatience que ie fus seule pour voir ce que c'estoit , ie sortis , & trouuant vne lettre ie l'ouuris , & vis qu'il y auoit ainsi.



AMYN.TAS A ERYCINE.

 I ie me sentoie coupable , ie ne feroie pas fi hardy à vous demander la raifon de vos rigueurs ; mais vous ayant toufiours feruie avec fidelité , i'ofe bien vous dire qu'il eft impoffible que vous me vouliez du mal , quelque feinte que vous y apportiez. Peut - eftre voulez - vous m'efprouuer ; mais fi vous avez deffein de recevoir mon feruice apres beaucoup de temps & de peines , ie vous prie de le faire dès à prefent , & nous deliurer tous deux des foins & des tourmens que vous nous preparez. Ie n'aspire point à la trifte gloire de fçauoir bien fouffrir , & lors que j'aurois enduré vos plus cruels tourmens , vous seriez en fin obligée de vous flefchir. Faites maintenant par affection ce que vous seriez alors par iuflice ; & me rendant fi heureux , vous me forcerez à vous feruir encore par iuflice , ce que ie ne ferois alors que par affection.

Ie le blafmay vn peu en moy - mefme , de fa hardiefle de m'auoir efcrit , & des libertez qu'il prenoit dans

sa lettre: toutefois cette humeur de prendre ainsi toutes choses à son avantage, ne m'estoit point desagréable: quelquefois i'accusois ma facilité, qui estoit cause qu'il ne me pouuoit croire si mauuaise: d'autre costé i'estois bien aisé, qu'il ne se rebutaist point pour ces feintes rigueurs, pource que ie faisois ainsi ce que ie deuois, & cela ne l'éloignoit point de m'aimer. En ce temps l'acquis encore l'affection de Misandre, si i'edois nommer ainsi le desir qu'il me tesmoignoit de me voir & de me parler; car sans doute vous rirez de l'humeur de cet homme. l'ay oüy dire, interrompit Ariane, qu'il est de Regge, & qu'il vient souuent à Syracuse, mais qu'il est fort melancholique. Il est impossible, reprit Erycine, que vous vous soyiez iamais imaginé qu'il le soit à vn tel degré. Il me vint voir vn iour en la compagnie d'Amyntas de qui il estoit amy, lors qu'Hyperie ma mere fut fort malade, & en danger de mourir: mon affliction qu'il trouua auoir quelque sympathie avec son humeur triste, fut cause, comme ie croy, de la bien-veillance qu'il eut pour moy. Ses discours estoient plustost pour me faire voir que i'auois sujet de m'affliger, que non pas pour me consoler; son esprit ne luy fournissant aucunes raisons pour vaincre les ennuys; & apres auoir employé quelques paroles pour me tesmoigner qu'il prenoit part à ma douleur, il creut m'auoir assez déclaré son affection, puisque peut-estre estois-ie la premiere qu'il eust obligée par cette complaisance. Pensant donc auoir acquis assez de familiarité avec moy par cette premiere rencontre, il me vint reuoir lors que ma mere se porta mieux, & que ie me reioüissois de sa guerison: ma gayeté ne fit pas

à la verité mourir mon affection , que ma tristesse auoit fait naistre : mais demeurant muet à tous les discours par lesquels ie luy tesmoignoys auoir de la satisfaction , il vouloit peut-estre me faire croire que son silence procedoit d'amour ; & quelques iours apres voyant que ie le receuois avec quelque douceur , comme i'ay accoustumé de traiter tous ceux que ie voy, il prit la liberté de se plaindre de moy , voulant me faire croire que ie luy faisois iniustice de ne pas reconnoistre l'affection qu'il me portoit , encore qu'il ne m'en eust rien fait parestre , soit par discours , soit par aucun deuoir. Pour moy n'ayant pas sujet de le satisfaire, il ne m'estoit pas mal-aisé de l'entretenir en cette humeur plaintiue : & toutes les fois qu'il me voyoit, il sembloit auoir obtenu ce qu'il desiroit lors que ie le traittois avec rigueur ou avec mespris ; il se mettoit à discourir qu'il estoit le plus mal-heureux des hommes : que celles qui auoient de la douceur pour tous les autres , n'auoient pour luy que des desdains ; que sa rencontre estoit si infortunée , qu'à mesme instant qu'il parestoit, il inspiroit les refus & les rudesses à celles de qui il desiroit le plus estre estimé : qu'en sa presence mesme on affectoit de fauoriser les autres , pour luy donner plus de desplaisir : En fin sur le sujet du mal-heur de sa vie , c'estoit vn torrent de paroles qu'il estoit impossible d'arrester. Ie riois en moy-mesme de ce qu'il se satisfaisoit ainsi , en me faisant toutes ces plaintes & ces reproches ; son ame n'aimant à se repaistre que de ces mauuaises nourritures. Vous me representez vn homme , interrompt Ariane , d'un naturel bien estrange , & toutefois assez plaisant. Ie ne

puis ; reprit Erycine , vous exprimer assez cette misérable humeur : pource que j'ay remarqué qu'il est impossible de le satisfaire , donnant vn sens à toutes choses qui luy confirme l'opinion d'estre mal-heureux. Si ie le traitois avec quelque sorte de douceur , il croyoit que c'estoit feinte : si i'vsois de froideur , c'estoit veritable mespris : si ie luy parlois , c'estoit , disoit-il , d'vne certaine façon qu'il connoissoit bien le peu d'estime que ie faisois de luy : si ie me taisois , c'estoit pour luy faire sentir qu'il m'importunoit , & pour luy donner congé : En fin j'ay trouué fort vray ce que j'auois ouï dire de luy à mon frere , qu'il croyoit que de toutes les passions il n'auoit que les mal-heureuses & les desplaisantes ; comme la tristesse , la crainte , la ialousie , le desespoir , la defiance , & les autres : Et sur ce sujet il faisoit vne remarque que j'ay trouuée fort belle , & que j'auray peut-estre retenuë ; que la pluspart des choses ont deux faces , qui diuersement regardees font des effects diuers : comme en vn combat , vn homme de courage ne considere que la gloire de vaincre , & la tient toute assourée ; vn poltron ne regarde que la mort , qui luy fait horreur & le trouble. Aussi Misandre , ayant le dedans gasté de cette humeur noire , ne regardoit que le mauuais sens de toutes choses , & interpretoit toutes mes actions à son desauantage. J'auois donc deux seruiteurs bien differens ; l'vn qui se plaignoit incessamment sans en auoir aucun sujet ; l'autre qui se satisfaisoit tousiours quelque rigueur qu'il receust. Je vous confesse qu'Amyntas ne me desplaisoit point ; pour l'autre vous pouuez iuger s'il estoit aimable : toutefois encore qu'il fust personne que ie deusse bannir de moy , iamais la douceur

de mon naturel ne me permit de luy desplaire assez pour le chasser. Amyntas reconnoissant au traitement que ie luy faisois, qu'il n'estoit point mal avec moy, ne cessoit de me voir ; & n'eust pas manqué d'entreprendre beaucoup, si ie ne l'eusse retenu en son deuoir : mais ma modestie l'arrestoit entierement. Misandre auoit vne melancholie si contagieuse, qu'il ennuyoit tous ceux qu'il approchoit. Amyntas m'auoit donne sa connoissance, mais il s'en repentit assez pour l'amour de moy, & plus encore à cause de luy-mesme ; pource que Misandre ne m'abandonnoit point, & il ne pouuoit m'entretenir comme il l'eust desiré. Il est vray que si i'auois vne ennemie, ie luy souhaitteroie d'auoir à souffrir l'amour d'un homme de cette humeur : car ie ne croy pas qu'il y ait rien de plus insupportable. Si vous demeurez au logis, ils vous assiegeront cruellement, sans dire quelquefois vn seul mot en vn iour, & laisseront les plus opiniaîtres, qui penseroient attendre leur sortie pour parler avec liberté : si vous auez affaire dehors, ils vous accompagneront incessamment sans vous donner vne heure seulement de trêue : cependant ils voudront que leurs souspirs soient receus pour les plus doux entretiens d'amour ; leur silence pour vne discretion admirable, & leur importunité pour des seruices qui ne se peuvent assez recompenser.

Ie me souuiens qu'un iour Amyntas vint chez nous, feignant de se sauuer d'une pluye qui l'auoit surpris, comme il auoit tousiours quelque plaisante excuse pour y venir souuent ; & y trouuant Misandre dont la presence l'importunoit assez, sans que son humeur triste adioustast quelque chose à son ennuy, il ne pût souffrir

cette contrainte , & sortit pour s'en deliurer , malgre la pluye qui continuoit tousiours : mais lors qu'il fut dehors , l'orage s'augmenta de telle sorte , qu'il fut contraint de nous reuenir trouuer , où nous passasmes vne journée aussi noire qu'il est possible , tant à cause du temps, que de l'humeur de Misandre. Sur le sujet de cette pluye Amyntas me donna le lendemain ces vers.

*Hier , belle Erycine , assailly d'un orage,
Je me croyois chez vous garantir de naufrage ,
Comme en vn port heureux par le Ciel octroyé :
Vos yeux de leurs rayons aussi tost me secherent :
Mais quand iusques au cœur leurs flammes me toucherent,
Faut-il, dis-je, brusler de peur d'estre noyé ?*

*Je les souffris long temps, pource que ie les aime:
Mais en fin surmonté par leur ardeur extrême ,
Je pris congé de vous, euitant ce danger :
Je recourus à l'eau pour chercher mon remede,
Bien que i'eusse despit d'implorer à mon aide
Celle qui peu deuant me vouloit submerger.*

*Lors le Ciel dessus moy versa de cent nuages
Tout ce qui luy restoit de tempeste & d'orages,
Pourrauir à vos yeux l'honneur de mon trespas.
Je reuins donc à vous, bel Astre de mon ame,
Aimant mieux, vous voyant, mourir dans vostre flamme,
Que perir dans les eaux en ne vous voyant pas.*


En fin Amyntas ne sçachant comment se deffaire des importunitéz de Misandre , & connoissant son humeur,

s'aduifa d'une ruse aussi bizarre, comme il sçauoit que son esprit estoit rare en son espece : aussi nous discou- rions quelquefois de luy, Amyntas & moy, & demeu- rions d'accord qu'il s'engageoit par les mespris, & se rebuttoit par les faueurs : il luy arriuoit quelquefois de me dire qu'il ne pouuoit estimer la moindre liberté que prenoit vne fille de tesmoigner de la bonne volonté à vn homme : iugez s'il me persuadoit à luy en faire parestre.

Amyntas escriuit donc vne lettre en mon nom, & ayant mis au dessus l'adresse à Misandre, il me fit accroi- re estant chez nous, qu'il l'auoit receuë de Regge avec quelques autres, & pria vne fille que j'auois de la luy porter (pource qu'il logeoit fort près de nous) sans qu'el- luy dist d'où elle l'auoit eue. l'ay sceu depuis qu'elle estoit telle.



ERYCINE A MISANDRE.

 *Ostre respect a vaincu ma froideur, & vostre modestie vous a acquis toute l'es- time que vous pouuiez esperer de moy: mais pource que la retenue dont vous usez ne vous permet pas assez de liberté; j'ay voulu vous preuenir de celle-cy, & vous assurer que j'auray fort agreable, que vous me fassiez sçauoir par les vo- stres la qualite de vostre affection.*

Amyntas ayant sceu qu'il l'auoit receuë, voulut voir
com-

comment réussiroit son artifice ; il alla le trouver , & l'abordant avec vne familiarité d'amy , luy dit qu'il venoit de me quitter : qu'il croyoit que ie le ferois mourir d'amour , sans qu'il luy fust possible de me toucher par son affection ny par aucun deuoir. Misandre luy respondit ; Vous autres aussi qui estes d'humeur si gaye , ne sçavez pas comment il faut servir les Dames : croyez vous que toutes vos libertez luy soient fort agreables ? il faut de la discretion , & non pas encore de la commune , mais d'une aussi parfaite que celle avec laquelle ie la sers. Quoy , dit Amyntas en riant , croyez vous que vostre tristesse & vostre silence luy plaisent ? ce seroit aimer la chose du monde la plus ennuyeuse. Il vouloit ainsi l'obliger à luy faire sçavoir sa bonne fortune ; & Misandre n'y faillit pas , pource qu'avec vn ris qui sembloit se moquer de l'autre , il luy respondit : Toutefois cette tristesse & ce silence m'acquiescent des faueurs que vos gayetez ne doivent iamais pretendre. Amyntas pour l'engager encore poursuiuit ; Et quelle connoissance auez vous iamais eue qu'Erycine approuue vostre humeur ? il luy respondit en se promenant , & marchant d'un pas superbe ; Par les asseurez tesmoignages que i'en ay receus. Vous , reprit Amyntas ? il faut que vous l'ayez résuë cette nuit , pource que ie luy ay entendu parler de vous d'une façon qui ne vous est point aduantageuse. Il luy reparut : Elle cache ainsi le bien qu'elle me veut : mais lisez cela , dit-il en luy presentant la lettre , & vous en sçavez la verité si vous en connoissez l'écriture. Alors Amyntas prit les tablettes , & apres les auoir leuës , il feignit d'entrer en rage de le voir fauorisé à son preiu-

dice: il effaça ce qui estoit escrit, puis ietta au feu les tablettes, afin qu'elles ne me peussent nuire s'il les eust monstrees à d'autres; & en suite il luy dit mille choses contre moy, comme estant transporté d'amour & de fureur. Misandre se vouloit fâcher de ce qu'il auoit ainsi traité sa lettre. Quoy? dit Amyntas, pouuez vous estimer les faueurs de celle qui vous escrit la premiere, & qui prend vne liberté qui ne se peut pardonner à vne fille? pour moy, ie vous la laisse de cette humeur; elle a bien enuie que l'on voye de ses lettres puis qu'elle n'attend pas d'en receuoir, & ne se contente pas d'en escrire à vn seul. Je voulois faire le fin avec vous, croyant estre le seul qu'elle obligeoit de cette faueur. Voyez, continua-t'il, tirant de sa poche vne lettre de pareille escriture, si ie n'auois pas sujet de me croire en ses bonnes grâces; mais ie m'esprise bien vne chose qu'elle rend si commune, & iure de ne la voir de ma vie: puis il ietta la lettre au feu comme l'autre, & deuant que de partir rangea tellement Misandre à ce qu'il desiroit, qu'ils protellèrent l'un à l'autre de ne me plus voir. Je trouue, interrompit Ariane, qu'il mettoit vn peu vostre reputation en danger, pour s'acquérir seulement la liberté de vous voir plus à son aise. Il est vray, reprit Erycine, & lors qu'il m'en fit le conte ie m'en plaignis à luy, mais il me dit que quand il arriueroit à Misandre de se vanter que ie luy auois escrit; pour peu que l'on me connust & luy aussi, iamais on ne le croiroit.

Je perdis ainsi cet aimable Misandre: mais Amyntas ne iouit pas long temps de son artifice, & n'eut pas beaucoup de peine à se cacher de luy pour venir chez nous, pource qu'il fut forcé de s'en priuer par vn malheur qui

arriua. Diocles & mon pere eurent quelque contestation, en suite de laquelle il fut deffendu à Amyntas de venir chez nous, & à moy de le receuoir. Vn peu apres ie sceus la recherche que Diocles faisoit de vous pour luy; & lors qu'un iour il s'approcha de moy au Temple, & me voulut tesmoigner le regret qu'il auoit, du mal-heur qu'il empeschoit de me voir, ie luy dis; Ce ne sont pas là les paroles que vous deuez estudier pour la belle Ariane; il vous faut plustost faire prouision de premieres offres de seruice. Il merespondit: le sçay bien qu'Ariane est le souhait de tous ceux de Syracuse, & que vous auez sujet de croire que ie l'estime, sçachant qu'elle est des plus parfaites que nous voyons: mais assurez vous que ie ne tourneray iamais les yeux deuers son merite, pour manquer à la fidelité que ie vous ay iurée. Le luy dis; Comment osez vous me parler ainsi, puis que ie sçay que vous la recherchez? Dites s'il vous plaist, reprit-il, que mon pere la recherche: mais encore qu'il croye que ie ne m'opposeray point à son dessein, i'espere beaucoup de choses auant qu'il obtienne ce qu'il desire. Dicarque ne l'aime pas, & n'y voudra point consentir: Ariane a le courage trop releué, & ne fera iamais estime de moy, principalement ne recherchant point à luy rendre des deuoirs; & quand toutes choses seroient arrestées, assurez vous que ie m'en irois si loing que l'on ne me reuerroit plus que la belle Ariane ne fust mariée: Elle merite bien pour le moins vn cœur entier, & le mien ne peut estre iamais qu'à Erycine. Je fais serment deuant ces Dieux que nous adorons, & veux qu'ils me punissent comme parjure, si ie quitte iamais vne affection que i'ay maintenüe depuis ma naissan-

ce, & que ie sçauray bien conseruer encore iusqu'au tombeau.

Il me dit ces paroles avec tant d'assurance, que i'eus opinion qu'il ne me trompoit pas; & ie luy respondis, qu'il n'y auoit que le temps qui me peust faire iuger s'il estoit veritable. Depuis il m'a tousiours continué les mesmes protestations, & quelque bruit qui ait couru de vostre mariage, iamais ie n'ay trouué sa passion refroidie. Iugez, belle Ariane, continua Erycine, si ie n'auois pas sujet d'estimer que ie luy estois bien redevable: car lors qu'il se vid avec beaucoup plus de biens, le changement de sa fortune ne changea point son affection; mais depuis, quelle fidelité n'eust point cédé à l'esperance de posseder cette diuine Ariane? Cette parole la fit rougir, & l'obligea de la prier qu'elle la traitast avec moins de flatterie. Permettez, reprit Erycine, que i'en parle ainsi; car il n'y a point de doute que ce changement luy eust esté trop avantageux: toutesfois i'estois assésurée qu'il ne m'abusoit pas, sçachant qu'il ne vous voyoit point: aussi vous ne sçauriez croire combien de tourmens j'ay ressentis durant ces traueses: car les occasions de l'aimer continuoient tousiours, & ie voyois moins d'apparence que iamais que nostre mariage se püst faire. Considérez à present quel contentement ie reçois, par l'assurance que vous me donnez, que vous estes encore plus esloignée d'y penser que luy; & vous voyant en pouuoir de n'estre plus contrainte contre vostre desir, puis que vous n'avez plus de pere.

Il n'y a point de doute, repartit Ariane, que vous estes obligée d'aimer Amyntas: car ie vous puis assurer que iamais il n'a recherché à me rendre un seul tesmoignage d'af-

fection; & au lieu de luy ſçauoir mauuais gré d'auoir fait peu d'eſtime de ma recherche, ie le louë extrêmement de ne vous auoir point manqué de foy. De la façon que vous me l'auiez représenté, il faut qu'il ait le cœur en bon lieu; & i'eſpere que vos affections auront la fin que vous deſirez: Tant s'en faut que ie l'empêche, ie voudrois eſtre aſſez heureuſe pour vous y ſeruir, & ſatisfaire à l'obligation que ie vous ay de ne m'auoir point celé vos ſecrets. Mais, reprit Erycine, qui peut donc eſtre la perſonne où i'ay intereſt, qui vous pourra vn iour poſſéder? Chere Erycine, dit Ariane, ie te permets de le deuiner, mais tu ne le ſçauras point de ma bouche. Vrayement, répondit-elle, vous me payez bien de la franchise avec laquelle ie vous ay dit les plus cheres penſées de mon ame. Puis elle continua; Mon frere ſeroit-il bien ſi heureux? cela peut eſtre, repartit Ariane, & toutefois iamais mon mary ne ſera ton frere. Je ne comprends point, dit Erycine, ce que vous voulez dire. Il y a bien encore d'autres ſecrets, reprit Ariane, qui t'importent, & meſmes à Amyntas autant qu'à moy: mais la parole m'eſt interdite ſur ce ſujet, & dans peu de iours rien ne te ſera caché: contente toy ſeulement que i'eſpere trouuer moyen de nous rendre toutes deux heureuſes.

Lors qu'elles acheuoient ce diſcours, Epicharis qui s'eſtoit leuée les vint trouuer, & Ariane luy tendant les bras, la fit approcher pour l'embraffer encore, & luy dit: Ma chere fille, eſt-il poſſible que ie te reuoye, & qu'avec toy tu m'ayes ramené tant de contentemens? te pourray-ie iamais aſſez aimer pour tant de ſeruices que tu m'as rendus? Madame, répon-

dit Epicharis , la satisfaction que j'ay d'auoir fait quelque chose qui vous plaise , me tient lieu d'une assez grande recompense : tout-fois ie ne refuse pas l'honneur de vostre amitié , sans laquelle ie confesse que ie ne pourrois viure. Erycine dit aussi qu'elle luy estoit bien redevable , à cause du salut de son frere ; Et pource qu'il estoit desia tard , elles furent surprises dans cet entretien par Palamede , qui entra dans la chambre , amenant Melinte ; & ouurant les rideaux les appella paresseuses d'estre encore au lit. Melinte qui estoit plus retenu , dit qu'elles auoient souffert le iour de deuant assez de peine , pour se reposer encore toute la journée. Il n'est pas raisonnable , dit la belle Ariane , que vous soyiez tous seuls à vous promener aujourd'huy ; & encore que mon Oncle ait montré à Melinte tout ce qu'il croyoit d'estimable en sa maison , ie m'assure que ie luy feray remarquer des beautez qu'il ne peut voir si ie n'y suis. Il n'y a point de doute , repartit Melinte , qu'ou vous n'estes point , beaucoup de beautez y manquent. Ce n'est pas ainsi , dit Ariane , que ie l'entens : mais il y a des lieux ceans dont la beauté n'est connuë qu'à moy ; & ie veux vous y mener pour voir si vous serez de mon aduis. S'ils vous plaisent , reprit Melinte , ie ne doute point qu'ils ne me soient agreables , & ils me le seront encore plus quand vous y serez. Laissez nous donc habiller , dit Erycine , puis qu'il est resolu que nous nous leuions , & allez nous attendre au jardin , où nous vous irons bien tost trouuer. Il fallut leur donner ce loisir , & ces deux amis sortirent à regret de ce lieu , où tant de beautez

n'estoient pas si soigneusement cachées , qu'il ne s'en descourist tousiours quelqu'une , qui sembloit n'auoir iamais veu le iour , tant elle pareissoit blanche & delicate. Ils sceurent que quelques gens les demandoient dans la court du Chateau , & impatiens de sçauoir ce que c'estoit , ils allerent les trouuer , cependant que ces belles filles s'habillerent avec toute la curiosité qu'elles peurent y apporter.

Fin du septiesme Liure de l'Ariane.







LE
HVICTIESME
LIVRE DE
L'ARIANE.



L'ACCIDENT qui estoit arriué à Di-
cearque le iour precedent, auoit esté
sceu dés le soir mesme dans Syracu-
se; & chacun se réjouït qu'ils fussent
tous eschappez de ce danger: mais
lors que l'on apprit que cela s'estoit
fait par le secours de Melinte & de
Palamede qui estoient viuans, ce fut vne réjouïssance pu-
blique si grande, que iamais peuple n'en tesmoigna vne
pareille. Telephe & Hyperie pouuoient à peine croire vne
si heureuse nouuelle, apres auoir pleuré Melinte comme
mort, & ressenty sa perte avec autant de douleurs que
son merite & leur bon naturel leur en pouuoit causer.
Telephe n'eust pas manqué de le venir trouuer, s'il eust
esté en maison d'amy: mais il se contenta de luy man-

der qu'il vinst promptement les voir, & qu'il ne leur déniast pas dauantage ce contentement. Les principaux amis de Dicearque vindrent de Syracuse se réjoûir avec luy de son bon-heur: Ceux de Melinte & de Palamede accoururent aussi pour les voir & les embrasser. Diocles ne manqua pas d'enuoyer sçauoir des nouuelles de Dicearque & de sa niece: mais Pisistrate y vint luy mesme, estant en peine d'Ariane, dont il estoit fort amoureux; & c'estoit luy avec quelques autres, qui ayant veu Dicearque, demandoit à salüer Palamede & Melinte. Apres les embrassemens des plus chers amis, & les ciuiletez accoustumées des autres, Melinte sçeut que les Deputez mesmes de la ville arriuoient pour le voir. Il alla au deuant d'eux iusques dehors le logis, & eux l'ayant apperceu descendirent de cheual, & le salüerent séparément: puis l'un d'entr'eux luy dit, que l'amour si grande qu'il auoit tesmoignée à sa Patrie, ne pouuoit estre reconnüe que d'un soin pareil pour tout ce qui-le toucheroit, & particulièrement pour la conseruation de sa vie; de laquelle ils se venoient rejoyûir avec luy: que la mort l'eust priué d'une assez belle recompense qu'il receuroit, comme seroit celle de se voir beny le reste de ses iours de tout le peuple: Qu'autrefois dans Pise il auoit acquis vne victoire glorieuse pour luy & pour Syracuse: mais que celle qu'il auoit obtenüe dans Rome, surpassoit beaucoup l'autre, estant honorable pour luy, & utile pour son pais; qu'il sembloit qu'il ne fust ne que pour vaincre, & pour le salut de tous; n'estant pas plustost entré dans la Sicile, qu'il auoit trouue nouvelle occasion d'acquérir de l'honneur, & de sauuer celuy des autres avec leur vie. Il le pria en suite de venir bien tost receuoir

les louanges & les souhaits de tant de personnes heureuses par son moyen ; & l'assura que si les Dieux accordoient la moindre partie des vœux qui se faisoient tous les iours pour luy, il seroit sans doute le plus content des hommes. Melinte respondit qu'il receuoit trop d'honneur pour si peu de merite : que les seruices que l'on rend à son païs sont simplement deuoirs : qu'il n'y en auoit pas vn d'entr'eux , qui n'eust recherche le mesme bien pour Syracuse ; & qu'il estoit seulement plus heureux que tous, d'en auoir trouué l'occasion : toutefois si les Syracusains desiroient l'obliger, qu'il leur demandoit, non point par reconnoissance, mais par grace, qu'il peust estre ouï en public sur vn sujet qui luy estoit de consequence, & qu'il auroit dequoy esprouuer l'amour du peuple, en vne iustice qu'il auoit à luy demander. Non seulement les oreilles, dirent-ils, mais encore les bouches & les volontez des Syracusains vous sont acquises ; & s'ils trouuent occasion de vous rendre le bien-fait qu'ils ont receu de vous, ils mettront ce iour là entre les plus heureux de leur vie. Il les pria de s'en souuenir, & de là il les conduisit à Dicearque, qui les receut honorablement ; & fut bien aise qu'ils eussent rendu cét honneur à Melinte, faisant dessein dès lors de luy donner Ariane.

Cependant que Dicearque estoit empesché avec eux, & Palamede avec Pisistrate & les autres, Melinte s'eschappa de tous pour aller trouuer Ariane, & ne pas perdre le temps qu'il pouuoit passer auprès d'elle. Il vid Erycine & Epicharis qui acheuoient de l'habiller avec tant d'aduantages, qu'il en demeura tout interdit. Elle feignoit d'auoir besoin de ces ornemens, ayant à receuoir tant de personnes de condition qui estoient arriuées : mais

le principal sujet estoit pour donner plus d'amour s'il se pouuoit, à Melinte: aussi en estoit-il si rauy, qu'il faillit à oublier de luy faire le recit des Deputez qu'il venoit de recevoir. Il luy dit en suite, qu'ils seroient obligez de s'en retourner tous dès le mesme iour; pource que le peuple les vouloit voir: qu'il ne pouuoit aussi dauantage retarder le contentement de Telephe & d'Hyperie, & mesme que Dicearque vouloit remener les Deputez dans la ville. Ariane voyant qu'ils auoient si peu de temps à demeurer ensemble, prit Melinte & Erycine par la main, & donnant charge à Epicharis de les suiure, descendit avec eux par vn petit escalier destourné, qui conduisoit dans le parc sans passer par les iardins, & leur dit qu'il falloit prendre ce temps pour se promener en liberté, cependant que l'on pouuoit croire qu'elles s'habilloient encore. Lors qu'ils furent dans les grandes allées, Epicharis qui vouloit fauoriser ces Amans, feignit de vouloir monstrier à Erycine les lieux qui luy plaisoient le plus, & s'esloigna d'eux. A peine peut-on représenter le contentement de Melinte, quand il se vid seul auprès de sa belle Maistresse: à mesure qu'il les perdoit de veüe, il se sentoit esleuer à vn degré si haut de ioyes, que luy mesme n'eust sceu les exprimer. Ariane connoissant que son silence venoit d'excès de plaisir, le voulut soulager en parlant la premiere, & luy dit; le vous ay promis de vous faire voir icy des endroits que vous n'avez point veus, & que ie trouue les plus beaux de cette maison: ie veux vous mener icy près, en vn lieu que i'ay souuent visité depuis les mal-heureuses nouuelles de vostre mort & de celle de mon frere: Vous trouuerez que la Nature semble l'auoir fait ainsi, pour entretenir à souhait quelques pensées que

l'on puisse auoir : mais comme autrefois il a esté tesmoin de mes ennuis , ie veux qu'il le soit à present de mes contentemens. Madame, respondit Melinte, si vostre satisfaction est aussi parfaite que la mienne, ie vous estime la plus heureuse du monde: mais ie doute bien qu'elle puisse estre égale, estant impossible que vous ayez les beaux sujets de rauissement qui se presentent à mon ame. Melinte, reprit Ariane, il ne m'est pas seant de vous tesmoigner l'excès de ma ioye: toutefois il faut que la honte cede à la verité, & que ie vous confesse qu'il est difficile que la vostre la surpasse : au moins estes vous priué de ce plaisir qui m'est extrême, de vous voir viuant apres auoir pleuré vostre perte : car vous ne pouuez sentir ce contentement, n'ayant point esté tourmenté pour moy d'une pareille douleur. le deuois, repartit Melinte, encore moins esperer l'honneur de vostre affection, que vous de me voir viuant ; & ce bon-heur me doit estre bien plus sensible, pource que ma vie ne vous peut pas estre vn si grand bien qu'à moy les tesmoignages de vostre bonne volonté. Acheuant ce discours il arriua au lieu où Ariane le conduisoit. On y voyoit quatre belles sources d'eau qui sortoient avec bruidt, & s'égaroient dans des lieux rustiques: au milieu estoit vne touffe d'arbres pliez, qui faisoient vn ombrage fort agreable ; au dessous desquels dormoit vne Diane de marbre blanc, qui sembloit au retour de la chasse auoir choisi la fraicheur de ce lieu pour se reposer. Melinte aduoüa qu'il n'auoit iamais rien veu de si delicieux ; & estant entrez souz ces feuillages, Ariane s'assit aux pieds de la Diane, & Melinte se coucha sur l'herbe aux pieds d'Ariane sans quitter sa main. Vn peu apres elle luy dit ; Confesserez

vous pas que ie vous ay amené en vn lieu bien plaissant? Il m'est encore bien plus agreable, respondit Melinte, que vous ne pouuez vous l'imaginer: & ie suis bien certain qu'il ne le fut iamais tant qu'à cette heure. Mais, Madame, poursuivit-il en luy baisant la main, puis-je assez estimer l'heur que ie possède? & seroit-il bien possible qu'un iour il me fust si bien confirmé, que ie fusse garanty des apprehensions qui me trauaillent? Melinte, repartit-elle, diminuez vos craintes, & receuez les asseurances de mon amitié aussi puissantes que mon honnesteté le peut permettre: apres auoir esprouué vostre amitié en tant de sortes, & vous estant obligée comme ie suis, vser de feinte & de froideur, ce ne seroit plus modestie, mais ingratitude. Ah! Madame, dit-il, si ie puis croire ce que i'entens, rendez ie vous supplie mon bon-heur entier: faites que rien iamais ne nous separe. Je vous en coniure par mon affection qui n'eut iamais d'esgale, par vostre beauté pour laquelle i'ay tant de saints desirs, & par cette belle main que ie tiens, & que ie coniure aussi par ces ardens baisers, de n'en toucher iamais d'autre que la mienne pour luy donner la foy. Ariane respondit; Je promets que ie ne seray iamais qu'à Melinte: i'y suis obligée par son merite, encore plus par son affection; & luy estant redevable de l'honneur & de la vie, ie remets l'un & l'autre en ses mains, comme choses qu'il a acquises, & dont il peut mieux disposer que moy mesme. Je parle ainsi à present que ie n'ay plus de pere, de qui la puissance absolüe pouuoit contraindre mes desirs. I'ose donc bien faire choix de vous, & le faisant, asseurez vous que ie sçauray bien le maintenir. Madame, reprit Melinte tout confus, arretez ie vous prie le cours de ces obli-

geantes paroles: mon ame n'est pas capable d'en supporter la douceur; & les plaisirs qui entrent en foule par mes oreilles la vont estouffer, si mes autres sens n'en recoivent vne partie. Ariane voyant qu'il passoit en prononçant à peine ces mots, se baissa, croyant qu'il allast esvanouir; & Melinte luy tendant ses bras amoureux, elle laissa poser sa teste iusques sur la sienne. Ce fut alors qu'il esprouua, que les plus chers plaisirs de l'amour ne sont pas ceux qui se ressentent le mieux: car il entra en vne palmoison qui endormit tous ses sens; & reuenant de cet assoupissement, l'amour & le respect combattirent en luy long temps, pour luy faire deliberer s'il entreprendroit dauantage, ou s'il se contenteroit de ces faueurs. Ariane connoissant le doute où il estoit, anima son visage d'vne rougeur, & ce teint la rendit encore plus maiestueuse, de sorte que Melinte s'estant releué, & ayant vn genouil en terre, n'osa conceuoir vn seul desir deshoneste, la voyant si pleine d'esclat; toutefois apres luy auoir plusieurs fois baillé la main, il voulut luy porter la bouche iusques au sein; mais elle le repoussant doucement de son autre main: Contentez vous, luy dit elle, de ces mains, qui vous seront tousiours fauorables, quand vous ne vous adresserez qu'à elles. Cette Diane ne dort pas si bien qu'elle ne soit tesmoin de vos actions: toutefois ie ne veux pas croire que vous ayez vne seule pensée contre mon desir, de peur d'estre obligée de diminuer l'affection que ie vous porte. Madame, respondit-il, la Diuinite viuante que ie voy me donne assez de retenue, & ie fay encore serment à cette belle main, de ne rechercher que les faueurs; puisque c'est d'elle que j'attens tout mon bon heur: mais j'espere luy donner tant

de baisers, qu'en fin elle s'en lassera, & se vouldra soulager de ces ennuyeuses caresses, me permettant d'en donner vne partie au reste. Ariane luy prenant doucement la teste avec ses mains, le baïsa au front, & luy dit; Vous receurez plustost ainsi des faueurs, quand vous ne les rechercherez point: puis elle se leua, & dit qu'il estoit temps d'aller retrouver Erycine & Epicharis qui seroient en peine d'eux. Melinte luy respondit; Si elles ont aussi peu pensé en nous que i'ay pensé en elles, ie ne croy pas qu'elles soient en grand soin de ce que nous sommes deuenus. Si ie n'estois asseurée, reprit Ariane, qu'elles nous cognoissent bien, ie n'eusse pas permis qu'elles m'eussent laissée: mais allons nous rendre avec elles dans ma chambre, & nous donnerons le reste du iour aux ceremonies, apres auoir donné ce matin à la liberté de nos pensées. Melinte quittant à regret ce beau sejour, où il auoit passé de si agreables momens, luy dit, que sa vie seroit trop heureuse, s'il pouuoit souvent trouuer des heures aussi douces. Avec ces discours ils reprirent le chemin de la grande allée, où ils trouuerent ces deux filles, dont la discretion fut telle, qu'elles ne s'enquirent point où ils auoient tant demeuré; & iugeant tous qu'il falloit s'en retourner, les Dames allerent regagner le mesme escalier, par lequel elles se rendirent dans la chambre; & Melinte prit vn autre chemin, pour oster l'opinion qu'ils eussent esté ensemble.

Palamede se promenoit dans le grand parterre qui estoit opposé à la face du logis, avec Pisistrate, qui auoit grand desir d'acquérir les bonnes graces du frere, pour paruenir à celles de sa sœur: & voyant venir Melinte du costé du parc, il alla au deuant de luy, & luy dit, qu'il

Qu'il estoit bien aise qu'il eust trouué des lieux assez beaux dans cette maison, pour le conuier à les voir plus d'une fois, & quitter pour eux la compagnie des hommes. Il est vray, respondit Melinte, que ie laisserois souvent les hommes pour vne compagnie que ie viens de quitter. Celle de vos pensées, dit Pisistrate, vous doit estre bien agreable. L'aurois tort, reprit Melinte, d'abandonner les hommes pour entretenir mes pensées : mais on les peut bien quitter pour les Deesses; & ie vous confesse que si i'eusse osé prolonger mon contentement, ie serois encore auprès d'une Diane qui est dans ce bois. Le lieu, dit Palamede, est assez plaisant, & la figure est bien des plus belles qui soient en toute la Sicile. Je vous auoue, continua Melinte, que mes yeux ont esté charmez auprès d'elle, & ie ne sçay encore comment i'ay pû m'en retirer. Plus on a de connoissance aux beaux ourages, dit Pisistrate, plus on les admire: le ne nie pas, respondit Melinte, que mon admiration ne vienne de quelque connoissance : mais ie suis asseuré que iamais homme ne sortit d'auprès d'elle plus satisfait que moy. Je suis marry, repartit Palamede, qu'il faille si tost prendre le chemin de Syracuse, puisque vous vous plaisez tant icy; mais i'espere que nous y retournerons souvent. Cependant qu'ils se parloient ainsi, Dicearque venoit de rencontrer sa niece au bas du grand escalier, par lequel elle estoit descenduë avec Erycine & Epicharis; & l'amenant dans le jardin elle parut si belle, avec vne rougeur qui se mella parmy l'esclat de sa blancheur, à cause qu'elle voyoit Melinte qui venoit de la quitter, qu'elle augmenta encore la passion de Pisistrate, & satisfist extrêmement celle de Melinte, qui esperoit de se voir bien tost possesseur

de tant de beautez. Pisistrate la salua, & Melinte qui auoit ses heures bien plus commodés; luy laissa la liberté de s'enquerir de sa santé, & de ses apprehensions du iour precedent. Il luy tesmoigna le regret d'auoir esté si mal-heureux que de nes'estre point trouué à son secours: que ne cedant à personne en affection ny en courage, il auoit despit de leur ceder en bonne fortune. Ariane receut toutes ses honnestetez, & ses assurances d'affection, avec vne froideur assez douce: ne voulant faire naistre en luy, ny l'esperance, ny les ressentimens de mespris; & incontinent elle fut deliurée de cét entretien, pource qu'il fallut aller disner.

Dicearque fit esclatter son ambition & sa somptuosité, dans l'ordont la salle estoit pleine; & la magnificence du festin descouuroit son naturel superbe, qu'il cachoit d'une courtoisie affectée. Apres que le repas fut finy, il fallut penser à retourner à Syracuse, & pour rendre cette entrée plus agreable au peuple, il fut arresté que les prisonniers seroient menez deuant, liez dans vn chariot; les Dames suiuroient apres dans vn carrosse, & le reste de la compagnie iroit en suite à cheual. Ce fut en cét ordre qu'ils partirent de cette maison, que Melinte laissoit à regret, à cause du contentement qu'il y auoit receu. Apres auoir mis Ariane dans le carrosse avec Erycine, Epicharis, & quelques filles, il monta à cheual, & se messa avec Dicearque, les Deputez, & les autres, qu'il entretenoit dans le chemin; & quelquefois il alloit au carrosse avec Pisistrate & Palamede, se monstrant aussi agreable parmi les Dames, qu'il estoit serieux & habile avec les plus vieux qui le suiuiotent.

Telephe qui auoit esté aduertiy dès le matin par Melin-

te, vint à sa rencontre hors la ville ; & descendant tous deux de cheual , ils ne pouuoient quitter les embrassemens que l'un & l'autre donnoient & receuoient , pleins d'un plaisir extrême de se reuoir : toutefois il fallut suiure la troupe. Tout le peuple estoit préparé pour le receuoir, & remplissoit les ruës par où il deuoit passer : de sorte qu'à leur entrée ils furent estonnez de voir tant de monde. Les Deputez auoient mis Melinte au milieu d'eux, Dicearque alloit apres luy avec Telephe, Palamede, Pisistrate & les autres amis, & il marchoit comme en triomphe, & entendoit avec plaisir les cris de ioye, & les souhaits que luy faisoient les Syracusains, en l'appellant Pere de son païs, & luy donnant mille loüanges. Ariane croyoit participer à cet honneur, & sentoit mille delices en son ame, de voir tant aimé celuy qu'elle aimoit tant.

En fin cette troupe se separa au logis de Dicearque, où Ariane fut laissée avec luy & Palamede; Telephe mena chez luy Melinte & sa fille Erycine; & les Deputez avec Pisistrate & les autres se quitterent pour se retirer chacun chez soy; quelques Officiers de iustice se saisirent des prisonniers, dont la condamnation & la mort suivirent quelques iours apres.

Lors qu'Hyperie eut fait à Melinte toutes les caresses qu'une vraye mere pourroit donner à son fils qu'elle auoit creu mort. Telephe le prit à part, & luy fit present de deux escripts; dont l'un estoit vne attestation signée d'Hermocrate, par laquelle il reconnoissoit qu'il auoit mis entre les mains de Telephe, un sien fils né à Lylibée nommé Melinte, qui à l'endroit du cœur estoit marqué d'un autre cœur, pour luy seruir si par hazard il

en auoit besoin vn iour. L'autre estoit vne lettre de Diocles escrite à Telephe, lors qu'il estoit encore à Lylibée, par laquelle il se resioüissoit de la naissance de ce fils d'Hermocrate, & disoit que ce cœur dont il estoit marqué, signifioit qu'il aimeroit son pais, & acqueriroit le cœur de tous ceux qu'il desireroit auoir pour amis. Telephe adiousta qu'il auoit heureusement trouué ces escrits, dont il ne luy auoit point voulu parler, croyant les auoir perdus; & que maintenant avec ces assurances, il ne doutoit point que Diocles ne fust conuaincu. Melinte se resioüit d'auoir trouué ces moyens à son arriuée, & luy déclara sa resolution d'accuser Diocles en public: & qu'à ce sujet il auoit demandé vne audience du peuple, aux Deputez qui luy auoient esté enuoyez.

On celebroit tous les ans à Syracuse vne feste bien ancienne, pour remercier les Dieux de la ruine des Tyrans, & c'estoit tousiours vn de la race de Thimoleon, qui presidoit aux jeux qui se faisoient, & vne fille de la mesme famille, qui presentoit les sacrifices, & donnoit les prix des jeux. Cette feste approchoit, & les Syracusains ayant sceu que Melinte desiroit quelque chose d'eux, voulurent qu'il fist sa demande ce iour-là, & dirent qu'estant deliurez non seulement de la tyrannie ancienne, mais encore par son moyen de tous subsides, ils ne pouuoient recevoir vn plaisir plus agreable le iour de cette feste que de recompenser Melinte en quelque sorte du bien qu'il leur auoit obtenu. Il en communiqua avec Ariane & Palamede, & dit qu'il craignoit qu'ayant à faire vne accusation & non pas vne demande, Diocles n'eust sujet de dire que les festes n'estoient pas des iours pour des iugemens. Il leur proposa s'il ne seroit point plus à propos de

parler premierement à Diocles, que peut-estre on obtiendrait tout de luy par douceur, luy monstrant les tesmoignages infailibles qu'ils auoient. Contre ces considerations il fut allegué qu'il falloit se seruir de la bonne volonté des Syracusains, & qu'en l'humeur où ils estoient, ils passeroient pour l'amour de luy par dessus les formes ordinaires; qu'il estoit dangereux de parler à Diocles, pource qu'il n'y auoit pas d'apparence qu'il se dessaisist que par force de ses biens; & qu'il iroit chercher quelques inuentions contre les moyens qu'ils auoient: que s'il estoit surpris, le trouble de cette nouveauté & de sa conscience luy ostant le moyen de repartir, le feroit condamner sur le champ: & qu'il ne falloit point traiter doucement vn homme qui auoit vsé de malice & de trahison: mais la raison d'Ariane fut trouuée la meilleure: que Melinte, pour se faire connoistre fils d'Hermocrate, & du sang de Pyrrhe & d'Achille, auoit besoin que cette verité fust connue en public, & qu'il n'eussent pas qu'un particulier l'eust auouée. Melinte reconnut bien que s'interessant dans l'honneur de sa maison, elle vouloit que son choix fust approuué de tout le monde; & confessa qu'en cet aduis, elle auoit tesmoigné beaucoup de sens & de courage. Palamede adiousta, que puis que cela estoit resolu, il vouloit prier son oncle, de permettre qu'il présidast aux jeux; afin qu'estant ce iour-là le Chef de toute la ieunesse de Syracuse, il peust auoir la force en main, pour faire comparoistre Diocles, & l'arrester s'il vouloit fuir le iugement. Tout estant ainsi resolu, ils attendirent ce iour avec impatience.

Cependant Melinte voyoit souuent Ariane, & receuoit auprès d'elle autant de douceurs qu'il en pouuoit res-

sentir , estant assuré de son affection. Iamais deux personnes ne firent vne si grande estime l'vne de l'autre , & iamais deux ames ne se rencontrerent avec tant de sympathie. Ils auoient tous deux vne grandeur de courage si parfaite , vn esprit si sage , vne viuacité si brillante dans la conuersation , & vne modestie si maiestueuse , outre les beautez dont la Nature les auoit si liberalement paragez , que iamais couple ne se rencontra avec tant de perfection & d'égalité : aussi admirant les belles qualitez l'un de l'autre , ils formoient en eux-mesmes vne amour si releuée , que toute autre chose ne leur eust esté que sujet de mespris , s'ils n'eussent encore plus mesprisé la presumption. Pisistrate voyoit aussi souuent Ariane , & son amour croissant tous les iours , il ne cessoit de luy en rendre de nouueaux tesmoignages : mais elle les receuoit si discrettement , qu'il n'auoit sujet , ny de s'en louer ny de s'en plaindre ; & Pisistrate croyant que sa vertu & sa modestie luy ordonnoient de le traiter ainsi , ne s'estimoit pas si esloigné qu'il estoit de ses esperances. En fin ce iour arriue , & Palamede ayant obtenu de son oncle qu'il presideroit , se fit Chef de tous ceux qui vouloient se presenter aux jeux. Melinte se rangea sous sa conduite , Pisistrate aussi , qui auoit fait dessein de se monstrier ce iour-là digne d'Ariane : Amyntas qui estoit des plus accomplis de Syracuse se joignit à eux , avec quelques autres , & Misandre mesme , qui voulut bien mesler son humeur triste à la réjouissance publique.

Ariane fut conduite au Temple dès le matin par son frere , & les filles de sa suite par Melinte , Pisistrate & les autres. Elle estoit vestuë d'vne robe blanche , dont le corps estoit ioint au sien , & faisoit parestre sa belle taille : sur

les hanches, elle s'elargissoit en mille plis; & traissant iusqu'en terre la rendoit fort maiestueuse. Elle estoit couronnée d'un chapeau de fleurs, & ses beaux cheueux ondez tombant sur vn col de neige, accompagnoient si bien les beautez de ce diuin visage, avec la blancheur de sa gorge, dont l'esclat esbloüissoit la veüe, qu'il n'y eut personne qui peust supporter sans blesseur la veüe de tant de merueilles. Elle presenta les sacrifices sur l'Autel de la liberté, & fit les vœux ordinaires: mais ses beaux yeux se mocquoient des paroles que prononçoit sa bouche, & alloient avec leurs diuins rayons, raur à tous ceux qui la regardoient, cette mesme liberté qu'elle leur souhaittoit perpetuelle. Melinte estoit si rauy en la voyant, & croyant que cette ceremonie seroit bien tost suivie d'une autre, qui le mettroit au comble des felicitéz, que ces cheres pensées luy seruoient d'un doux entretien. Pisistrate la regardoit aussi plein d'admiration, & de desirs accompagnez d'esperances, & les autres faisoient des souhaits qu'ils confessoient eux mesmes inutiles, & qui estoient aussi tost estouffez par le peu d'espoir.

Après que les sacrifices furent acheuez, & les festins qui les suivirent, elle fut menée sur vn eschaffaut qui auoit esté dressé dans vne grande prairie hors la ville, & toutes les Dames se mirent autour d'elle, en la mesme sorte qu'elles auoient esté au Temple. Les iuges ordinaires de Syracuse, qui deuoient aussi iuger des prix, estoient plus bas; entre lesquels estoit Diocles, qui ne s'attendoit pas d'estre ce iour-là iugé luy-mesme.

Melinte s'estoit pare de la mesme escharpe, & estoit monté sur le mesme cheual dont Ariane luy auoit fait present autrefois: mais outre cela ce iour-là mesme elle

luy auoit donné vn brasselet de ses beaux cheveux, qu'elle luy auoit attaché au bras. Palamede auoit desiré vne faueur de la gentille Epicharis, qui le rendoit de plus en plus amoureux, & elle ne voulant pas luy refuser ce contentement en cette occasion, auoit pris la peine de luy corder tous ses cheveux, avec des rubans de soye de ses couleurs, pource qu'ils alloient tous la teste nuë : les autres s'estoient accommodez autant à leur auantage qu'il leur auoit esté possible. Le premier exercice fut de la course à cheual, où la pluspart se presenterent; & apres auoir fait le tour de la place avec mille passades, se rangerent à l'entrée de la barriere. En mesme temps que les trompettes sonnerent, il arriua qu'une alloüette poursuivie d'un oubereau, se vint sauuer entre les mains d'Ariane : là dessus il s'esleua vn cry de tout le peuple, & Melinte tournant la teste, & considerant avec plaisir les actions d'Ariane, tardoit à partir avec les autres : mais s'apperceuant de sa faute, & poussant son cheual avec furie, il passa bien tost les derniers, & voyant Misandre qui estoit bien monté, & qui esperoit arriuer le premier, il le heurta par le costé, & le renuersa avec son cheual par terre. Pisistrate qui le suiuoit, ne pût empescher que son cheual ne tombast aussi, rencontrant celuy de Misandre. Ce desordre arresta la course des autres qui alloient en suite, dont la pluspart tomberent aussi, ne pouuant se retenir en l'ardeur où ils estoient; & ce nombre d'hommes & de cheuaux estendus, faisoit vn spectacle assez ridicule. Cependant Melinte qui ne voyoit plus que Palamede aussi auancé que luy, allentir la fougue de son cheual, voulant ceder cette victoire à son amy : mais la fortune voulut reconnoistre cette generosité : car
vn

vn des rubans de la teste de Palamede se desnoüant, vola, & vint enuironner celle de Melinte qui couroit apres au petit galop, & le ceignit en façon d'vn Diademe: comme si Palamede voyant que Melinte luy cedoit la Couronne de la victoire, eust voulu en recompense couronner son amitié: Quelques vns aussi interpreterent, que cét accident prédisoit à Melinte, qu'il paruiendroit vn iour à vne grandeur souveraine. Incontinent suivirent les applaudissemens, de ce que cette action auoit esté reconnuë, & d'Ariane mesme qui en son ame admiroit le gentil courage de Melinte. Palamede ayant eu le premier honneur, & Melinte le second; les autres pour se remettre de la honte qui leur estoit arriuée, songerent à parestre encore à diuers jeux, où les vns & les autres acquirent quelque gloire. Melinte eut le prix d'auoir mieux lancé le jaelot, Amyntas celuy de l'arc, & Pisisstrate celuy de la course à pied: pour reparer la honte de celle du cheual, qui luy auoit esté mal-heureuse.

La belle Ariane donna tous les prix qui auoient esté ordonnez, & Melinte estant monté le dernier sur l'eschaffaut, pour receuoir de sa main celuy qu'il s'estoit acquis, tout le champ retentit des voix du peuple qui auoit pour luy vne affection nompareille. Ariane luy dit d'vne voix assez basse, en luy presentant le prix; Courage, Melinte, il est temps que l'on sçache ce que vous estes. Ce dessein fut suivi de celuy du peuple, pource que Melinte tournant la teste, lors qu'il estoit encore sur l'eschaffaut, le plus ancien des Iuges luy dit: Genereux Melinte, vous auez promis aux Syracusains de demander au iourd'huy ce que vous desirez d'eux: ils vous prient de ne leur point differer dauantage ce contentement, afin que

ces passe-temps puissent finir par vne chose bien iuste & bien agreable, comme sera quelque recompense à vostre vertu.

Palamede estoit remonté à cheual avec ceux de sa troupe, & enfermoit les Iuges avec le reste du peuple: de sorte qu'il estoit impossible à Diocles de sortir. Alors Melinte estant à costé d'Ariane, fit signe qu'il s'accordoit au desir de tous, & chacun luy donnant silence il commença ainsi.



YRACVSAINS, *Si ie n'estois pressé par vos desirs, ie m'empescherois bien de troubler vos jeux, n'ayant pas à faire vne demande, mais vne accusation: toutefois estant forcé par vous mesmes & par mon iuste ressentiment, ie declare que c'est Diocles que j'accuse, & qui doit sortir d'entre les Iuges, pour estre condamné par eux, apres auoir esté conuaincu des crimes dont il ne se peut deffendre.*

Alors il s'esleua vn grand bruit, chacun regardant Diocles, & luy mesme fut bien troublé, ne s'attendant pas que cette affaire le deust toucher: puis se remettant de son estonnement, il representa que c'estoit le surprendre, & qu'ils n'estoient pas en vn iour qui permist d'accuser les Citoyens; toutefois le peuple voulant que Melinte continuast son accusation; Diocles fut contraint de se retirer d'entre les Iuges, & de se mettre à part, attendant le discours de Melinte, sur lequel il pourroit former sa deffen-

se : ces contestations estant appaisées avec le bruit, Melinte reprit ainsi.

Es Dieux me sont tesmoins, si ie n'aime pas mon pais à un tel point, que i'ay eu peine à me resoudre de despleire à un de nos Citoyens, en luy redemandant les biens qu'il me retient ; Et ie croy que si mon honneur n'eust esté meslé à mon interest, i'eusse abandonné mes pretentions, pour me contenter de la fortune où ie suis. Mais ces mesmes Dieux me iugeroient indigne des faueurs qu'ils m'ont faites, si ie les laissois perdre ; Et mon silence seroit plustost estimé la scheté que patience.

Chacun de vous s'est estonné d'où venoit la richesse de Diocles ; n'estant point un homme qui ait quantité de vaisseaux pour le trafic, ou qui ait pris à ferme aucune chose publique ; qui sont les moyens ordinaires pour paruenir de peu de biens à de grandes facultez ; la fortune recompensant quelquefois ceux qui se sont entierement donnez à elle. Les biens de la terre ne tombent pas du Ciel en un moment sans estre venus ; ce n'est pas là leur origine : mais étant de la possession des hommes, ils ne peuvent arriuer à personne sans l'ordre de succession ou d'acquisition. Je ne sçay pas par quelle succession les biens d'Hermocrate pouuoient eschoir en partage à Diocles ; aussi qu'il les ait acquis, il ne peut le iustifier par aucun tilre. Mais puis qu'il faut pour sçauoir le se-

cret de ses affaires , que ie vous declare celuy de ma vie ; ie ne veux rien cacher à ceux qui me tesmoignent tant d'affection ; & ie ne doute point qu'apres auoir reconnu la verité , vous ne rendiez la iustice à qui elle est due.

Syracusains , la pluspart d'entre vous se peut souuenir d'Hermocrate , qui par un mal-heur fut banny de cette ville ; il croyoit Diocles tellement son amy , qu'il ne craignoit point de luy remettre entre les mains tout ce qu'il possédoit dans Syracuse , & au reste de la Sicile , pour en auoir le gouuernement iusques à son retour : mais Hermocrate s'estant perdu par une auanture qui n'a point esté scenée ; Diocles qui n'en auoit plus de nouvelles , se résolut en fin de dire sien tout ce qui estoit à Hermocrate. Cette usurpation eust esté pour iamais cachée , sans qu'un autre dépost fust donné à un amy plus affectionné & plus fidelle que luy. Diocles auoit accompagné Hermocrate à une iournée seulement de cette ville lors qu'il s'en alla : mais Telephe le suiuit iusques au port de Lylibée , où il deuit s'embarquer pour passer à Carthage , & Euphrosyne qui estoit partie de Syracuse fort grosse , estant surprise en ce lieu des douleurs de l'enfantement , accoucha d'un fils qu'Hermocrate ne voulut point mettre sur la mer , mais pria Telephe del'apporter à Syracuse , & le nourrir comme sien iusqu'à ce qu'il fust de retour. Diocles n'a pas ignoré cette verité , car Hermocrate luy en manda la neuuelle , &

Telephe aussi, ausquels il fit responce pour se resjouir avec eux. Je ne craindray point, Syracusains, de vous dire que ie suis ce fils d'Hermocrate, que vous avez creu iusques icy fils de Telephe.

(Tout le peuple battit des mains d'excès de resioüissance, entendant cette nouueauté; & Melinte continua.)

Hermocrate vous auoit tousiours aimez, & vous en avez chery la memoire, & ie sçay que son bannissement mesme fut vn tesmoignage de vostre affection enuers luy. Je ne doute donc point que vous ne receuiez avec ioye ces nouuelles, puis que vous l'avez aimé, & que vous me voulez aimer aussi. Il ne me reste qu'à vous donner les preuues de ce que ie vous dis, qui parestront si claires, que vous ne mettrez point en doute, ny ma naissance, ny l'infidelité de Diocles: car outre que ie pourrois faire voir plusieurs témoins; Hermocrate donna en partant à Telephe vn escrit signé de sa main, par lequel il reconnoissoit luy auoir mis vn sien fils entre les mains, qui à l'endroit du cœur estoit marqué d'un autre cœur.

(Telephe qui estoit present donna cét escrit aux Iuges, & Melinte poursuivit.)

Diocles mesme faisant responce à Telephe, luy escriuit à Lylibée qu'il se resioüissoit de la naissance de ce

filz d'Hermocrate, & que ce cœur dont il estoit marqué signifioit qu'il gagneroit le cœur d'un chacun, & aimeroit bien son país.

(Telephe mit encore cette lettre entre les mains des luges, laquelle ayant esté leuë tout haut, Melinte ouurit son habit, & descourant son estomac, dit en fortifiant sa voix.)

Maintenant, Diocles, regarde ce cœur, qui accuse le tien de la plus lasche perfidie qui fust iamaïs. C'est ce cœur qui te reproche d'auoir manqué de foy à ton amy; encore ne sçay-ie si à ce crime tu n'as point adiousté vne trahison encore plus grande: ostant du monde Hermocrate, pour estre plus assuré de ses biens. Toutefois ie ne te veux pas croire si meschant: Mais quelles raisons peux tu alleguer, pour couvrir l'usurpation de ce qui estoit à luy? car si tu ne le voulois pas garder, pourquoy te mocquois tu de Telephe, quand il t'auertoit de ne point aspirer à la fille d'Aristide par le support de ces richesses, pource que le filz d'Hermocrate viuoit? & si tu ne le voulois pas croire, pourquoy ne rendois-tu pas ces biens à ceux de la race d'Hermocrate, puis qu'ils n'estoient point à toy? Voila donc ces tresors que tu as acquis, sans courir fortune ny sur mer ny sur terre: voila le gain excessif que tu as fait, ne donnant en eschange de tant de possessions, que ta foy & ta conscience que tu as abandon-

nées. Ce trafic se faisoit en toy-mesme, & tu n'auois qu'à deliberer, si pour acquerir ces biens tu trahirois ton ame. Ton auarice disputoit contre ta fidelité, & l'arrest que ton ingement donna pour elle, est le seul titre de tes nouvelles acquisitions. Mais c'est abuser des oreilles des Iuges & du peuple de chercher d'autres preuues apres vne chose si claire : il faut donc que tu desauouës l'escriture d'Hermocrate, & la tienne mesme : puis apres que tu rapportes les tiltres de tout ce que tu possedes ; & tout cela estant impossible, ie demande aux Syracusains, qu'ils te condamnent à me rendre les biens que tu me retiens iniustement, pour soutenir deormais le rang de ma naissance ; & qu'ils ordonnent à son infidelité la peine qu'elle a meritée.

Melinte ayant ainsi parlé, tout le peuple commença à battre des mains, & à crier que l'on condannast Diocles : mais les Iuges ayant fait cesser le bruiet, luy commanderent de parler. Alors il demanda du temps pour penser à sa iustification, & dit qu'il ne pouuoit pas respondre sur le champ aux impostures de Melinte : qu'il scauroit bien s'en defendre : mais qu'il luy falloit du loisir, pour faire voir la fausseté de ce qu'il auoit dit. On luy presenta les escrits que Telephe auoit donnez, & on luy demanda s'il les reconnoissoit. Il ne peût desaduouer son escriture, ny celle d'Hermocrate ; mais il dit que cela n'empeschoit pas qu'il n'eust acquis les biens qu'il auoit, d'Hermocrate mesme auant son départ. Les Iuges s'enquirent de luy, s'il en auoit les contracts de vente passez entr'eux. Il respondit qu'ils

estoyent chez luy, & qu'il demandoit seulement du temps pour les faire voir. On luy ordonna d'en-
uoyer Amyntas son fils qui estoit present pour les ap-
porter : mais il dit qu'ils n'estoyent pas en lieu où il
les peust trouuer, & que luy mesme auoit besoin de
terme pour les mettre par ordre. Toutes ces responses
n'estant que des fuittes, & le peuple ne cessant de crier
contre luy, les Iuges s'assemblerent pour deliberer, &
apres auoir long temps parlé ensemble, les vns excu-
sans Diocles, qui auoit iusques-là ignoré ce que Melin-
te estoit : les autres se monstrans plus seueres, & disans
qu'en toute façon il auoit voulu retenir ce qui ne luy
appartenoit pas. En fin le Magistrat prononça ce iuge-
ment. Que Diocles estoit condamné, non seulement de
remettre entre les mains de Melinte tous les biens qu'il
tenoit d'Hermocrate : mais encore de luy payer le re-
uenue du temps qu'il les auoit possédez ; & que pour
l'infidelité qu'il auoit commise, on le bannissoit pour
trois ans.

Le peuple tesmoigna estre bien satisfait de ce iuge-
ment par ses applaudissemens, & Melinte faisant signe
de la main qu'il vouloit encore parler, chacun se teut,
& il dit. Je vous ay demandé seulement iustice, & main-
tenant ie vous demande vne grace, qui est de reuo-
quer le bannissement de Diocles en ma faueur, & pour
le reuenue de mes biens du temps qui est passé, ie le don-
ne à Amyntas, dont j'estime les bonnes qualitez, & de
qui ie veux estre amy.

Chacun ayant admiré la generosité de Melinte enuers
le pere, & sa liberalité enuers le fils, il obtint tout ce qu'il
desiroit, & cette derniere action finit l'assemblée. Me-
linte

l'inte prit la main d'Ariane , qui estoit pleine de satisfaction pour l'heureux succès de leurs desirs , & la ramena chez elle , avec Palamede & leurs amis. Diocles plein de tristesse & de honte, se retira chez luy , ne sçachant s'il deuoit se plaindre ou se louer de Melinte , duquel en si peu de temps il auoit receu tant de desplaisirs & de graces.

Dicearque qui n'auoit point assisté aux jeux , à cause de sa place qu'il auoit quittée à son neveu, apprit cette nouuelle par vn de ses amis , qui alla aussi tost l'en aduertir, pour auiser ensemble comment ils auroient à viure avec Melinte , puis qu'il estoit reconnu pour fils d'Hermocrate. Lors qu'ils estoient sur ce doute Melinte entra amenant Ariane : Palamede fit le recit à Dicearque de ce qui s'estoit passé , & tellement à l'auantage de Melinte, qu'il fut obligé de luy tesmoigner, qu'il se resioüissoit de ce bon-heur : Mais apres que chacun se fut retiré, lors que Palamede dit à son oncle qu'ils se deuoient estimer bien-heureux , de ce que rien desormais ne se trouueroit à redire en Melinte , pour luy donner sa sœur, puisque sa naissance & ses biens estoient aussi grands qu'ils les pouuoient desirer ; Dicearque respondit que cela meritoit bien d'y penser à loisir , & pour ceste fois n'en pût tirer autre chose. Cette reconnoissance de Melinte pour fils d'Hermocrate, fut cause de la mort de deux personnes : Diocles , soit qu'il se fust saisi de regret & de honte, de se voir decheu de si grands biens, soit de repentir d'auoir commis vne si grande infidelité , fut trouué mort le lendemain dans son liét; & Hyperic qui auoit creu iusques-là posseder vn bien inestimable, ayant vn fils si accomply que Melinte, receut vne plus grande affliction

quand elle sceut qu'elle n'estoit pas sa mere, que lors mesme qu'on luy apporta la nouuelle qu'il estoit mort, & ne pouuant resister à cette douleur, perdit la vie quelques iours apres.

Melinte ayant ressenty la perte d'une personne qui luy tenoit lieu d'une mere fort affectionnée, ne pût pas toutefois garder long temps en son ame ce desplaisir, estant trop diuertey par ses esperances; & se voyant remis en la possession de tout ce qui luy pouvoit appartenir, il ne croyoit pas que rien desormais peust retarder ses contentemens, s'assurant de l'affection d'Ariane, de Dicearque & de Palamede. Il venoit tous les iours les visiter, & se fust estimé trop heureux, receuant à tous momens de nouveaux tesmoignages de l'amitié d'Ariane, sans quelque froideur que Dicearque luy faisoit prestre, & que toutefois il taschoit à cacher d'une feinte courtoisie. Pisistrate rendoit aussi beaucoup de devoirs à Ariane; & Melinte voyant que Dicearque faisoit plus d'estat de luy que de coustume, croyoit que ce n'estoit que pour luy faire un refus plus honneste : toutefois ils furent bien estonnez, quand Palamede ayant prié son oncle de resoudre le mariage de Melinte, il luy respondit, qu'il falloit auparavant qu'il allast avec sa sœur & luy à Corinthe, pour voir leurs parens, & en auiser avec eux : qu'à ce dessein ils s'en iroient dans le vaisseau de Pisistrate qui s'en retournoit, & qu'ils se preparassent tous deux à ce départ. Palamede voulut opposer quelques raisons à cette resolution; mais elles furent inutiles, & ayant appris cette nouuelle à Melinte & à sa sœur, il les remplit tous deux de confusion. Melinte fit prier Dicearque par Palamede, qu'il peust les accompagner en ce voyage, pour se faire

connoistre de leurs parens à Corinthe : mais il dit que cela n'estoit pas à propos , & qu'il sembleroit qu'il leur allast parler d'une affaire resoluë , s'il estoit parmy eux. Cette responce troubla Melinte encore davantage, ne sçachant à quel dessein il entreprenoit ce voyage & faisoit ces difficultez : car il croyoit l'aüoir assez obligé en luy sauuant la vie , & par son serment encore , pour luy faire oublier les vieilles inimitiez.

Toutefois tout se prepare au départ , & Melinte trouuant vn iour Ariane estonnée de cette necessité de partir , luy dit plein de douleur. Madame , que signifie ce mal-heureux voyage ? Je ne sçay quelle en sera la fin, mais son commencement est trop triste , pour me promettre rien de bon. Lors que ie me croyois le plus heureux des hommes , ie trouue que le bon-heur s'esloigne le plus de moy , & me deffend mesme de le suivre. Melinte , respondit Ariane , ie ne sçay pas quels sont les desseins de mon oncle : mais les miens seront tousiours pareils aux vostres ; & me trouuant secondée par mon frere , il n'y a point de force qui me puisse vaincre. Viuez ie vous prie en repos autant que vous le pourrez durant cette absence ; & si mon esloignement vous cause de la douleur , que l'assurance de mon amitié la diminuë. Madame , reprit Melinte , que ces tesmoignages me rendent heureux en vne occasion si mal-heureuse ? mais puis-je m'asseurer que iamais aucune contrainte ne changera en vous cette volonté ? Non seulement , dit-elle , vous le deuez croire , mais encore vous m'offencez d'en douter : car il semble que vous me iugiez capable de legereté & d'ingratitude. Pardon , Madame , dit-il , iamais ie n'ay cëu que ces deffauts peussent auoir lieu en vostre ame : mais perdant

tant de biens par vostre esloignement, il me semble que
iamais rien ne me les redonnera. Que puis-je plus esperer,
apres la perte des assurances trompeuses qui m'ont flat-
té ces iours derniers; voulez vous que ce mal-heur de ne
vous plus voir me promette quelque bien, puis que
mes plus grands contentemens ne m'ont apporté qu'une
si cruelle fortune? Melinte, dit-elle, les contentemens
sont suivis de desplaisirs, & les tristesses de ioyes: les cho-
ses contraires succedent les vnes aux autres: nous aurons
vn peu à souffrir estant esloignez: mais apres auoir en-
duré, le retour en sera plus glorieux & plus agreable: ne
m'affligez point, ie vous prie, de vos ennuis, les miens
me suffiront; & lors que ie sçauray que vous supporte-
rez cette separation avec constance, i'auray bien assez de
courage pour vous imiter. Il me semble, repartit-il, que
c'est auoir peu d'amour, que d'auoir tant de courage: car
quelle force pourra resister aux desplaisirs de mon ame,
estant priué du bon-heur de vous voir? la resolution ne
peut rien pour le soulagement d'un mal, que le iugement
trouue plus grand, plus il cherche de quoy se consoler: pour
perdre l'ennuy, il faudroit que ie perdisse vostre souuenir,
& ie ne le puis qu'avec la vie. Melinte, dit Ariane, ie sçay
bien que nostre mal-heur est grand: mais vous en plai-
gnez vous à moy, afin que par mes raisons ie rache à vous
consoler? ou afin que le connoissant, ie ne manque pas
à le souffrir autant que vous? pour le premier vous con-
fessez que la raison n'y peut rien, & pour l'autre vous fe-
riez cruel de vouloir augmenter ce qu'il endure. Soula-
geons nous plustost de part & d'autre; & comme ie tra-
his ma douleur pour vous tesmoigner de la constance, fei-
gnez aussi d'en auoir, afin qu'estant contans de nos maux,

nous soyons au moins deliurez de ceux que nous ver-
rions souffrir l'un à l'autre. Ces paroles qui parloient de
l'excès d'une belle amitié firent venir les larmes aux yeux
de Melinte ; & il eut de la peine, tant il estoit saisi, à
former ces mots. Madame, que j'aye dessein d'accroistre
vostre douleur, cela est impossible, ayant pour voustant d'a-
mour : mais ie me voy reduit à ne sçavoir comment vous
parler ; car si ie vous tesmoigne ce que ie souffre, vous vous
en plaignez ; & si ie ne vous le tesmoigne pas, que pense-
rez vous de mon affection ? Ariane voyant sa difficulté
de parler, l'interrompit pour le soulager, & luy dit : Ie
ne veux plus de tesmoignages de cette affection : si j'en
auois encore besoin, vous n'en auriez pas desia tant re-
ceu de la mienne. Non, mon cher Melinte, ie suis plus
assurée de vous que de moy-mesme ; mais ces mutuelles
assurances ne seruent qu'à nous faire plus ressentir cet
accident : si nous nous aimions moins, nous se-
rions moins touchez de cette separation : estimons donc
nostre douleur bien glorieuse, puis qu'elle a une si bel-
le cause ; & ne nous en plaignons point, puisque nous
ne voudrions pas auoir moins d'affection, pour souffrir
moins de peine. Melinte plein de saisissement, & touché
encore de ces cheres paroles, n'en pouuoit prononcer au-
cune ; & baïsoit seulement les mains d'Ariane, qui estoient
toutes humides des grosses larmes qui luy tomboient. Il
fut quelque temps ainsi, & Ariane cedant à un obiect si
sensible, laissa couler aussi quelques pleurs de ses beaux
yeux, qu'elle essuya voulant cacher son affliction à Me-
linte, qui s'adressant en fin à ce qu'il tenoit, dit sans se re-
leuer. Belles mains, faut-il que ie vous quitte, & que j'a-
bandonne les douceurs dont vous me fauorisez ? au moins

promettez moy de n'en receuoir iamais d'autres en la place des miennes. Iurez-le moy, belles mains, par vos douceſtraintes ; ie veux croire que vous ne me ferez iamais infidelles : car vous eſtes trop delicates pour entreprendre de me faire mourir, & trop blanches pour n'eſtre pas innocentes. Ariane reſpondit : Ie vous promets pour elles tout ce que vous deſirez, & veux bien (dit-elle en les luy preſentant) que vous les baiſiez encore, pour gage de leur fidelité: puis elle ſe leua pour ſe diuertir de ſa douleur, & n'eſtre pas ſurpriſe avec ce trouble par lequel vn qui fuſt ſuruenue. Auſſi Palamede arriua quelque temps apres, avec lequel ils deuſerent ſur le ſujet de ce voyage, dont ils ne pouuoient connoiſtre les vrayes cauſes. Il promit à Melinte de l'aduertir par ſes lettres de tout ce qui ſe passeroit, & de reuenir luy-meſme à Syracuſe ſ'il eſtoit beſoin. Car d'oſer reſiſter à leur oncle, entre les mains duquel Ariſtide auoit remis Ariane en mourant, ils ne le iugeoient pas à propos.

Depuis ce iour iuſques au départ, Melinte ne pût entretenir Ariane en particulier ; ſeulement il luy fit voir ces vers, auſquels il donna vn nom emprunté pour pouuoir eſtre leus deuant tous.

*Quel ſort ennemy de ma flamme,
Et quel deuoir imperieux,
Eſloignant Cloris de ces lieux,
Rauir la moitié de mon ame ?
Donques ie la verray partir,
Et ie pourray bien conſentir
A ceſte abſence ſi cruelle ?
Deſtins jaloux, Cieux inhumains,*

Faites moy partir avec elle,
Ou laissez ma vie en ses mains.

Fut-il iamaïs telle iniustice ?
Et faut-il iusqu'à son retour,
Que plus i'ay pour elle d'amour,
Plus on m'ordonne de supplice ?
Desia l'effroy, le desplaisir,
Les soins qui n'osoient me saisir
Deuant sa diuine presence,
A son départ me viennent voir,
Et menacent mon innocence,
De leur tyrannique pouuoir.

Cloris, estes vous resoluë,
Mésprisant le Dieu de nos cœurs,
De ceder aux tristes rigueurs,
D'une force moins obsoluë ?
Je ne puis vous faire pitié
Par l'ardeur de mon amitié,
Ny par la source de mes larmes ;
Sortez, pleurs ; ie vous veux punir :
Lettez, mes yeux, ces foibles armes
Qui ne la sçauroient retenir.

Doncques ceste humeur si constante
A subir les loix du deuoir,
Peut songer à ne me point voir,
Et pretendre le nom d'Amante ?
Cloris, i'ayme autrement que vous ;
Mon cœur doit bien estre jaloux

*De ce froid repos de vostre ame :
Car si ie ne verse en vos yeux
La plus viue ardeur de ma flamme,
Le sens que i'estouffe en tous lieux.*

*Hé bien, vous me laissez, cruelle,
Rien ne vous scauroit empescher :
La pitié ne vous peut toucher,
Vous n'avez point de lieu pour elle.
Adieu donc, seuer Beauté,
Adieu, cœur plein de dureté :
Qu'un vain espoir ne nous console :
Ne pretendons rien de formais :
Je perds la vie & la parole,
Et vous me perdez pour iamais.*

A peine peut-on dire les douleurs que ressentit Melinte à ce départ, celles d'Ariane n'estoient pas moindres ; mais elle les cachoit si bien, que Dicearque ne connut point le regret qu'elle auoit de partir. Ils furent accompagnez par leurs amis au vaisseau de Pisistrâte, & Melinte ne peût dire Adieu que des yeux à la belle Ariane : mais cét Adieu leur fut si sensible, qu'elle s'en alla avec Epicharis dans vne des chambres du nauire se mettre sur vn liët, où elle se noya de pleurs ; & Melinte apres auoir pris congé de Dicearque, & quitté les chers embrassemens de Palamede, ne la voyant plus, & le vaisseau s'esloignant, se laissa tellement saisir à la douleur, qu'il tomba entre les bras d'Arcas, & fut long temps à reuenir de son évanouïssment.

Sa recherche & son amour estoient desia diuulgüées
dans

dans Syracuse, & plus il estoit aimé, plus sa douleur causoit de pitié : en fin saisy de desplaisir & de foiblesse, il fut reconduit chez luy, pource qu'il ne logeoit plus chez Telephe, depuis qu'il auoit esté remis en ses biens ; & ses amis tascherent à le diuertir de son ennuy, duquel autre que luy ne pouuoit reconnoistre la grandeur.

Pisistrate croyant auoir le vent d'amour aussi favorable comme celuy qui enflait ses voiles, s'en alloit à Corinthe, glorieux de la despoüille qu'il s'imaginoit emporter, & de la conqueste qu'il se promettoit. Dicearque luy donnoit de grandes assurances ; la discretion d'Ariane ne luy deffendoit point d'esperer, & la courtoisie de Palamede luy faisoit croire, qu'il n'auroit point son alliance desagreable.

Il ne s'estonnoit point de ce qu'Ariane fuyoit son entretien, iugeant qu'en ces occasions de recherche, les filles veulent parestre modestes ; Dicearque qui le receuoit avec plus de franchise, estoit sa compagnie ordinaire ; & Ariane n'auoit autre consolation, qu'en parlant de Melinte avec son frere & sa chere Epicharis. Palamede qui deuenoit de plus en plus amoureux de la beauté de cette fille, ne cessoit de luy rendre des tesmoignages honnestes de sa passion : mais entendant à toute heure les reproches de tant de legeretez, il se resolutoit à se faire cognoistre desormais fidele, & se soubmettoit à toutes les espreuues qu'elle pourroit desirer. Ayant passé l'Isle de Cephallenie, ils entrerent dans le Golphe de Corinthe, auquel on auoit depuis peu donné le nom de Lepante. Ils arriuerent en fin à Corinthe, où Sebaste, qui estoit cousin de Dicearque, les vint recevoir pour

les mener chez luy , & ils y furent receus , ainsi que le vouloit la qualité de Dicearque , & la magnificence de Sebaſte. Ce vieillard eſtoit renommé pour ſon autorité dans la ville , & plus encore pour eſtre des plus ſçauans de la Grece : Il fit ſalüer à Palamede & à Ariane vne ieune fille qu'il auoit nommée Caſſiope , qu'ils trouuerent fort modeſte & bien agreable : mais quand Ariane entendit parler des merueilleuſes qualitez d'vne autre ſœur qu'elle auoit , nommée Cyllenie , qui eſtoit parmy les filles qui ſeruoient au Temple de Iunon , elle eut vn grand deſir de la cognoiſtre. Sa beauté luy auoit acquis le prix par deſſus toutes celles de Corinthe : mais ſon eſprit s'eſtoit encore rendu plus recommandable ; & l'amour extrême que luy auoit porté le vertueux Lepante , ne luy auoit pas moins donné de reputation. Ariane eut de l'impatience que le lendemain fuſt arriué pour l'aller voir , & Cyllenie qui entendit parler de cette diuine Ariane , n'eut pas vn moindre deſir de iuger de tant de perfections.

Piliſtrate eſtant venu dès le matin les voir , conduiſit au Temple Ariane & Palamede ; & apres les ſacrifices faits , ces deux belles filles s'aborderent avec tant de rauiſſement de part & d'autre , qu'il n'y eut iamais de ſatisfaction pareille. Leur veü eſtoit ſi occupée à iuger de leurs beautez , qu'elles ne ſongeoient pas à ſe parler. Ariane auoit vn eſclat qui ſurpaſſoit de beaucoup celui de Cyllenie , mais la douceur & la modeſtie eſtoient bien pareilles en elles : les admirations qu'elles firent alors l'vne de l'autre , furent depuis ſuiuies de mutuelles proteſtations d'amitié ; & au lieu d'auoir de la ialouſie des aduantages que chacune recognoiſſoit en ſa compagne , la cognoiſſance de ces merites fit naiſtre en elles plus d'eſti-

me & d'affection. Bien tost les feintes ciuilitéz furent bannies d'entr'elles , pour faire place à vne franchise qui ne leur permit plus de se rien celer. La ressemblance de leurs beautez & de leurs esprits lia leurs ames , & incontinent apres, celle de leur fortune rendit cette amitié parfaite.

Dicearque qui vouloit mettre en effect la promesse qu'il auoit faite à Pisistrate , declara en fin à Palamede qu'il ne les auoit amenez à Corinthe, que pour en faire le mariage avec Ariane : qu'il ne consentiroit iamais qu'elle espousast Melinte fils de son plus grand ennemy, & que c'estoit vne resolution qu'il falloit prendre. Palamede estonné de ce discours, tascha de le diuertir de son dessein : luy representa les obligations qu'il auoit à Melinte, l'amour de son amy pour sa sœur, & en suite les sermens par lesquels il auoit promis de ne luy vouloir iamais de mal à cause de son pere ; & que s'il y manquoit les Dieux ne luy pardonneroient pas. Dicearque luy respondit , que son intention n'auoit esté que de penser à Telephe, & non point à Hermocrate, en faisant ce serment ; & quand il seroit obligé de le tenir, qu'il ne s'estoit pas pour cela engagé de luy donner sa niece. Palamede employa toute l'eloquence dont il fut capable , pour le ramener à la raison ; luy reprochant la vie que Melinte luy auoit conseruée, & combien il se feroit de tort de tesmoigner tant d'ingratitude : mais rien ne peût fleschir cét esprit opiniastre & vindicatif, qui voulut encore que Palamede en aduertist sa sœur , pour prendre ses resolutions.

Ces cruelles nouuelles la surprirent tellement, qu'elle en perdit la parole : mais Palamede voyant que cette bel-

le ſœur ſ'emportoit à la douleur & abbattoit ſon courage, releua le ſien, pour l'aſſeurer qu'il ne ſouffriroit point cette tyrannie : que leur oncle deuoit auoir ſur eux vne douce autorité, mais non pas vn iniuſte empire : qu'il ſçauoit bien ſe garantir & elle auſſi de cette oppreſſion, & que meſmes quand il ne ſeroit point ſi redeuable à Melinte, la façon de faire de Dicearque l'obligeoit aſſez à ne luy pas ceder. Ariane vn peu remiſe par cette reſolution, pria ſon frere d'eſſayer premierement à gagner l'eſprit de ſon oncle par douceur : mais elle fut bien eſtonnée lors que Dicearque meſme luy teſmoigna, que iamais rien ne le diuertiroit de ce deſſein ; & ne ſçachant comment ſe deliurer des cruautez de ſon oncle, & des importunittez de Piſiſtrate, elle ſ'auifa de ſ'enfermer avec Cyllenie dans le Temple de Iunon, emmenant ſeulement Epicharis avec elle, cependant que Palamede retourneroit à Syracuſe aduertir Melinte de ce qui ſe paſſoit, pour reſoudre enſemble comment elle auroit à ſe conduire. Le lendemain elle pria ſon oncle de trouuer bon qu'elle fuſt quelques iours avec Cyllenie, lequel croyant qu'il ſ'en pourroit mieux aſſeurer dans ce Temple, y conſentit ; & Palamede feignant qu'il alloit à Athenes voir ſes amis, partit, & ſ'embarqua ſecrettement, pour prendre le chemin de Syracuſe.

Auſſi toſt qu'Ariane fut ſeule avec Cyllenie, elle luy fit part de ſa douleur, & apres ne luy auoir celé aucune choſe de Melinte & d'elle, luy demanda conſeil de ce qu'elle auoit à faire. Vous auez raiſon, dit Cyllenie, de vous adreſſer à moy en cette occaſion : il vous eſtoit impoſſible de trouuer vne perſonne plus ſçauante que moy ſur ce ſujet, pour vous dire ce qui eſt neceſſaire en cette

conduite, & fuit ce qui est à craindre; & puisque l'expérience m'a si bien apprise, ie veux vous dire la plus grande partie de ma vie, qui sera la meilleure instruction que vous puissiez recevoir. Ariane l'ayant priée de luy faire vn discours si vtile & si agreable, Cyllenie luy parla ainsi.



HISTOIRE DE LEPANTE, & de Cyllenie.



ELLE Ariane, vous auez conceu vne si bonne opinion de moy, qu'il me fâche de la diminuer par le recit que ie vay vous faire: car vous sçaurez de si tristes accidens, qui me sont arriuez par ma seule faute, que vous auez de la peine à croire que j'aye iamais peu tomber en vn tel auenglement: toutefois pour le soin que j'ay de vostre bon-heur, j'aime mieux preferer vostre salut à ma repuration enuers vous: afin que vous receuiez par mon exemple les conseils qui vous seront viles. Je ne craindray point de r'ouuir mes playes pour l'amour de vous, & pour vous en faire horreur, afin que vous euitiez les mesmes precipices où ie suis tombée. J'auray encore quelque consolation dans mes malheurs, s'ils peuuent au moins seruir à empescher que vous ne foyez mal heureuse.

Sçachez que Lepante de qui vous auez oüy parler estoit de Naupacte, qui est vne ville assez proche d'icy,

assise à l'emboucheure du Golphe de Corinthe, lequel ayant perdu son pere & sa mere, ne se contenta pas des soins qu'ils auoient pris de le faire instruire en toutes les estudes & les exercices qui luy estoient necessaires: mais apres auoir marié vne sœur qu'il auoit à vn des premiers d'Athenes, il vint en cette ville, attiré par la reputation du grand Philosophe Arthemidore, qui estoit particulier amy de Sebalte mon pere, pour apprendre de luy les sciences les plus cachées & les plus releuées. Bien que cette occupation fust fort serieuse, & qui demandoit vn esprit tout entier, il ne laissoit pas encore de se diuertir à toutes sortes d'arts & de gentilleses, où il reüssissoit avec autant de gloire, comme sa naissance luy fournissoit de bon-heur pour tout ce qu'il entreprenoit. Artemidore admiroit cét excellent Genie, & quelquefois en entretenoit mon pere avec admiration: bien souuent il venoit chez nous, où ils conféroient ensemble de leurs estudes; & estant plein de courtoisie, souuent il s'eschappoit d'eux pour me venir parler, comme se deslassant des discours sublimes qu'ils traittoient; & il me diuertissoit de propos si agreables, qu'il m'eust semblé que son seul aduantage estoit d'entretenir les Dames, si ie n'eusse sceu combien il estoit estimé pour choses de plus grands poids: aussi en faisois-ie beaucoup plus d'estat, & l'honorois comme vne personne esloignée du commun: Il tesmoignoit aussi qu'il prenoit vn grand plaisir à m'entretenir, pource que j'aimois à quitter les discours ordinaires des filles, & taschois à rendre mon esprit capable de choses que nous auons coustume d'ignorer: de sorte que s'accommodant à la suffisance de mon iugement, il me faisoit auoir de belles considerations, par des moyens

fort intelligibles ; & lors qu'il s'esleuoit vn peu , & qu'il voyoit que ie l'atteignois , il me fortifioit en ceste estat de pensées plus releuées , & me faisoit naistre le desdain de nos amusemens ordinaires , avec le desir de polir mon ame , & de la rendre plus parfaite. Il sembloit qu'il formast luy-mesme ce qu'il auoit entrepris d'aimer : & de mon costé luy estant extremement redevable de cette peine , ie m'estudiois à luy plaire , & à faire en sorte que ie fusse digne d'estre estimée de luy. l'auois quelque sorte de ialousie , quand i'entendois dire que chacun le cherissoit , ou qu'il se plaisoit en quelque compagnie ; ayant peur que les caresses de quelques Dames ne me le rauissent , ou qu'il n'en rencontrast quelqu'une , dont il trouuast l'esprit plus esgal au sien. Il sembloit que ce fust à dessein , que ceux qui me venoient voir me parloient de Lepante , & m'estimoient heureuse de le voir quelquefois , comme si toutes choses eussent conspiré pour me le faire aimer ; & s'il attriuoit chez nous , en mesme temps que l'on luy auoit donné ces louanges , ie voyois qu'elles n'estoient point affectées , pource que chacun luy deferoit avec tant d'honneur , & approuuoit ce qu'il disoit avec si grand plaisir , que ie ne pouuois faillir apres tant de personnes , de faire des iugemens à son auantage. l'eusse desiré qu'il me vist plus souuent , & depuis voyant qu'il se passoit peu de iours qu'il ne vinst chez nous , & le trouuant dans vne tristesse qui ne luy estoit point ordinaire , i'allay m'imaginer qu'il aimoit quelque Dame , dont il estoit mal traité , ou qu'il ne pouuoit voir facilement , & qu'il venoit diuertir avec moy ses ennuis. Tantost ie voulois du mal à cette Belle , pour la douleur qu'il en receuoit : tantost ie n'estois pas fâché qu'il en eult si peu de satisfaction , pour l'intérêt

que j'y auois ; & pour quelque sujet que ce fust , j'estois bien aise de le voir plus souuent. Il auoit la reputation d'estre aimé de quelques Dames : mais celles-là ne trouuoi-
loient point mon esprit ; pource qu'il me disoit tous les défauts qu'il y trouuoit ; tantost elles estoient trop faciles ; tantost elles n'auoient autre gloire que d'acquiescer
quantité d'Amans, & de les conseruer tous par differens moyens ; & sçachant que les vanitez, & les affecterics
luy estoient insupportables, j'estois assurée qu'il n'auroit
iamais de la passion pour ces sujets. Je m'enquerois des lieux où il hantoit le plus, mais ie ne trouuois rien qui
meritast de l'arrester, & en mon ame ie me doutois qu'il
m'approuuoit autant que personne. En fin vn iour que
nous estions seuls, ie luy monstray quelques vers que l'on
m'auoit donnez, & en recompense il m'en fit voir d'au-
tres qu'il auoit faits, qui estoient ainsi.

*Donques ie souffriray qu'un eternal silence,
De mes tristes ennuis cachant la violence,
Esteigne de mes iours la plus belle saison?
Donques cette Beauté que mon penser adore,
Me peut bien de la voix rauir l'usage encore,
Après m'auoir osté celui de la raison?*

*Donques tousiours l'ardeur de ma secrette flame
D'inutiles desirs allumera mon ame,
Sans iamais allentir l'excès de sa rigueur?
Et cet œil sans pitié, me perçant de sa foudre,
Tousiours fera voler mon esperance en poudre,
Au mesme temps qu'en cendre il reduira mon cœur?*

Où suis-

Où suis-tu, mon courage ? ay-ie perdu l'ennui
 Qui nous porte à cherir son plaisir & sa vie ?
 Justes ressentimens, qu'estes vous deuenus ?
 Quel magique poison, quelle ruse ennemie
 Retenoit au besoin vostre force endormie,
 Quand ie receus chez moy des traistres inconnus ?

Helas ! où me conduit ma fureur insensée ?
 Le frein respectueux d'une crainte glacée
 Me fait desaduoïer ces mots de mon transport ?
 Ie cheris les tourmens de mon ame abbatue,
 Et veux bien caresser l'ennemy qui me tue ;
 Si ie suis sans raison, me plains-ie pas à tort ?

C'est à tort, il est vray ; mes chaines sont trop belles :
 Me plaindre sans sujet me rend indigne d'elles :
 De m'en tirer iamais, ce n'est pas mon dessein :
 L'honneur de l'ofer voir me sert de recompense,
 Et ie suis trop heureux de pouuoir sans offence
 Porter incessamment son image en mon sein.

Que dis-je, son image ? hélas ! c'est-elle mesme ;
 Ie la sens là dedans d'une rigueur extrême
 R'allumer le brasier qui nourrit mon tourment :
 Ie la sens ; son pouuoir la fait assez connoistre,
 Qui se plaist en l'ardeur qu'elle mesme fait naistre,
 Et qui vit dans le feu comme en son element.

Toy qui vis en mon cœur, Beauté trop inhumaine,
 En vain ie parlerois, tu vois assez ma peine :

*Veux tu point establir la paix en ton séjour?
 Quoy ! l'horreur de mes maux ne te rend point sensible?
 Mais si tu n'es que glace, hélas ! est-il possible
 Que tu n'esteignes point l'ardeur de mon amour?*

Est-il possible, dis-je, en luy rendant ses vers, que Lepante demeure muet deuant celle qu'il aime? Non seulement muet, respondit-il, mais tellement plein de respect & de crainte, que iamais vn seul regard ne luy a donné tesmoignage de mon amour. Il faut, luy dis-je, que vous la craigniez extrêmement; pource que ie n'en connois gueres qui ne receussent avec plaisir l'offre de vostre seruice. Je m'estonne, reprit-il, que vous trouuiez cela estrange, puis que vous estes de celles qui ne peuvent souffrir d'estre aimées. Ne parlez point de moy, luy repartis-je; pource que j'ay raison de ne pas croire que l'on me puisse aimer: mais celle qui vous donne de l'amour, estant sans doute fort aimable, peut croire ce que vous luy diriez de vostre affection. Au contraire, poursuiuit-il, ie ne l'aime, que pource qu'elle vous ressemble, & c'est ce qui me fait craindre, redoutant d'esprouuer d'elle cette mesme seuerité, que beaucoup d'autres ont ressentie de vous. Je luy repliquay, ce n'estoit pas Lepante qui me faisoit ces offres; & n'estant pas satisfaite de ma beauté, ie ne pouuois croire les effets bien grands d'une si petite cause; puis ie vous diray qu'encore que ie ne vaille pas la peine d'estre aimée, ie n'ay point iusques icy trouué personne digne de mon courage; & quand il s'en presenteroit quelqu'un, ie le traiterois comme l'estimant le moindre des hommes, & me croyant de plus parfaites. Cette response le surprit, & l'in-

terdit pour quelque temps : puis reprenant la parole, il me dit. l'ay donc quelque sujet de craindre, que cette Belle vous ressemblant, ne me bannist de sa veuë, si i'osois luy declarer mon amour, ou du moins qu'elle ne s'estimast offensée de moy; & ses yeux irrités me seroient insupportables. Toutes, luy dis-je, ne sont pas si mauvaises, & ie voudrois la connoistre pour la persuader à vous vouloir du bien. Pleust aux Dieux, dir-il, que vous eussiez autant de volonté de me secourir, que vous avez de connoissance d'elle. Je luy iuray que ie m'y employerois de bon cœur, s'il me la faisoit connoistre. Ce seroit, respondit-il, vous parler d'amour, & vous ne le voulez pas souffrir. Ce qui ne me touche point, luy dis-je, ne m'offensera iamais. Si elle vous ressemble, reprit-il, & en beauté & en humeur, elle aura vn pareil sentiment que vous; & pour essayer par vous mesme le traitement qu'elle me feroit, ie veux vous dire, Cyllenie, ie vous aime: que me respondriez vous? Mais, luy dis-je, cela n'est point, & ie ne vous puis faire la response que ie vous ferois. Il n'est rien, continua-t'il, de plus veritable, & tout le discours que ie vous ay fait, n'estoit que pour en venir à cette declaration. Je rougis, & honteuse de l'auoir ainsi obligé à se descourrir, ie luy dis. Lepante, si la franchise dont i'vise avec vous, est cause de cette hardiesse, vous n'en abuserez pas long temps: car vous devez perdre cette liberté ou ma veuë. Luy sans s'estonner, me respondit: Vous me confesserez donc que i'ay sujet de tenir mon affection cachée à celle qui vous ressemble: car i'en apprehende vne response aussi cruelle, que celle que i'ay tirée de vostre bouche. Je fus encore plus honteuse qu'auparavant, d'auoir esté ainsi trompée; & sans la suruenue de

quelques personnes, ie m'allois plaindre à luy de se iouer ainsi de moy : toutefois ie me flattois de la creance que son discours pourroit bien estre veritable ; & toute la nuit ie ne fis que me fortifier en cette opinion , qu'il auoit voulu me sonder de tous costez , redoutant mon humeur ; & que si ma responce eust este plus douce, il eust laisse les feintes pour me parler plus ouuertement. C'estoit vne estrange resolution que la mienne : i'auois souhaitté qu'il m'aimast, & croyois aimer sans estre aimée, & lors que ie le vy soufins à moy sans qu'il sceust mon dessein, ie pris vne autorité sur luy si absoluë, que ie luy voulus faire souffrir mon empire aussi rigoureux, que si ie l'eusse haï, pour en tirer les plus rudes espreuues.

Depuis il viuoit avec moy comme auparauant, croyant que i'eusse receu son excuse : toutefois ie ne voulois point en demeurer là ; & mon enuie estoit admirable. Ie desirois qu'il se declarast à moy, & estois pourtant resoluë de luy oster toute esperance. I'en recherchois donc l'occasion autant que luy : & vn iour que ie luy parlay de quelque songe que i'auois fait, il me dit qu'il en auoit mis vn des siens en vers, qu'il me fit voir à l'heure mesme, & ils estoient tels.

Insensé, qu'ay ie fait ? ah ! malheureuse audace !

J'ay donc osé rompre la glace

D'un respect gardé tant de mois ?

En fin donc ma fureur a pris cette licence ;

J'ay dit que ie l'aimois,

Et i'en suis pour iamais banny de sa presence ?

Ces beaux yeux sans pitié, trop prompts à la iustice,

Ont adiousté pour mon supplice,

*La colere à la maïesté.
 le sens leur feu vangeur : elle suit, l'inhumaine,
 Dans vn bois escarté;
 Et ie pers pour la suiure, & la force & l'haleine.*

*Cruelle, arrestez vous; ie vay vous satisfaire;
 Si ma bouche a pû vous desplaire,
 Mes mains sçauront bien vous vanger.
 Mais quoy? tout est obscur, & mon bras que i'allonge,
 Ne prend qu'un vent leger:
 Dieux! ie suis en mon lit, & mon mal n'est qu'un songe.*

*O bien-heureux réveil, qui cheris l'innocence!
 Quoy! son corroux, & mon offense
 Se sont en l'air esvanouis?
 Mon respect triomphant se rit de ces chimeres;
 Et mes sens resioüïs
 Sont sauuez de la peur de ces vaines miseres?*

*Va, songe, la terreur des ames amoureuses,
 Porteur de visions affreuses,
 Prere des fantosmes ombreux,
 Va, cruel imposteur, te plonger aux abyssmes
 Des Efers tenebreux,
 Dans le triste sejour des monstres & des crins...*

Vous estes dont encore, luy dis-je, sur cette retenuë de n'oür vous declarer? Ah! Madame, respondit-il, vous m'auez bien appris à ne me pas mettre en ce hazard. Toutes, luy dis-je, ne sont pas faites comme moy. Je vous ay dit, reprit-il, que celle-là, sans vous offenser.

est faite tout ainsi que vous. le vous prie de ne me point persuader de courir cette fortune ; & qu'aspirant à des biens que ie n'ose esperer , ie ne me priue point par imprudence de ceux dont ie iouïs. le la voy , ie luy parle , & me contente de l'estime qu'elle fait de moy , puis-que ie ne puis pretendre d'en estre aimé. Mais , repartissie , qu'esperez vous que deuienne vostre affection , si elle n'en a cognoissance ? Il me respondit : Puis qu'elle ne veut pas en ouïr parler auant qu'elle la cognoisse , il faut qu'elle la cognoisse auant que d'en ouïr parler. Que sçauiez vous , luy dis-ie , si desia elle ne la cognoist pas , & s'il ne tient plus qu'à vous en assurer ensemble ? Promettez moy , me dit-il , qu'elle ne s'en fâchera point , & ie prendray cette liberté. le vous le promets , luy dis-ie , par le pouuoir que j'ay sur elle. Il me respondit ; Vous pouuez tout sur vous mesme ; c'est pourquoy j'ose encore vne fois vous dire , que c'est vous que j'aime ; & que vous en deuez estre toute assurée , puisque vous sçauiez bien qu'il n'y a personne au monde que vous que ie puisse aimer. Vous pensez , luy dis-ie froidement , me faire encore parler au nom de celle que vous aimez , & m'essayer vne seconde fois. Non , reprit-il , il n'y a point de feinte en ce que ie vous dis , & quelque rigueur que ie puisse esprouuer , ie suis forcé de vous le dire par l'excès de mon affection , & par l'assurance que vous m'auuez donnée de ne vous en point offenser. le ne veux pas , luy dis-ie , me fâcher contre vous , puisque ie m'y suis obligée , mais ie vous deffends de me parler iamais de cette affection : si vous m'aimez , vous craindrez de me desobeïr , & si vous ne m'aimez pas , ie ne veux point entendre vos feintes. Alors passissant comme s'il eust re-

ceu vn arrest de mort, il n'osa plus souffrir ma veuë, & baissant les yeux, il me dit: Madame, dès cette heure ie ne suis coupable que pour vous auoir obeï; & puis que c'est faillir que de faire vos commandemens, ma desobeïssance à ce que vous voulez m'ordonner, ne sera pas vn crime. Il faut pourtant, luy respondis-ie, vous y resoudre, ou ne me voir iamais. Ce dernier coup l'abatit entierement, & luy fit perdre la parole: quelques personnes qui suruindrent nous trouuerent dans vn grand silence, qu'il ne rompit point, sinon en sortant qu'il me dit: l'aime mieux me priuer de vous parler ainsi, que de vous voir; & puisque vous estes si cruelle, ie promets de vous obeïr toute ma vie. Toutefois il ne pût s'empescher de reprendre ce discours vne autre fois; surquoy ie luy alleguay la promesse qu'il m'auoit faite, & ne le voulus plus entendre. Le lendemain il me fit voir ces vers.

*Ouy, ie te l'ay promis, & le veux bien tenir,
Cruelle, dont le souuenir
Conserue seulement ce qui sert à ma peine;
I'ay promis de souffrir, & me taire à iamais:
Inhumaine, inhumaine,
Tien donc ainsi que moy tout ce que tu promets.*

*Ces beaux yeux, qui cachotent vne ame sans pitié
Dessous vn voile d'amitié,
M'asseroient, pour ofer à ta grace pretendre:
Ie les voy deuenus mes cruels ennemis,
Au lieu de me diffendre:
Pourquoy ne tiennent-ils ce qu'ils m'auoient promis;*

Alors que ie laissay conduire en ta prison
 Mon cœur avecques ma raison,
 Ta beauté leur promet vn si plaisant seruage.
 Sous ces conditions aux fers ils furent mis;
 Et tu leur fais outrage!
 Est-ce ainsi que tu tiens ce que tu m'as promis?

Il est vray qu'un esprit sans amour comme toy,
 Peut bien aussi viure sans foy:
 Seul ie feray donc voir ma promesse certaine:
 Et le Ciel qui serit des pariuers d'Amour,
 Ne sera point en peine,
 De pardonner les miens, & s'en mocquer vn iour.

Ie fuy vœu derechef de me taire à iamais:
 Que si i'y manque deormais,
 Ie veux de tes desdains sentir tousiours l'attainte.
 Tout parlera pour moy: ma peine incessamment,
 Sur mon visage peinte,
 Te dira les ennuis que ie souffre en t'aimant.

Mon silence eloquent, bien plus que mes discours,
 Viendra s'offrir à mon secours,
 Pour te faire sçauoir les maux qui m'environnent:
 Et cét estonnement, que tes perfections
 Deuant tes yeux me donnent,
 Te dira mieux l'excès de mes affections.

Quand tu consulteras ton miroir au matin,
 Ces deux Astres de mon destin,

Si dignes

Si dignes d'estre aimez, te diront que ie t'aime.

Et sans que ie repugne à tes seueres loix,

Ta belle bouche mesme

Te le dira, cruelle, au deffaut de ma voix.

Je vous confesse que ie m'estois faict vn grand effort, pour le traiter si cruellement : car il n'y auoit rien au monde que i'estimasse tant que luy, ny à qui ie desirasse plaire dauantage : toutefois sçachant qu'il ne prisoit rien tant qu'une vertu separée du commun, & qu'il m'en aimeroit beaucoup mieux de resister ainsi à ses premieres attaques, i'auois creu qu'il falloit viure avec luy de cette sorte. Mais iugeant alors que ie l'auois assez esprouué, & pleine de ioye de le voir si touché d'amour, il me fallut ceder ; & changeant de visage, ie luy dis avec vn souris : Lepante, ie veux que vous m'obeissiez toute vostre vie, en ne me parlant iamais de vostre affection : car i'en veux estre toute assurée ; vous estimant trop vertueux pour estre vn trompeur. Il fut si surpris de ce discours, ne s'attendant pas à vne si heureuse fortune, que me prenant la main il ne sçauoit que me respondre. En fin il me dit : Il suffit que vous ayez cognoissance de vous & de moy, pour sçauoir ce que vous en deuez croire ; Et vous avez raison de ne vouloir pas des paroles pour vous en assurer : puisque toutes les actions de ma vie ne vous diront autre chose. Lepante, repris-ie, vous avez assez cognu combien ie vous estime : si ie dois aimer quelque chose, ce ne peut estre que vous : ie vous permets de le croire ; & ne vous prescriis aucune loy pour viure désormais avec moy ; estant certaine que la vertu regle tous vos desirs. Madame, me dit-il en me baissant la main, ma

passion a pour objet vne chose trop parfaite, pour me permettre vne pensée qui soit indigne de sa cause, & ie ne reçois pas vne petite ioye de l'assurance que vous en voulez auoir, qui me fait croire que vous la iugez aussi grande qu'elle est, encore qu'il soit bien difficile. Cessions, luy dis-je, ces communes protestations, & viuons sans douter l'un de l'autre: ce ne sont pas vos paroles, qui m'ont enseigné ce que ie dois croire de vous; & vne des miennes vous doit assurer de mon amitié, puisque i'ose le dire. Il ne reste donc plus, repliqua-t'il, qu'à m'ordonner comment il vous plaist que ie viuë: si vous desirez que ie me declare, ou que ie tiëne encore mon affection cachée. Il vaut mieux, luy dis-je, ne se pas decouurir si tost (pource qu'en ce temps-là Callias me recherchoit) vous sçauëz, adioustay-je, ce que mon pere souhaite, & il faut que ie rompe ce coup, auant que l'on connoisse que j'ay vn autre desir: cependant viuëz si discrettement, que l'on ne se puisse appercevoir de vostre dessein. Je reçois, repartit-il, cette ordonnance pour vne faueur extrême, & vous verrez de quelle sorte ie l'observeray. Depuis ce temps-là nous vescuimes dans vne confiance tres parfaite, que nous cachions d'vne discretion merueilleuse; & il y en auoit fort peu qui peussent nous soupçonner d'intelligence: ce qui faisoit que tous deux separément, nous estions estimez insensibles à l'amour, comme ne trouuant rien digne de nous. Je l'aduerussais de tout ce qui se passoit; surquoy il me donnoit conseil, & le receuoit aussi de moy en ce qui le touchoit: Je luy faisois de bons contes de ceux qui entreprenoient de m'aïmer, comment ils s'y prenoient, & de quelle sorte ils estoient receus; il en plaignoit les vns, &

se rioit des autres. S'il m'arriuoit quelque chose, j'auois impatience de le voir, pour luy en faire le recit: aussi me rendoit-il conte si exactement de sa vie, & satisfaisoit à tout ce que ie desirois de luy, avec tant de soin & de respect, que i'estois trop assurée du pouuoir que i'auois sur luy. Mais ie vous iure que rien ne m'estoit si agreable que sa discretion: rien ne sembloit si esloigné que luy du dessein de m'aimer: Il ne feignoit point en presence de tous, & de mon pere mesme, de parler de ce qu'il auoit à me dire, ou à sçauoir de moy, sous des termes si plaisans, & avec tant de dexterité, soit en me faisant quelque conte, ou à propos de ce qui se disoit, que sans estre entendus de personne, nous nous entendions aussi bien que si nous eussions parlé ouuertement.

L'espace d'un an nous vescuimes de cette sorte: mais à la fin ayant rompu le mariage de Callias avec beaucoup de peine, & voyant qu'il me seroit difficile de faire souuent vn pareil effort sur ce que ie deuois à mon pere, puis qu'il tesmoignoit n'auoir autre desir que de me voir bien tost mariée à vn des premiers de Corinthe, ie conseillay Lepante de ne plus perdre de temps à se descourir, encore que ie preuissie beaucoup de difficultez: car bien que mon pere l'estimast autant qu'il se pouuoit, & vist sa condition aussi releuee que la sienne, si estoit-il bien esloigné de penser en luy, ne voulant point s'allier hors de Corinthe. Nous consultaimes donc ensemble des moyens qu'il faudroit tenir, & encore que Lepante receust avec grande ioye la permission de me demander, il ne laissoit pas d'apprehender extrêmement, voyant que si la fortune luy estoit contraire, il perdoit non seulement le bien de m'auoir, mais encore les commoditez

qui luy estoient acquises, comme de me voir, & de m'entretenir avec tant de facilité. Toutefois il falloit se refoudre, & ie luy promis de tesmoigner en sa faueur tout ce que mon honneur me pourroit permettre : mesme ie luy donnay autant d'asseurances de mon amitié qu'il en pouuoit souhaitter ; & sur ce que ie le voyois triste, ie luy dis : Lepante, n'estes vous pas content des paroles que ie vous donne ? dites de quelle sorte vous les desirez, & vous verrez si ie n'ay pas dessein de faire pour vous tout ce que ie puis. Madame, me respondit-il, l'honneur que vous me faites est si grand, que mon silence vient en partie de ne sçauoir comment vous en rendre graces. Je n'ay rien à desirer de vous, que ce qu'il vous plaira ordonner de moy : i'aime mieux desormais estre redevable à vostre bonne volonté, des faueurs que ie receuray de vous, qu'à la promesse que i'en auois tirée : mais permettez vn peu que i'apprehende la fortune hazardeuse que ie vay courir : il n'y a point de milieu pour moy ; il faut que ie sois le plus heureux du monde, ou que ie meure : car soyez assuree que si ie me voy priué de viure avec vous, la mort la plus prompte me sera la plus secourable. Lepante, luy dis-je, la fortune ne nous sera pas peut-estre si cruelle, & deuant que vous perdiez l'esperance, il faut que ie perde toutes sortes de moyens de vous rendre content. Le pouuoir, reprit-il, que vous auez en cecy est si grand, que si vous l'employez ie ne doute point de mon bonheur : vous auez vn pere qui vous aime, & qui n'a point sujet de me haïr : i'ole dire que nos conditions sont esgales : mais vne legere difficulte ruine souuent des considerations importantes. Ce n'est pas icy comme des mariages ordinaires, dont la proposition estant suivie d'un re-

fus, le peu d'engagement fait que chaque chose demeur-
re en son estat : mais aussi tost que l'ouuerture en sera fai-
te de ma part, il faut que j'employe tout ce que j'auray
de puissance & de vie, pour m'acquiescer vn bon-heur, sans
lequel ie ne puis estre au monde. Ie luy repartis : Faites
de vostre costé ce qui depend de vous, & de ma part ne
doutez point que ie ne fasse encore plus que vous n'o-
sez esperer : ie veux croire que les Dieux auront soin de
nous, & ne permettront pas que nous soyons long temps
separez. Il me prit la main, & me la baissa long temps plein
de saisissement & de ioye ; & pour le retirer de ce trou-
ble, ie luy dis qu'il falloit songer aux moyens que nous
deuions tenir. Nous auisâmes qu'encore qu'il eust des
parens à Corinthe, il valloit mieux que la proposition
se fist à mon pere par Artemidore, estant personne pour
en ouurir le propos comme amy commun, & capable
puis apres de persuader par la force de ses raisons ; & que
s'il estoit besoin, les autres se pourroient ioindre : toute la
difficulté estoit d'auoir des nouuelles l'un de l'autre, au
cas que l'affaire se rendit difficile, pour se donner aduis
de tout ce qui se passeroit, & remedier aux desordres qui
pourroient suruenir. Ie ne pouuois me resoudre à me fier
en personne, & ce me fut vn bon-heur ; pource que
sans doute j'eusse esté trahie. En fin ie luy dis, que j'auois
vn cabinet qui respondoit sur vne rue, par laquelle peu de
personnes passioient ; que la nuit ie laisserois couler vne
corde, à laquelle il feroit attacher les lettres qu'il m'en-
uoyeroit, & que le lendemain il auroit ma response. Cela
fut donc ainsi arresté, & il se separa de moy avec beaucoup
de regret, ayant peur de ne me reuoir de long temps : tou-
tefois ie le vis encore vne fois, mais en presence de quel-

ques personnes, & il eut seulement le loisir de me dire qu'Artemidore se porteroit pour luy d'une affection extrême, & qu'il en deuoit parler le lendemain.

L'attendis ce iour avec vne grande inquietude, & le matin ie me preparois à faire bonne mine, lors qu'Artemidore viendrait chez nous: mais ie fus preuenue, pour ce que mon pere reuenant au logis pour dîner, ie le vy qui auoit le visage assez triste, & qui se promenoit à grands pas, ayant quelque pensée qui le tourmentoit. Je sceus qu'il venoit de chez Artemidoré, & ne doutay plus de ce qui le rendoit si pensif. Nous dînasmes sans dire vn seul mot; & apres dîner il entra dans le cabinet de ses liures, où il me fit appeller. L'allay le trouuer aussi tremblante que si l'on m'eust conduite au suplice: toutefois en entrant ie me rassuray, & comme il auoit accoustumé de me parler aussi tost que quelque party se presentoit, il me dit: Ma fille, j'ay sceu ce matin que vous estes recherchée d'un homme dont le merite vous est assez connu & à moy aussi: il y a des difficultez qui me pourroient diuertir de penser à luy, & des raisons aussi qui me feroient l'agréer: mais auant que d'escouter aucune proposition, j'ay voulu sçauoir si vous pourrez vous resoudre à le recevoir. Je voulus faire la fine, & le preuenant ie luy dis; Mon pere, ie vous supplie de ne me nommer personne, & de croire que tel qu'il puisse estre, ie le receuray, pourueu qu'il vous soit agreable. Il m'auoit parlé ainsi doucement à dessein, se doutant bien que j'estois aduertie de tout, & il reconnut aussi tost mon artifice; puis il poursuiuit. Non, non, ma fille, c'est à vous à choisir celuy avec qui vous deuez viure, & ie verray apres si vostre choix est raisonnable, pour ce que vous deuez vous rapporter à moy de ce

iugement; & ie vous veux bien dire que c'est Lepante qui vous recherche. Je ne pûs m'empescher de rougir : toutefois croyant que tout dependoit de la declaration que ie ferois en sa faueur, ie luy respondis. Mon pere, Lepante a trop de bonnes qualitez, & ie vous ay trop de fois ouï l'estimer, pour y rien trouuer à redire : s'il vous est agreable, ie vous tesmoigneray que ie n'ay autre dessein que de vous plaire. Cette response, encore qu'elle semblast honnestes, luy fit trop parestre ma satisfaction : il iugea que la demande nes'estoit point faite sans que ie l'eusse deliré, outre qu'il s'estoit auparauant desfié de nostre intelligence, & il n'y eut rien qui nous nuisist dauantage que la connoissance de cette confidence entre nous sans son congé : & bien qu'il n'eust autre suiet de se plaindre de Lepante, cela l'anima assez pour me dire d'un visage enflamé, Je voy bien qu'il ne vous deplaist pas : mais j'ay peur que ce qui vous agreé le plus en luy, soit ce qui m'offense dauantage; Allez, j'y penseray, & cependant ie vous deffends de le voir. Ces paroles m'estonnerent extrémement, & ie sortis aussi confuse, comme i'auois esté auparauant pleine d'esperance.

Le soir ie sceus par les lettres de Lepante, qu'Artemidore auoit proposé nostre mariage à mon pere, & luy auoit remonsté toutes les considerations qui l'y deuient porter, lesquelles il auoit escoutées avec vn peu de froideur, & auoit promis d'y songer. Je luy conseilloy d'employer tous les amis qu'il pourroit, pour persuader mon pere auant qu'il fust vne response à son desauantage, pource que i'auois reconnu qu'il s'estoit fort offensé de nostre affection : de façon qu'il ne se passoit iour, que ceux qui auoient pouuoir sur luy ne

luy en parlaſſent , ſurquoy il ne donnoit aucune reſolu² tion.

Lepante eſtoit fort aimé dans Corinthe , & ſi toſt que l'on ſçeut ſon deſſein , il n'y eut perſonne qui ne deli²raſt qu'il y reüſſiſt : chacun faiſoit des ſouhairs pour luy, voyant à regret le tourment qu'il endureit , à cauſe de l'aueſion de mon pere : Et pource que i'eſtois auſſi en quelque eſtime , on ne croyoit pas qu'il y euſt rien de mieux aſſorty que nous deux : auſſi ie croy que iamais humeurs ne furent ſi eſgales , non ſeulement il aimoit tout ce qui eſtoit honnelle, mais il ſ'y eſtoit rendu tellement atcomply , que toutes les belles qualitez que l'on a peine d'acquérir, ſembloient eſtre nées avec luy : pour moy ie ne veux pas dire que ie fuſſe ainſi parfaite, mais ie ne pouois approuer que c'eſt qui l'eſtoit. Nous faiſions ordinairement vn iugement ſemblable de toutes choſes, nos courages ſ'eſleuoient au meſme degré, & nous aimions vne meſme ſorte de vie. Voyez quel bon-heur i'euſſe poſſédé, ſi nous euſſions pû viure enſemble. Tous blaſmoient mon pere de ſ'oppoſer à nos deſirs, n'y ayant aucun qui ne iugeaſt bien que cette affection ſ'eſtoit nourrie entre nous de long temps, & qu'il n'auoit rien entrepris ſans ma permiſſion.

I'auouë que i'auois vn deſpit que l'on creuſt que ie l'aimaſſe, & eſtois marrie que ſon merite fuſt ſi connu de tous, qu'il eſtoit impoſſible qu'il ne le fuſt auſſi de moy. I'euſſe deſiré qu'il euſt eſt² moins accompli, afin que l'on peult douter ſi ie l'eſtimois; & ne ſçachant comment me vanger de cette commune opinion, quelquefois i'eſtois reſoluë de l'abandonner, & conſentois à me rendre malheureuſe & luy auſſi, pour ruïner cette creance à nos deſpens.

pens. Il est vray qu'il a payé bien cher cette vertu glorieuse & altiere qu'il m'auoit enseignée ; & que ie me suis bien seruy contre luy-mesme, de cette grandeur de courage où il m'auoit esleuée, qui me persuadoit qu'il valloit mieux perdre tous les contentemens de ma vie, qu'il fust dit que i'eusse de l'amour : cependant ie ne considerois pas qu'il n'y a rien de si permis, que de choisir par les moyens honnestes celuy avec lequel on s'estimeroit heureuse de viure ; & quand ce bon-heur est arriué, on ne peut estre estimée que sage : cette erreur m'a fait commettre des fautes que ie pleureray toute ma vie.

Encore que mon pere eust fait sçauoir à Artemidore, que Lepante ne deuoit point penser à moy, il ne laissoit pas de le remettre quelquefois sur ce discours, & luy representoit quelle faute il faisoit, de refuser ce bon-heur pour sa famille : qu'il mesprisoit en Lepante les qualitez que les autres peres eussent desiré rencontrer pour leurs filles ; que s'il m'aimoit avec tant de passion, c'estoit plutost vn bon-heur, qu'une chose qui le deust rendre coupable : que toute la ville luy seroit obligée d'arrester parmy eux vne personne de tel merite ; pource que la pluspart de son bien estant autour de Corinthe, il offroit de s'y establir, & de n'abandonner iamais mon pere ; mais tout cela ne gaignoit rien sur luy. Ce qui rendoit Lepante recommandable, c'estoit ce qui luy nuisoit le plus ; mon pere ayant cette mal-heureuse opinion, qu'il falloit plutost choisir vn gendre moins habile, & plus soigneux de ses affaires. Toutefois ie croy que la plus forte raison estoit, que mon pere (encore que sçauant) estant du naturel des vieilles gens, qui veulent faire passer toutes leurs opinions avec autorité, estoit enuieux du sçauoir de Le-

pante, & ne vouloit point auoir ordinairement chez luy vne personne qui le peust contredire; bien que Lepante sceult d.ferer à tout ce qu'il disoit avec beaucoup de discretion. Mon pere n'auoit pas tant de raison de le refuser, que i'en auois de l'aimer; & il connoissoit bien le desir que i'auois; pource que ie ne pouuois souffrir qu'on me parlait au desauantage de Lepante, & reiettois bien loing les partis qui se presentoient. Je sçay bien que si i'eusse declaré à mon pere que ie ne pouuois consentir à autre recherche, il se fust en fin laisse fieschir à la tendresse qu'il auoit pour moy, & au merite de Lepante: mais craignant qu'une resolution si absoluë vinst à estre sçeuë dans Corinthe, i'amaies ie n'eus cette assurance.

Cependant i'estois tourmentée des ennuis de Lepante & des miens. Je le voyois au Temple, mais rarement, & avec vn visage si changé, que la mort n'en a pas vn plus deffait. Ses lettres n'estoient plus remplies que du malheur de sa vie, & modestement il me sommoit de mes promesses. Je reconnoissois qu'il auoit raison, & que son bon-heur estoit entre mes mains, mais ie ne me pouuois resoudre: & cette seuerité qui me rendoit insensible à ses douleurs & à ses prieres, à la fin me rendit aussi insensible à son affection.

Tous ceux qui m'approchoient, estoient instruits pour me parler au mespris de Lepante, & pource que ie le connoissois trop pour les croire, s'ils me disoient quelque chose qui fust contraire à la verité, ils desguisoient seulement ses vertus, & les faisoient passer pour autant de vices. Ainsi les charmes qu'il auoit pour se faire aimer des plus habiles, & respecter des moindres; n'estoient plus qu'un empire & vne autorité tyrannique qu'il vsurpoi

sur tous ceux qui le hantoient: sa discretion estoit dissimulation, & sa courtoisie artifice: routes ses belles qualitez à leur iugement estoient autant de defauts. Je vous confesse que ie commençay peu à peu à ceder à leurs raisons. L'absence de Lepante effaçoit chaque iour quelque vne de ses perfections de ma memoire. Je disois que peut-estre mon affection m'aveugloit, & me faisoit imaginer en luy des merites qui n'estoient pas: que ceux qui estoient sans passion en iugeoient autrement: en fin croyant estre bien plus clair-voyante, & iuger plus parfaitement, ie ne m'apperceuois pas que ie deuenois aveugle & sans iugement. Toutefois il me restoit encore vn certain respect pour Lepante, que ie n'osois l'offencer en luy tesmoignant mon refroidissement. L'auois honte de donner ce desplaisir à celuy à qui il n'estoit iamais arriué de me desplaire. Ses lettres estoient tousiours pleines d'amour & de regret de ne me plus voir, & pource qu'il scauoit que les gentilleses & les pointes d'esprit qu'il m'escruiroit m'estoient fort agreables, il en mesloit tousiours quelques vnes, malgré la cruauté de sa fortune & des tourmens qu'il enduroit, & souuent il se forçoit tellement, que laissant à part ses douleurs, elles estoient toutes remplies de douceurs & de mignardises, & à toute autre qu'à moy elles eussent semblé partir d'un esprit bien satisfait.

Pour moy ie connoissois bien la contrainte, & l'enplaignois: mais lors que mon affection diminua, ie changeay d'avis, & ie iugeois que s'il auoit beaucoup d'amour, il ne s'amuseroit pas à ces gentilleses: si sa passion l'emportoit à me tesmoigner quelque desespoir, ie disois qu'il sortoit du respect qu'il me deuoit: S'il me donnoit quelque aduis, ie ne trouuois pas bon qu'il se meslast de me

conseiller, & qu'il se deffist de ma conduite: si ie le ren-
controis, & qu'il me parust avec vn visage fort deffait, ne
trouuant plus en luy ce quime sembloit autrefois si agrea-
ble, ie croyois auoir raison d'en retirer mon affection: & si
quelque esperance luy faisoit reprendre son teint ordinai-
re, ie disois qu'il n'estoit pas fort tourmenté d'amour. En
l'humeur où i'estois il eust esté difficile qu'il eust composé
son visage, & ses actions en sorte que ie n'y eusse pû trou-
uer à redire. Il iugeoit assez que la cause deuoit estre bien
mauuaise, qui produisoit vn si grand changement, pource
qu'autrefois il ne faisoit rien que ie n'eusse approuué. Tou-
tefois sa discretion se maintint tousiours si parfaite, que
iamais il ne se plaignit de moy, quelque sujet qu'il en eust:
Iamais il ne fit sçauoir aucune des assurances qu'il en auoit
receuës, pour tesmoigner combien i'auois tort. Il dissimu-
loit donc sa douleur, ne m'osant accuser, & esperant que ie
traitterois mieux son affection: mais la bonne volonté que
i'auois eüe pour luy commença du tout à s'esteindre.

Le faisois au commencement response à ses lettres, &
luy donnois de nouuelles assurances, avec des instru-
ctions pour se conduire: depuis ie me mis à luy represen-
ter les difficultez: peu apres ie receuois ses lettres sans luy
respondre, & à la fin ie luy renuoyay vne des siennes
sans la voir, & fermée comme ie l'auois receüe. Cette
mesme nuit que ie fis cet outrage à son affection, & qu'il
receut ce traitement si indigne de luy, i'ay sçeu qu'il
faillit à mourir: son affliction le saisit de telle sorte que
l'on crût qu'il estoufferoit sans les remedes que l'on ap-
porta pour le soulager. I'auois crû que ie ne pouuois plus
recevoir ses lettres, depuis que ie touffrois la recherche
que Callias renouuelloit. Je me laissois aller aux opinions

communes; que toutes les femmes qui vivent au monde n'ont pas des maris si parfaits, & n'en sont pas moins contentes : qu'il falloit plustost obeïr à son pere, que satisfaire aux desirs d'une personne qui estoit auparavant inconnüe; & s'il me restoit quelque consideration pour Lepante, ie disois qu'ayant l'esprit fort & constant, il sçauroit prendre resolution en me perdant; & deffendois de cette mauuaise raison la cruauté qui luy enuoyoit la mort dans le sein.

L'ay souuent songé à l'excès de son respect & de son amour, qui ne luy permit iamais de faire vne seule plainte de moy, & les resolutions qu'il prit depuis m'ont bien fait connoistre que ce silence ne venoit pas de peu de ressentiment. En fin ie consens au mariage de Callias, & il est receu chez nous : chacun s'estonne de ma resolution, & comment Lepante m'auoit si peu engagée à l'aimer. Callias n'estoit pas fort vitieux, & n'auoit aucune imperfection remarquable; mais il estoit de ces mediocres pour lesquels ceux qui ont de l'esprit & du courage ont tant de mespris. Du commencement ie le comparay à la plupart de ceux que ie connoissois qui estoient mariez, & ie trouuois qu'il les pouuoit esgaler. Mais tout à coup voila que ma memoire traistresse, qui m'auoit caché quelque temps Lepante, me le va représenter avec toutes les perfections; & faisant comparaison de Callias avec luy, i'y trouuay vne si grande difference, que i'eus honte de la faire que i'allois faire. Au lieu d'une taille adroite, & d'une mine majestueuse, ie voyois vn corps pesant & sans grace : au lieu de cét esprit releué qui traittoit de si beaux sujets avec tant de facilité, & me diuertissoit si agreablement, ie trouuois vn entretien languissant, qui n'a-

uoit pour sujet que les moindres choses : au lieu de cette courtoisie & de cette honnesteté si naturelle, ie voyois vn homme qui n'obseruoit de ciuilité que ce qu'il voyoit faire aux autres. Ie commence à le regarder avec froideur : puis avec dégoût ; & en fin avec vn mespris qui m'estoit plus cruel qu'à luy : toutefois i'auois laissé resoudre toutes choses, & ne me pouuois plus desdire.

Le iour que Lepante sceut que les conclusions se deuoient signer, lors que i'allois au Temple, il s'approcha de moy sans estre veu, & me dit. Iamais il ne m'arrivera de vous faire aucun reproche en ma vie : mais la mort que ie vay cherther ne vous laissera iamais de repos. En mesme temps il s'esloigna de moy : aussi bien ie n'eusse sceu que luy respondre, tant sa veuë & ses paroles me troublerent ; & ne le voyant plus, vne horreur me saisit, & vn frissonnement si grand, qu'à peine me pouuois- ie soustenir : Toutefois r'appellant ce qui me restoit de resolution, ie creus encore que c'estoit le dernier effort de nostre amitié mourante.

I'esloignois donc autant que ie pouuois Lepante de mon imagination, & reiettois l'exacte consideration de ce que i'allois faire : mais quand tout fut arresté, mesme de ma main, & que i'eus fermé les yeux pour prendre ce poison ; venant à les r'ouuir, ie m'apperceus que tous ceux qui aimoient Lepante ne pouuoient plus souffrir ma veuë : la pitié du mal dont il ne pouuoit guerir, faisoit qu'ils m'auoient en horreur, & m'estimoient indigne d'auoir esté si bien aimée de luy : au lieu d'une commune resioüissance, c'estoit vn silence general, & il n'y auoit que les plus mesprisables personnes qui tesmoignoassent quelque ioye. Tout cela m'estonnoit ; tantost

Lepante se presentoit à mon imagination, me reprochant mon infidelité : toutes ses belles qualitez venoient m'attaquer l'une apres l'autre ; & voyant Callias en la place qu'il auoit accoustumé de tenir, ie destournois les yeux, & ne le pouuois supporter. Chacun recognoissoit mes rêveries : mais on les attribuoit à mon humeur, que l'on estimoit vn peu glorieuse & particuliere. En fin ce iour arrive auquel ie fus menée au Temple du grand matin ; & ayant seen que Lepante estoit sorti de la ville, pour n'estre pas tesmoin d'une action si honteuse pour moy & si mal heureuse pour luy, i'amaïs ie ne desiray tant sçauoir de ses nouuelles, pour apprendre ce qu'il vouloit deuenir. Apres que i'eus esté espousee i'apperceus à la sortie du Temple vn homme que l'on ne cognoissoit point, que ie sçauois bien qui estoit à Lepante, & iugeant qu'il n'estoit là que pour luy porter ces nouuelles, ie luy dis en passant : Va dire à ton Maistre ce que tu as veu, & à quelque heure que se puisse estre, reuien auourd huy me dire ce qu'il aura fait apres t'auoir oüy. Iugez, belle Ariane, quel soin ie pouuois auoir de luy, apres l'action que ie venois de faire. Le reste de la iournée ie fus si pleine de trouble, que l'on creut à voir mon visage que i'estois malade. Il sembloit que les plus cruelles pensées eussent entrepris de m'attaquer toutes ensemble, pour me mettre plus en desordre ; & quelques fois elles me pouissoient en telle fureur, que sans la retenüe à quoy nostre sexe nous oblige, ie croy que ie me fusse abandonnee au desesper. Delia mon ame estoit pleine de ces confusions, quand sur le soir ie sceus que l'on demandoit à parler à moy. Ie iugeay aussi tost que c'estoient des nouuelles de Lepante, & allay en grand

haste, & toute fois tremblante, sçauoir ce que c'estoit.
 Je vis ce mesme homme, qui m'ayant tirée à part, mo
 dit les larmes aux yeux; qu'ayant passé dans vn esquif
 iusqu'à Naupacte, il auoit trouué Lepante qui l'atten
 doit sur le bord de la mer, auquel il auoit dit ce qu'il
 auoit veu, avec ce qu'il auoit ouï de moy; & que Le
 pante luy auoit respondu: Ne tarde pas vn moment à
 luy aller redire ce que tu vas apprendre; qu'aussi tost
 il auoit gaigné le Promontoire qui auance dans la mer,
 duquel il s'estoit precipité dans le Golfe, sans qu'il le
 peust atteindre pour l'en empescher. Apprenant cette
 mal-heureuse nouuelle, ie m'escriay. Ah! Dieux, ie l'ay
 fait mourir; & sans m'arrester dauantage à cét homme,
 ie luy dis qu'il se retirast, & ie m'entray dans la salle tou
 re troublée, avec les yeux égaréz. On s'enquit de ce que
 j'auois, mais incontinent ie tombay en foiblesse: Mon
 pere, Callias & les autres estoñnez de cét accident, tas
 cherent à me faire reuenir: & à force de remedes i'ouuris
 les yeux: puis ie fus portée dans mon liét, où ie fus sai
 sie d'vne fièvre si violente, qu'elle me troubla le iuge
 ment & me rendit furieuse. Je perdis tout respect & tou
 te connoissance, & lors que Callias s'approchoit de moy,
 ie criois. Ostez moy ce monstre, qui me veut deuorer:
 Ah! le vilain animal: ie suis perduë, il m'empoisonnera
 de son venin; & ie me retirois autant qu'il m'estoit pos
 sible. Si mon pere venoit pour me remettre l'esprit avec
 douceur, ie luy disois: Ah! bourreau de ton sang, va
 cruel; ne me pense pas mettre entre les griffes dece dra
 gon, ie me tueray plustost. Non, non, tu ne m'y por
 teras pas; voicy Lepante qui vient à mon secours: puis
 me retournant, ie disois: Generex Lepante, com
 ment

ment me venez vous deffendre , puisque ie vous ay fait mourir? Quoy, vous auez assez de pitie de moy pour l'aller attaquer? mais bien, allez, tuez ce monstre, & vous gardez bien qu'il ne vous enuelope : courage, mon cher Lepante, voila desia vne patte abbatuë, courage, il perd tout son sang : Lepante, encore vn coup, le voila, le voila mort : puis ie me réjouïssois, & croyois embrasser Lepante comme victorieux, & luy demandois pardon de l'auoir fait mourir, avec mille prieres, qui estoient suivies d'un torrent de larmes. Je ne vous sçaurois redire toutes mes rêserues, n'en sçachant que ce que l'on m'en a conté depuis : mais mon transport ne cessoit, que quand Callias & mon pere s'ostioient de ma presence. Alors reuenant à mon sens ordinaire, ie ne pouuois croire ce que l'on me disoit de ma fureur, encore que ie sentisse de grands tourmens en mon ame pour la perte de Lepante & le desplaisir de mes fautes; & ie considerois en quel mal-heur ie m'estois engagée, quand i'uois preferé d'estre mal-heureuse, plustost que l'on sçeust que ie l'aimasse; puis qu'alors i'estois mal heureuse, & reconnue amoureuse. Toutefois ma fièvre & ma fureur me reprenoient aussi tost qu'ils reuenoient me voir : De sorte que trois ou quatre iours apres, voyant que ie courois fortune de la vie, & qu'il n'y auoit pas apparence que ce mariage s'acheuast, à cause de ce que i'auois tesmoigné pour Lepante, & contre Callias, on se resolut en fin de m'asseurer qu'il ne seroit point mon mary : alors ma fièvre diminua fort; & apres que tous les accords furent rompus entierement, à cause de mon auersion, peu à peu ie reuin en santé : mais il me resta vne si grande douleur de la mort de Lepante, que depuis ie n'ay iamais eu de contente-

ment. A tous momens ses belles qualitez & les obligations que ie luy auois, me reuiennent en l'esprit: la faute de l'auoir fait mourir m'est vn souuenir si cruel, qu'il ne me donne aucun repos, & i'ay trouué trop veritable ce qu'il m'auoit prédit. En fin ie me resolus de me mettre dans ce Temple, pour employer mes iours au seruice des Dieux; puis que i'auois sceu si mal me seruir du bonheur qu'ils m'auoient offert parmy les hommes. Voila, ma chere Ariane, ce que i'ay à vous dire de ma vie, afin de vous seruir d'exemple, & vous empescher de tomber aux mesmes fautes qui m'ont tant causé d'ennuis: car ie voy que vos affaires prennent vn mesme chemin que les miennes, & si vous n'estes plus sage que moy, vous vous rendrez aussi mal-heureuse.

Ariane qui auoit donné vne extrême attention à ce discours, rompit alors son silence, & dit: l'ay eu beaucoup de contentement d'oïr le particulier de vostre vie, mais beaucoup aussi de desplaisir d'en apprendre le mal-heur. Je trouue qu'en quelque chose vous estes blasmable, & en d'autres excusable: pource que vous auez eu tort d'oublier le merite de Lepante, & d'estre changeante en effect: mais d'un autre costé l'autorité d'un pere est bien grande, & ie ne sçay pas comment i'eusse pû moy-mesme y resister. Autrefois, respondit Cyllenie, i'ay crû que cette autorité n'auoit este donnée aux peres, qu'afin que nous ne doutassions point de rendre le respect que nous deuons à la sagesse de leurs conseils: mais depuis examinant toutes choses, & considerant que la pluspart n'ont pas vne pieté solide enuers leurs enfans, & preferent leurs passions particulieres au bon-heur de ce qu'ils ont mis au monde, i'ay trouué qu'il n'y auoit rien

de si tyrannique; & qu'ils cachent seulement leurs fantaisies, de ce manteau de bonté, & d'amitié pour nous. Ariane, assurez vous que nos parens ont leurs desseins entierement differens des nostres: apres que nous auons bien songé à choisir vne personne vertueuse, accomplie, & conforme à nostre humeur, pour passer la vie avec honneur & repos, ils viennent la regarder d'autres yeux; ils veulent estre seuls satisfaits, & que rien ne les blesse: nostre bonheur est la moindre chose qu'ils considerent: s'ils ont quelque petit sujet de haine contre ce que nous desirons, ou quelque interest qui les oblige à desirer ce que nous fuyons; pour cacher le veritable sujet de leurs passions, ils blasmeront les nostres: ils nous presenteront l'obeïssance que nous leur deuons, & quelle honte c'est de faire parler de nous, se seruant de nos vertus mesmes pour nous rendre mal-heureuses: ils employent alors leur puissance contre nostre foiblesse: car il n'y a point de doute, & vous trouuerez que sur ce sujet ie me suis renduë bien sçauante à mes despens; que si nostre entendement n'est bien fortifié par la raison, il chancelle souuent en l'execution d'une entreprise; & est poussé hors des considerations sur lesquelles il s'est fondé, par d'autres quelquefois fort legeres. Il ne faut rien faire que nous n'ayons bien pensé & approuué; & que rien apres ne soit capable de nous faire repentir, par la legereté de nostre iugement: car le repentir rend la chose mauuaise, qui d'elle mesme estoit bonne; & l'ellection qui est fondée sur vne certaine science & vn ferme discours de raison, ne se doit changer iamais. Ainsi lors que nous auons reconnu vne personne d'une heureuse naissance, avec toutes qualitez honnestes; & que

pour ces iustes causes nous l'auons trouué digne de nostre amitié; que nous luy auons voulu tesmoigner cette estime; que nous auons receu ses assurances, & donné les nostres; il n'y a plus de consideration qui nous doiuë degager; nostre ame s'est donnée à luy quand nous auons receu la sienne: le Ciel nous a liez; les ceremonies de la terre sont puis apres peu de chose: nostre vertu ne peut plus consentir à s'en desdire; & les pensées qui nous suruiennent pour songer à d'autres sujets, sont toutes criminelles contre l'honneur de nostre sexe, qui ne peut souffrir qu'il reste vn homme à qui en effect nous ayons donné nostre ame, cependant qu'un autre possedera le corps: cette seule pensée nous est vn bourreau perpetuel, quelque mine que nous fassions, & quelque pretexte que nous prenions pour excuser nostre légèreté.

Le voy bien, interrompit Ariane, que vous auez bien estudié ces considerations, & j'aurois sujet de me deffier de mon courage, puisque le vostre estant appuyé d'un si bon sens, a peu ceder aux difficultez. A la verité, reprit Cyllenie, peut-estre ne deuez vous pas tant craindre de tomber en de pareilles erreurs que moy: pource que l'autorité d'un oncle n'est pas si puissante que celle d'un pere, & vous auez plus de force que moy en l'esprit: mais sur tout ne vous persuadez iamais, que l'affection que vous auez pour Melinte se puisse aneantir, soit par la resolution, ou par le temps: de peur que sur cette esperance vous n'abandonniez tout le bon-heur de vostre vie. Sçachez, Ariane, que quand par vne grande cognoissance de vertus & de merites, deux volontez se sont rencontrées pareilles, alors ce n'est

plus vne passion, c'est la raison qui aime : il ne faut point esperer que iamais ces affections se separent de nostre ame ; Il arriue quelquefois des accidens qui nous troublent , & nous font receuoir de fausses opinions : mais lors que ces fantaisies sont dissipées , les premieres impressions qui ne se peuuent destacher , passent aussi graüees que iamais , & se font sentir avec toute leur force ; & iugez en quel estat on demeure , si pendant le trouble du iugement , on a fait vne faute si grande , qu'on ne la puisse plus reparer. Il faut que nous confessions, respondit Ariane, que les hommes ont bien plus de force que nous aux resolutions : car lors qu'ils ont conceu vn dessein qui importe au bien de toute leur vie, ils le maintiennent iusques au dernier soupir , & font toutes choses possibles pour le mettre en effect : au contraire nostre esprit se relasche au moindre obstacle ; nous ne sçauons plus que deuenir ; & nostre foiblesse nous empesche de franchir le moindre passage , pour paruenir aux suprémes felicitez. Il est vray , poursuiuit Cyllenie : mais pourquoy ne s'en trouuera-t'il pas vne entre nous qui tesmoigne quelque force , & qui releue l'honneur de nostre sexe ? Belle Ariane , si i'ay manqué ainsi de courage , n'en faites pas de mesme : acqueriez vous avec beaucoup de gloire , beaucoup de contentement. La Nature nous a donne de secrets desirs, non seulement de conseruer nostre vie ; mais encoré de la rendre heureuse : pour le premier elle nous a donné l'amour de nous mesmes ; & pour le second , elle veut que nous aimions quelque autre chose : mais pour ce que l'amour de nous mesmes est la premiere , plus la chose que nous aimons, nous ressemble, plus nous sommes heu-

reuses quand nous pouuons la posseder. Ainsi lors que deux ames se rencontrent pareilles en bonté, en douceur & en vertu, c'est vn tresor qui ne se peut estimer; & cette rencontre ne se fait qu'une fois en vn siecle: aussi doiuent-elles mespriser tous les empeschemens qu'elles trouuent de s'vnir ensemble, afin de iouir des contentemens parfaits d'une si belle amitié: car apres qu'elles se sont vne fois cognues & aimées; s'il arriue qu'elles soient separées, cela ne se peut sans vne violence insupportable, & sans souffrir apres des supplices aussi cruels, comme elles s'estoient promis de plaisirs à conuerser ensemble eternellement. Il faut croire, reprit Ariane, que ces felicittez sont bien grandes, puisque la seule esperance que j'ay de viure vn iour avec Melinte, me rait: car pour vous dire le secret de mes pensées, ie ne croy pas que rien que la mort de l'un de nous, m'en puisse iamais empeschier: il me tarde qu'il ne soit desia arriué icy avec mon frere, afin que vous iugiez si j'ay raison de l'aimer, & que nous prenions tous ensemble conseil comment nous destournerons les desseins de mon oncle, pour fauoriser les nostres. Je seray bien aise, repliqua Cyllenie, de donner mon aduis dans ces conferences, & assurez vous que mes resolutions ne seront pas des moins genereuses.

Ces belles filles s'entrenoient souuent ainsi, pendant l'absence de Palamede, & attendant avec impatience son retour & celuy de Melinte: quelquefois la gentille Epicharis y melloit ses conseils, étant aimée de tous deux, autant que son esprit & sa discretion le meritoient.

Dicarque venoit souuent les voir, & poursuiuoit sa

niece de consentir à son dessein , surquoy elle remettoit à se resoudre au retour de son frere. Pisistrate ne manquoit pas aussi de luy rendre ses deuoirs , esperant acquiescer par le tesmoignage de son affection, ce que Melinte auoit desia gagné par vn si grand nombre de merites & de seruices , que la meconnoissance d'Ariane eust de beaucoup surpassé celle de son oncle, si elle eust mis seulement en doute de satisfaire aux promesses qu'elle luy auoit si solemnellement iurées.

Fin du huitiesme Liure de l'Ariane.





1752

Am. 1752

1752



LE
NEVFIESME
LIVRE DE
L'ARIANE.



E P V I S le cruel départ d'Aria-
 ne, Melinte auoit banny de son
 ame toutes sortes de ioyes, &
 sembloit auoir perdu en l'esloi-
 gnant de veüë, tant de belles
 qualitez qui le rendoient admi-
 rable. Cét esprit si genereux, si
 sage & si courtois, languissoit
 abbatu d'eunuy, sans aucune
 apparence de vertu, receuant les
 deuoirs de ses amis sans leur en tesmoigner de ressentiment,
 & mesprisant le soin de les rendre. Il haïssoit au-
 tant que son mal mesme, les diuertissemens qui le pou-
 uoient soulager, & ne cherissoit que la tristesse prolon-
 ge qui le consommoit. Il n'auoit point de contentement

que lors qu'il redemandoit à sa memoire le cher gage qu'elle auoit en garde, la diuine idée de sa belle Ariane, qui ne se presentoit iamais à son imagination qu'avec vne poimpe digne d'elle, accompagnée de lumieres qui la rendoient esclatante, pleine de graces & de charmes, & qui sembloit luy enuoyer des regards amoureux, pour le consoler en cette absence, & l'asseurer de sa fidelité. Toutefois ce plaisir estoit troublé de beaucoup de tourmens: aussi tost naissoit vn souhait de voir ces beautez autrement que par idée: puis suiuiot vn desir impatient, sinon de les posseder au moins de iouïr des faueurs qui luy estoient promises autrefois: mais ce desir mal-heureux estant reconnu impuissant, & abandonné de tout secours, le replongoit encore dans l'excès de ses afflictions.

Il n'y a que les insenséz qui puissent estre heureux par fantaisie; pource que leur iugement n'agissant point, & ne pouuant discerner le faux d'avec le vray, ils reçoient & ressentent leurs biens imaginaires comme veritables. Melinte au contraire n'estoit miserable que pour auoir trop de sens: la solidité de son iugement repoussoit ma'gré luy ces vaines illusions; & luy faisoit voir & sentir la verité de sa disgrâce, avec tous les mal-heurs qui l'accompagnoient. Si quelquefois il taschoit à se releuer par les sentimens de la vertu, qui enseigne à mespriser les accidens humains, comme choses hors de nous, & dont nous ne gouuernons pas les ressorts; & si son courage faisoit vn effort pour trouuer de la consolation dans cette absence, considerant qu'elle deuoit finir, & que les maux qui ont vn terme reçoient du soulagement de l'esperance; aussi tost mille loupçons cruels renuersoient ses resolutions. Il trouuoit que le voyage precipité de Di-

cearque n'auoit aucun sujet apparent qui luy peust estre aduantageux : il consideroit la prosperite de Pisistrate, qui sembloit triompher de luy , ayant eu le pouuoir d'emmener en son vaisseau , & d'auoir en sa disposition sa chere Ariane, avec ceux qui dispoient d'elle: l'aduantage de ce Riual, d'estre en son pais, assisté de ses amis, fauorisé de mille moyens , ayant Dicearque present , Ariane & son frere, lesquels il tascheroit de vaincre par tous moyens cependant qu'il estoit esloigné, incertain de toutes choses, en vain pourueu d'amis, en vain chery & honoré de tout vn peuple , & en vain remis dans son illustre & opulent heritage, puisque toute cette puissance luy demeueroit inutile. Ces meuttrieres pensées, soustenuës de mille raisons importunes, dont son esprit n'estoit que trop fertile , poulsuiuoient cruellement son esperance , & le priuoient du seul remede capable d'adoucir ses ennuis. Son corps participant aux douleurs de son ame , eust sans doute succombé souz les coups d'une fortune si ennemie, sans le dernier preseruatif qui luy restoit en l'assurance de l'affection d'Ariane, & de l'amitié de Palamede, dont il ne pouuoit douter. Palamede estoit vn amy esprouué par trop de rencontres pour en auoir le moindre soupçon ; & se deffier d'Ariane , c'estoit adiouter vn crime à son mal-heur, que la fidelle amour de cette Belle n'eust iamais pardonné, & que tout l'Ocean n'eust peü lauer.

Combien de fois pourtant disoit-il , pressé de ses craintes , & balançant entre l'assurance & le doute. Belle Ariane, dont la resolution bonne ou mauuaise pour moy me donnera la vie ou la mort , pardonnez

vn peu d'apprehension à celuy qui vit dans l'ignorance de tout ce qui vous arriue. Si ie crains, c'est que ie doute de moy, & non pas de vous: quand ie m'imagine la force de vostre diuin esprit, ie sens arriuer en mon ame vne puissance qui en chasse toutes les desffiances: mais de croire que ie puisse estre le sujet d'une constance inuincible, ce seroit vne presumption qui me rendroit mesme indigne de vous. Peut-estre qu'à present la cognoissance de beaucoup de merites en vn autre, esbranle vostre courage; & vous fait auoüer qu'ils ont plus d'égalité avec la grandeur de vostre vertu: peut-estre aussi qu'à cette heure vous résistez genereusement aux attaques d'une violente poursuite: Il me semble que i'entens d'un costé les humbles supplications & les promesses aduantageuses; & de l'autre le conseil plein de feinte affection, soutenu d'une autorité tyrannique, de colere & de menaces: si ce dernier est veritable; Ah! que ie vous enuie vne espreuue d'amour si glorieuse; & que ie cherirois l'heur d'estre exposé à des violences encore plus cruelles, pour faire voir ma passion victorieuse du Ciel & de la Terre. Que ie suis heureux, si vous m'avez pour seul obiet en ces occasions, & que ie vous estime heureuse aussi de l'aide que vous receuez, triomphant de leurs efforts & de leurs artifices. C'estoit ainsi que Melinte flattoit sa passion, & fortifioit ses cheres esperances; & si quelquefois vn peu de doute se mesloit dans ses résveries, c'estoit si modestement, & reiettant tousiours sur luy le deffaut qui pouuoit causer son mal-heur, qu'Ariane mesme n'eust peu s'en offenser. Mais le bien qu'il esperoit, flottant encore dans vne mer si pleine d'orages & d'escueils, & ses maux presens se faisant sentir avec toute

leur force , il retomboit tousiours dans son ennuy. Ses amis estoient contrains de l'arracher souuent de sa solitude , & de l'emmener aux passe-temps publics , & quelquefois à la chasse , où il se déroboit tousiours des autres , & n'auoit autre contentement , que lors qu'il estoit en lieu où il peust penser librement qu'il n'en auoit point.

Si les honneurs eussent esté capables de le satisfaire, les Syracusains eussent guery sa melancolie, l'establiissant Chef de leur conseil, & luy esleuant vne statuë de bronze en la place publique , avec cette honorable inscription : AV GENEREVX MELINTE , QVI AIMA PLUS SON PAÏS QVE SOY-MESME. Mais toutes ces faueurs estoient vn puissant appareil à son mal : son visage tesmoignoient bien les desplaisirs de son ame , tant il estoit changé ; & son corps ne pouuoit tantost plus resister , estant priué de nourriture & de repos. Ses iours estoient des nuits , pource qu'il ne iouïssoit plus de la clarté , tant il auoit la veuë chargée & affoiblie par les veilles ; & ses nuits estoient des iours longs & ennuyeux , puis qu'il ne goustoit plus la douceur du sommeil.

Sur la fin d'une nuit qu'il auoit ainsi passée sans dormir , apres auoir roulé en son esprit mille pensées différentes sur le sujet de ses soucis , il occupa le reste du temps qu'il auoit à demurer au lit , à faire ces vers sous le nom de Cloris , qu'il supposoit ordinairement.

*Tristes & mal-heureuses nuits ,
Qui resueillez tous mes ennuis ,
Pendant que vous donnez repos à toute chose ,
Me plaindray-ie tousiours ainsi ?*

*C'est assez soupiré, souffrez que ie repose,
Et ne me dites plus, Cloris n'est point icy.*

*Desja la Lune en passissant,
Fuit deuant le Soleil naissant,
Et le sommeil encor n'a fermé ma paupiere.
Pour moy seulement sous les Cieux,
La nuit est sans repos, & le iour sans lumiere;
Aussi-tost que Cloris s'esloigne de mes yeux.*

*Messagere de la clarté,
Deesse, de qui la beauté
Emprunte mille attraits de celle que j'adore,
Viens-tu m'annocer son retour?
Tu cours en vain pour moy, retourne, belle Aurore,
Si tu viens seulement pour annoncer le iour.*

*Pourquoy, courriere d'Orient,
Verses-tu des pleurs en riant?
Pleures-tu de pitié, voyant ce que j'endure?
Et si tu ris en mesme temps,
N'est-ce point que tu veux me donner vn augure,
Que ie verray bien tost les Beantez que j'attans?*


*Helas! que ce penser est doux;
Le Ciel de mon bien trop ialoux,
Me d'ffend d'esperer l'heur que tu me proposes.
Mais toy qui redonnes le iour,
Et qui rends à nos yeux toutes les belles choses,
Que ne ramcines-tu l'objet de mon amour?*

Melinte passoit ainsi sa vie miserablement, ayant l'ame troublée d'ennuis, d'impatiences, de soupçons & de craintes; plein d'incertitudes & de doutes, qui est l'estat le plus mal-heureux où vn Amant se puisse voir. C'est ordinairement entre deux extrémités que consiste la vertu, le bon-heur & le repos: mais il n'y a rien de si cruel en amour, que ce milieu qui est entre l'espoir & la crainte: c'est vn espace remply de confusion, de despit & de rage. L'esprit veut tousiours agir, connoistre & iuger: si les sens ne luy rapportent rien touchant ce qu'il aime, il ne sçait à quoy s'emp'oyer; il se trouble & se perd, & tourne ses forces contre luy-mesme pour se tourmenter & se destruire.

En fin l'arriuée de Palamede qui vint de Corinthe, le retira de tous ces doutes: mais ce fut par l'assurance qu'il luy donna du mal-heur qu'il craignoit. Il apprit la resolution tyrannique de Dicearque, la violente poursuite de Pisistrata, les cruelles persecutions que souffroit Ariane pour ne luy manquer pas de fidelité. Toutefois il estoit plus content d'estre assuré d'un mal qui n'estoit pas sans remede, que de viure incessamment dans l'incertitude & la crainte. Son courage ne luy permettoit pas de desesperer, & la fidelle assistance d'Ariane & de Palamede, estoit vn appuy bien puissant à ses resolutions. Mais la lètrre qu'il receut de la part d'Ariane, l'assura entierement, & l'obligea de ne pas differer dauantage pour partir de Syracuse: elle estoit telle.



ARIANE A MELINTE.

 La fin nous auons sceu le sujet de nostre voyage : on veut que i'espouse Pisistrate : mais pour y consentir il faudroit que i'eusse perdu le souuenir de vous. Toutefois ie ne sçay que deuenir, si vous ne m'assistez de conseil & de secours ; n'ayant plus pour me deffendre que l'amitié que ie vous porte, qui est une raison inuincible, mais qui n'est pas pour estre alleguée. Venez donc le plustost que vous pourrez ; & afin que vous ne doutiez point de moy ny de vostre pouuoir, sçachez que ie vous permets tout ce que vous voudrez entreprendre.


Il falloit peu de telles paroles à Melinte, pour le faire aller aux extrémités de la terre ; aussi tost il resolut avec Palamede, d'équiper vn vaisseau de toutes choses nécessaires, pour leur seruir à tous euenemens ; & pource qu'ils se doutoient bien qu'il faudroit employer la force, ils se pourueurent des plus belles & des meilleures armes qu'ils peurent choisir. Mais bien que l'amour de Melinte l'occupast entierement, il ne laissoit pas de songer aux choses plus esloignées ; & sçachant bien que tost ou tard Neton sçauroit qu'ils estoient viuans, il se resolut d'enuoyer Arcas à Rome, pour apprendre s'il ne se parloit point d'eux, & luy donna charge de s'adresser à Ma-

xime, auquel il enuoya de riches presens, pour le recompenser des pertes qu'il auoit souffertes à leur occasion. Ayant donné ordre de ce costé, il pria Telephe d'auoir soin de tous les biens qu'il laissoit en Sicile; & lors qu'il voulut partir avec Palamede, Amyntas se vint offrir à luy de si bonne grace, pour l'accompagner & le servir en ce voyage, qu'il ne le pût refuser. Erycine mesme qui aimoit tousiours Melinte comme son frere, le pria de le receuoir; ayant voulu qu'Amyntas qui continuoit à l'aimer passionnément, luy rendist ce tesmoignage de son affection, de l'aller servir en son entreprise qui ne luy estoit pas inconnüe. Melinte, Palamede & Amyntas, accompagnez de la plus courageuse ieunesse dont ils se peurent assurer, partirent, & prirent la route de Corinthe. Le vent leur fut fauorable du commencement: mais incontinent il s'esleua vn vent du Midy, qui les contraignit d'aller bien loin prendre terre en Italie, quelque art que le Pilote peust employer. Ce destour & ce reculement de voyage estoient bien cruels à Melinte, qui à tous momens croyoit que ce fust l'heure fatale que l'on contraignoit Ariane d'espouser Pisistrate: toutefois il fallut passer ainsi plus d'vn mois auant que le vent fust change: mais aussi tost qu'ils l'eurent propre ils se remirent en mer. Le second iour qu'ils estoient partis, ils virent venir à eux vn vaisseau leger, qui sembloit auoir dessein de les attaquer. Melinte pour n'estre pas surpris, mit vn casque en sa teste, prit vne espée & vne rondache, & aduertit Palamede, Amyntas & les autres d'en faire autant, & de se tenir prests pour combattre. Ils connurent incontinent que c'estoit vn brigantin de pyrates, qui fut bien tost à eux, pource qu'ils estoient trop courageux pour fuir; & lors

qu'ils furent accrochez, Melinte sauta le premier dans le brigantin, & fut aussi tost suiuy de Palamede & d'Amintas, ce qui estonna grandement les Corsaires, pource qu'ils n'auoient pas accoustumé d'estre preuenus, ny de combattre seulement pour se deffendre. Cét estonnement qu'ils receurent fut suiuy de mille coups, que Melinte & ses vaillans amis leur porterent en vn moment. Melinte auoit desia abbatu à ses pieds cinq ou six soldats, & tout fuyoit deuant luy, mais il fut arresté par la valeur d'un ieune Corsaire extrêmement beau, qui portoit vn armet doré, couuert de plumes qui ombrageoient son visage; & qui luy donnoient ensemble de la fierté & de la grace: avec cela il faisoit parestre tant de force & d'adresse, que Melinte iugea que c'estoit là vn ennemy digne de luy; aussi tost il l'attaqua, mais il s'estonna de voir qu'en quelque lieu qu'il adressast ses coups, il y trouuoit tousiours ou son bouclier ou son espée. Cependant il falloit aussi qu'il songeast à parer les atteintes d'un si vaillant & si adroit ennemy, qui ne luy donnoit point de repos, & pour se bien deffendre ne laissoit pas aussi de bien attaquer. Toutefois Melinte auoit de l'auantage, pource que peu à peu il le faisoit reculer, & en fin parant vn coup il coula entre les armes, & passant sur luy le perça au bras gauche. Alors ils vindrent aux prises; Melinte apres plusieurs efforts le ietta par terre, & ayant retiré son espée, alloit le tuer, sans qu'on luy arrestast le bras. Il regarda celuy qui le tenoit, & vid vn homme de bonne mine qui n'auoit point d'armes, & qui le coniueroit de donner la vie à vn si gentil & si valeureux Capitaine. Melinte se contenta de luy oster son espée, & aduertit qu'on luy estanchast le sang: il regarda en mesme

temps ce que faisoient Palamede, Amyntas & les autres, & il vid qu'ils auoient tué la pluspart des pyrates, & que le reste demandoit la vie, voyant leur vaillant Capitaine vaincu. Ce ieune Corsaire ayant quelque temps tenu la veuë en terre, pource qu'il estoit honteux de sa défaite, la releua pour regarder Melinte, & luy dit : Iamais ie n'eusse esté si lasche que de vous rendre mon espée, & de vouloir vous estre redeuable de la vie, si ie n'auois dessein d'employer l'une & l'autre à vous seruir : car il faut que vous soyiez le plus vaillant de tous les hommes, pour m'auoir mis en cet estat ; n'ayant iamais trouué personne qui m'ait résisté. Je vous prie donc de me recevoir pour vn soldat qui sçaura bien vous obeïr, puis que ie ne vous ay sçeu vaincre. Melinte touché de ces paroles, qui partoient d'un cœur bien genereux, & sentant quelque émotion en luy qui le conuioit à l'aimer, soit pour la grace qui accompagnoit son visage & son parler, soit pour vne secrette affection que tous les vaillans hommes ont les vns pour les autres, luy tendit la main, & l'ayant embrassé l'assura de son amitié ; & luy tesmoigna seulement qu'il s'estonnoit, comment estant si honneste & si vaillant, il s'adonnaît à vne vie de pirate. Eurymedon luy dit (car il se nommoit ainsi) que lors que le trouble seroit cessé dans le vaisseau, il luy rendroit telle raison de sa vie, qu'il esperoit n'estre condamné par luy d'aucune de ses actions. Melinte luy respondit, qu'il seroit bien aise d'apprendre sa fortune, & pource que ce vaisseau estoit plein de morts, il repassa dans le sien avec ses amis, & y fit entrer le bel Eurymedon, & celuy qui auoit empesché qu'il ne fust tué, ausquels il dit qu'il seroit bien aise de n'arriuer que de nuit à Corinthe. Euryme-

don qui auoit souuent couru toutes ces mers, & qui voyoit desia parestre de loing le Promontoire de Nau-pacte, & le Golfe auquel on auoit depuis peu donné le nom de Lepante, depuis que ce mal-heureux Amant se fut precipité dedans, luy dit qu'ils en estoient assez près, & qu'il falloit ietter l'ancre pour s'arrester en ce lieu. Son aduis fut suiuy, & les deux vaisseaux se separerent, pour ne se pas heurter. Eurymedon ayant veu que sa blesseure n'estoit pas bien grande, y appliqua d'une drogue avec laquelle il s'assuroit que le lendemain la playe seroit refermée. Alors Melinte le pria de leur faire sçauoir sa fortune, estant impossible de mieux employer le temps qui leur restoit iusques à la nuit; & s'estant tous retirez dans vne chambre, il commença ainsi l'histoire de sa vie.



HISTOIRE D'EVRYMEDON & de Pasithée.



E ne croy pas qu'il y ait personne au monde, qui puisse mieux tesmoigner que moy, combien la rencontre que l'on fait pour estre nourry & esleué, est importante à la vie des hommes: car si j'ay fait de bonnes actions iusques icy, i'en suis entierement redevable à cette nourriture, & si i'en ay fait de mauuaises, ie pense aussi en estre excusable par elle. Vous confesserez cette verité, lors que ie vous auray dit à quoy ie me suis em-

ployé, depuis que i'eus acquis quelque cognoissance; car de ce qui m'est arriué auparauant, i'amaïs ie n'en ay peu apprendre aucune chose.

Dans la mer Ionienne il y a vne Isle nommée Corcyre, à l'un des costez de laquelle regardant l'Epire, est vne retraite de pyrates, où il est impossible de les aller attaquer. Ie fus esleué en ce lieu parmy eux, sans i'amaïs auoir eu cognoissance de quels parens ie suis né: seulement ils m'ont tousiours fait croire que i'estois d'un Sang illustre. Ie ne sçay s'ils m'ont desrobé à quelque Roy estant enfant, ou si c'estoit pour m'en donner plus de courage; toutefois i'ay tousiours remarqué qu'ils m'ont porté un grand respect, & que dès mon plus ieune âge, ils auoient ordonné quelques uns d'entr'eux pour me seruir: depuis encore, aussi tost que ie fus capable de porter les armes, ils se sousmirent volontairement à mon obeïssance; & croyoient leurs conquestes toutes assurées, lors qu'ils me pouuoient auoir pour leur Chef. Ie ne puis dire d'où venoit l'opinion qu'ils auoient conceüe de moy, ou si quelque deuin leur auoit promis quelque grande fortune, si ie leur commandois: en fin ie les ay recognus tousiours prompts à m'obeïr, excepté seulement en ce qui me touchoit le plus, qui estoit de sçauoir en quel lieu ils m'auoient trouué. Toutefois ie les estimois excusables de me refuser ce contentement, lors que ie pensois qu'ils auoient crainte de me perdre, & qu'apres que ie me serois rendu en mon pais, ie ne recherchasse leur ruine, au lieu de seruir à leur fortune. Ie croy que ce qui les fit esperer quelque chose de mon courage, fut vne action que ie fis, n'ayant pas encore neuf ans ac-

compris. Quelques Corsaires auoient fait vne prise, & venant à la partager deuant moy, deux d'entr'eux prirent querelle contr'vn; & pour luy faire quitter ce qu'il auoit, mirent l'espée à la main contre luy. Je ne peüs souffrir ce combat inegal, voyant que celuy qui estoit seul alloit estre tué, bien qu'il employast toute son industrie & son courage à se deffendre; & sans songer à mon âge, ny au danger, ie mis la main à vne petite espée que i'auois, & allay attaquer l'vn de ces deux. Je ne sçay s'il craignit de m'offenser, & si me mesprisant il me donna plus de facilité de le frapper, mais ie luy portay vn coup dans le ventre qui le fit mourir à l'heure mesme. Incontinent ceux qui estoient presens, vindrent m'embrasser; & me donnerent mille louanges, de n'auoir peu souffrir la lascheté de ces deux, qui en attaquoient vn seul. Aussi tost que i'eus l'age de douze ans, ils commencerent à me mener sur la mer, & quelque soin qu'ils prissent pour m'empescher de sortir du vaisseau, lors qu'ils en alloient attaquer vn autre, ils me trouuoient tousiours au milieu du combat l'espée à la main, & ayant quelque ennemy sous mes pieds. En fin lors que i'eus enuiron quinze ans, il arriva que celuy qui commandoit à tous les Pyrates mourut: ils m'eleurent pour leur Chef; se relioüissant, comme ils disoient, de ce qu'ils obeïroient désormais à vn Prince: les ceremonies qui leur sont ordinaires en ces elections furent obseruées, & ils me firent serment d'une obeïssance inuiolable, pourueu que ie conseruasse leurs priuileges. Peu de temps apres, pour me monstrier digne de cette charge, ie montay sur mer avec deux vaisseaux seulement, & allay aux costes de l'Egypte: ie fus

fi heureux que de prendre cinq grands vaisseaux chargez de marchandises, avec lesquels ie reuins en Corcyre, où ie fis part de mon butin à tous mes compagnons, qui ne cessioient de me louer, & de m'appeller leur bon & leur vaillant Prince. En deux ans ie les rendis plus riches que leur dernier Capitaine n'auoit fait en toute sa vie: toutefois ie ne vous rediray point toutes les prises que ie fis, ny tous les accidens que ie courus, pour venir à ce qui m'a esté le plus sensible de ma vie.

L'acquerois avec l'aage plus de connoissance; & ayant tousiours vescu parmy eux en cette erreur, que plus le massacre & le butin auoient esté grands, la gloire estoit aussi plus grande, peu à peu ie commençay à changer d'opinion: pource qu'il me sembloit plus glorieux de pardonner aux vaincus, que de les tuer cruellement; & ie prenois bien plus de plaisir à donner ce que i'auois acquis que d'en faire des tresors. Cela me fit penser que la vie de ces Pyrates estoit mal-heureuse, & que leurs actions repugnoient à celles que deuoient pratiquer les genereux courages. Ce qui acheua de me les faire auoir en horreur, fut que pour mon bon-heur, estant allez bien loin en course dedans l'Helespont, nous fusmes surpris de l'Hyuer au retour, & fusmes contrains de nous arrester à vn port de la Grece, iusques au Printemps. Cependant que ceux qui estoient avec moy contrefaisoient les marchands, pour estre seurement en ce lieu, & vendoient ce qu'ils auoient pris, ie ne perdis point le temps, & allay par toutes les plus belles villes de la Grece, demeurant quelque temps en chacune, où j'appris legerement les exercices qui sont propres à ceux qui suuent les armes, & les ciuilité que ie voyois obseruer par les plus nobles. En ces

escoles, ie connus bien que celle où i'auois esté nourry estoit fondée sur de meschantes maximes, & que ce que les nostres appelloient vaillance & gloire, estoit proprement assassinat & brigandage. Toutefois apres auoir demeuré plus de six mois à m'instruire ainsi, ie ne laissay pas de me remettre en mer avec mes compagnons, pour nous en retourner en Corcyre.

Le second iour que nous fusmes partis, nous aperceusmes vn grand vaisseau qui venoit des costes de l'Asie, & qui sembloit prendre la mesme route que nous. Aussi tost nous nous resolusmes de l'attaquer, & l'ayant quelque temps costoyé, nous l'inuestismes, & entraismes dedans. Le combat fut assez bien disputé par ceux qui y estoient, entre lesquels il y eut le Chef qui se defendit long temps contre moy: toutefois ie luy fis en fin demander la vie, & pardonnay en sa faueur à tout le reste. Je l'auois blessé en plusieurs endroits, & i'eus soin de luy faire accommoder ses playes; puis ie l'emmenay avec son vaisseau & ses gens en Corcyre. Mon retour fut extrêmement agreable aux Pyrates, tant à cause qu'il y auoit long temps que l'on ne m'auoit veu, que pour les grandes richesses que i'amenois, avec ce prisonnier, qui estoit vn Prince Armenien, lequel s'en alloit Ambassadeur à Rome, de la part de Vologese Roy des Parthes, & de Tyridate Roy d'Armenie. La cognoissance que i'eus qu'il estoit Prince, me fit auoir vn soin particulier de luy; ie le visitois assez souuent, attendant que sa rançon arriuaist; mais ie le trouuois dans vne si profonde melancholie, que rien ne le pouuoit consoler. En fin l'ayant pressé beaucoup de fois de me dire le sujet de sa tristesse; ce Prince qui se nommoit Araxés, trou-
uant

uant en moy quelque ciuilité, & vne grande franchise, se resolut de me dire quelle estoit sa douleur, & me parla ainsi. Quand ie n'aurois que ce seul desplaisir de manquer à mon Roy, de qui les affaires souffrent vn grand preiudice par le séjour que ie fay icy, vous me confesferez que i'ay raison de m'affliger: mais bien que l'ennuy que i'en ay soit extrême, il est bien surpassé par vn autre tourment que i'endure. Je ne veux point, continua-t'il, vous celer ce qui me cause tant de peine; & bien que vous soyez le seul sujet de la prison où ie suis, ie reçois de vous tant de courtoisies dans mon malheur, que ie veux bien vous faire part de ma fortune, comme au meilleur amy que i'aye au monde. Sçachez, poursuiuit-il, que Tyridate mon Maistre, est le legitime successeur du Royaume d'Armenie par le partage qui fut fait entre luy & ses freres Vologese & Pacore; dont le premier qui estoit l'aîné, se reserua le Royaume des Parthes, & donna à Pacore & à Tyridate, les Royaumes de Medie & d'Armenie. Mais les Romains s'estant sous la conduite de Corbulon rendus les plus forts dans l'Armenie, en chasserent Tyridate, & firent venir de Rome Tygranes, vn Prince estrange, petit fils de l'ancien Archelas, Roy de Cappadoce, & neveu d'Archelas Roy de la Troade, qui auoit tousiours demeuré en ostage auprès des Empereurs, & l'establirent Roy d'Armenie. Ce changement estoit bien triste à la pluspart des Armeniens, qui regrettoient leur Roy naturel de la race du grand Arsaces: d'autre costé plusieurs aimoient mieux Tigra- nes, esperant que les Romains, de la main desquels ils le receuoient, les sçauroient mieux maintenir en paix, que Tyridate qui ne pouuoit se reestabliir & se conseruer,

qu'en combattant continuellement contr'eux. Toutefois Vologese ayant assemblé toutes ses forces pour remettre son frere en son Royaume, apres qu'il y a eu de l'avantage & de la perte de part & d'autre, nous auons fait en sorte que Corbulon est demeuré d'accord, que Tigranes abandonneroit la pretention d'Armenie, & que Tyridate en demeureroit paisible possesseur, pourueu qu'il allast à Rome receuoir le Diademe de la main de Neron. Attendant que ce voyage se peust faire, j'estois enuoyé deuers l'Empereur, pour l'asseurer de la fidelité de mon Maistre, pour gage de laquelle il a laissé sa fille entre les mains de Corbulon; mais j'ay eu charge de passer par la Troade, pour voir le Roy Archelas, sur quelques conditions qui le touchoient, à cause de son neveu Tygranes; & en ce lieu j'ay rencontré tout le bonheur & le mal-heur, que ie dois esperer ou craindre en ma vie. Ce Roy n'a point de fils, mais cette disgrace est bien recompensée par l'heur qu'il a d'auoir vne fille nommée Pasithée, qui est sans doute la plus belle & la plus aimable Princesse de l'Vniuers. Apres auoir parlé au Roy, ie fus conduit deuant elle pour la saluër; & aussi tost que ie la vis, vn tremblement me surprit, qui me presageoit, comme ie croy, les mal-heurs qui me doiuent arriuer pour l'auoir veüe. Je ne laissay pas de me rassurer; mais apres luy auoir parlé quelque temps, ie me sentis tellement touché de son amour, que de saisissement la voix me manquoit à chaque propos. Je ne pouuois finir cette entreueüe pour le contentement que receuoit ma passion naissante en la regardant: d'autre costé j'estois honteux d'estre deuant elle, & de ne pouuoir l'entretenir. Toutefois en fin ie la laissay, de peur de luy estre

importun ; & m'estant retiré au logis que l'on m'auoit donné , ie commençay à résuer profondément sur ce qui m'estoit arriué. Je considérois la beauté & toutes les graces de la Princesse, qui me forçoient à l'aimer, & dont ie ne trouuois rien capable de me desgager : d'autre part ie regardois le peu d'espoir d'estre iamais heureux avec elle ; pource qu'elle estoit destinée à Tygranes son cousin , qui seroit tousiours bien plus considerable que moy à Archelas, bien que ie fusse de la race des Arsacides, à cause qu'il estoit seul resté de son sang. Ces cruelles pensées estoient bien assez puissantes pour ruiner mes esperances, mais non pas pour estouffer mon amour ; & sa violence croissant de moment en moment , ie ne pouuois soulager mon ardeur, qu'en recherchant à la voir : & tants'en faut que cette veüe m'apporast quelque remede, ie sentoie en la voyant mille desirs qui entroient en foule dans mon ame, avec dessein de n'en partir iamais , & de me rendre le plus miserable des hommes. Je sçauois bien que plus ie la voyois , plus ie ressentiois mon mal , & rien toutefois ne m'estoit si cruel que d'estre obligé de la laisser pour acheuer mon voyage. Tout ce que ie pûs faire, fut qu'estant auprès d'elle pour luy dire adieu ; Madame, luy dis- ie, ie m'en vay à Rome, d'où ie voudrois bien reuenir aussi heureux que Tigranes, mais ie n'en voudrois pas rapporter les qualitez qu'il y a acquises. Elle me demanda ce que ie voulois dire. C'est, luy respondis- ie, qu'il en est reuenu avec l'esperance de vous posseder, mais il en a rapporté vn esprit bas & seruile, qui le rend indigne d'vne si haute fortune. Je n'eusse pas pris la hardiesse de mespriser ainsi son cousin, si ce n'eust esté vne chose connue, que son esprit s'estoit rendu abject ayant

esté retenu long temps en ostage à Rome. Elle rougit m'entendant ainsi parler, & sans se fâcher elle me dit. Si cette esperance est si haute, elle peut donner du courage à ceux qui en manquent, & en faire perdre à ceux qui en ont trop. l'eus seulement loisir de luy repartir. Ce n'est pas perdre le courage quand on ne le perd qu'avec la vie; & c'est la resolution que ie prens en la recherche que ie veux faire de l'honneur de vos bonnes grâces. Elle ne pût me répondre, pource que quelques personnes s'approcherent de nous; & ie fus assez content de luy auoir tesmoigné mon affection, & le peu d'estat que l'on faisoit de Tygranes, auant que de me separer d'elle. le partis de la Cour d'Archelas en dessein de venir à Rome, & de retourner le plustost que ie pourrois en Armenie, pour m'acquitter de ma charge, où apres auoir demeuré le moins qu'il me seroit possible, i'auois resolu d'aller aussi tost reuoir Pasirhée, dont la priuation m'estoit si cruelle, que tous les momens que ie passois sans la voir, m'estoient des années de supplices insupportables. Iugez, Eurymedon, continua-t-il, quel mal-heur ce m'a esté d'auoir esté pris par vous, lors que mon voyage mesme m'estoit assez ennuyeux; & quelle doit estre ma vie en ce lieu, où ie pers peut-estre la fortune de mon Maistre, & mes plus cheres esperances? Alors quantité de larmes luy tomberent des yeux, desquelles ie fus touché; mais plus encore de sçauoir que i'estois la cause d'un si grand trouble aux affaires de Tyridate, & aux amours de ce Prince: ce qui m'obligea de luy dire. Ie croy que vostre plus grand ennuy vient de n'oser esperer aucune courtoisie de nous; mais ie veux vous faire voir que mon ame ne tient rien de la cruauté des pirates.

Je pense que les Dieux vous ont enuoyé icy pour mon salut, & peut-estre aussi qu'ils m'ont fait naistre pour vous servir. Dés à present ie vous donne la liberté sans attendre dauantage vostre rançon, & vous rends tous ceux qui sont demeurez des vostres, avec les richesses que vous auez, qui sont encore entieres: mais c'est à condition que vous m'accorderez la priere que ie veux vous faire. Il y a long temps, continuay- ie, que ie veux quitter la vie de ces pirates, parmy lesquels j'ay esté nourry malgré moy, & sur cela ie luy contay tout ce que vous auez entendu touchant l'incertitude de ma naissance, & comment j'auois vescu iusques alors. Maintenant, adioustay- ie, vous pouuez faire vostre voyage de Rome, & partir quand vous voudrez: ie vous demande seulement que nous puissions viure eternellement amis, & que vous me disiez où ie vous pourray trouuer à vostre retour, soit en Asmenie, soit en la Troade; pource qu'apres auoir abandonné cette Isle pour iamais, ie me rendray deuers vous en equipage digne d'un Prince pour ne nous plus separer.

Araxés au commencement de ce discours ne scauoit s'il deuoit croire ce que ie disois: mais voyant en fin que ie parlois serieusement, il se ietta à genoux deuant moy, & me dit. Qu'il ne doutoit point que ma naissance ne fust des plus illustres, puis que ie faisois des actions qui n'appartenoient qu'aux Dieux, & aux plus grands Princes du monde: que s'il receuoit de moy vne grace si grande, il m'auroit vne obligation dont tous ses seruites ne le pouroient iamais acquitter; & que s'il estoit si heureux que de me voir vn iour en Armenie, ie reconnoistrois quel ressentiment il auoit d'une faueur si signalée. En fin

il me fit mille sermens, pour m'asseurer que iamais homme ne fut si redevable à vn autre qu'il me seroit, apres auoir receu vn office si important à sa vie. Je le releuay, & l'ayant embrassé pour luy iurer encore vne eternelle amitié, nous consultasmes ensemble, & trouuasmes qu'il luy falloit pour le moins deux mois pour son voyage: il me demanda ce terme, dans lequel temps il se rendroit sans faillir en la Troade, aupres de la Princesse Pasithée, s'il ne luy arriuoit vn second mal-heur: que toutefois il ne deuoit pas nommer ainsi la rencontre qu'il auoit faite de moy, puis qu'il auoit plus acquis en cette infortune, qu'il ne pouuoit iamais gagner dans les plus heureux accidens de sa vie. Je fis equiper son vaisseau le mieux que ie pûs, dans lequel ie fis remettre tous ses hommes avec ce qu'il auoit perdu: mesme i'y adioustay quelques presens, afin qu'il se souuinst de moy, cependant que ie disposerois mes affaires, pour abandonner secrettement ceux qui m'auoient nourry, sans qu'ils se doutassent de mon dessein. Mes compagnons auoient bien du regret de se voir enleuer tant de richesses; mais ils me portoient tant d'honneur, que iamais ils n'oserent m'en rien témoigner. En fin ie fis partir Araxés de nostre Isle, apres mille embrassemens, accompagnez d'autant de protestations d'amitié. Depuis ie fus quelque temps parmy les Corsaires, viuant plus que iamais à leur mode, & approuuant toutes leurs actions, afin qu'ils ne se defiasent point de moy. Mais lors que ie vis approcher le temps qu'Araxés m'adoit donné, ie commençay à choisir ceux qui m'estoient les plus affectionnez, pour me suiure en mon entreprise. Vn iour les ayant assemblez, ie leur representay quel dessein estoit le nostre, d'acquérir in-

ceſſamment des richelſſes, ſans ſçauoir à quoy les employer. Car, leur diſois-ie, dans la vie ordinaire des hommes, ie trouue excuſables ceux qui taſchent d'aſſeſſer des biens, pour ſubuenir à leurs familles, ou pour ſatisfaire à leur ambition, ce qui ne ſe peut faire ſans leur ſecours. Mais nous n'auons point d'enſans, pour leſquels nous ayons ſujet de trauailler; & pour les degrez d'honneur, nous ne les donnons pas entre nous aux plus riches, mais aux plus vaillans. Quelle furie donc nous poſſede pour nous porter inceſſamment dans le peril, & nous faire troubler le repos & le commerce de tous les hommes. Cette meſme valeur par laquelle nous ſurmontons les autres, nous peut faire acquerir dans la guerre avec gloire, ce que nous rauifſons avec infamie. Si tout le monde nous redoute, nous redoutons auſſi tout le monde; & meſurant noſtre nombre à celuy du reſte des hommes, nous auons bien plus d'ennemis. Les autres ont encore cet aduantage par deſſus nous, qu'eſtant en noſtre pouuoir, ou ils en ſortent par rançon, ou ils reçoient la mort avec innocence; & nous ſommes aſſeurez, eſtant pris, de mourir par le plus honteux ſupplice dont on puiſſe punir les meſchans. Outre cela ie ne croy pas que les Romains nous laiſſent dauantage en repos: il n'y a point de doute qu'au retour de la guerre des Parthes, Corbulon nettoiera la mer de pirates auſſi facilement que ſit autrefois Pompée. Plus nous auons eſté vaillans depuis quelque temps, plus nous auons eſmeu de plaintes contre nous; & plus nous nous ſommes rendus redoutables, on nous viendra attaquer avec plus de puiſſance & d'opiniatrete. Pourquoy continuërons nous à viure de cette ſorte, puis que nous

pouuons estre parmy les autres hommes avec plus d'honneur & de seurété, & avec autant d'auantage? Je ne croy pas ceder en valeur à aucun Capitaine qui iolt au monde, & ie suis assuré qu'il n'y a point de soldats en l'armée de Corbulon plus courageux que vous: cependant nous leur laissons emporter les despoüilles de toute la terre, & les loüanges de tous les hommes, & nous nous amusons laschement à courir la mer pour attendre vn Marchand au passage. Allons, mes compagnons, en lieu où nous puissions acquerir des biens accompagnez de gloire: soyons amis des Romains ou leurs ennemis; prenons part à leurs victoires, ou bien ioignons nous à ceux qu'ils attaquent pour empescher leurs conquestes. C'est là que nous serons inuincibles, quand toutes nos actions seront autorisées du droict de la guerre. Si ie suis Prince, comme l'on me veut faire croire, ie veux faire des actions dignes de ma naissance; & si vous auez encore ce grand courage que j'ay reconnu en tant de rencontres, vous ne douterez point de me suiure dans le dessein que j'ay de rendre nostre bon-heur parfait, & nostre gloire immortelle.

Lors que j'eus acheué de parler, ils me crièrent tous qu'ils estoient resolu de viure & de mourir avec moy, en quelque lieu que ie les voulusse conduire. Le prix d'eux vn serment different de celuy qu'ils m'auoient fait autrefois, & les priay de tenir nostre entreprise secrette: cependant qu'ils missent à part ce qu'ils auoient de plus precieux, & se tinsent prests pour me suiure, lors que ie feindrois de les choisir pour aller en course. l'auois peur d'arriuer en la Troade plustost qu'Araxés: de sorte que ie laissay encore couler vn mois, apres lequel ie pris congé du

gé du reste des pyrates , en dessein de ne les reuoir iamais. Je vous confesse que ma ioye fut extrême, lors que ie me vis eschappé d'entre leurs mains ; & ie ne songeois qu'à la nouuelle façon de vie que i'allois suiure, dans laquelle ie me promettois toute sorte de contentement & d'honneur. Mais il est bien difficile à ceux qui sont accoustumés au vice, de le quitter entierement , & ne retomber pas dans leur premiere façon de viure, quand l'occasion s'en presente d'elle mesme. Deux iours apres que nous fusmes partis , lors que nous eusmes fait le tour du Peloponese, & qu'apres auoir passé les Cyclades nous entrasmes dans la mer Egée, vn vaisseau vint à nous , qui se trouua de si belle prise, qu'il me fut impossible d'empescher ceux qui estoient avec moy de l'aller attaquer. Je leur disois assez , est-ce là cette genereuse resolution que nous auons faite ? est-ce là ce serment qui deuoit estre inuiolable ? Ils me prierent de leur donner cette derniere satisfaction , & que c'estoit seulement pour prendre congé de leur mestier. Cependant ils m'emportoient malgré moy deuers ce vaisseau , quelque remonstrance & quelque commandement que ie leur fisse ; & l'ayant ioint ils entrerent pelle-messe dedans : pour moy ie demeuray les bras croisez dans le brigantin , sans vouloir auoir part à cette action, qu'il me falloit souffrir malgré moy : seulement ie les priay qu'ils ne tuassent personne. Quelque temps apres ie les vy retourner chargez de quantité de belles estoifes , que l'on portoit à Rome, & qui venoient du Leuant : ils firent passer dans nostre vaisseau de ieunes enfans fort beaux , des cheuaux rares , & quantité de marchandises precieuses , qui auoient esté destinees pour seruir au luxe estrange, qui regnoit alors

dans la premiere ville du monde : ils ne prirent que ce qui estoit le plus riche, & laisserent le reste avec la vie, à ceux qui estoient dans ce vaisseau, auquel ils donnerent la liberté. La plupart des miens se ietterent à genoux deuant moy, pour me prier de leur pardonner cette desobeissance, & me promirent que desormais ils suiuroient inuiolablement tout ce que ie leur commanderois. Je fus contraint de faire tout ce qu'ils voulurent, puis nous poursuiuismes nostre chemin.

Nous auions dessein d'aller descendre en la Troade; & nous descouuions desia l'Isle de Lesbos, lors qu'il nous parut vn autre vaisseau qui venoit de partir de l'Isle: mes compagnons m'assurerent que ie connoistrois en cette occasion qu'ils me vouloient tenir desormais ce qu'ils m'auoient promis, & se resoluoient de le laisser passer: mais lors qu'il fut prest de nous, l'entendis la voix d'une fille qui erioit; sauuez la Princeesse, mes amis, sauuez la Princeesse. Je dis à ceux de mon vaisseau, que c'estoit là vne occasion digne de nostre courage, & qu'il falloit attaquer ces ravisseurs. Incontinent nous allasmes les inueltir: c'estoit vn brigantin pareil au nostre, dans lequel ie sautay avec mes compagnons: i'y trouuay peu de resistance, encore que ceux du vaisseau fussent bien armez, & nous mismes tout au fil de l'espee: puis y entray dans vne des chambres, où ie trouuay vn homme laid & contrefait, assisté de quatre ou cinq soldats, qui tenoit vne ieune Princeesse, la plus belle qu'il est possible de voir. Je donnay trois ou quatre grands coups d'espee à ces mal-heureux, & aussi tost ce vilain se ietta à genoux deuant la Princeesse, & luy dit, que si elle faisoit en sorte que ie luy sauuasse la vie, il luy apprendroit

quelque chose qui luy estoit de grande importance. Elle élcouta ce qu'il vouloit dire , & apres qu'il luy eut quelque temps parlé en secret , elle s'adressa à moy , & me pria de me preparer pour combattre vn autre vaisseau qui deuoit bien tost l'attaquer : puis elle me dit. Sçachez , braue guerrier , que l'homme du monde que ie hay le plus , auoit dessein de m'enleuer bien loin hors de mon pais , & avec vn assez plaisant artifice : car pour faire mesme que ie luy en eusse de l'obligation , il faisoit tenir deux vaisseaux prests ; le premier estoit celuy-cy , qu'il auoit fait cacher derriere vn rocher , le long de la coste de la mer , où ie deuois me promener avec les filles de ma suite , & dans lequel estoient ceux qui m'ont enleuée & que vous auez deffaits : Le second est encore au port , & il doit se mettre dedans , feignant de venir à mon secours ; afin qu'apres auoir attaqué celuy-cy , ie croye qu'il m'aura saquée des mains de cét homme , qu'il auoit choisi le plus laid qu'il auoit peu , afin que i'en eusse plus d'horreur , & que ie creusse luy estre extrêmement redevable , de ce qu'il m'en auroit deliurée : puis il deuoit me conjurer par son affection de le receuoir pour mon mary , en recompense d'un seruice si signalé ; sinon il auoit resolu de m'enleuer de force en son pais. Maintenant , poursuit-elle , si vous desirez acheuer de m'obliger , ie vous supplie de ne le point espartgner quand il nous abordera , comme il a dessein de le faire incontinent ; afin qu'il recoiue de vos mains la peine que sa trahison a mentée. Elle parloit avec tant de grace , que ie ne cessois d'admirer la douceur de son discours , & ie luy respondis. Madame , quand le deuoir qui nous commande de seruir toutes les Dames , ne m'ordonneroit pas

de vous obeïr, vostre naissance, & tant de belles qualitez que ie voy, m'obligent trop de vous donner le contentement que vous souhaitez; & il me tarde que ce traistre ne paroisse, pour le punir deuant vos yeux d'une si grande meschanceté: mais afin qu'il ne manque point à nous ioindre, ie suis d'avis que nous passions dans mon brigantin, qui est semblable à celui-cy, & mieux fourny de tout ce qui nous est necessaire: puis apres auoir mis ces mesmes estendars, nous coulerons celui-cy à fonds, avec ce qui reste de ces miserables; & il ne manquera point de nous prendre pour le mesme vaisseau qui vous emmenoit. Cette proposition fut trouuée fort bonne par la Princesse qui soufrit entendant cette inuention, & en mesme temps me fit dans l'ame mille blessures. Je la pris par la main, & la fis passer dans mon brigantin: aussi tost ie fis faire diuerses ouuertures à celui d'où nous estions sortis, par lesquelles il prit eau de tous costez, & vn peu apres il n'en parut aucune chose sur la mer. l'auois impatience que cét autre vaisseau n'arriuaist, tant ie desirois plaire à cette belle Princesse, de qui la douce maïesté me lioit delia le cœur de mille chaines. En fin ie le voy parestre, aussi tost ie donne ordre que l'on fist feinte de fuyr lentement, & que lors qu'ils nous auroient abordez, on en laissast entrer vne partie: ie pris seulement vn casque, & abaissay la visiere de peur qu'ils seignissent d'entrer, voyant des visages inconnus. Le Capitaine de l'autre vaisseau estoit armé de mesme, lors qu'il sauta dans le nostre, & il dit en entrant? Ah! traistres, ie vous puniray bien de vouloir enleuer vne telle Princesse; mais il trouua ce qu'il n'attendoit pas, pour ce que ie le receus avec de si grands coups, qu'il recon-

nut avec estonnement que l'on ne l'espargnoit point. Je vous iure que i'estois honteux d'une victoire si facile: toutefois ayant promis à la Princesse de le punir devant ses yeux, ie l'abbaris à mes pieds, & voulant luy trancher la teste ie la fis appeller, afin de le faire mourir en sa presence: mais ayant arraché le casque à ce mal-heureux qui estoit à mes pieds, ie demeuray tout immobile de voir que c'estoit Araxes. Alors mon esprit fut troublé de mille confusions, d'avoir ainsi traité celuy que i'allois chercher en la Troade: & d'autre costé i'auois promis à la Princesse de ne le point espargner; dequoy elle s'estonnant, ie la regarday tout triste, & m'estant iecté à ses pieds, ie luy dis. Ah! Madame, que ie suis mal-heureux! il faut que ie vous desobeïsse, ou que ie tuë mon amy. Elle m'embrassa pour me releuer, & me dit. Comment est-il possible que vous soyez amy d'un si meschant homme, étant si genereux que vous estes? toutefois ie veux estre satisfaite pour l'amour de vous de la punition qu'il a receüe, & veux bien que vous luy laissiez la vie. Je la remerciay de cette grace qu'elle nous faisoit à tous deux, & allay pour faire estancher le sang d'Araxes qu'il perdoit de tous costez. Il estoit si honteux & si estourdy de ce qu'il voyoit, étant encore à-peine desabusé, qu'il n'osoit leuer les yeux sur moy, ny sur la Princesse, qui estoit la belle Palithee sa Maistresse: toutefois il se laissa accommoder ses blessures, & cependant i'allay demander à la Princesse, si elle ne desiroit pas que ie la ramenasse à Lesbos. C'est, me dit-elle, dequoy ie vous supplie. Aussi tost ie fis remettre Araxes dans son vaisseau, & le recommanday à ses gens, en leur ordonnant de suiure le mien. Ayant donné l'ordre par tout, ie n'eus plus au-

tre soin que d'entretenir cette belle Princeſſe : & bien que l'amitié que j'auois promiſe à Araxés s'eſſorçaſt d'empêcher la naiſſance de mon amour, elle ne faiſoit pas ſi bonne garde, qu'il n'entraſt peu à peu beaucoup de paſſion dans mon ame : moy meſme ie deſtournois ma penſée de cette amitié, pour fauoriſer la ſurpriſe, & la trahiſſois pour me laiſſer prendre moy-meſme. Cette Princeſſe me faiſoit de ſi grands remerciemens, que ie ne ſçauois comment reſpondre à ſes obligeantes paroles ; & plus elle teſmoi-
gnoit m'eſtre redevable du ſecours que ie luy auois donné ſi à propos, plus elle me reduiſoit à auoir beſoin du ſien. Apres l'auoir aſſeurée de mon ſeruice, & qu'elle pou-
uoit diſpoſer de ma vie, ie la priay de ne point declarer Araxés pour autheur de ſon enleuement; ce qu'elle me promit.

En fin nous arriuaſmes au port de Mitylene, où deſia beaucoup de peuple eſtoit accouru, avec le Roy Archelaſ ſon pere, qui eſtoit alors en cette iſle, & eſtoit bien empêché à faire partir des vaiſſeaux, pour aller apres ceux qui venoient d'enleuer ſa fille vniue. Nous deſcendiſmes, & le Roy venant embraffer ſa chere fille, luy demanda comment elle auoit eſté ſauuée. Voila, luy dit-elle en me monſtrant, celuy à qui ie dois l'honneur & la vie, que ſa valeur m'a conſeruez. Le Roy me vint embraffer, & m'aſſeura que ie pouuois diſpoſer de tous ſes Eſtats, en échange d'une ſi chere aſſiſtance. Il nous demanda qui pouuoient eſtre ceux qui l'auoient voulu enleuer; & ie reconnus bien qu'elle vouloit m'obliger, lors qu'elle reſpondit. Ie croy que c'eſtoient quelques eſcumeurs de mer, dont il n'en eſt pas reſté vn ſeul, pource que le vaiſſeau a eſté coulé à fonds. Araxés, reprit le Roy, ne vous

â-t'il point reneontrez ? Non, repartit-elle, & peut-estre aura-t'il pris vne autre route.

Mais, continua Eurymedon, il faut que ie vous conte les reſioüiſſances du peuple pour le ſalut de Paſithee : ce n'eſtoient que cris de ioye autour de nous, & vne foule ſi grande, que nous ſaillîſmes à eſtre eſtouffez. Ie cognus bien qu'elle eſtoit infiniment aimée, mais ie vous en diray la cauſe incontinent. Ie commanday à ceux de mon vaiſſeau de retourner en mer le long de la coſte, pour renecontrer celuy d'Araxés, qui ne pareſſoit point encore; & de l'aduerſtir qu'il ne ſeignîſt point de reuenir à la Cour pour ſe faire penſer; & que le Roy n'auoit aucun ſouſçon de luy : ie retins ſeulement deux ou trois des miens, avec leſquels j'accompagnay le Roy & la Princeſſe au Palais, où ils voulurent que ie fuſſe logé, tandis que ie voudrois demeurer en ce païs. Archelas me demanda ſ'il n'y auoit point moyen de ſçauoir à qui ils auoient vne ſi grande obligation. Ie luy diſ que l'on me nommoit Eurymedon : pour ma naiſſance, que ie ne la ſçauois pas moy-mefme, & que ceux qui m'auoient eſleuë me vouloient faire croire que i'eſtois d'un ſang Royal. Ils ſe contenterent alors de cela, puis ils me conduiſirent dans vne chambre, où ils me prièrent de me reposer : mais ie leur diſ que mon trauail n'auoit pas eſté ſi grand qu'il m'obligeaſt à prendre le repos deuant la nuit. Ie les reconduiſis dans leurs appartemens; & cependant j'admirois le nombre de Seigneurs qui venoient baiſer la robbe de Paſithee, & qui teſmoignoient vne extreme ioye de la reuoir : Auſſi les qualitez de cette Princeſſe eſtoient admirables, comme ie ſçeus depuis. Outre ſa beauté merueilleuſe, elle auoit tant de charmes en toutes ſes actions



soit en la douceur de ses regards, soit en l'obligeante familiarité dont elle vsoit enuers tous ceux qui l'approchoient, qu'elle acqueroit non seulement la bien-veillance, mais l'amour passionnée de tous ceux qui pouuoient la voir ou luy parler. Tous les Princes estrangers qui venoient à la Cour de son pere, ne pouuoient plus partir d'auprès d'elle: ceux du païs qui la connoissoient de pluslong temps, gardoient en leurs cœurs de vieilles blessures, & les Gentils-hommes qui estoient ordonnez pour la seruir, estoient tous pasles & languissans, se sentant consommer d'une amour sans esperance. Si tost qu'elle desiroit quelque chose, tous ceux qui estoient autour d'elle couroient pour auoir l'heur de luy rendre service: s'il luy arriuoit quelque indisposition, c'estoit vne affliction generale: & si les Dieux eussent desiré des victimes humaines pour luy redonner la santé, il n'y eust pas eu vn homme en l'Isle, ny en toute la Troade, qui ne se fust sacrifié pour elle. Ce n'est pas qu'elle affectast de se faire aimer, ny qu'elle employast aucun artifice pour s'acquérir ainsi tous les cœurs: mais il luy estoit si naturel de plaire à chacun, que sans y penser elle produisoit tousiours ces effects; & quelquefois elle se faisoit d'un tirare don de nature, qui contre son desir faisoit des blessures à ceux mesmes qu'elle vouloit obliger. Ce ne fut donc pas vne grande merueille, si estant si generalement aimée, elle le fut aussi de moy: mais c'en fut vne bien grande pour moy d'acquérir sans peine l'honneur de sa bien-veillance, que tant de Princes recherchoient depuis si long temps avec mille deuoirs; & par le plus estrange hazard qu'un homme puisse iamais rencontrer. Car Argasés estant sorti de nostre Isle par la grace que ie luy fis, estoit

estoit allé en diligence à Rome, puis estoit retourné en Armenie; & aussi tost il s'estoit rendu en la Troade, n'ayant pas employé plus de deux mois en tous ces voyages, tant il estoit pressé du desir de reuoir Pafithée; & le Roy Archelas desirant passer vne partie de l'Esté en l'Isle de Lesbos qui luy appartenoit, il les auoit suiuis pour ne point abandonner la Princesse, dont il taschoit d'acquérir les bonnes graces par toutes sortes d'artifices: En fin ne pouuant obtenir d'elle aucune faueur, qui luy donnast esperance d'y paruenir, il s'estoit resolu de l'enleuer, lors qu'elle se promeneroit sur la coste en la compagnie de ses filles seulement: pource qu'elle auoit certaines heures où elle vouloit estre libre sans vn seul homme: Mais considererez quel mal-heur fut celuy d'Araxés, & quelle fortune fut la mienne; il vouloit que la Princesse luy eust obligation de sa deliurance artificieuse, & mon bon-heur voulut que ie luy donnay vn veritable secours, qui m'acquies entierement son affection. Je reconnus sa bonne volonté; pource qu'estant dans sa chambre, apres que le Roy se fut retiré, elle dit, qu'elle se vouloit promener dans les iardins deuant le souper, & me donna la main pour me tesmoigner qu'elle vouloit estre conduite par moy. l'estois si rayuy de cet honneur, que ie ne scaurois vous redire mon transport. Je vous confesse que ie n'auois encore rien aimé, & que i'estois assez nouueau à l'entretien des Dames: i'estois ieune, & sans experience des ciuilités qu'il faut obseruer, ayant tousiours esté sur la mer, & parmy des pirates: ie me souuenois seulement de ce que i'auois veu dans la Grece durant le séjour que i'y fis. Quantite de personnes passerent deuant nous, & les autres nous suivirent avec les filles, iusques dans les iardins, où la

Princesse se separant des autres, qui s'esloignerent par respect, me mena dans vne allée où nous demeurâmes seuls: alors desirant l'entretenir de quelque chose, comme elle sembloit m'y conuier, ie luy dis. Madame, quelle fortune plus grande me pouuoit arriuer, ayant dessein de voir cette Cour, que d'en auoir eu l'entrée par vn moyen si fauorable? Elle me respondit: Cette rencontre est heureuse seulement pour moy, pource que sans me trouuer en mer, vous eussiez tousiours esté icy le bien venu; & si ie ne vous eusse trouué, ie serois à présent la plus mal-heureuse de la terre. Madame, repris- ie, il n'y a point de iuge qui n'auouë que vostre rencontre estant infiniment plus agreable que la mienne, ie n'aye esté en cette occasion le plus heureux; si ce n'est que la veuë d'une si belle chose ne me rende plus mal-heureux que ie ne puis encore le preuoir. Je puis bien, me dit- elle, vous oster cette crainte, & vous assurer que si ma veuë ne vous est heureuse, au moins ne vous sera-t-elle iamais mal-heureuse, tandis que vostre bon-heur dépendra de ma volonté. La plus grande gloire, poursuiuit- elle, que j'aye au monde, c'est de n'estre haïe de personne; & il faudroit que ie la fusse beaucoup de vous, si apres tant de satisfactions que vous m'auiez données, vous en receuiez peu de moy. L'estois bien rayuy de ces obligeantes paroles, & il sembloit qu'elles me donnassent sujet de la presser dauantage, pour receuoir de plus grands tesmoignages de sa bonne volonté: mais se contentant de ce qu'elle m'auoit dit, elle rompit ce discours, pour me demander d'où venoit la connoissance que j'auois d'Araxés. Madame, luy dis- ie, ie ne vous puis rien dire sur ce sujet, que ie ne vous conte toute ma vie: & pource

que ie ne vous en veüx celer aucune chose , permettez que ie remette à vous en entretenir lors que vous aurez plus de loisir: seulement ie vous supplie de croire, que ie l'ay trop peu connu pour auoir iamais participé à aucune de ses malices. Souuenez vous donc , me dit-elle, de la promesse que vous me faites: car i'espere receuoir vn grand plaisir à entendre vostre fortune ; elle ne doit pas estre ordinaire; & ie m'attens d'oüir de vous des actions bien contraires à celles d'Araxés. Vous deuez sçauoir , continua - t'elle , que la premiere fois qu'il me vit, ce fut lors qu'estant enuoyé à Rome par Tyridate , il passa par la Troade pour voir le Roy mon pere. Je ne sçay quel dessein il eut pour moy: mais apres m'auoir voulu tesmoigner de l'affection par quelques souspirs , il fut si insolent en medisant Adieu , que de me parler au mespris de Tygranes mon cousin , croyant fort auancer ses affaires, s'il reculoit celles de Tygranes, duquel on parloit pour me le faire espouser. l'eus assez de retenü pour ne le pas offencer, en repartant à cette indiscretion , comme il sembloit raisonnable. Mais ne croyant pas le reuoir iamais , ie voulus bien le laisser aller sans mescontentement. Enuiron deux mois apres ie le vy reuenir en la Troade , ayant pouuoir de traiter encore quelque chose avec le Roy mon pere, cependant que Tyridate estoit allé à Rome pour receuoir la Couronne d'Armenie des mains de l'Empereur. Je ne sçauois vous redire les artifices & les meschancetez dont il vfa , pour acquerir quelque aduantage sur ma volonté. La douceur que ie tesmoigne à tous ceux que ie voy , le rendit si insolent, qu'il ne feignit point d'entreprendre toutes choses sur mon esprit , qu'il estimoit peut-estre foible , &

susceptible de beaucoup d'impressions. Pour m'abuser, il pratiqua des Sacrificateurs & des Deuins, qui me voulurent faire croire, que par leur science, & par les victimes immolées, ils connoissoient que mon bon-heur ne pouuoit venir que du costé de l'Armenie; qu'un Prince du sang le plus illustre de ces Prouinces, deuoit me posséder; sur tout que ie me gardasse bien de ce qui venoit des Romains, & de ce qu'ils auoient nourry: pource que de ce costé il ne me pouuoit arriuer que du mal-heur. Outre cela il gagna par presens vne femme qui couchoit dans ma chambre, laquelle fut si meschante que de m'espouuanter la nuit, & de me faire entendre des voix avec des accens pitoyables, comme si c'eust esté la Reine ma mere, qui estoit morte vn peu auparauant, laquelle m'aduertissoit de fuir Tygranes, & de choisir Araxés pour mon mary. Mesmes il fut si lasche & si traistre, qu'il dressa des embusches pour assassiner son riuai, de quoy sa bonne fortune seule le preserua. Toutes ces trahisons me furent descouuertes vn iour seulement auant qu'il me fist enleuer; & il ne sçait point encore que i'en aye rien sçeu. Ie me souuiens que quelques iours auparavant il osa bien dire à Tygranes en ma presence, qu'il estoit vn Roy sans Couronne, & qu'il seroit bien tost vn seruiteur sans Maistresse: ie ne pouuois iuger alors ce qu'il vouloit dire: mais depuis i'ay reconnu qu'il méditoit delia mon enleuement, auquel il s'estoit resolu voyant qu'il n'acqueroit rien par ses meschantes pratiques. Son mal-heureux dessein fut assez bien conduit, & i'eusse esté enleuée par deux fois, si ie n'eusse esté deliurée par vous seul de ces deux mal-heurs. Voyez à present s'il fut iamais vn homme plus meschant que

celuy-là , & si i'ay sujet de le détester plus que toutes choses. Pasithée acheua ainsi de parler , continua Eury-medon , & i'estois si estonné d'entendre tant de malices que ie demeurois immobile en la regardant : en fin ie luy dis : Madame , ie ne connoissois point ce Prince pour vn homme si traistre , ne l'ayant iamais veu que quelques iours en vn lieu où il estoit retenu prisonnier , d'où ayant esté deliuré par mon moyen il me promit son amitié pour iamais : ie l'asseuray aussi de la mienne , & ie ne l'auois pas veu depuis. Je l'estime bien meschant , sur ce que vous m'avez appris , mais ie le trouue bien peu fin , ou bien mal-heureux , de ce que taschant d'acquérir vostre affection , il a acquis vostre haine , avec laquelle il se peut croire haï de tout le monde. Pour moy ie l'abandonne , & pour l'amour de vous , & pour moy-mesme : confessant qu'il n'y a rien de si dangereux que l'amitié d'un traistre. Nous nous rencontraſmes alors à vn destour d'allée , où nous trouuaſmes quantité de personnes : elle eut seulement loisir de me dire : Si vous perdez d'un costé , vous pourrez plus gagner d'un autre ; n'y ayant icy personne qui ne soit bien aise de vous auoir pour amy. Je ne pûs repartir , pource qu'il fallut nous ioindre aux autres , & le reste de la journée se passa en ciuilité & en ceremonies.

Lors que ie fus retiré , i'estois bien en peine comment ie traitteroſ avec Araxés : mais il me deliura luy mesme de cette inquietude , pource que mes gens me venant retrouver , apres auoir esté long temps en mer , me dirent qu'ils n'auoient rien veu pareſtre , quelque soin qu'ils euſſent pris , & que sans doute Araxés se seroit retiré autre part. Je ne songeay donc plus qu'à bien conduire la

fortune de mes affections , puis qu'elles auoient vn si heureux commencement. Le lendemain j'allay au leuë du Roy , qui me fit encore toutes sortes de caresses , puis il me mena dans la chambre de la Princeſſe , que nous ſurpriſmes , lors qu'elle ne venoit que de ſortir du liſt : mais cette ſurpriſe fut bien auantageuſe pour elle , & bien agreable pour moy ; pource qu'elle auoit toute la gorge deſcouuerte , qui eſtoit d'vne blancheur extrême. Tout ce qu'elle peût faire , fut de mettre au deuant ſes belles mains , qui bien qu'elles fuſſent ialouſes de la merueille de ce ſein , & qu'elles ſemblauſſent diſputer avec luy de beauré , laiſſoient touteſois eſchapper la victoire par l'ouuerture des doigts qui ne pouuoient pas le tacher entierement. Mon contentement finit par le moyen d'vn linge qu'on luy apporta , qui la couurit entierement , & deſroba tous ceſtrefors à ma veüë. Le Roy me laiſſa avec elle , luy ordonnant de m'entretenir : il ne pouuoit pas me faire vne grace plus grande ; & deſirant m'en preualoir , ie dis à la Princeſſe. Madame, pardonnez ſi ie ne puis vouloir de mal au plus grand ennemy que vous ayez , puis qu'il eſt la ſeule cauſe du bon-heur que j'ay de vous voir. Ce bon-heur, reſpondit-elle, n'eſt pas aſſez grand pour luy eſtre fort redeuable. Elle me demanda là deſſus où il eſtoit. Je luy dis, qu'ayant enuoyé mes gens le chercher en mer, ils n'en auoient eu aucunes nouuelles. Que les Dieux, reſprit-elle, ne nous le renuoyent iamais , pour mon repos & pour le voſtre. Mais , continua-t'elle, ne puis- ie point ſçauoir comment il vous auoit obligé à venir icy ? C'eſt, luy dis- ie , dequoy ie ne vous puis entierement eſclaircir, que ie n'aye le loifir de vous apprendre toute ma vie. Je veux, dit-elle, dès cette heure vous en donner la com-

modité , pource qu'il me tarde trop que ie ne sçache de vos nouuelles ; & s'estant fait apporter vne simarre Persienne , elle se fit remettre sur son lit ; & m'ayant fait approcher seul , me commanda de m'asseoir , & de m'acquitter de la promesse que ie luy auois faite le soir precedent. Alors ie luy recitay tout ce que ie vōus ay appris de ma fortune , pensant que c'eust esté infidelité de reseruer aucune chose à dire , à celle à qui i'auois donné mon cœur. Elle m'escoutoit avec vn excès d'estonnement & de ioye : mesmes il sembloit que desia elle prenoit part aux accidens de ma vie. Il me restoit seulement à luy dire ce que i'auois fait depuis mon départ de Corcyre , pour venir en la Troade , lors qu'on la vint aduertir , que Tygranes qui arriuoit des confins de l'Armenie la venoit voir. Elle rougit , & se mit hors du lit ; en mesme temps ie soupiray assez haut , & ce soupir alluma encore dauantage le feu des iouës de Pasithée , qui pour couvrir le sujet de sa rougeur , dit tout haut. Ie suis vrayement bien honteuse , de ce que Tygranes me trouuera en ce desordre. En mesme temps il entra pour la saluer , & luy fit quelques complimens : puis il s'adressa à moy , & me dit qu'il venoit de sçauoir du Roy l'obligation que tout son Royaume m'auoit , en laquelle il prenoit plus de part que personne , ayant vn grand interest au salut de la Princesse. Ie luy respondis que nul ne m'estoit redevable d'vne chose que m'on deuoit seul m'auoit ordonné de faire : toutefois que ie m'estimois bien-heureux de m'estre rencontré à propos sur la mer pour la secourir , & pour estre la cause de leur contentement. Ie remarquay à son port & à ses discours , que c'estoit vn homme comme Araxes me l'auoit dépeint , qui passoit plustost né pour ser-

uir que pour commander ; ne montrant aucune grandeur de courage, & n'affectant que certaines ciuilitéz, qui se pratiquent entre les honnestes Citoyens d'une ville. Vn peu apres quantité de Princes & de Seigneurs arriuerent, & il ne se parla plus que de sacrifices & de réjouissances pour le salut de Pasithée.

Le lendemain fut choisi par le Roy pour certains esbats que ces Princes renouuelloient souuent en la place publique, pour disputer à l'enuy quelques prix ; leur dessein n'estant en ce país que de plaire à la Princesse, & d'entrer en ses bonnes graces. L'accompagnay Pasithée au Temple, où les sacrifices se firent avec beaucoup de ceremonie & de ioye : pour moy ie me perdis dans la presse, & ayant fait signe à mes gens de me suiure, & m'estant rendu à mon vaisseau ie m'en allay en plaine mer. La Princesse s'estonna de ne me voir plus, & creut que i'estois allé trouuer Araxés. Le Roy commanda que l'on me fist chercher, & ne pouuoit sçauoir pourquoy ie les auois quittez sans prendre congé d'eux. Cependant ils ne laisserent pas de continuer le dessein qu'ils auoient pris de se resioiir, & toutes choses furent préparées pour les jeux du lendemain. Je sçeus depuis que Tygranes mena la Princesse en la place publique, & l'ayant laissée avec le Roy sur leur eschaffaut, il monta à cheval & s'alla messer avec sa troupe parmy les Princes qui vouloient ce iour là faire parestre leur adresse en faueur de Pasithée. Apres auoir disputé quelques prix, on planta au milieu de la place vn pilier de bois, auquel on attachas des armes en façon de trophée, qui representoient vn homme armé. Les Princes venoient à cheval à l'entour en courant ; & lançant leurs jaelots, c'estoit à
qui

qui adreſſeroit le plus beau coup dans ces armes. Lors que tous eurent donné différentes atteintes , on entendit vingt trompettes au bout de la liee : cela fit tourner la veuë à chacun de ce coſte , & la barriere eſtant ouuerte , les trompettes entrerent , & ſe placerent à l'entour du camp. Incontinent apres cinquante hommes parurent à pied, veſtus ſuperbement, chacun le jaelot en la main & le bouclier au bras gauche, au milieu deſquels eſtoit vn ieune guerrier , armé legerement ſur vn beau cheual Arabe , lequel apres que ſes compagnons eurent tous lancé leurs jaelots ſur le trophée , vint en galoppant , & planta le ſien dans la viſiere du caſque. Chacun battit des mains pour teſmoignage que c'eſtoit là le plus beau coup : mais ce bruit ceſſa , à cauſe des meſmes trompettes qui ſonnerent encore ; & ces guerriers s'eſtant rangez à l'entour du camp , la barriere fut ouuerte ; l'on vid auancer peu à peu vn grand pavillon , d'vne eſtoffe fort fine & grandement legere , dont le bas eſtoit porté tout à l'entour par vingt-quatre ieunes enfans fort beaux , veſtus de caſaques de ſoye incarnate , bordées d'argent , avec de petits habillemens de teſte de meſme lürée , d'où pendoient des plumes incarnates & blanches. Lors que cette machine fut paruenüe iuſques au milieu de la place , deux de ces enfans qui portoient les bords du deuant , ourrirent le pavillon : en meſme temps on en vid fortir vn grand aigle qui emporta le pavillon dans les nuës , & le fit perdre de veü. Le parus alors ſur vn beau cheual blanc , marqué de taches rouges naturelles. L'auois la teſte couuerte de plumes de différentes couleurs : i'eſtois veſtu d'vne ſuperbe caſaque de broderie d'or & d'argent , & faiſois manier mon che-

ual qui estoit assez bien dresse. Les enfans s'allèrent ranger à l'entour de l'eschaffaut de la Princesse, & cependant apres auoir fait faire quelques passades à mon cheual, ieluy fis prendre la course deuers le trophée, & lançay mon jaelot dans le casque de si grande roideur, que non seulement il y demeura attaché; mais encore le pilier qui peut-estre estoit desia esbranlé, en fut renuersé par terre avec les armes. Ma force fut admirée de tout le peuple, & des Princes mesmes, mais plus encore lors que ie descendis de cheual, & qu'allant deuers les armes ie les pris avec le pilier sur vne espaule: & les portay deuers l'eschaffaut du Roy. Je les presentay à la Princesse, & les ayant mises à ses pieds, ie receus d'elle vn braslet de grosses perles qui estoit le prix, que ie baissay, puis le passay dans mon bras. Elle estoit pleine d'vne grande satisfaction de me reuoir, & de l'honneur que j'auois acquis en presence de son pere, qui me donna mille louanges, & me conuia de pareltre encore au passe-temps qui relloit.

Permettez, dit alors Palamede, que ie vous interrompe, & faites nous sçauoir, s'il vous plaist, comment vous auiez pû trouuer dequoy faire vne entrée si merueilleuse. Je suis bien aise, respondit Eurymedon, que vous m'en ayez fait souuenir, car ie l'eusse peut-estre oublié. J'auois trouué heureusement, reprit-il, toutes ces choses dans le premier vaisseau que mes soldats auoient pris; ce pavillon, ces enfans ainsi vestus, ce grand aigle, le cheual sur lequel j'estois, & celuy de mon Lieutenant qui estoit ieune soldat, fort vaillant & adroit; lequel auoit paru au milieu de ces cinquante qui entrèrent les premiers & qui estoient l'eslite de mes compagnons.

Pour moy ayant trouué cét aigle fort grand, ie luy attachay au pied vne corde, dont l'autre bout tenoit au haut du pavillon, qui estoit soustenu par dedans de la pointe d'un grand jaucelot que i'auois en la main, & ie le portois ainsi moy mesme avec les enfans qui le soustenoient par les bords. Je tenois l'aigle cependant, & lors que le pavillon fut ouuert, ie le laissay aller, & il emporta avec luy ce pavillon qui estoit d'une estoffe extrêmement legere. Cette inuention fut fort approuuée de Melinte, de Palamede & des autres, puis Eurymedon reprit. Le dernier passe-temps estoit, que tous ceux qui auoient paru aux autres exercices, semesloient ensemble, & se frappaient avec des jaucelots dont la pointe estoit émoussée, pour faire voir seulement l'adresse & la grace, ce qui estoit plustost vne maniere de dance que de combat. L'on me donna vn de ces jaucelots, & remontant sur mon cheual, i'allay me mesler parmy les autres; mais ce fut vn jeu qui troubla bien la ioye de cette iournée. Deux Armeniens s'estoient mis de la partie, avec des dards bien aigus, dont l'un frappa Tigranes, & le blessa à mort; l'autre s'adressa à moy, duquel heureusement i'euitay le coup, plustost pource qu'il est naturel de destourner le corps d'un dard que l'on void venir à soy, que pour la crainte que ie deusse auoir d'en estre blessé: toutefois ie ne pûs empescher que le coup ne me portast dans le bras. Incontinent Tigranes s'escria qu'il estoit blessé; celuy qui auoit fait le coup, vouloit s'enfuir avec son compagnon, & leur fuite seule les accusa, pource qu'on eust esté en doute d'où venoit le coup s'ils fussent demeurez parmy nous; tout fut à l'instant en allarme & en desordre; Archelas accourut avec quelques vns de ses officiers qui l'as-

filtoient, & aussi tost qu'il fut arriué, Tygranes expira; ce qui fit faire au Roy mille regrets. Mais ce qui estonna tout le monde, fut qu'un vieillard, des premiers d'aupres Archelas, seietta sur le corps mort de Tygranes, & l'embrassant fondonoit en pleurs, & remplissoit tout de ses plaintes. Le Roy luy demanda quel sujet il auoit de se tourmenter si particulierement de cét accident. Ah! Sire, dit-il, que le sujet de mon extrême douleur serue à la diminution de la vostre: le veux bien vous dire que celui cy estoit mon fils, que ie menay avec le petit Tygranes vostre neveu, lors que vous l'enuoyastes par moy en ostage à Rome. Vostre neveu mourut sur la mer, & voyant qu'il estoit du tout important au bien de vos affaires que cét enfant allast à Rome: pource qu'il ne vous restoit aucun de vostre sang pour donner en ostage; ie supposay mon fils en sa place, qui fut receu pour luy, & depuis il a tousiours esté nourry comme s'il eust esté le vray Tygranes. Je ne croy point estre blasmable d'auoir fait cette supposition, n'ayant eu alors autre dessein que l'affermissement de vos Estats; & si depuis j'ay laissé chacun en cette erreur, c'estoit de peur que les Romains ne creussent que vous eussiez esté autheur de la tromperie: mais puisque ie n'ay osé pendant sa vie luy rendre aucun deuoir de pere, permettez que ie luy rende au moins ce dernier tesmoignage de mon affection; & là dessus il se mit à l'embrasser & à pleurer comme auparavant. Chacun estoit immobile d'estonnement: mais le Roy plus que tous, qui ne laissa pas d'auoir soin du corps de Tygranes, & de consoler ce bon-homme qu'il auoit tousiours esprouué tres-fidelle. Cependant on auoit arresté les deux Armeniens, qui apres quelques tourmens,

confessèrent qu'ils auoient esté enuoyez par Araxes, pour se desfaire de Tygranes & de moy, & qu'ils n'en auoient pû trouuer vn meilleur moyen. l'eus alors en horreur Araxes, qui auoir voulu me faire assassiner apres auoir receu de moy tant de bons offices, & remerciay les Dieux de m'auoir preserué de ce danger. Le Roy & la Princeesse n'eurent plus autre soin que de moy: ils me contraignirent de garder le lit à cause de ma blessure, encore qu'elle fust petire: toutefois ie n'en estois pas fasche, pource que i'estois visité par la Princeesse, qui me dit la premiere fois qu'elle fut seule avec moy. Hé bien, Eurimedon, voila des presens de vostre bon amy: le luy respondis: Madame, encore que son dessein fust tres-meschant, ie ne scaurois me plaindre de luy, de ce que pensant m'oster du monde il en a osté aussi celuy qui m'eust bien tost remply de mal-heurs, & qui vous eust aussi renduë infortunée, estant indigne de vous: Mais puis qu'il n'est plus, permettez moy, Madame. La voix me faillit alors: dequoy elle souffrir, & m'ayant regardé quelque temps, elle me dit: Vous pouuez continuer. Je repris la parole, mais en tremblant; & luy dis. Permettez moy, Madame, d'esperer. Ma langue s'arresta pour la seconde fois; & elle souffrant encore, me dit. Je ne veux point que vous acheuiez: car ie vous permets d'esperer toutes choses. Ah! Madame, luy dis-ie, que vous me rendiez heureux: mais quand vous considererez que ie suis vn Estranger & vn inconnu, j'ay bien peur que mon bon-heur ne se change. Vos actions, respondit-elle, font trop connoistre ce que vous estes; & tout ainsi que Tygranes ne pouuoit faire que des actions basses, n'estant pas Prince; il est impossible aussi que

vous ne soyez Prince, reconnoissant que vous en faites toutes les actions. Je luy repartis. Jamais mon ambition ne m'a fait affecter ce titre, bien que j'aye esté nourry en l'opinion de le posséder: mais ie veux bien le retenir, puisque c'est luy seul qui me peut faire pretendre quelque chose auprès de vous; encore que ma passion extrême veuille prendre beaucoup de part en l'entreprise d'acquiescer l'honneur de vos bonnes graces. Elle me dit; ie veux croire de vostre passion tout ce qu'il vous plaist: mais ie vous commande de vous qualifier Prince désormais, en attendant que vous puissiez vérifier vostre naissance, pour fortifier cependant, & faire réussir vn iour le choix que ie veux faire de vous. Je pris alors vne de ses belles mains, qu'elle me laissa long temps baiser; & ie ne pouuois la quitter, ne sçachant de quelle autre sorte luy exprimer ma ioye. Toutefois il fallut nous separer, & elle s'en alla apres m'auoir ordonné de faire en sorte que ie sceusse ce que i'estois. Je luy promis d'employer tout mon soin à cette recherche, puisque de là dépendoit tout le bon-heur de ma vie. M'estant leué le iour d'apres, ie l'allay voir, pour la remercier des soirs qu'elle auoit pris de moy. A mon abord elle vint au deuant de moy, & me dit; l'ay d'estranges nouuelles à vous dire: le Ciel en fin nous a deliurez d'Araxés. Vn homme de sa part vient de me faire sçauoir qu'il est mort de ses blessures: mais auant que de mourir, voyez quelle impression il m'a voulu laisser de vous. Alors elle me presenta vne lettre qu'elle en auoit receuë, où ie leus ces mots.

ARAXES A LA PRINCESSE
Pasithée.

BELLE PRINCESSE, *ie vay mourir pour vous , & ayant tousiours eu ce dessein, ie n'aurois pas regret de quitter la vie , si ie ne la perdois par la main d'un traistre. Le soin que i'ay eu de vous servir, continuë mesme apres ma mort ; & ie vous aduertis que celuy que vous chérissiez, & qui se dit Prince , est le plus fameux & le plus infame Corsaire , qui ait iamais couru la mer. Les blessures que i'ay receuës de luy , ont esté la recompense de luy auoir donné le bon-heur de vous voir , & vous n'en deuez attendre qu'une trahison pareille. Si vous luy faites iustice , vous luy ferez plustost sentir la main d'un bourreau , que de luy faire esperer l'honneur de toucher un iour dans la vostre.*

Ah ! le meschant, m'écriay-ie apres l'auoir leuë : voyez quelle est sa rage ? La Princesse me dit ? Si vous ne m'auiez fait sçauoir vostre vie , & si ie n'auois esté tefmoin de quelle sorte vous estes cause de sa mort, il me pourroit peut-estre faire croire quelque chose contre la verité :

encore faudroit-il que ie ne le cognusse pas pour vn méchant & vn artificieux. Mais comme les autres malices ont tourné à vostre auantage, celle-cy augmentera encore ma bonne volonté pour vous. Le reste de nos discours se passa en admirations de l'estrange fureur de cét Armenien, & en communes assurances de nostre amitié.

Depuis elle ne pût si bien cacher l'affection qu'elle me portoit, que le Roy ne s'en apperceust : il luy témoigna que cela ne luy estoit pas agreable ; & en fin il entra en vne extrême colere contr'elle : mesme il me fit sçauoir couuertement qu'il seroit bien aise que ie me retirasse ; mais j'estois sourd aux propositions que l'on m'en faisoit, estant trop cherement engagé en ce pais. Je voyois bien que le Roy me receuoit plus froidement que de coustume, & en fin me faisoit vne mine qui témoignoit vne grande auersion contre moy : mais ce qui nous perdit, fut qu'vn iour il me surprit seul avec elle dedans son cabinet, lors que ie luy baisois la main. Alors il entra en vne telle furie, qu'il tira son espée, & m'en eust tué, si ie ne me fusse eschappé. Je sortis du cabinet, & vn peu apres du Palais, n'estant arresté de personne, pource que i'estois assez aimé : toutefois voyant qu'il n'y auoit point de seureté pour moy dans Mitylene, i'entray dans mon vaisseau, avec tous mes soldats, qui s'estoient aussi tost rendus aupres de moy : & fus quelque temps en pleine mer à l'entour de l'Isle, ne pouuant m'en esloigner : mais en fin impatient de sçauoir ce qui estoit arriué à la Princesse, ie mis à terre vn des miens, pour aller apprendre de ses nouuelles : il me rapporta qu'elle estoit retenüe prisonniere, mais d'une façon bien estrange.

estrange. Le Roy apres luy auoir tesmoigné tout le courroux qu'un pere offensé peut faire paroistre, se resolut de la tenir en seure garde : toute fois pour executer ce dessein, il se trouua bien empesché, pource qu'elle estoit si generalement aimée, qu'il ne sçauoit à qui s'en fier. Neantmoins apres auoir beaucoup résué en son esprit, il s'auisa de la mettre dans vn chasteau, en la garde d'une quantité de femmes qui seroient incapables de ressentir ses charmes, & qui furent enfermées avec elle, ayant prouision de viures pour plus de six ans : puis il fit venir des extrémitez de la Paphlagonie six mille Barbares, qui furent dispersez alentour du Chasteau, lequel estoit enuironné de hautes murailles, en sorte qu'ils ne pouuoient la voir. Cét ordre ayant esté donné, les Princes qui estoient amoureux d'elle, ayant dessein de la seruir, & estimant impossible de la deliurer, s'ils n'estoient puissamment assistez, partirent pour aller chacun en leur país, & en ramener des forces qui leur donnassent l'honneur de sa deliurance, & leur acquissent son affection ; comme ils croyoient que ie l'auois auparavant iustement possédée, pour l'auoir sauuée d'entre les mains d'Araxés. Celuy que i'auois enuoyé me rapporta toutes ces choses : aussi tost ie consulte en moy-mesme ce que ie pourrois faire, ne pouuant souffrir qu'un autre que moy deliurast la Princesse, qui estoit prisonniere à mon occasion. l'appelle au conseil mes compagnons, & leur dis que i'estois resolu de retourner deuers les pyrates, pour amener toutes leurs forces en l'Isle, & avec elles deliurer Pasithée : qu'il falloit feindre que nous auions esté long temps retenus en quelque lieu ; & que pour estre mieux receus, il falloit en-

core faire quelque prise. Ils s'accorderent à ce que ie desirois ; alors nous trauerfâmes la mer Egée ; & nous auions costoyé tout le Peloponese sans rien trouuer, iusques icy prés, où nous auons rencontré vn vaisseau de marchands, parmy lesquels estoit ce braue Grec (ce dit Eurymedon monstrant celuy qui auoit empesché que Melinte le tuast) auquel, pourluiuait-il, ie ne puis rendre autre recompense, pour estre cause que vous ne m'auez pas osté la vie, dit-il à Melinte, sinon de vous dire qu'il m'a semblé le plus vertueux homme que i'aye iamais connu ; tant au mespris qu'il a fait de la mort, lors que mes compagnons l'ont attaqué, qu'aux sages propos qu'il nous a tenus depuis : de sorte qu'en l'admirant ie l'ay embrassé, & l'ay prié qu'il demeurast mon amy : ie luy ay conté vne partie de mes auantures pour prendre son conseil ; & lors que nous nous entretenions ensemble avec beaucoup d'affection, vostre vaisseau a paru, que nous auons attaqué à nostre dommage. Le vous auoué que iamais rien ne m'a tant estonné, que de vous voir sauter dans mon brigantin, n'ayant encore iamais esté attaqué en ma vie : & ie n'ay point à present de plus grand desir que de sçauoir qui vous estes, pour me vouër à vous en qualité de soldat, ou d'esclaué, si vous le voulez.

Eurymedon finit ainsi son histoire, & le genereux Melinte ayant admiré sa grace, & la naïueté de son discours ; & ne doutant point de sa valeur ny de sa noblesse, luy promit non seulement son amitié, & celle de ses compagnons, mais encore leur assistance pour l'entreprise de Pasithée. Nous sommes, continua-t'il, Siciliens ; & nous allons à Corynthe pour vn mesme dessein que le vostre : car i'ay là vne belle Maistresse, sœur de Palamede

que voilà, dit-il en le monstrant, qui m'est iniustement retenuë. Nous en sommes si proches, que si vous voulez m'assister pour l'auoir, nous nous ioindrons puis apres à vous, pour aller en l'Isle de Lesbos. Eurymedon s'estima bien-heureux de trouuer si tost vne occasion de le seruir: & apres s'estre tous embrassez pour estre amis, Eurymedon commanda aux siens de le suiure dans leur brigantin. Ils continuerent leur chemin, en consultant ce qu'ils auoient à faire, & arriuerent la nuit à Corynthe.

Fin du neufiesme Liure de l'Ariane.







LE
DIXIESME
LIVRE DE
L'ARIANE.



A nuit sembloit ouvrir tous ses yeux, pour voir les actions d'une troupe si genereuse; & prestoit autant qu'il falloit de lumiere, pour faire qu'ils se reconnussent, & qu'ils ne fussent pas reconnus. Aussi tost Melinte sortit du vaisseau avec Palamede, apres avoir taitle la conduite de ce qu'ils auoient resolu, à ce sage Grec, de qui il faisoit delia vne grande estime, à cause des prudens aduis qu'il auoit donnez au conseil qu'ils auoient tenu ensemble; & ayant prie Eurymedon & Amyntas de se tenir prests avec les soldats, s'ils auoient besoin de leur secours, ils entrerent dans Corinthe, & allerent deuers le Temple de Iunon. Palamede y ayant conduit Melinte, le fit retirer sept ou huit pas, atten-

dant qu'il eust parlé aux gardes du Temple, & apres qu'ils eurent ouuert, il leur demanda s'il ne pourroit point dire vn mot à Epicharis, de la part de Sebaſte & de Dicearque. Ces gens qui l'auoient veu autrefois avec ſon oncle, ne feignirent point d'aller querir Epicharis, qui eſtant ſortie pour voir qui la demandoit, fut bien eſtonnée de reconnoiſtre Palamede : auſſi toſt il la mena où eſtoit Melinte, & elle fut rauie de ioye de les reuoir. Melinte luy demanda comment ſe portoit Ariane. Fort bien, reſpondit-elle, pourueu qu'elle vous voye : & aſſurez vous que iamais vous ne vinſtes ſi à propos, car nous ſommes reduites à vne grande extremité. Ariane a touſiours remis à ſe reſoudre au retour de ſon frere; & Dicearque ne pouuant ſouffrir dauantage cette longueur, luy a donné ſeulement trois iours de terme, qui expirent demain : & n'eſpererez point, dit-elle à Palamede, de le pouuoir fleſchir par aucune raiſon : pource qu'il a tellement arreſté en ſon eſprit de la donner à Piſiſtrate, que toutes les puiffances du Ciel & de la terre, ne luy feroient pas changer cette reſolution. Melinte demeueroit muet d'entendre cette cruelle opiniaſtrete; mais Palamede & Epicharis luy dirent, qu'il n'y auoit point d'autre remede que d'emmener Ariane en vn lieu où Dicearque n'eust point de pouuoir, & où elle peust diſpoſer d'elle meſme. Dés cette nuit, continua Epicharis, il faut partir, pour euites les violences de demain. Ariane, dit Melinte, pourra-t'elle ſe reſoudre à cette fuite ? Vous eſtes trop reſpectueux, reprit Epicharis, & elle trop vertueuſe : il faut quitter pour vn temps cette ſeuerité de ſageſſe, & laiſſer faire à l'Amour & au courage. N'eſpererez pas que voſtre vertu ſurmonte iamais la fureur de Dicearque : il faut

opposer vostre passion à la sienne; & la vostre estant plus noble, se rendra sans doute maistresse de l'autre. Souuenez vous seulement que les heures de cette nuit sont cheres, & que si vous les perdez, vous ne les recouurerez peut estre iamais. Melinte leur demanda conseil de ce qu'il falloit faire: & c'estoit vne chose estrange, de voir vne personne si pleine de sagesse & de courage, reduitte en cette occasion à implorer le conseil & l'assistance d'une fille, & de Palamede qui auoit eu besoin tant de fois de sa prudence, pour remedier à ses ieunes erreurs. Toutefois Melinte se desioit alors de sa vertu qui se relaschoit, & qui alloit ceder à sa passion, pour luy laisser conduire cette entreprise qui luy sembloit vn peu violente; & il demandoit le conseil des autres, se croyant incapable en cet estat de se conseiller luy-mesme. Epicharis luy dit, qu'elle alloit premierement aduertir Ariane & Cyllenie de leur arriuée; qu'apres auoir pris leur aduis, elle reuiendroit les trouuer, & qu'alors ils pourroient resoudre toutes choses. Aussi tost elle les quitta, puis estant rentrée elle alla porter cette nouvelle à Ariane & à Cyllenie, qui attendoient avec beaucoup d'apprehension de sçauoir ce que vouloit Dicarque à Epicharis: mais elles changerent bien de passion au retour de cette fille, quand elles sceurent que Melinte estoit si près d'elles. Cela esmeut extrêmement Ariane, qui sentit en mesme temps de la ioye, de la crainte & de l'esperance. Epicharis & Cyllenie, la rassurerent, & apres beaucoup de raisons alleguées de part & d'autre, la firent resoudre de s'en aller avec Melinte. Ce qui la fortifia le plus en ce dessein, fut la resolution que prit Cyllenie de s'en aller avec elle; n'ayant eu,

disoit-elle, aucun bon-heur depuis la mort de Lepante; que celuy de son amitié, duquel elle vouloit iouir toute sa vie, & pour ce sujet qu'elle vouloit suivre sa fortune. Ariane pouuoit à peine croire ce qu'elle disoit: mais elle l'assura que c'estoit sa resolution. Elles renuoverent Epicharis, pour amener Melinte au lieu où elles estoient, & trouuerent bon que l'on apportast des eschelles, avec lesquelles elles peussent se sauuer; pource qu'il estoit impossible de sortir toutes par la porte, à cause des gardes du Temple qu'elles ne vouloient point faire tuer, encore que cela eust esté assez facile.

Melinte ayant sceu la resolution d'Ariane & de Cyllenie, pria Palamede de retourner au vaisseau, pour en apporter vne eschelle de corde, & d'amener avec luy le sage Grec: qu'Eurymedon & Amyntas vinsent aussi armez, avec cinq ou six soldats pour fauoriser leur retraite; & que tout cela fust conduit au lieu de la muraille qu'Epicharis leur monstra. Palamede promit de ne pas manquer à cet ordre, puis il s'en alla. Melinte se laissa conduire tout tremblant par Epicharis, pour aller voir sa chere Ariane, dont l'absence luy auoir esté si cruelle. Les portes furent fermées aussi tost qu'ils furent entrez, & Melinte fut mené dans vne chambre, où Ariane allant au deuant de luy, ne pût s'empescher d'ouuir les bras pour receuoir son cher Melinte, & aussi tost estant honteuse d'auoir fait cette action deuant Cyllenie, elle le quitra sans parler, pour luy laisser saluer cette chere amie. Cyllenie admirant la façon maiestueuse de Melinte, bien qu'il fust fort interdit, l'assura qu'il estoit le bien venu. Il luy respondit; que d'auoir esté receu seulement en cette chambre, c'estoit vne faueur qui luy estoit trop

trop sensible pour en pouuoir exprimer le ressentiment. Aussi tost elle le fit asseoir auprès de sa belle Ariane, ce qui luy vint assez à propos, pource qu'il ne pouuoit plus se soutenir dans le saisissement où il estoit. Ils se sentoient tous deux si esmeus, qu'estant l'un deuant l'autre, & se tenant les mains, ils ne se pouuoient parler. Melinte pour soulager son estomac qu'il sentoit presse, laissa aller vn grand soupir, lequel Ariane receut, respirant en mesmetemps, puis en soupirant elle le renuoya à Melinte ; & il sembloit que leurs ames se visitassent ainsi l'une l'autre : ou plustost qu'ils ne se seruissent que d'une ame pour animer leurs corps. En fin Cyllenie qui ne s'estonnoit pas de ce silence, pour auoir sceue ce que c'estoit que d'amour, les voulut soulager, & leur dit que les soupirs ne les saueroient pas, & qu'il ne falloit point perdre de temps. Melinte alors prit la parole, & s'adressant à Ariane, luy dit. Mais, Madame, puis-je croire que vous vouliez me suiure ? Elle respondit. Melinte, ie suis à vous, & sans vous ie ne puis viure : Voyez en quel endroit du monde vous voulez me retirer ; ie m'estimeray bienheureuse d'y mourir avec vous : Voila Cyllenie, continua-t-elle, qui me veut suiure ; & ie ne croy pas faillir puis qu'elle veut prendre part à cette action. Cyllenie leur dit : puisque la resolution est prise, voyons à choisir les plus necessaires de nos hardes, & nous en allons. Epicharis qui songeoit desia à les amasser, dit qu'elles seroient bien tost prestes. Alors Cyllenie ayant pris vn cofret où estoit ce qu'elle auoit de plus precieux, le mit encore avec ce qu'Epicharis enueloppoit : & tout estant prest ils sortirent de la chambre sans faire bruit, & se rendirent au pied de la muraille, où ils n'attendirent pas

long temps qu'ils virent tomber vne eschelle de cordes à leurs pieds. Melinte monta le premier, & prit la main d'Ariane qu'il souleuoit pour la faire monter apres luy, & l'ayant tirée iusques au haut, il la donna à Palamede, qui la descendit, & Melinte alla querir les deux qui restoient, l'une apres l'autre. Cyllenie voulut qu'Epicharis sortist la premiere, estant plus dangereux qu'elle demeurast qu'elle, toute fois en fin elles se sauuerent toutes trois. Aussi tost Melinte prit Ariane entre ses bras, & l'emporta le plus viste qu'il pût: Palamede se saisit de sa chere Epicharis, & le Grec prit Cyllenie. Eurymedon & Amyntas, avec quelques soldats, fauorisoient leur fuitte; mais ils furent estonnez qu'ils entendirent vn grand bruit dans la ville, & beaucoup de gens qui venoient à eux. La sortie hors de la maison n'auoit pû estre si secrette, que les seruiteurs ne s'en apperceussent aussi tost, & ils en auoient aduertie les gardes du Temple qui coururent apres les rauisseurs; & quelques vns allerent chez Dicearque & Pisistrate pour leur donner aduis de l'enleuement. Eurymedon & Amyntas furent contraincts d'arrester ceux qui les suiuoient, en leur fermant le passage d'une rue, cependant que les Dames pourroient estre portées dans le vaisseau: ils se fussent contentez de les soutenir; puis de faire leur retraite, sans qu'ils virent que le nombre croissoit, de sorte qu'ils se resolurent d'en tuer quelques vns, pour donner de la peur aux autres. Aussi tost ils en estendirent cinq ou six sur la place; cela refroidit le courage de ceux qui suiuoient, & il leur fut aisé de faire leur retraite sans danger. Ils se rendirent dans vn esquif qui les attendoit pour les mener dans le vaisseau, & arriuerent en mesme temps que les Dames estoient portées par Melin-

te & les deux autres, dans les chambres pour se reposer: mais en y entrant ils virent vn estrange spectacle. Il y auoit des flambeaux dans le vaisseau, qui furent cause que Cyllenie voyant celuy qui la portoit, fit vn grand cry, & s'efforçant avec violence, sortit d'entre ses bras: puis toute effrayée s'enfuit deuers Ariane, regardant derriere'elle, en tremblant, s'il ne la suiuiot point. D'vn autre costé le Grec qui la tenoit, l'ayant veüe, tomba de sa hauteur, & ne donna plus aucun signe de vie. Ariane demanda à Cyllenie le sujet de cette grande peur, & elle luy dit. Chere Ariane, sçachez que i'ay esté enleuée par l'ame de Lepante, qui auoit repris son corps pour me rendre cét office, & m'ayant mise dans le vaisseau, elle a laissé ce corps qui est retombé mort. Incontinent on alla deuers ce corps. Melinte & Eurymedon dirent que c'estoit vn Grec qu'ils auoient amené avec eux, & qui meritoit bien que l'on en eust soin. Alors à force de remedes on luy fit reuenir le poux, puis la veüe, & vn peu apres la parole: Ah! Dieux, dit-il, qu'ay-ie veu? Eurymedon prit soin de luy, & Melinte retourna deuers Cyllenie, qui estoit toute espouuantée, pour luy dire que ce n'estoit point vn corps mort, mais vn homme viuant. Non, non, respondit-elle, c'estoit l'ame de Lepante. Melinte ne pouuoit iuger ce qu'elle vouloit dire: mais Ariane qui sçauoit sa vie, luy dit. Ne seroit-ce point aussi Lepante luy-mesme, qui peut-estre n'est pas mort? D'vn autre costé le Grec disoit à Eurymedon: Ah! i'ay veu Cyllenie. Il luy respondit, Hé bien, haïssez vous si fort Cyllenie, que vous ne la puissiez voir sans tant d'horreur & de faiblessement? Helas! au contraire, reprenoit-il, ie ne la puis voir, pource que ie l'ay trop aimée. Hé quoy! re-

partir. Eurymedon, fuyez-vous ce que vous aimez ? En l'estat qu'elle est, respondit-il, ie ne la puis voir sans mourir. D'autre part Ariane disoit à Cyllenie ; Allons voir si c'est Lepante. Je n'y veux point aller, respondoit-elle, car il est mort : mais peut-estre reprenoit Ariane, il est viuant. Mort ou viuant, disoit-elle, ie ne puis souffrir sa veuë. Ainsi tous deux ne se vouloient point voir : Lepante, pource qu'il la croyoit mariée ; & Cyllenie, pource qu'elle le croyoit mort ; & quand il eust esté viuant, pource qu'elle luy auoit esté infidelle. En fin Ariane alla voir Lepante, & l'assura que Cyllenie n'estoit pas mariée : ce qu'il ne vouloit point croire ; puis elle reuint à Cyllenie luy dire que Lepante n'estoit point mort. Il fallut faire ainsi plusieurs voyages vers l'un & vers l'autre, auant que de les pouuoir assurer ; & Ariane fut contrainte de dire à Lepante, de quelle sorte le mariage de Cyllenie avec Callias auoit esté rompu, & que les desplaisirs qu'elle auoit receus depuis, l'auoient assez punie de son infidelité. Elle alla dire en suite à Cyllenie, que Lepante auoit esté garanty de la mort, & auoit tousiours conserue son affection aussi parfaite, que si elle ne luy eust iamais manqué de constance, & elle la pria de se resoudre à le voir. Lepante & Cyllenie furent à la fin amenez l'un deuant l'autre ; Cyllenie conduite par Ariane & Epuharis, & Lepante par Melinre & Eurymedon. Cyllenie se ietta à ses piëds, & en pleurant luy demanda pardon de sa faute. Lepante mit vn genoüil en terre pour estre aussi bas qu'elle, & en la releuant luy dit, qu'il voyoit à present que les Dieux ne luy auoient point esté menteurs, & qu'en luy sauuant la vie, ils auoient voulu luy conseruer le plus fidelle seruiteur qu'elle peüst auoir au monde. Apres que ces deux Amans

se furent plusieurs fois embrassez, pleins d'estonnement & de ioye, ils se retirerent tous dans les chambres; & pource qu'il ne faisoit pas seur pour eux de demeurer si près du port, les deux vaisseaux partirent & se mirent en pleine mer. Ils consulterent en quel lieu ils se deuoient retirer, ne voulant point aller à Syracuse, où sans doute ils seroient suiuis: Et pource que Melinte auoit promis d'assister Eurymedon pour l'entreprise de Pasithee, ils se resolurent d'aller descendre à vn port de l'Epyre, où ils pourroient attendre qu'il fust alle en Corcyre pour amasser les forces, & que cependant Melinte espouseroit Ariane, & Lepante Cyllenie. Prenant cette route, ils virent passer vn vaisseau bien armé qui s'en alloit à Corynthe: mais ne songeant qu'à leurs ioyes, ils prièrent les vents de leur estre fauorables, & allerent à pleines voiles. Le temps estoit fort serain, & Melinte prenant Ariane par la main, la mena se promener sur le tillac, où l'ayant long temps entretenue; & Palamede suruenant, qui auoit quelque chose à dire à sa sœur, il se mit cependant à relâcher sans quitter sa main, & en peu de temps fit ces vers.

*Flots heureux, qui portez la Beauté que j'adore,
 Dont la terre a senty l'empire rigoureux:
 Souffrez avec respect qu'elle vous dompte encore;
 Caressez ce vaisseau de baisers amoureux:
 Infidelle Element, sçache qu'au moins pour elle
 Tu dois estre fidelle.*

*Hé quoy! flots, vous grondez? escumez vous de rage,
 De sentir son pouuoir qui triomphe de vous?*

*Rebelles, gardez bien d'esrouuoir quelque orage:
Si vous auiez des yeux, vous seriez bien plus doux.
Bien-tost de ses regards l'aimable violence
Vaincroit vostre insolence.*

*Mais quoy? vous en auex, & plus que de coustume
Vous vous pressez pour voir cette Diuinité.
Non, ce n'est pas Venus fille de vostre escume,
Celle que vous voyez a plus de maiesté;
Et la sainte pudeur qui luit sur son visage
Montre qu'elle est plus sage.*

*Ne laissez pas pourtant de nous estre propices;
Conduisez seurement ce vaisseau dans le port.
Mais si quelqu'un nous suit, ouurez vos precipices:
Vastes mers, sauuez-nous, & leur donnez la mort.
J'ay fié sur vos eaux celle que j'ay rauie,
Ayez soin de sa vie.*

Lepante qui estoit aussi venu sur le tillac avec Cyl-
lenie & les autres, entendit reciter à Melinte ces vers
qu'il venoit de faire. En mesme temps il en composa à
l'enuy & y fit vn air: puis ayant trouué vn Luth, il y ac-
corda sa voix, & chanta ces vers.

*Mon ame, ne sois plus aux tourmens affermie.
Quitte l'ennuy, mon cœur, & fay place aux plaisirs:
Le voy que mon bon-heur surpasse mes desirs:
Où j'ay cherché la mort, j'ay retrouvé la vie.*

*Aux lieux où ie conceus vne funeste enuie,
La croyant dans les bras d'un espoux bien heureux,*

*Je l'eus, sans y penser, dans les miens amoureux :
Où j'ay cherché la mort, j'ay retrouvé la vie.*

*Quand de trop de fureur ma douleur fut suivie,
La mer ne me pût perdre y cherchant le trespas :
Et j'ay trouvé mon heur en ne l'y cherchant pas :
Où j'ay cherché la mort, j'ay retrouvé la vie.*

Après que Lepante eut acheué de chanter, & que l'on eut grandement estimé sa voix, & la grace qu'il auoit à toucher le Luth; on le pria de dire comment il auoit esté sauué de la mer, & quelle auoit esté sa vie depuis; pource qu'Ariane auoit desia conté vne partie de ce qui luy estoit arriué auparauant. Il voulut bien leur donner ce contentement, & voyant que chacun s'estoit assis, & se preparoit pour l'escouter, il quitta le Luth pour se mettrre au milieu d'eux, & commença ainsi.



SVITTE DE L'HISTOIRE de Lepante.



POUR euitter les reproches qu'il sembleroit que ie voulusse faire à Cyllenie, ie ne vous rediray point les ressentimens que i'eus de me voir peu à peu abandonné d'elle : toutefois ie vous feray seulement sçauoir, que ie me flattois tousiours d'une creance, qu'elle vouloit esprouuer à quelle extremité de

douleur ma fidelité pourroit resister. Car ie ne pouuois m'imaginer que son esprit, qui m'auoit semblé si releué par deüsus l'ordinaire des filles*, & qui m'auoit honoré d'vne si parfaite confidence, peüst oublier l'estat où nous auions esté ensemble, & mettre vn rideau deuant ce qui s'estoit passé, pour en perdre à iamais le souuenir: mais à la fin i'appris que pour rendre Callias heureux, elle auoit signé l'arrest de ma mort. Iusques-là i'auois creu que toutes ses froideurs enuers moy n'estoient que des feintes; & mesmes apprenant mon malheur, ie ne pouuois encore le croire; mon esprit ne se pouuant si tost desabuser: peut-estre aussi que ie le croyois, n'en pouuant plus douter, mais que mon ame estonnée d'vn si grand coup de malheur, estoit dans vn estourdissement qui luy empeschoit de sentir si tost son mal. Ie fus en fin forcé de connoistre vne verité si visible, & de sentir les pointes de douleur qui accompagnerent vn si cruel accident. Ne sçachant que deuenir, ie me mis dans vn esquip, & m'enfuis à Naupacte, croyant soulager mon mal en fuyant la demeure de ceux qui en estoient la cause: mais il m'eüst fallu pouuoir eschapper de moy-mesme, qui estois alors mon plus cruel ennemy; mon esprit produisant continuellement des pensées furieuses, pour se desesperer luy mesme. Ie ne me contentay pas de me voir en vn estat si miserable: mais pour augmenter encore ma fureur & mon desespoir, ie renuoyay vn des miens à Corynthe dans le mesme esquip, pour aller au Temple où Cyllenie deuoit estre espousée, & me rapporter de quelle sorte elle se seroit gouuernée en cette action. I'attendis ces nouuelles avec autant d'inquietude, que si i'en eusse espere le plus grand
conten-

contentement de ma vie : mais apres qu'il fut de retour, & que ie sceus qu'apres m'auoir donné la mort, elle ad-iouſtoit des coups qui ſembloient partir d'vne extrême inhumanité, comme de vouloir ſçauoir ce que i'aurois fait apres auoir ouï qu'elle eſtoit mariée; mon ame ne pût ſouffrir cette douleur; elle chaſſa ma raiſon, & receut en ſa place le deſeſpoir, qui s'eſtant rendu le maître, m'ordonna de dire à celui qui me parloit. Va, & ne manque pas à luy aller redire ce que tu vas apprendre: auſſi toſt ie gagnay le haut d'vn grand rocher qui auance dans la mer, & me precipitay dedans en ſa preſence.

Mais qui peut douter, apres ce que ie vay vous dire, du ſoin continuel que les Dieux ont de nous? car il eſt impoſſible d'attribuer à la fortune, qui eſt auetugle & imprudente, quelques aſſiſtances que nous receuons aux plus grands hazards de noſtre vie, qui ne peuuent eſtre données que par vne meilleure & plus ſage main. Au lieu de me perdre, ie tombay, ie puis dire à preſent, heureuſement, dans vn grand filet de peſcheurs, qui eſtoient avec des nacelles ſous ce rocher. Ma cheute fut ſi ſubite deuant les yeux de ces hommes, que ie fus pluſtoſt au fonds de l'eau qu'ils n'eurent iugé ce que c'eſtoit; & eux croyant que ce fuſt quelque monſtrueux poiſſon, qui ſe fuſt ainſi eſſancé hors de l'eau, puis qui eſtoit re-tombé dedans, tirerent leur filet avec beaucoup d'attention & d'eſperance. Lors que ie vins à pareſtre, ils ne pouuoient encore connoiſtre ce que c'eſtoit, pource que i'eſtois embarſſé parmy les filets & quantité d'herbes qui m'enueloppoient : mais en fin apres auoir tout démelle avec bien de la peine, ils connurent avec vn grand

regret que c'estoit vn homme. Toutefois leur esperance se tourna en pitié; & apres m'auoir fait vuidier l'eau que i'auois beuë, ils m'estendirent sur leurs manteaux, & tascherent par toutes sortes de soins à me faire reuenir. I'ouuris en fin les yeux, & quand i'eus reconnu le lieu où i'estois, ie fus bien estonne: toutefois apres auoir appris de quelle sorte i'auois esté garenty de la mort, & que i'eus long temps résuë sur cet estrange accident, ie connus que les Dieux ne vouloient pas que ie mourusse. Cette consideration me toucha de pieté & de crainte tout ensemble, & me fit connoistre quelle faute i'auois commise contr'eux, lors que i'auois suiuy les aueugles transports de mon desespoir. Cela me donna la resolution de viure, mais non pas de me consoler; & ie priay ces gens de me conduire dans leurs nacelles en quelque endroit esloigné, où ie les recompenserois de leurs peines: Ils mirent alors vne petite voile, & pource que le vent donnoit à propos pour aller à Cyrrhe, qui est vne ville de la Phocide, assez proche de là, nous y arriuasmes incontinent. Je trouuay qu'ils ne m'auoient rien osté de ce que i'auois sur moy, & eus assez dequoy les rendre contens. I'auois encore de reste quelques diamans, que i'auois heureusement à la main, avec lesquels ie creus que ie pourrois faire quelque voyage: de sorte que i'entrepris de marcher, ne sçachant enco- en quel lieu ie deuois choisir mon sejour, & n'ayant autre dessein que de fuir les enuirs de Corynthe. Toutefois ie ne trouuois aucun endroit de la terre où ie peusse viure sans tristesse; & i'eusse esté bien-heureux si en quelque lieu i'eusse pû quitter mon amour & mon


soutenir. Mais ma fidelité auoit des racines trop profondes pour pouuoir estre esbranlée, & l'inconstance ne m'estoit agreable qu'au changement continuel des lieux, qui dennoit quelque diuertissement à ma constance malheureuse. l'erray ainsi par toute la Grece, cuitant les lieux où i'auois quelque connoissance; c'est pourquoy ie ne voulus point voir Athenes, qui est la ville qui eust le plus diuertiy ma douleur, à cause d'Eriphile ma chere sœur, qui est mariée à vn des premiers de cette grande ville. Quoy, interrompit Melinte; estes vous frere de la vertueuse Eriphile, femme d'Ephialtes? Ouy, reprit Lepante. Permettez, continua Melinte, que ie vous embrasse, puisque vous estes frere d'une des plus sages que i'aye iamais conuës, chez laquelle i'ay long temps esté nourry, & à qui i'ay mille sensibles obligations. Alors ils se firent beaucoup de caresses, & Palamede qui auoit eu part en l'amitié de la sage Eriphile, voulut aussi se meller à leurs embrassemens. Puis Melinte remettant à vne autre fois de luy dire tous les sujets qu'il auoit de l'aimer, & de le seruir à cause de sa sœur, le pria de continuer son histoire. Lepante reprit: En fin ie me resolus de partir de la Grece, & de passer en Asie. l'arriuay en Eolide; de là i'allay en la Lydie, & en la Phrygie: mais il ne m'arriua rien de remarquable qu'en la Galatie, où ie courus grande fortune de perir d'une mort infame.

Estant près d'arriuer dans la principale ville, ie passay dans vn bois où quelque meurtre s'estoit commis. le me vis enuironné de quantité de gens à cheual, qui me prirent pour vn des meurtriers, & m'emmenèrent en la ville, quelque innocence que ie sceusse alleguer. Ceux

qui auoient fait le meurtre, furent pris incontinent apres, & mis en prison avec moy ; & lors qu'ils sceurent que i'estois accusé de leur crime , ils se mocquerent de moy entr'eux, & iurerent qu'ils ne me deschargeroient point, encore qu'ils ne me cognussent pas, afin que ie leur fisse compagnie à la mort. l'estois bien empesché, n'ayant aucun moyen de me iustifier que par eux, & auois bien du desplaisir de ce qu'il me falloit mourir honteusement, comme vn voleur & vn meurtrier. Vn iour que ie croyois que l'on nous vinst querir pour nous mener au supplice, ie vis entrer vn Officier de Iustice, qui ayant fait assembler tous les criminels, leur declara que chacun eust à choisir son Aduocat pour plaider leur cause deuant le Roy Polemon : afin que le plus eloquent de tous emportast pour son client la grace qui estoit accordée tous les ans. Je m'enquis de ce que c'estoit que cette grace, & j'appris que du temps de Iule Cesar, Deiotare estoit Roy de Galatie, qui apres auoir suiuy le party de Pompée, & ayant esté receu en grace par Cesar, fut accusé de luy auoir dressé des embusches, lors qu'il estoit chez luy en Galatie. Pour ce sujet il estoit prest d'estre iugé à mort par Cesar & le Senat, sans le secours de la merueilleuse eloquence de Ciceron, laquelle eut tant de force qu'elle fit changer ce dessein à Cesar, & luy fit pardonner à Deiotare. Ce Roy, pour se souuenir de ce bien-fait receu par l'eloquence, ordonna que tous les ans à certain iour, les criminels choisiroient des Aduocats, entre lesquels celuy qui seroit iugé le plus eloquent, emporteroit pour son client la grace de la vie, outre le prix de l'Aduocat, à qui l'on donnoit vne Couronne de grande valeur. Apres auoir appris cela,

ie sceus que les plus célèbres Aduocats estoient retenus
 dés long temps avec grand prix d'argent, & ie vis qu'il
 me seroit bien difficile d'esperer-cette grace, n'ayant au-
 cuns moyens, ny aucune connoissance dans ce païs.
 Toutefois ie pris courage, & dis tout haut à cet Offi-
 cier, que ie demandois à me pouuoir deffendre moy-
 mesme. Chacun se prit à rire escoutant ma proposition,
 pource que l'on me voyoit en vn estat trop miserable,
 pour croire que i'eusse aucune science: mais ie ne laissay
 pas de donner mon nom, afin que ie fusse oüy deuant le
 Roy comme les autres. Pendant huit iours, qui estoient
 donnez pour preparer les harangues qui se deuoient faire,
 i'eus assez de loisir de penser à la mienne: & lors que le
 temps fut arriué, on nous mena tous au l'alais. Nous fus-
 mes mis dans vne grande salle, à l'entour de certains bar-
 reaux, qui empeschoient que l'on n'approchast du Roy,
 lequel estoit au dedans sur vn siege releué de quatre ou
 cinq degrez, & auoit à costé de luy les principaux Officiers
 qui estoient les Iuges. Lors que l'on voulut commencer
 à oüir les plaidoyers, on ouurit les barreaux pour faire en-
 trer le premier Aduocat qui deuoit parler, lequel de-
 meurant debout deuant le Roy, commença vne haran-
 gue fort estudiée, par laquelle il taschoit à deffendre vñ
 criminel qui estoit present entre nous. Quand il eut fi-
 ny, il s'eleua vn petit bruit des iugemens differens qui
 se faisoient de luy: puis on ouurit à vn autre qui dis-
 courut avec beaucoup de vehemence; & ainsi plusieurs
 furent oüis. Ie m'estonnois de voir tant d'Aduocats, mais
 on me dit qu'il en estoit venu de tous les costez de
 l'Asie, & de la Grece mesme, les vns recherchez par
 les criminels, & les autres attirez par l'ambition de faire

parestre leur ſçauoit , & d'emporter le prix. Ce nombre m'ennuyoit fort , touteſois on auoit ordonné que les harangues fuſſent courtes , pource qu'un iour n'eult pas eſté ſuffiſant pour ouïr tous ceux qui ſe preſentoient. En fin , l'on dit qu'il n'y auoit plus d'Auocats à parler. Polemon vouloit deſia demander les aduis aux Iuges , & ie penſois m'auancer , pour prier que l'on m'eſcoutaſt ; mais vn Heraut me preuint , qui dit au Roy qu'il ne reſtoit plus qu'un pauvre criminel nommé Lepante , qui ſe vouloit deffendre luy meſme. Hé bien , reſpondit Polemon , neluy deſnions pas ceſte iuſtice. Alors i'entray dans le barreau , & eſtant deuant le Roy , ie diſen peu de mots ce que i'auois premedité , avec le plus d'aſſurance & de modeſtie que ie pûs. Braue Lepante , interrompit Melinte , ne nous priuez pas ie vous prie du recit de cette harangue ; nous auons aſſez de temps pour l'entendre , & puis qu'elle eſt courte , cela ne vous doit pas eſtre ennuyeux. Au moins donnez cela au deſir de la belle Cyllenie , qui eſcoute avec tant d'attention les accidens de voſtre vie pendant ſes ennuis. C'eſt me commander , repartit Lepante , que de me prier ainſi ; & puis que vous le voulez , ie vous reciteray ce que ie diſ alors , & ie commençay ainſi.

 RAND ROY , Et vous , Iuges equitables , ie ne ſçauois plus me plaindre de la fortune , pour l'eſtrange accident où ie ſuis tombé , puis qu'elle me donne le bon-heur d'eſtre eſcouté de vous ; Et pourquoy me plaindrois-ie d'elle , puis que deuant Et apres mon mal-heur , elle m'a pourueu de moyens pour me

secourir ? Aussi tost que ie suis entré dans ce païs, elle m'a rendu criminel sans que ie fusse coupable : mais en un temps auquel une grace est donnée qu'elle me fait esperer, m'ayant fait instruire dès mon enfance en toutes sortes de sciences & d'arts, preuo-
yant le besoin que i'aurois de leur assistance. Aussi les Dieux eussent esté iniustes & cruels, de souffrir l'auanture qui m'est arriuée, s'ils n'eussent connu de quelle sorte ie me pourrois garantir. Ne m'accusez point de presumption, si ie suis assuré d'emporter auionrd'huy le prix qui se donne au plus eloquent : il est impossible que vous me le refusiez, puis qu'il n'y a rien qui sçache mieux persuader que l'innocence.

Tout ce que peut faire l'art de l'eloquence pour couvrir un crime, c'est de faire naistre un doute, pour oster la connoissance si l'accusation est vraye ou fausse, puis elle tasche d'émouuoir la pitié des Iuges, pour les faire incliner vers la meilleure part : mais la verité n'a point besoin d'artifice, ny de desguisement ; elle se descouure toute nue ; & produit alors d'elle-mesme une infinité de preuues puissantes & inuincibles. C'est cette verité qui me va defendre, & qui va sortir si pure de ma bouche, que vous n'aurez point de peine à la reconnoistre.

Ce n'est point un crime, Roy tres-juste, qui m'a fait sortir de mon païs : & ie ne suis point entré par un crime dans celuy-cy. Un mal-heur m'a chassé des

terres de ma naissance , & i'en ay trouué vn autre dans vostre Royaume. Le premier m'auoit fait perdre mes plus cheres esperances , & l'autre me veut rair les seules choses qui me restent , qui sont l'honneur & la vie. Pour ma vie , ie l'abandonnerois volontiers comme la plus mal-heureuse du monde ; ce n'est point la crainte de la perdre qui me fait parler deuant vous : i'ay tasché de la quitter quand il me sembloit honorable de mourir : mais puisque le crime dont on m'accuse est honteux , & le supplice qui le menace ; cét accident a rendu ma vie attachée à mon honneur : & ie suis obligé de deffendre l'une pour conseruer l'autre.

Depuis que i'ay quitté la Grece , i'erre d'une Prouince en vne autre , pour soulager vn ennuy qui me travaille ; & passant par vn bois pour arriuer en cette ville , ie me suis veu environné de personnes qui m'ont pris , sans me dire pour quel sujet : Depuis i'ay sçeu que l'on auoit tué vn homme en celieu là , & que les meurtriers auoient esté aussi emmenez en la mesme prison , lesquels sçachant que i'estois accusé de leur crime , se sont mocquez de moy quand ils m'ont veu , & ont iuré qu'ils ne me declareroient point innocent.

Mais il est aisé de verifier si ie suis coupable. Que l'on les interroge separément de quelle sorte ils me connoissent , & l'on sçaura que ie ne les vis iamais : Il n'y a qu'un mois que ie suis passé en Asie ;

& en

Et en ce temps i'ay traversé l'Eolide, la Lydie, & la Troade: il n'y a que deux iours que ie suis entré dans la Galatie; & le iour que ie fus pris, i'estois party d'un lieu si esloigné d'icy, qu'il m'a esté impossible de prendre aucune habitude avec eux. Tout cela se peut sçavoir de ceux cheZ lesquels ie suis passé dans mes voyages, qui ne dénieront pas de tesmoigner ce que ie dis.

Voila, Grand Roy, & vous Iuges, toute l'eloquence dont ie me veux servir: c'est la verité qui parle par ma bouche: Elle veut que vous luy donnieZ la victoire de ceste iournée; c'est elle qui pretend le prix & non pas moy. Elle se monstre à vous toute nue, pour vous monstrier que l'eloquence des autres, en comparaison d'elle, n'est qu'une beauté fardée. La Iustice qui est assise à vos costez luy tend les bras, & sous son bandeau ne laisse pas de la bien cognoistre. Ceste seuerre Deesse est sans doute à present bien satisfaite, de ce que les Dieux ont mis entre les accuseZ un innocent, de peur qu'elle ne fust contrainte auourd'huy de laisser aller un coupable. Grand Roy, prenez pitié d'un Estranger, qui n'a pour appuy auprès de vous que cette iustice: mais cét appuy est bien puissant, puis que c'est luy seul qui sçait maintenir les Royaumes. Je ne crains point la mort, mais l'infamie. Si ie ne puis meriter le prix de l'eloquence par dessus tant de rares esprits, ordonneZ au moins dès à present que i'aille employer ma vie à deffendre vos frontieres.

contre les Barbares; ie m'estimeray heureux de mourir en homme de courage. Si ie ne puis euitier la mort, au moins que i'euite la honte: ou si vous voulez rendre ce iour celebre par le plus memorable iugement qui fut iamais, que pas vn de nous ne remporte la victoire; mais donnez en ma faueur le prix de l'eloquence à la verité, & la vie à l'innocence.

Il finis ainsi avec quelque sorte d'esperance, pource que i'auois esté ouï avec vne grande attention. Incontinent le Roy se leua, & apres auoir pris les aduis de tous les Iuges, il le remit dans son siege, puis il prononça. Le Grec Lepante est déclaré par nostre iugement innocent & victorieux. Aussi tost on me vint querir parmy les criminels, entre lesquels i'auois esté remis; & me faisant approcher du trosne où estoit Polemon, ie mis vn genouil sur l'vn des degrez; & receus de sa main la Couronne qui estoit ordonnée pour le vainqueur. Le Roy ne se contenta pas de cette grace, qu'il auoit donnée à mon innocence, plustost qu'à mon eloquence; mais se leuant il me prit par le bras, & me commanda de l'accompagner, pource qu'il vouloit sçauoir ce que i'estois. Il me fit cette faueur de s'appuyer sur moy iusques dans sa chambre, où s'estant enquis de moy de quelques particularitez de la Grece, il donna charge à quelques vns de ses Officiers d'auoir soin de moy tandis qu'il disneroit, & me commanda de le reuoir incontinent apres.

Il fus conduit à l'heure qu'il m'auoit donnée, dans son cabinet, où il me fit saluer la Reine Berenice sa femme, qui est vnetres-belle Princeesse; & en presence d'elle, de

luy & d'un sien confident, il me commanda de luy dire le particulier de ma vie ; à quoy ie satisfis le mieux que ie pûs , & ne luy celay aucune chose de mes amours infortunées. le fus escoute d'eux avec vn grand silence , & des tesmoignages qu'ils prenoient part à mon affliction & qu'ils faisoient quelque estime de moy. En fin le Roy me pria de me consoler , & me fit tant d'honneur que pour diuertir ma douleur il voulut bien me conter l'histoire des amours de la Reine & de luy , & commença ainsi son discours.

Bien que vostre fortune , fidelle Lepante , paroisse sans ressource ; & que rien au monde ne semble capable de la restablir ; ne trouuez pas estrange si ie vous exhorte à rejeter les pernicious conseils que donne le desespoir , & à croire que tout ainsi que les Dieux vous ont desia preserué d'un accident d'où avec apparence il vous estoit impossible d'eschapper ; ils peuuent encore guerir vostre douleur par des remedes qui nous sont maintenant inconnus ; & par la premiere assistance vous inuitent à attendre la seconde. Si vous n'estes pas encore assez persuadé par vous mesme , escoutez de quelle sorte le Ciel m'a assisté , & vous confesserez que si ie me fusse abandonné au desespoir lors qu'il sembloit que ie ne deusse plus rien esperer , ie ne iouirois pas maintenant avec Berenice de toutes les douceurs que puissent goustier deux ames parfaitement vnies.

Ie croy, Lepante , poursuit-il , que vous n'ignorez pas les changemens qui se sont faits par l'ordre del'Empereur Claude dans les Royaumes de la Cominagene , de l'Iberie , de l'Armenie , de la Galatie , de la Cilicie , du Bosphore de Thrace , & de quelques autres icy aux enui-

rons; & qu'au lieu que ie commande icy maintenant, ie regnois en cette partie du Bosphore qui est du costé de l'Asie; car de si grandes reuolutions d'Estats ne peuuent estre ignorees: mais peut-estre n'en sçavez vous pas les causes; & ie vous puis dire que la beauté de cette Princeesse que vous voyez, me dit-il en regardant la Reine, à cause la pluspart de ces estranges bouleuersemens. Cotys, Roy de cette partie du Bosphore qui est du costé de l'Europe & dont Byfance est la capitale, estoit son pere; & estant ma voisine la reputation de sa beauté arriua bien tost à mes oreilles: mais ie ne la pûs voir qu'apres la mort de ce Prince, lors qu'Irene sa mere promenant le ieune Cotys son fils par ses Estats & par la mer du Bosphore, arriua près de mes terres. Ie montay sur mer, & pris occasion d'aller à sa rencontre, & de luy offrir mon seruice par ma bouche mesme, l'ayant desia fait par vn Ambassadeur. Là ie vis Berenice; il suffit de vous dire que ie la vis, pour vous tesmoigner que ie conceus aussi tost pour elle des passions bien violentes; & ma condition flattant mon amour, ie creus que quand ie tesmoignerois mon desir à la Reine, il luy seroit difficile de me refuser, puisque difficilement pouuoit-elle rencontrer vn Roy dont l'alliance luy fust plus vile. La proposition que ie luy en fis faire fut receüe par elle avec de grands tesmoignages d'approbation: toutefois elle en remit la resolution, lors que son affliction recente, & le trouble inopiné de ses affaires, luy auroient donné quelque relasche.

Cependant ie voyois la Princeesse, & dans le séjour que ie fis auprès d'elle, ie ne manquay pas à luy tesmoigner par mes discours & par toutes sortes de deuoirs qu'elle

s'estoit renduë Maistresse de mon cœur. En fin elle me fit connoistre par la reception qu'elle commença à me faire, qu'elle ne me iugeoit pas indigne d'elle; & nous nous separâmes pour cette fois avec de grandes esperances de part & d'autre. Depuis ie sceus que Mithridate, qui estoit descendu de ce grand Mithridate contre qui les Romains combattirent si long temps, & qui estoit fils de ce grand Achemenes qui auoit possédé tant d'Estats, faisoit vne grande leuée de gens de guerre pour venir attaquer Byfance; pretendait de grands droits sur le Royaume du ieune Cotys: mais rien ne l'animoit tant que Berenice qu'il auoit veuë, allant inconnu dans Byfance, où il vouloit pratiquer quelques intelligences; & pour la possession de laquelle il offroit à la Reine d'abandonner tous ses droicts. Incontinent l'armay en diligence pour aller au secours d'Irene; & fus si heureux qu'ayant équipé vne flotte pour secourir Byfance, ie deffis l'auant-garde de celle de Mithridate, auant que les Romains sous la conduite d'Aquila, & les autres Rois voisins qui tous auoient pris le party du ieune Cotys, entre lesquels Eunones Roy des Adorfes estoit le plus puissant, fussent prests pour luy resister. l'entray victorieux dans Byfance & fus receu d'Irene & de Berenice avec de grandes satisfactions. Cette guerre fut assez longue & eut diuers retours; pource que Mithridate eut quelquefois de grands aduantages, & mesmes eut tant de courage que pour auoir le tiltre de Roy, il attaqua à l'impouru-u le Royaume des Dandandes, qui est vn peuple entre les Sarmates, s'empara de quelques places, puis reuint victorieux deuant Byfance; ce qui estoit cause qu'Irene ne vouloit rien resoudre avec moy, afin qu'en tout euenement elle eust moyen de

terminer cette guerre en luy donnant Berenice. Je connoissois assez la cause de ces retarde mens qui me faisoient mourir d'ennuy , & estoient aussi bien desagreables à Berenice qui tesmoignoit m'auoir en estime & Mithridate en horreur. En fin ie parlay vn iour ainsi à la Reine. Madame , ie veux laisser à part les dissimulations qui sont accoustumées entre les Princes, & vous parler à cœur ouuert & de mes interests & des vostres : car à quoy sert de dissimuler, si ce que ie desire vous est autant auantageux qu'à moy? Je croy que quand vous pensez d'un costé à Mithridate, & de l'autre à moy, vous faites vne grande difference entre nous ; considerant que l'un est vostre ennemy, l'autre vostre amy; que l'un vous veut destruire, & que l'autre vous defend de toutes ses forces ; que l'un est vn Roy estably, & que l'autre n'a qu'un bien imaginaire où il ne peut s'establir qu'en vous ruinant. Aussi veux- ie croire que sans quelques considerations qui vous tourmentent , vous satisferiez aussi tost à l'esperance qu'il vous a pleu me donner. Mais si ie vous monstre que le retardement que vous apportez à mon bonheur retarde le repos de vostre Royaume, ne confesserez vous pas que vous estes coupable de tous les maux que souffrent vos subiets en differant mon contentement? Le seul amour de la Princeesse a fait resveiller en Mithridate ses pretentions imaginaires. La seule esperance de la posseder l'anime ; pour elle seule il fait plus que ses forces mesmes ne peuuent permettre ; Et il n'y a point de doute que si vous accomplissez ce que vous m'avez promis, vous verrez son armée dissipée aussi tost que son esperance. Si Mithridate entre victorieux dans Byfance, non seulement il sera maistre de la Princeesse, mais enco-

re du Royaume, dont il vous chassera comme son ennemie, & peut-estre massacrera vostre fils comme celuy qui luy peut disputer la Couronne; & alors qui aurez vous pour amy? car vous seriez honteuse de venir chercher du refuge vers celuy que vous auriez mesprisé apres vous auoir assistée: Et si vous permettez que ce qui est accordé entre nous se termine, vous terminez cette guerre en le desesperant; & du moins vous vous assurez vne retraitte chez moy quand il vous arriueroit quelque accident: car de croire que Mithridate se puisse rendre par les armes paisible possesseur de vos Estats, les Romains estant pour vous, c'est vne vaine crainte. Voyez donc, Madame, si vous estes resoluë de nourrir la guerre en me donnant la mort par vos retardemens, ou de vous en voir deliuree en me rendant heureux. La Reine qui n'auoit escouté patiemment me respondit. Bien qu'avec peu de paroles i'eusse pû aller au deuant de tout ce que vous me venez de dire, ie n'ay pas voulu le faire, pour vous donner au moins toute la satisfaction que vouspouuez receuoir maintenant, qui est celle de vous plaindre en toute liberté, & de ne garder en vostre ame vne seule des choses que vous auiez à me dire: mais quand ie vous assureray que non seulement ie ne songe point à differer vostre contentement, mais encore que ie cherche à l'auancer autant que ie puis; ne confesserez vous pas que vous deuez vous louer de moy, au lieu de vous en plaindre? Il est vray qu'au commencement de cette guerre, ie n'ay pensé qu'aux moyens de me deffendre; & i'ay crû aussi que vous en vouliez attendre la fin auant que de songer à des resioüissances; mais si tost que ie me suis apperceuë que l'impatience de vostre amour n'en

pouuoit souffrir la longueur; l'ay enuoyé vers l'Empereur, sans le vouloir duquel ie ne puis disposer d'aucun de mes enfans, pour luy demander la permission de vous donner Berenice. C'est ce que j'attends maintenant avec autant de desir que vous mesme; & ne croyez point que iamais j'aye eu la moindre pensée de la donner à Mithridate, à qui ie donneroie plus volontiers la mort pour tous les mal-heurs dont il nous a esté la cause. Moderez donc vn peu vostre ennuy iusques au retour de celuy que j'ay enuoyé; & croyez que ce retardement ne fait qu'augmenter mon desir aussi bien que le vostre.

Ainsi m'appaisa la Reine pour quelque temps, & cependant à l'aide des Romains nous fismes quitter à Mithridate tout ce qu'il auoit enuahy pendant cette guerre: toutefois ie sçauois qu'il ne manquoit point d'entre-metteurs enuers elle, & ie m'emportay tellement dans ma passion, ne voyant que luy qui me peult disputer Berenice, que ie luy offris de le combattre seul à seul, ou de vaisseau à vaisseau: que s'il me vainquoit ie luy abandonnois & la Princesse & mon Royaume; & que si ie le surmontois il abandonneroit seulement la pretention de Byfance & de la Princesse; iugez avec quel desauantage ie faisois cette partie, hazardant des biens solides contre des imaginaires. Mais les Romains qui ne vouloient point que nostre valeur decidast nos differens, & qui en vouloient estre les seuls arbitres, rompirent tous nos desseins; & ie ne pûs m'empescher de leur en tesmoigner vn furieux mescontentement. Aquila qui les commandoit me dit qu'ils m'estonneroient bien s'ils se mettoient du party de Mithridate. Je luy respondis que celuy qui estoit en estat de ne refuser pas la mort mesme, n'estoit pas capable de s'estonner

ner d'aucune chose; le me retiray ainsi d'avec eux, ayant quelque soupçon qu'Irene & eux voulussent s'entendre avec Mithridate, & méditassent desia de me faire vn mauvais party.

Lelendemain au matin, estant dans Bysance vn des miens me vint dire tout effrayé, que Mithridate avec des troupes Romaines alloit entrer dans la ville. Cette nouvelle me surprit extrêmement; & ie ne doutay point que ie ne fusse trahy & par les Romains & par la Reine mesme, sans le consentement de laquelle celuy qui estoit auparavant son ennemy n'entreroit pas dans Bysance. Incontinent craignant d'estre liuré entre les mains de Mithridate mon riuai, ou du moins d'estre enuoyé prisonnier à Rome, comme d'autres Rois auoient esté; ie me fis descendre dans vn esquif par les fenestres de ma maison, le bas de laquelle estoit laué de la mer, & de là ie gagnay vn de mes vaisseaux qui estoit seul en ce lieu, avec lequel ie deliberay de regagner en haste mon Royaume.

Quand nous commençâmes à voguer, vne telle douleur me saisit de me voir réduit à quitter mes plus cheres esperances, que ie regrettay mille fois de ne m'estre pas ietté dans la mer, au lieu de m'estre ietté dans l'esquif: car mes gens qui me voyoient dans le desespoir, tâchoient d'appaiser alors mes transports, & ne m'abandonnoient point de peur que ie ne me precipitasse. L'accusois Irene d'ingratitude, les Romains de tyrannie, & tous ensemble de m'auoir fait la plus lasche trahison dont il se parla iamais. L'estois dans cette confusion d'esprit lors qu'on m'aduertit qu'un vaisseau bien arme nous poursuuoit. Je receus cette nouvelle avec vne certaine

creance que c'estoient mes ennemis qui ne vouloient pas me laisser eschaper; toute fois avec ioye, esperant me vanger d'eux dans le combat, ou du moins y trouuer la mort ou par leur main ou par la mienne. le commanday à mes soldats de se tenir prests pour combattre, & de ne point fuir, mais d'accrocher le vaisseau le plustost qu'ils pourroient. Cela fut fait aussi tost; i'entray dedans l'espée à la main, estant si troublé par mes ennuis, que i'en auois la veüe esgarée, & ne pouuois discerner ce qui se presentoit deuant moy. En fin i'entendis vne voix qui me dit. Quoy? Polemon, voulez vous tuer celles qui viennent implorer vostre secours, & qui n'ont esperance qu'en vous. Je reconnus la voix de Berenice, plustost que son visage: puis ma veüe se rassurant, & commençant à voir ce qui me donnoit tant d'amour. le me iettay à ses genoux, & luy dis en les luy embrassant: Est-ce vous, ma Princeesse? ou quelque illusion qui me trompe, pour me liurer viuant à mes ennemis? Non, respondit-elle, assurez vous que c'est moy-mesme qui me viens liurer à vous; & que voila la Reine ma mere, qui vous vient demander vn asyle dans vos Estats, pour elle, pour le Roy mon frere & pour moy. Alors ie les reconnus tous, & apres les embrassemens, ie luy demanday quelle fortune, mauuaise pour eux & bonne pour moy, auoit causé leur départ. l'appris qu'ils s'estoient eschappez de Bysance, pour auoir sceu comme moy que Mithridate arriuoit dans la ville, accompagné des Romains mesmes, sans que la Reine eust sceu aucune chose de leur intelligence si soudaine, & ne pouuant douter qu'ils ne vinssent en intention de les surprendre, pour disposer mal-gre elle & de son fils & de sa fille: ce qui l'auoit fait resoudre de se

ſauuer avec ce qu'elle auoit de plus cher au monde , & de ſe mettre entre mes mains. Nous iugeaſmes qu'il ne falloit point perdre de temps pour gagner mes Eſtats ; où nous arriuaſmes ſans eſtre ſuiuis ; & la Reine de peur d'eſtre contrainte par quelque ordre de Rome , de ſatisfaire au deſir de ſes ennemis ; & pour obliger celui de qui elle attendoit tout ſecours , conſentit que i'eſpouſaſſe Berenice : ce que ie fis avec toutes les magnificences que ie pûs inuenter , mal-gré les craintes de la guerre que j'attendois du coſté des Romains.

Vous voyez donc, Lepante , pourſuiuit le Roy , comment de l'abyſme des mal-heurs ie me vis eſleué à vn haut comble de ioyes ; & que le bon-heur ſuit ſouuent de bien près les plus grandes infortunes. Il me reſte à vous dire ce qui ſe paſſoit cependant à Byſſance ; & vous iugerez que les plus grands eſtabliſſemens de nos fortunes naiſſent quelquefois de cauſes fort legeres. L'Empereur Caligula auoit fait venir à Rome vn Roy d'Iberie nommé Mithridate , & l'auoit fait mettre aux fers. Claude ſon ſucceſſeur voulant repaſſer les deſordres & les violences qui auoient eſté commiſes par ce Tyran , ſ'eſtoit reſolu de le retirer de ſa miſere , & de le renvoyer en ſon Royaume avec eſcorte ; & c'eſtoit ce Mithridate & non pas noſtre ennemy qui alloit paſſer dans Byſſance avec des Romains , retournant en ſon païs. N'admirez vous pas comment la fortune ſe iouë des hommes , d'auoir fait rencontrer cét autre Mithridate près de Byſſance , en meſme temps que la Reine & moy commençons à nous deſſier que les Romains vouluſſent prendre le party de celui contre qui nous combattions ? Non ſeulement nous y fuſmes trompez , mais encore tous les Byſſantins , qui

dans cét effroy laisserent entrer ces troupes comme celles à qui ils abandonnoient leurs biens & leurs vies.

Ce Mithridate d'Iberie & ceux qui l'escortoient, furent bien estonnez de voir vn peuple qui les fuyoit de tous costez, & eurent bien de la peine à en rassurer quelques vns afin qu'ils leur donnassent à loger. Ils furent long temps saas se pouuoir entendre les vns les autres : en fin quelques vns de l'intelligence de nostre ennemy, luy manderent qu'il vinst en diligence sur l'erreur où l'on estoit, & que les portes luy seroient ouuertes. Ainsi il s'empare de Byfance : toutefois les Romains ne luy donnant pas loisir de s'establiir, l'attaquerent si viuement, que non seulement il fut contraint d'abandonner la ville, mais encore la pluspart de ses forces; & ne sçachant à qui auoir recours, il alla se jeter aux pieds du Roy Eunones qui auoit este vn de ses plus grands ennemis, & luy dit qu'il voyoit ce Mithridate que les Romains auoient tant cherché par mer & par terre, qui venoit de son bon gré se rédre à luy : qu'il eust pitié du fils du grâd Achemenes, qui estoit la seule qualité qui luy fust restee. Eunones en eut pitié, & pria l'Empereur par ses lettres de luy pardonner: Incontinent apres il fut enuoyé à Rome, où ayant tesmoigné beaucoup de courage aux responfes qu'il fit à Claude, encore qu'il courust fortune de la vie, non seulement il n'eut aucun mal, mais encore l'Estat de Byfance luy fut donne; & il fut ordonne qu'Irene & son fils seroient recompensez du Royaume de Galatie. Mais ayant secu ces changemens, & voyant que la Reine auoit vn regret extrême de quitter le Bosphore pour s'en aller en Asie; i'escris à l'Empereur que pour obliger Irene ie luy cederois mon Royaume pour prendre celui de Galatie, & Clau-

de considerant ma generosite qui me faisoit abandonner mon interst , en faueur de ma belle mere ; car encore que le Royaume de Galatie soit de plus grande estenduë, il n'est pas si considerable que le Bosphore de Thrace , qui a tant de mer , & semble lier l'Europe avec l'Asie , il me donna encore la Lycaonie , & vne grande partie de la Cilicie , n'en reseruant que les parties maritimes. Voilà comment la beauré de Berenice a cause tous ces changemens , qui ont bouleuerse la fortune de tant d'hommes : car les subiects par la mutation des Rois en ont senty leurs establissemens renuersez : la pluspart qui auoient leurs biens dans les terres ne pouuant suivre leurs Princes , desquels ils receuoient des faueurs & des aduantages. Ainsi , Lepante , la fortune dispose des humains ; & en vn moment nous transporte de la felicité dans la misere , & de la misere dans la felicité. Et c'est ce qui donne quelque sorte de bon-heur dans l'infortune mesme : car les mal-heureux par l'esperance ont continuellement dans l'esprit la veue du bien qu'ils attendent ; & les heureux , par la crainte ont la consideration du mal qu'ils redoutent.

Voyant que le Roy auoit finy son discours , continua Lepante , j'admiray ces estranges euenemens , & luy dis que ie n'auois sceu que la moindre partie de toutes ces choses : que les mariages qui se font par des accidens si merueilleux , sont des ouurages du Ciel ; & non seulement sont heureux , mais encore sont naistre ordinairement des merueilles. Sur ce propos la Reine desira que ie visse le ieune Prince leur fils , qui auoit enuiron douze ans. Le Confident l'alla querir , & cependant le Roy me fit plusieurs questions politiques & morales , ausquelles ie satisfis aucunement à leur gré. Puis ie vis arriuer le petit Prin-

ce , qui auoit fort bonne grace & auoit la mine d'auoir beaucoup d'esprit. Le Roy desira qu'il me rendist conte de ses estudes, tandis que son Precepteur estoit malade, lequel , à ce que ie sceus depuis, estoit vn Sophiste qui auoit reputation d'estre sçauant , mais qui n'auoit ny iugement ny vertu. Je luy demanday avec la permission du Roy & la sienne mesme , ce qu'il auoit appris. Il me respondit qu'il sçauoit la langue Romaine & la Grecque, & qu'il auoit estudié quantité de discours pour parler sur toutes sortes de sujets. Je m'enquis de luy si l'on ne luy auoit point enseigné à estre iuste , magnanime, clement, temperant, patient, liberal. Il me respondit qu'il sçauoit bien la définition de tous ces mots. Mais, luy dis-je, ne vous a-t'on point exercé à pratiquer ces vertus? comme de vous faire iuger quelque differend , pour apprendre à estre iuste: de vous proposer quelque fascheux accident où vous pourriez tomber , pour voir si par magnanimité vous pourriez vous resoudre à vaincre ou à souffrir la fortune : de vous faire endurer quelque honte ou quelque peine legere pour vous instruire à la patience, & ainsi des autres vertus. Il me dit qu'il n'auoit fait autre chose que d'apprendre continuellement du Latin & du Grec: en fin ie sceus qu'on auoit fort exercé sa memoire, sans auoir eu aucun soin de son iugement. Je consideray quelle perte on faisoit d'instruire de cette sorte ce ieune Prince, dont le naturel estoit vif, & genereux; & ie l'admiray en vne repartie qu'il me fit: Car luy ayant dit qu'il falloit sur toutes choses qu'il apprist les vertus Royales, & l'art de bien regner, qui estoit le plus grand & le plus beau de tous les arts; Il me repartit, qu'il y auoit vn art qui estoit encore plus grand & plus beau que ce-

luy-là, & qu'il voudroit bien apprendre. Et lequel? luy demanday-je: l'art, me dit-il, que sçait l'Empereur de Rome, qui est de sçauoir donner & oster les Royaumes à qu'il on veut. Nous admirasmes tous le desir releué qu'auoit conceu cét enfant. Et depuis il ne nous parla plus que de la passion qu'il auoit d'aller à Rome pour apprendre cét art. Je luy dis qu'il falloit qu'il en apprist vn autre auparauant, qui estoit celuy de regler ses desirs.

Toute l'apresdisnée se passa en ces agreables entretiens; & sur le soir le Roy me prit à part, & avec beaucoup d'affection m'offrit le gouuernement de son fils & vne des premieres charges de sa Iustice, si ie voulois demeurer auprès de luy. Je luy respondis, que luy estant redevable de tant de graces, il pouuoit disposer de la vie qu'il m'auoit donnée: mais que me sentant incapable de me gouverner moy-mesme, il me seroit impossible de gouverner ny son fils ny son peuple sous son autorite. Que s'il vouloit adionster vne faueur extrême à tant d'autres, ie le suppliois qu'il me permist de m'en retourner en mon país. Il tascha de me retenir encore par quelques raisons; mais voyant que quand ie luy cedoïs, c'estoit pour n'oser le contredire; & que mon desir se portoit entierement à sortir de son Royaume, il me fit plusieurs pressens, avec lesquels il me laissa aller. Je me mis en quelque equipage pour reuenir, & m'estant pourueu de gens & de cheuaux pour ne courir plus vne fortune si honteuse, ie repassay par les mesmes lieux que i'auois veus en allant; puis ie trauersay la mer Egée, & descendis en la Macedoine, en laquelle ayant deigné quel-que temps, ie me rendis en l'Epire où nous allons à present. Mais pource que les ennuis estoient ma plus agrea-

ble compagnie, ie commençay à me laisser de mes gens, & me resolus d'aller viure en quelque solitude. En ce dessein ie les laissay en Epire, avec charge de m'y attendre, iusques à ce que ieusse fait vn voyage en Italie. Je passay la mer sans aucun des miens, & arriuy à Brunduse: ie trauersay l'Apoüille sans rencontrer aucun endroit qui me fust agreable; de là i'arriuy à Cumes, où ayant trouué vn lieu pour y demeurer seul autant que ie voudrois, ie pris quelque petite prouision pour manger, que ie portay dedans; & là i'accu'ois les Dieux autant qu'il me plaisoit; ie me tourmentoys à mon gré de cruels souuenirs; & plus ie me donnois de peine, plus ie m'imaginois receuoir de satisfaction. Ce lieu estoit l'autre de la Sybille Cumée, & vne nuit apres auoir fait mille plaintes, ie m'auiſay d'implorer le secours de sa voix que l'on disoit estre restee au monde, pour me fauoriser d'un Oracle. Cette sacree Sybille eut en fin pitié de mes maux, & i'entendis cette voix diuine qui me dit ces vers;

*Amant d'inuincible constance,
Tu verras finir ton tourment,
Si tu retournes promptement
Aux lieux où tu pris ta naissance.*

Epicharis, Melinte & Palamede interrompirent ce discours, en se prenant à rire, & dirent tous ensemble. Ce fut donc vous, Lepante, à qui nous rendismes cet oracle? Voila, continua Melinte, en monstrant Epicharis, vostre Sybille qui prononça les vers sur le champ. Lepante estoit si estonne qu'il ne sçauoit que dire, ayant creu iusques

ques là auoir esté assisté diuinement ; dequoy estant demeuré tout interdit, Cyllenie, Eurymedon & les autres qui ne sçauoient point cette rencontre, prièrent Epicharis de leur dire ce que c'estoit. Elle leur conta comment s'estant eschappez eux trois des prisons de Rome, & fuyant cette ville, ils se cachèrent vne nuict dans cét antre, où ayant entendu vn homme qui se plaignoit, & imploroit le secours de la voix de la Sybille, elle s'estoit résoluë de contre-faire cette voix, & de renuoyer ce mal-heureux chez ses parens. Lepante reuenant de son estonnement luy dit. Belle Epicharis, ce que vous dites est-il bien possible ? Cela est ainsi, repartit-elle, & ie vous remets encore en mon souuenir ; pource que ie reconnois à present que ce fut vous mesme qui passastes auprès de nous le lendemain au matin. Il est vray, respondit Lepante, que ie vis quelques personnes qui voulurent m'arrester ; mais i'estois si satisfait de mon Oracle, & de l'assistance des Dieux, que rien n'estoit capable de me retenir. Cependant, dit Epicharis, voyez comment sans y penser i'ay esté veritable : car vous auez trouué icy par mon moyen, vostre fortune entierement changée, & vous m'estes redeuable de tout vostre bon-heur. Il est vray, repartit Lepante, que vous estes ma Sybille, & la seule Deesse que ie dois adorer, puis que ie tiens de vous seule tous les contentemens de ma vie ; & que sans vous ie serois encore dans cette grotte. Chacun admira cette rencontre ; & comment fortuitement ils s'estoient trouuez en ce lieu, & auoient esté inspirez de luy rendre cét Oracle, qui auoit esté le plus veritable & le plus salutaire que les Dieux mesmes eussent peu luy donner. Lepante rendit mille graces à Epicharis, & aux Dieux

qui luy auoient parlé par sa bouche , puis il pour-
suit.

Bien que ie creusse que les Dieux prenoient soin de moy , & qu'ils vouloient me deliurer de cette mal-heureuse vie , ie ne pouuois pourtant m'imaginer qu'ils me peussent guerir autrement que par l'oubly de mon amour : de sorte que bien que ie suiuisse le commandement de cét Oracle , c'estoit sans aucune esperance de bon-heur , pource que ie ne voulois point guerir de cette façon. Ie repris le chemin de mon pais avec assez de langueur & de desdain , me sentant forcé d'y aller par vne puissance qui me sembloit redoutable , & abhorrant toutefois les lieux que ie cherchois. Cela estoit cause que ie ne me pressois pas trop d'auancer mon chemin ; & estant arriué à Regge apres plusieurs iours , ie fus bien content de ne point trouuer de vaisseau qui partist pour Corynthe ; pource que plus i'en approchois , plus ie craignois d'y arriuer. Dans Regge i'auois vn hoste fort ancien amy de feu mon pere , que ie me resolus d'aller trouuer , ne croyant pas qu'il peust auoir connoissance de mes mal-heurs , afin que ie puisse séjourner quelque temps en ce lieu. Ce bon-homme qui se nommoit Menandre , ayant sceu de moy qui i'estois , me fit toutes les caresses que l'on puisse recevoir , & sçachant que i'estois arresté à Regge attendant qu'un vaisseau partist pour Corynthe , il me pria de demeurer chez luy autant de temps qu'il me plairoit , & me tesmoigna qu'il ne pouuoit recevoir vn contentement plus grand , que de voir le fils de son bon amy. Ie fus dans cette maison fort long temps , pource que l'on ne s'ennuyoit point de moy , & ie ne songeois point à partir , ne pouuant encore me resoudre.

Menandre connoissoit bien que mon esprit estoit affligé, & ayant tâché plusieurs fois d'en sçauoir la cause, iamais il ne la pût apprendre, surquoy ne voulant point me presser dauantage, il essayoit seulement à me diuertir. Il auoit vne fille qui estoit mariée chez luy, nommée Melicerte, qui estoit fort agreable, & d'un esprit fort gentil; il luy auoit commandé de ne me point laisser sans entretien, & elle s'en acquittoit avec beaucoup de soin, & encore avec plus de grace. Tous les iours ie sçauois les nouuelles de la ville, dequoy elle estoit bien informée; & lors que le temps n'en fournissoit pas de luy-mesme, elle me contoit les choses qui s'estoient passées auparauant, & faisoit si agreablement ses recits, qu'elle rendoit mon esprit attentif à ses discours, & neluy permettoit pas de penser à sa melancholie. Mais puisque nous auons du loisir, il faut que ie vous fasse part encore d'une histoire qu'elle m'apprit, qui m'occupa tellement, lors que ie l'entendis d'elle, & me diuertit de telle sorte pource qu'elle sembloit me toucher, que ie croy que ie vous apporteray encore quelque plaisir en vous la redisant:

Vn iour ie vis venir chez elle vne Dame nommée Ardanie qui la venoit visiter; & par les caresses qu'elles se firent, ie connus qu'elles estoient intimes amies. Cette Dame auoit vn grand esclat: mais sa beauré sembloit auoir esté attaquée par vne grande maladie; pource que son teint, bien que fort delicat, estoit passé & defait, & ses yeux qui estoient bien ouuerts, & d'une grosseur agreable, n'auoient aucune viuacité, & estoient si languissans, qu'ils sembloient regretter la perte de leurs traits & de leurs charmes. Je m'apperceus que ma pre-

sence rendoit les discours indifferens, & les empeschoit de se parler librement; de sorte que ie pris à part Charés, qui estoit le mary de Melicerte, & l'entrerins pour leur donner toute liberté. Je vis bien que ie leur auois fait plaisir, pource qu'elles furent plus d'une heure à se parler en secret; & en fin Ardanie se resolut de s'en aller. Charés voulut la conduire chez elle, pource qu'il estoit assez tard, & me laissa seule avec Melicerte, qui me dir peu de temps apres. Voila vne Dame qui a esté bien plus belle qu'elle ne paroist à present: mais ses ennuis sont cause de ce changement. L'attribuois, luy dis-je, cette palseur a quelque maladie; pource qu'il n'y a point de doute qu'elle garde encore les marques d'une grande beauté. Je ne veux point vous celer, continua Melicerte, que voila vne inconstante la mieux punie qui soit au monde; & quand ie considere les accidens qui sont arriuez à trois ou quatre personnes de ma connoissance, ietrouue que l'amour est bien iuste: Quand il se melle de se vanger, il s'auiſe quelquesfois de punir les infidelitez d'une plaisante sorte; & bien qu'Ardanie soit ma plus chere amie, ie me fie tellement en vostre discretion, que ie ne craindray point de vous en conter toute l'histoire.

Il y a trois ou quatre ans, poursuiuit-elle, qu'entre les plus accomplis de cette ville, estoit vn nommé Polydamas, qui avec plusieurs excellentes qualitez, auoit vne discretion si grande, qu'elle le faisoit aimer de tout le monde. Il estoit parent d'Ardanie, & cette consideration faisoit qu'ils se voyoient souuent: Ils faisoient vne estime fort grande l'un de l'autre; & leur affinité leur donnant encore sujet de s'aimer, ils se cherissoient avec

beaucoup d'affection , & communiquoient ensemble avec vne grande confiance. l'estois dès ce temps-là celle qui sçauoit tous les secrets d'Ardanie , & ie voyois que rien ne luy plaisoit tant que Polydamas ; pource qu'elle me faisoit tousiours des contes à son aduantage , & s'il ne luy donnoit alors de l'amour , au moins luy faisoit-il auoir du mespris pour tous les hommes. Il estoit engagé il y auoit plus de deux ans , en la recherche d'une fille nommée Elusine , qui l'aimoit avec tant de constance , qu'elle souffroit pour son amour toutes les cruauttez qu'un pere furieux peut faire sentir , lors qu'il void la passion d'une fille contraire à ses desseins. Ardanie sçauoit de Polydamas tout ce qui se passoit en cette affection : mais pource qu'il estoit bien plus aimé qu'il n'aimoit , il poursuivoit avec assez de froideur cette entrepriſe , & ne secundoit pas les efforts que faisoit Elusine pour paruenir à ce qu'ils desiroient : seulement il se contentoit de luy rendre des deuoirs , qu'il ne pouuoit luy desnier sans tesmoigner beaucoup d'oubly & de mespris. Ardanie luy faisoit quelquefois des reproches deuant moy du peu de soin qu'il auoit d'Elusine ; & il confessoit à elle mesme qu'elle estoit cause qu'il n'aimeroit iamais personne d'amour. A la fin la constance d'Elusine ceda aux violences de son pere ; elle se resolut de luy obeïr , & en demanda la permission à Polydamas , pour se deliurer des tourmens qu'on luy faisoit endurer. Il fit alors vne action qui sembloit partir d'une affection bien sincere ; mais qui estoit en verité vn tesmoignage de sa froideur. Il luy escriuit , que ne pouuant la voir endurer eternellement , il auoit resolu de la prier de la mesme chose dont elle luy demandoit congé : que perdant toute esperance , elle deuoit donner

contentement aux siens, pour se garantir de misere ; qu'il la prioit de l'oublier s'il luy estoit possible, pour n'estre pas toute sa vie mal-heureuse : que pour cét effet, il luy renuoyoit tous les gages qu'il auoit de son amitié, & luy remettoit tous les sermens qu'elle luy auoit faits, afin que cét engagement n'empeschast point son repos. Sur cela elle se maria, & laissa Polydamas libre, qui eut peu de ressentiment de ce mal-heur. Ardanie, continua Melicerte, a vn frere nommé Misandre, qui entre beaucoup de basses qualitez, est pourueu d'une si pesante melancolie, qu'il ennuye tout le monde. Lepante fut interrompu là-dessus par Amyntas, qui luy dit : l'ay assez connu Misandre à mes despens. Ariane, adiouta : C'est peut-estre ce Misandre dont Erycine m'a parlé. C'est celuy-là mesme, repartit Amyntas, de qui l'humeur nous a fait long temps souffrir tous deux. A ce que ie voy, reprit Lepante, vous le connoissez mieux que moy de veüe, mais peut-estre scay-ie plus que vous de effects de cette triste fureur qui le travaille, & qui a bien donné de tourment à d'autres. Polydamas, continua Melicerte, encore qu'il mesprisast l'humeur de Misandre, ne laissoit pas de faire semblant de le chérir, pour estre souvent aupres d'Ardanie, dont la compagnie luy estoit fort agreable. Vn iour Misandre sceut que l'on parloit de mariage pour Polydamas ; & lors qu'ils furent tous trois ensemble, il apprit cette nouuelle à sa sœur, comme leur deuant estre fort agreable, dequoy Ardanie rougit. Polydamas remarqua cette action ; pource qu'il n'y a rien qui s'apperceiue si tost que les choses qui se passent à nostre aduantage, & il iugea qu'elle s'interessoit beaucoup en luy. Cela le fit penser à vne chose, dont il ne s'estoit

point encore aduisé, qui estoit de rechercher son affection, n'ayant iusques-là desiré que son amitié. Ardanie estoit bien plus belle qu'Elusine, & il fut bien aisé d'allumer du feu, apres le commencement de chaleur qui estoit entr'eux. Il n'y auoit eu que la consideration de leur parenté qui auoit empesché Polydamas de jeter les yeux sur elle pour l'espouser : mais alors il connut, que puis qu'elle n'en faisoit point de difficulté, il ne deuoit pas estre plus scrupuleux qu'elle. Le voila donc resolu de luy tesmoigner vne grande passion : & sans faire semblant de s'estre apperceu de son inclination, afin qu'elle n'eust pas la honte de l'auoir preuenue, il iugea qu'il falloit feindre de l'aimer depuis long temps d'une affection cachee. Pour ce sujet il fit plusieurs vers, par lesquels il disoit qu'il luy estoit au moins permis de mettre par escrit ce qu'il souffroit, sans en dire le sujet, & de soulager son ame de cette sorte, de tant de pensées cruelles qui la tourmentoient, & qui en vouloient sortir. En mesme temps il rendoit plus de soins que de coustume à Ardanie, & luy tesmoignoit par ses souspirs, & par quelques mots interrompus, qu'il mouroit d'amour pour elle. Au premier tesmoignage qu'elle en eut, elle m'apprit la nouuelle que Polydamas l'aymoit, comme vne chose extrêmement desirée d'elle, & qui la combloit de ioye : ie me trouuay chez elle lors qu'il luy monstra ces vers ; & elle fut bien aise qu'il les leust deuant moy, afin que ie connusse combien il auoit de passion. Il attribuoit toutes ses froideurs pour Elusine, à cette amour secrette qu'il auoit pour vne autre depuis long temps, & feignoit d'auoir fait beaucoup de choses par necessité qui auoient esté alors sans dessein. Nous luy fîmes quantité de questions sur cette amour se-

crette, qu'il ne declaroit point encore, auxquelles il satis-
 faisoit fort bien; & Ardanie y prenoit vn grand plaisir. Il
 cognoissoit bien que nous entendions tout ce qu'il vou-
 loit dire; & dès lors nous prîmes vne coustume de nous
 parler ainsi sans rien declarer ouuertement; & nous ne
 laissions pas de dire toutes choses aussi intelligiblement,
 que s'il nous eust dit le nom decelle qu'il aymoit. Je le
 trouuois bien-heureux de traiter ainsi: pource que sous la
 couuerture de la parenté, il prenoit des libertez qui ne luy
 eussent pas esté permises s'il se fust déclaré pour Amant;
 comme d'approcher souuent la bouche de la sienne, &
 de baiser sa main incessamment. Ce fut ainsi qu'il donna
 naissance à la plus violente passion qui fut iamais; pour-
 ce que cette belle cousine ne luy refusant point ces caresses,
 & l'obligeant d'une estroite confidence, il se sen-
 toit si redevable enuers elle, & si touché en mesme temps
 de sa beauté, qu'il allumoit vn feu pour ne se pouuoir
 de long temps esteindre. Misandre ne voyoit pas bien
 volontiers cette grande intelligence; toutefois il ne pou-
 uoit iuger encore que ce fust autre chose qu'une simple
 amitié. Polydamas voyant qu'il auoit besoin de ce me-
 lancolique, luy rendoit cependant toutes sortes de de-
 uoirs; pource qu'Ardanie n'auoit plus que sa mere qui
 estoit fort vieille; & tout le pouuoir de la maison estoit
 entre les mains de ce Misandre, qui bien que d'un es-
 prit foible & pesant, ne laissoit pas d'auoir l'autorité,
 à cause de la rudesse de son humeur à qui l'on craignoit
 de desplaire. Ardanie & Polydamas luy persuadoient la
 pluspart du temps ce qu'ils vouloient par souplesse d'esprit:
 mais ils le craignoient, lors qu'il auroit connoissance de
 leur amour; pource qu'il auoit d'autres desseins pour
 sa

sa sœur. Vn iour Misandre, soit par simplicité, soit par dessein, pria Polydamas de porter l'esprit d'Ardanie à vn mariage auquel elle resistoit. Polydamas se trouua obligé de luy en parler, & il serença que ce fut en sa presence. Il luy representa toutes les considerations qui la deuoient toucher pour choisir ce mary, auxquelles elle repliqua du commencement en riant, comme si elle eust creu qu'il se mocquoit; mais il la pressa tellement, en parlant serieusement de cette affaire, à dessein, comme ie croy, de l'esprouer, qu'elle se facha en fin, & luy dit, qu'elle trouuoit cela mauuais de luy, plus que de tout autre. Elle se descourut ainsi, & ce fut la premiere parole qu'elle laissa aller, par laquelle elle monstra qu'elle approuuoit son affection. Alors il l'appaisa, & luy voulut faire croire qu'il auoit ainsi parlé pour sçauoir ses sentimens, & les dire à son frere. Elle ne feignoit point de dire souuent à Polydamas, qu'elle seroit la plus mal-heureuse du monde, si le dessein qu'elle auoit ne reüssoit: mais bien qu'il conneust qu'il estoit bien aimé d'elle, il ne le sçauoit pas encore si bien que moy; à qui Ardanie disoit mille choses touchant son affection, qui me faisoient voir que iamais fille ne fut plus amoureuse.

Depuis il se presenta vn party pour elle qui leur donna bien des craintes & des tourmens. L'affaire auoit esté concertée entre les parens auant que d'en communiquer avec Ardanie, pource que l'on ne vouloit pas douter de sa volonté: de sorte que tout estoit fort auancé lors qu'elle en apprit la nouuelle. La voila dans les apprehensions, & tout ce qu'elle pouuoit faire, c'estoit de représenter quelques difficultez. Elle en aduertit Polydamas qui ne sceut quel re-

mede il pourroit trouuer; & leur affection n'osant encore éclater, tous deux se trouuoient en grande peine. Vn iour il entra chez Ardanie, lors que des amis de part & d'autre estoient assemblez, pour vuidier quelques difficultez touchant ce mariage. Misandre vint au deuant de luy, auquel Polydamas telmoigna qu'il s'en vouloit aller, puis qu'ils estoient empeschez. Non, non, dit Misandre, vous demeurerez, s'il vous plaist, pource que vous auez autant d'interest en cette affaire, que pas vn de ceux qui sont icy. Pour le moins, disoit Polydamas en luy-mesme, puis il se laissa conduire au lieu où estoient ceux qui debattoient les differens. Ardanie estoit presente, aussi passe que si elle eust esté prestte à estre iugée à mort, mais lors qu'elle vid entrer Polydamas, elle conceut quelque esperance, & reprit vn peu de courage. Il estoit en l'estime d'vne si grande vertu & d'vn si bon iugement, qu'incontinent on luy proposa les difficultez, pour les considerer, & les iuger luy mesme. D'abord il telmoigna qu'il vouloit accorder toutes choses; n'ayant toutefois autre dessein que de rompre cette assemblée; & dit qu'il se falloit relascher de part & d'autre, & que de petites considerations ne deuoient pas empescher vne affaire de grande importance. Il s'insinua ainsi dans la creance des vns & des autres; mais sur ce que l'on vouloit precipiter le mariage, il dit que cela n'estoit pas raisonnable, & que ce qui regardoit toute la vie meritoit bien d'y penser plus à loisir. En fin il sceut si bien manier les esprits qu'il rompit cette assemblée, & fit remettre la resolution au lendemain. Ardanie du commencement ne scauoit que penser de Polydamas en l'entendant parler: mais voyant qu'il auoit si bien conduit son dessein, elle en demeura;

ra bien satisfaiſte. Alors eſtant demeuré ſeul avec Miſandre & ſa mere, il leur representa qu'il falloit ſe déſier de ceux qui vouloient les eſbloüir par vne ſi prompte reſolution qu'ils vouloient les obliger de prendre : qu'il y auoit quelque grand deſſaut caché là deſſous, & qu'il falloit du temps pour le reconnoiſtre. Apres les auoir mis dans ces ſouſçons, ils firent tant de remiſes, qu'ils donnerent deſpit aux autres, & en fin tout fut rompu, au grand contentement d'Arदानie & de Polydamas, qui iugerent qu'ils ne pourroient pas toujours deſtourner ainſi les orages qui ſe preſenteroient, & qu'il eſtoit temps de ſe declarer. Le ſecours que Polydamas auoit donné à Ardanie en cette derniere occaſion, l'auoit tellement obligée, qu'elle ſe lia entierement à luy, & luy donna tout ce que l'amour peut accorder d'honneſtes aſſurances. Ils conſulterent les moyens qui eſtoient à tenir, & ſe pourueurent de perſonnes qui pouuoient faire conſentir ſa mere. Il n'y auoit que ce ſaſcheux Miſandre qui eſtoit vne beſte trop ſarouche pour pouuoir eſtre aiſement gouvernée ; de ſorte qu'il ſe trouuoit peu de perſonnes capables de le perſuader. Polydamas qui auoit pris vn empire ſur ſon eſprit, euſt eſté ſeul ſuffiſant de le porter à tout ce qu'il euſt voulu en luy parlant pour vn autre ; mais pour ſe ſeruir luy-meſme, il demeuroid ſans force. Sur ces entrefaites la mere deuient malade & meurt. Ardanie apres luy auoir rendu les derniers deuoirs, ne receut conſolation que de la ſidelle compagnie de ſon cher Polydamas, qui ne croioit pas que rien fuſt capable d'empêcher leur bon-

heur , puis qu'elle estoit demeurée maistresse d'elle
mesme. Il y eut entr'eux vn renouvellement d'asseu-
rances ; ils viuoient en vne si estroite vnion , & a-
uoient des soins aussi particuliers l'un pour l'autre , que
s'ils eussent esté desia mariez ensemble. Alors plus de
partis se presenterent pour elle , de sorte qu'ils se re-
solurent de conclure leurs affaires , & d'en faire la pro-
position à Misandre , à qui elle auoit delibéré de de-
clarer son vouloir absolu , & le prier d'y consentir ,
sinon de passer outre. Polydamas choisit vn de ses
amis pour en parler à Misandre ; & il s'en acquitta si
bien , luy representant mille considerations qui de-
uoient l'obliger à desirer ce mariage ; que s'il eust eu
quelque iugement , il ne deuoit point refuser de con-
sentir à vne chose si desirée de tous. Il receut cette
ouuerture avec beaucoup de tristesse ; toutefois il pro-
mit d'en parler à sa sœur : mais en son ame il con-
ceut vne haine furieuse contre Polydamas , au lieu de
l'estroite amitié qui estoit entr'eux ; & il creut , com-
me il y auoit apparence , que Polydamas ne luy auoit
tesmoigné de l'affection que pour ce dessein. Aussi les
ames basses ne laissent pas de reconnoistre leurs def-
fauts & le merite des autres au trauers des tenebres qui
les enucloppent : & au lieu de chérir la vertu de ceux
qui les surpassent , ils les haïssent & les fuyent , de peur
d'en estre maistrisez. Misandre estant de retour chez luy ,
fait le malade , & refuse de manger : on luy demande
quel est son mal , il se fasche & se despite ; il ne sçait
à qui se prendre pour descharger sa colere ; & tout
son dessein n'est que de faire le furieux & l'enrage , pour

tesmoigner à sa sœur son auersion pour son dessein. Ardanie se doutoit bien que tous les transports venoient de la declaration qui luy auoit esté faite, dont elle estoit bien aduertie, & ne sçauoit comment l'aborder en cette fureur inquiète. En fin il se couche, puis il enuoye prier sa sœur de le venir trouuer, & estant demeurez seuls, il luy dit. Hé bien, ma sœur, j'ay sceu à la fin le sujet de vos froideurs, & de tous les refus que vous avez faits des partis qui se sont presentez; j'ay trouué mes soupçons bien fondez, lors que ie ne pouuois approuuer tant de secrets avec Polydamas. Je sçay bien que c'est de vostre aduis qu'il vous fait demander en mariage: voyez si c'est vne chose que vous ayez résoluë: ie ne puis plus empescher vos desseins, & ie vous vay signer tel consentement que vous voudrez: mais assurez vous, que ie ne viuray pas deux iours apres. Ouy, ie mourray, & le feray mourir aussi, pour s'estre mocqué de moy toute sa vie, & auoir abusé de ma franchise pour me deceuoir & vous aussi. Ce fut en suite vn torrent de paroles enragées contre Polydamas & Ardanie; & apres que sa fureur eut pris quelque relasche, elle luy dit, qu'elle ne sçauoit pas pourquoy il s'emportoit ainsi; qu'elle auoit ignoré le dessein de Polydamas: mais que puis qu'il auoit de la bonne volonté pour elle, il luy faisoit honneur: qu'elle vouloit bien luy dire, que s'il y vouloit consentir, il luy feroit plaisir; ne pouuant estre iamais heureuse qu'avec luy. l'aimerois mieux, luy dit-
il, m'estre precipité, & vous auoir donné d'un poignard

dans le sein. Non, non, j'empeschera y bien l'effet de vos fantaisies, ou l'on verra bien du sang se respan- dre. Ardanie voyant que son transport luy faisoit dire d'estranges folies, le laissa, sans tesmoigner vn grand soucy de ses paroles, & ils passerent tous deux vne nuit qui ne leur donna pas beaucoup de repos. L'auois esté choisie, continua Melicerte, par ces deux Amans, pour estre leur confidente pendant les tra- uersez qu'ils auoient bien preueuës, & il leur estoit impossible de se voir apres cette declaration, Misandre ayant fermé toutes les auenuës: de sorte que le len- demain Polydamas me vint voir, pour sçauoir ce qui s'estoit passé. Je luy dis que les affaires estoient bien broüillées, & qu'il y auoit bien de la rumeur au logis; que Misandre faisoit le furieux, & Ardanie resistoit le mieux qu'elle pouuoit à sa rage.

Mais ce fut vne chose estrange que le peu de force d'Ardanie. Elle ne pût souffrir la colere de son frere, & voyant qu'il ne vouloit point manger, elle l'alla supplier de ne se point fâcher, & qu'elle ne feroit rien contre sa volonté. Je n'osois dire cette foiblesse à Polydamas, voyant à quel point de tristesse il estoit reduit, pource qu'Ardanie n'auoit point parlé avec vne si grande resolution qn'il auoit esperé. Elle d'vn autre costé voyant son frere appaisé, reprenoit ses forces, & tesmoignoit de l'affection pour Polydamas: Misandre faisoit alors l'enragé comme auparau. nt, & contraignoit sa sœur de luy ceder. Ce combat de l'amour d'Ardanie contre la rage de Misandre dura long temps, & quand celle-cy estoit refroidie, l'autre re-

prendre l'avantage. Cependant Polydamas ne voyant plus Ardanie, qui ne mettoit point en effet ce qu'elle luy auoit promis, estoit tourmenté d'une infinité d'inquietudes & d'ennuis; & plus il voyoit de facilité à executer leurs desseins, plus il auoit de douleur, de voir qu'elle ne pouuoit se resoudre à mespriser son frere. Mais pour venir aux infidelitez dont ie vous ay parlé, disoit Melicerte, qui se sont punies les vnes par les autres, ie laisseray à vous dire tous les efforts que fit Ardanie; puis les foiblesses qui la firent relascher, & toutes les plaintes & les reproches que luy fit Polydamas; qui fut toutefois si discret, que iamais il ne se plaignit d'elle qu'à elle mesme & à moy. Il auoit esté infidele à Elusine sans qu'elle le sceust, & elle luy auoit esté aussi infidele, en l'abandonnant pour se deliurer de mal-heur, bien qu'elle creust qu'il l'aimoit encore. Amour pour vanger Polydamas d'Elusine, fit qu'estant mariée elle eut son mary en tel mespris, qu'elle ne feignit point de rechercher Polydamas qui la mesprisa. Puis pour vanger Elusine de Polydamas, il fit qu'Ardanie mit en oubly la plus grande affection qui fut iamais; & ie croy que ce qui la rendir infidele, ce fut la fidelité de son miroir, qui luy representant son teint effacé par les ennuis. Hé quoy! dit-elle, ie perdray ma beauté, qui m'acqueroit tant de vœux & de loüanges, pour maintenir mon amour qui me donne tant de maux? Non non, quittons plustost cette amour, le trouble de mon ame, & la ruine de mes plus chers tresors; & l'oubliant pour iamais laissons reuenir cette Beauté,

qui pour vn Amant perdu m'en acquerra plus de mille. La voila donc qui se delibere de reuenir belle, & qui pour reprendre son embon-point, ne veut plus entendre parler de Polydamas. Je m'estonnois d'vn si estrange changement; & lors que ie luy reprochois sa legereté, elle auoit bien l'assurance de me dénier toutes les choses qu'elle m'auoit dites, lors qu'elle aimoit Polydamas; iusques-là mesme qu'elle me vouloit faire croire, que iamais elle n'auoit eu d'amour pour luy. En ce temps-là vn ieune homme nommé Cyllare la rechercha; il auoit aimé Danaïde, qui estoit vne femme à qui il estoit redevable de tout ce qu'il sçauoit de ciuilité parmy les Dames: pource qu'elle auoit pris la peine d'instruire sa ieunesse; dequoy Cyllare estant ingrat, renonça à son amitié, & poursuuiuit l'affection d'Ardanie. Amour qui s'estoit desia vengé d'Elusine & de Polydamas, se vangea d'vn seul coup de deux infidelles; assemblant par mariage Cyllare avec Ardanie pour les punir l'vn par l'autre. Cette Belle qui estimoit ses charmes si puissans, ne pût arrester ce volage; qui ne fut pas plustost marié, qu'il retourna deuers Danaïde, & sans songer aux desplaisirs qu'il donneroit à sa nouvelle espouse, rechercha de rentrer en ses bonnes graces par toutes sortes de moyens. Danaïde pour se vanger, se mocqua long temps de luy, dequoy il receuoit tant d'ennuis qu'il ne pouuoit les cacher deuant Ardanie. Elle d'vn autre costé se voyant méprisée, se mit à regretter son fidele Polydamas, qu'elle auoit abandonné; de sorte qu'estant tous deux
dans

dans le lit, ils s'esloignoient le plus qu'ils pouuoient l'un de l'autre & souspiroient chacun à part, l'un pour Danaïde, l'autre pour Polydamas. Mais depuis quelque temps, Cyllare a trouué moyen de renoüer avec Danaïde, & c'est ce qu'Ardanie me contoit à present, disoit Melicerte, au moins elle a cette opinion, soit que cela soit vray, ou que sa ialousie luy fasse croire qu'il soit ainsi. Voyez, Lepante, me dit-elle, quel repos Ardanie peut esperer à present: car soit que son mary se trouue en grace ou en disgrâce auprès de Danaïde, elle en reçoit vne egalle affliction: elle se desespere de le voir soupirer pour elle; d'autre costé elle se meurt, lors que Danaïde le rend heureux; & en quoy ie la trouue bien malheureuse, c'est que plus elle s'afflige, plus elle se met en estat de ne pouuoir plus regagner l'affection de Cyllare. En fin tous ces desplaisirs luy ont causé la perte de cette beauté qu'elle auoit tant chérie, & pour laquelle elle auoit quitté celuy qui auoit eu tant d'amour pour elle. Polydamas la rencontrant par hazard ces iours passez, & voyant ce beau visage si changé, a fait des vers sous vn autre nom, qu'il m'a enuoyez; & ie m'assure, Lepante, adioustâ Melicerte, que vous les trouuerez assez gentils. Elle les tira de sa poche, & me les monstra, & i'en pris vne copie, que j'ay encore à present. Lepante la fit voir à Melinte & aux autres, & il y auoit ainsi.

*Philis que vous estes changée :
Que sont deuenus tant d'appas ?*

*Ah ! que mon amour est vannée :
 Mes yeux ne vous connoissent pas.
 Vostre beauté veut-elle au changement
 Imiter vostre iugement ?*

*Helas ! vous n'avez plus de charmes
 Pour rendre quelqu'autre amoureux.
 Vos yeux sont priuez de leurs armes ;
 Ils ne sont plus si dangereux.
 Leurs traits si vifs ont perdu la vigueur
 De passer iusques dans le cœur.*

*Lors que vous bannistes la flamme
 Dont vostre esprit estoit atteint,
 Sortant de fureur de vostre ame
 Elle deuora vostre teint.
 Ce teint si doux n'estoit pas assez fort
 Pour resister à cét effort.*

*Vostre beauté me fut fidelle,
 Quand vostre ame n'eut plus de foy :
 Voyant que ie mourois pour elle,
 Elle ayma mieux mourir pour moy.
 Sa belle fleur, passant si promptement,
 Fut constante en son changement.*

*Helas ! disoit l'ame affligée,
 Beauté, pourquoy nous quittez vous ?
 Cét Amant m'a trop obligée,
 Luy respondit-elle en courroux ;*

*Si vous changez pour le faire mourir,
Le veux changer pour le guerir.*

Lepante repliant ces vers , reprit. Melicerte auoit ainsi finy cette histoire , que i'auois escoutée fort attentiuement , songeant continuellement à Cyllenie ; à laquelle toutefois ie ne pouuois souhaitter qu'elle se trouuast punie de mesme sorte , ayant tousiours gardé pour elle vn si cher souuenir , que bien souuent lors que ma memoire la representoit à mon imagination , & qu'elle me la faisoit voir comme infidelle , il sembloit que i'en destournois la veuë ; mais i'auois vn regret de vouloir en mesme temps & ne vouloir point penser en elle. C'est ainsi que i'ay tousiours vescu pendant mes ennuis , que Melicerte seule estoit capable de soulager par ses agreables recits. Mais à la fin ie pensay que c'estoit trop long temps negliger le bonheur que les Dieux m'auoient promis : ie songeay à partir ; & ayant trouué la commodité d'vn vaisseau , ie pris congé de Menandre , de Chatés & de Melicerte , & estant en mer nous fusmes rencontrés par Eurymedon. Ses compaignons ayant tué quelques vns de ceux qui estoient avec nous , ie m'attendis à recevoir la mort de leur main , & ie crûs que c'estoit le soulagement à mes maux que les Dieux m'auoient promis , ne pouuant m'en imaginer vn autre. Cela fut cause que ie me presentay sans armes avec beaucoup d'assurance deuant leurs esprits. Ils s'estonnerent de me voir si resolu de mourir ; & Eurymedon qui me vit en cette action , creut que c'estoit par

grandeur de courage : de sorte qu'il me sauua , & m'embrassant me tesmoigna qu'il vouloit que ie fusse son amy. Depuis ie fus present lors que les Corsaires alerent attaquer le braue Melinte ; & ie fus si heureux que de rendre à Eurymedon ce qu'il m'auoit presté, obtenant de Melinte qu'il ne le tuast pas. En fin suivant vne troupe si courageuse , i'ay trouué entre mes bras ma chere Cyllenie, aussi pure, aussi belle, & avec autant d'affection pour moy que iamais , & par le plus estrange hazard que la fortune puisse produire. C'est dequoy ie m'estimeray toute ma vie redevable à la belle Epicharis , que i'appelleray desormais ma Sybille : & bien que l'on puisse attribuer cette rencontre à la fortune, ie croy plustost que les Dieux luy font extrêmement amis; qui m'ont voulu rendre bienheureux par son entremise. Lepante finit ainsi , & chacun ayant admiré ces rencontres ; Melinte le pria qu'ils iurassent ensemble vne eternelle amitié , tant à cause de sa vertu , que de ce qu'il estoit frere de la sage Eriphile. Ils se conterent alors toute leur vie ; & les rencontres que tous ceux de la troupe auoient eües, leur fournirent assez d'entretien pendant leur voyage iusques en Epire, où ils descendirent. Eurymedon prit congé de Melinte & de toute la troupe avec mille embrassemens, pour aller retrouver les pyrates ; & il les assura qu'il repasseroit au mesme lieu , pour les voir auant que d'aller en l'Isle de Lesbos avec ses forces; & que s'il ne les trouuoit point, & qu'ils eussent besoin de son seruice , ils auroient de ses nouuelles en l'Isle , qui estoit le lieu de ses plus chers desirs. Il

entra dans son vaisseau avec ce qui restoit de ses compagnons ; & Melinte, Ariane, & tous leurs amis, allerent dans Nicopolis, qui est la premiere ville de l'Epire, avec esperance d'y demeurer sans crainte de leurs ennemis, & d'y iouir de tous les contentemens qu'ils se pouuoient promettre.

Fin du dixiesme Liure de l'Ariane.





ROMA
VITTORIO EMANUELE



LE



VNZIESME

LIVRE DE

L'ARIANE.



A fortune qui auoit donné tant de trauerſes à ces Amans, ſembloit eſtre laſſée de les trauailler; & ils ſe reſolurent de donner fin à leurs peines. Melinte deuoit le lendemain eſpouſer Ariane, & Lepantè Cyllenie: Palamede s'offroit de retourner à Corinthe vers ſon oncle, feignant de reuenir encore de ſon voyage d'Athenes; & faiſant l'ignorant de tout ce qui eſtoit arriué, deuoit taſcher à l'appaiſer, & en ſuite Sebaſte pour Cyllenie, & de moyenner ainſi leur paix & leur retour. Lepante auoit trouué ſes gens dans cette ville, qui l'attendoient au meſme lieu où il les auoit laiſſez, lors qu'il partit de l'Epire pour paſſer en Italie. Ils eſtoient logez aſſez commodément: de ſor-

te qu'ils choisirent tous cette maison, pour estre le lieu heureux, où tant de beaux & de violens desirs deuoient receuoir vne entiere satisfaction. Melinte estoit si rauy de se voir à la veille de gouster tant de delices, qu'il ne pouuoit luy mesme mesurer la grandeur de sa ioye : mais plus Ariane approchoit du comble de ses souhaits, plus sa modestie faisoit d'effort pour reprimer les tesmoignages de son contentement. Lepante & Cyllenie ne sentoient pas moins de douceurs en leur ame. Amyntas se promettoit que son bon-heur suiuroit celuy de Melinte, duquel il esperoit beaucoup de secours auprès de Telephe : & Erycine deuoit estre satisfaite de luy, pour luy auoir si bien obeï lors qu'elle luy auoit comandé de seruir Melinte. Il n'y auoit que Palamede, à qui l'amour pour Epicharis donnoit assez de desir & d'impatience : mais la sagesse de cette fille le moderoit, laquelle cognoissant qu'il feroit vne grande faute de l'espouser, estant esclau, luy en auoit deffendu l'esperance, tandis qu'elle seroit en cette condition. Palamede toutefois en cette occasion ne pouuant souffrir de voir tant de personnes heureuses, & d'estre si reculé de iouïr des mesmes plaisirs, luy dit. Belle Epicharis, iusques à quand voulez vous remettre à satisfaire la passion que i'ay pour vous ? desirez vous que i'attende vn temps infiny, & que ie demeure cependant auprès de vous le plus mal-heureux des hommes ? ne craignez point que ie fasse rien indigne de moy en vous elpousant ; vostre merite recompense assez le deffaut de vostre liberté ; & mon oncle ne pourra pas refuser de vous la rendre, quand vous serez mon espouse. Quelle occasion plus fauorable pouuons nous esperer ? Maintenant que toutes choses sont icy en desordre,

fordre , si nous faisons quelque faute à peine sera-t'elle
considerée. Pouuez vous faillir imitant les actions d'A-
riane & de Cyllenie ? & faut-il que ma condition , que
vous iugez plus releuée que la vostre, soit la seule chose qui
me rende miserable ? Palamede, respondit Epicharis, si
vous pouviez iuger combien i'estime vous estre obligée
de vostre affection, ie vous croy si raisonnable que vous
auriez sujet d'estre satisfait de moy : mais pardonnez moy
si ie ne puis consentir à ce que vous souhaitez. Je con-
nois bien la difference de nos affections. C'est vne pas-
sion vn peu auetugle qui fait que vous m'aimez , & c'est
la raison seule qui est cause que ie vous honore. Vous
ne confidez pas bien ce que ie suis , quand vous me
tesmoignez tant d'amour ; & vous destournez sans dou-
te la pensée d'vn deffaut qui m'accompagne , lors que
vous m'estimez digne de vous : au contraire plus i'ou-
ure les yeux pour voir ce que vous valez , plus ie trou-
ue de sujet de vous aimer , & plus i'estime vous estre re-
deuable. Mais vous aimant avec raison , i'aime vostre
honneur autant que vostre personne , & il faudroit que
i'en eusse peu de soin , si ie me rendois heureuse à son
preiudice. Ce qui est bien seant & à la belle Ariane & à
Melinte, ne l'est pas à nous ; & la mesme raison qui leur
permet de se marier contre le desir de Dicearque, est cel-
le qui m'ordonne de demeurer encore fille contre le
vostre. Palamede, ie vous supplie de moderer vos desirs ;
& assurez vous que si les Dieux ont nos affections agrea-
bles, ils feront en sorte que l'honneur & la bien-seance
ne seront point separez de nos contentemens. C'estoit
ainsi que cette fille pleine de sagesse & de courage , arre-
stoit les transports de l'amour de Palamede , lequel plus il

se trouuoit esloigné de contenter ses desirs, plus il admiroit la vertu & la generosité d'Epicharis, & en augmentoit sa passion. Melinte fit apporter de son vaisseau beaucoup de richesses dont il l'auoit pourueu pour rendre ce iour le plus celebre & le plus magnifique qu'il pourroit en vn lieu esloigné de leur connoissance. Il en fit tirer beaucoup de meubles somptueux, de la vaisselle d'or & d'argent, & tout ce qu'il auoit iugé necessaire pour se faire voir digne d'Ariane, si Diccarque le receuoit en grace à Corynthe. Ariane & Cyllenie qui deuoient estre le plus bel ornement de ce iour heureux, ne manquerent pas de preparer pour le lendemain tout ce qui pouuoit faire parestre leur beauté plus esclatante : mais rien ne pouuoit rendre leurs charmes plus rians, que l'excès de leurs contentemens, qui ne se pouuant plus contenir dans leurs cœurs, venoient se descouurir sur leurs visages. Chacun apportoit le plus de soin qu'il pouuoit, pour n'estre pas sans pompe & sans grace; & en fin ce matin arriua si desiré de tous.

Lors que toutes choses furent prestes, & qu'ils se voulurent mettre en chemin pour aller au Temple, on entendit des trompettes sonner dans la ville. Ariane creut que Melinte les auoit fait venir de son vaisseau pour la conduire au Temple avec plus de solemnité : mais pour luy il en demeura estonné, & ayant enuoyé sçauoir ce que c'estoit, on luy rapporta que l'on venoit de faire vn cry public, par lequel on ordonnoit à tous ceux qui estoient sujets de l'Empire, de se saisir de Melinte & de Palamede Siciliens, en quelque lieu qu'ils fussent trouuez, & d'enuoyer leur testés à Rome; pource qu'ils estoient ennemis de Cesar & du peuple Romain; & pour les pou-

voir connoistre on en donnoit toutes les marques.

Ces cruelles nouuelles troublerent toutes leurs ioyes, & remplirent leurs ames d'estonnement & de tristesse. Ils n'osèrent plus sortir de peur d'estre reconnus; & ils ne sçauoient quel conseil prendre dans vn tel excès de mal-heur. Lors qu'ils fuyoient la fureur de Dicearque, les voila tombez dans vne bien plus grande misere, ayant les Romains pour ennemis, de qui l'Empire estant d'vne si grande estenduë, ils ne pouuoient esperer d'en sortir sans estre reconnus sur les chemins. Ils fermerent leur maison le plus soigneusement qu'ils peurent, attendant qu'ils peussent penser à quelque remede, encore qu'ils eussent peu d'esperance d'en trouuer. Ariane se mit aux pleurs de voir vne persecution si cruelle contre son cher Melinte & son frere; Cyllenie accompagnoit ses larmes par compassion; les autres taschoient à fortifier le courage de ces Belles contre ce mal-heur: mais ceux qui se mesloient de les consoler n'estoient pas moins affligez qu'elles. Lepante & Amyntas s'offrirent d'aller sçauoir ce qui se disoit par la ville: mais pource qu'ils estoient estrangers en ce lieu, on auoit peur qu'ils ne donnassent quelque soupçon de ceux qui demeuroident au mesme logis. Tout ce iour se passa avec beaucoup de tristesse & de crainte, & le lendemain encore sans qu'ils peussent trouuer aucun expédient.

Epicharis qui auoit l'esprit plein de mille inuentions, leur dit, qu'elle voyoit bien qu'il n'appartenoit qu'à elle de leur sauuer la vie, comme elle auoit desia fait dans Rome: qu'elle vouloit aller parmy la ville pour voir ce qui se passoit; & pour ce sujet qu'il falloit qu'elle se disguised en homme, pource que cét habit estoit fatal pour

leur salut. Toutefois qu'ils ne s'assurassent point tellement en les inuentions, qu'ils n'essayassent encore à trouuer quelque autre moyen. Melinte dit qu'il n'entrouuoit point de meilleur, qu'd'enuoyer quelqu'un en Corcyre, pour aduertir Eurymedon du danger qu'ils couroient; afin qu'en passant avec ses forces il les deliurast. Amyntas voulut y aller pour leur rendre ce seruice, & ne voulant point prendre leur vaisseau, de peur qu'ils n'en eussent besoin, il partit dans vn esquif, & alla en l'Isle. Epicharis ne feignit point d'un autre costé de se faire couper encore les cheueux; & s'estant accommodée d'un habit d'homme, avec vne espée à son costé, sortit vn matin du logis; ayant dessein d'aller gagner le portier de la ville, pour les laisser sortir la nuit. Elle s'estoit desfiée de la conduite d'un autre en cette occasion, craignant qu'il donnast du soupçon, & estant pris qu'il ne les descouurist: Mais elle estoit assurée de la souplesse de son esprit, & ne doutoit point de son courage, au cas qu'elle fust prise, pour ne dire iamais où ils estoient. Son dessein réussit heureusement, car apres auoir sondé ce portier de toutes façons, elle trouua que c'estoit vn homme qui pour peu d'argent eust fait entrer mesme les ennemis dans la ville. Elle luy mit quelques pieces d'or dans la main, & le pria qu'il les attendist sur le minuit: de là elle alla à leur vaisseau pour donner ordre que tout fust prest à la mesme heure, afin qu'ils ne manquassent point à partir. Mais lors qu'elle fut au port, il y eut vn ieune homme qui se mit à crier en la voyant: Voila mon esclaue fugitif, mes amis, prestez moy secours que ie l'arreste. Incontinent il voulut mettre la main sur elle; mais Epicharis se reculant d'un pas, mit l'espée à la main, & luy en donna vn coup sur le bras.

Toutefois elle fut aussi tost arrestée, & menée deuant des Romains qui venoient d'arriuer. Ce ieune homme ayant le bras sanglant, ne laissa pas de venir au mesme lieu, & pria ces Romains de ne laisser point aller son esclau qui se nommoit Eurylas, & qu'il luy fust rendu. Alors Epicharis connut que c'estoit le fils du Geolier de Rome, auquel elle s'estoit vendue autrefois : mais sans s'estonner, elles'adressa à celuy qui sembloit auoir le plus d'autorité, & luy dit. Le vous say iuge du differend qui peut estre entre cet homme & moy, & ie m'assure qu'il se condamnera luy-mesme ; puis elle se tourna deuers luy, & luy dit ; ie confesse que ie me suis vendu à vous ; mais ne fut-ce pas à condition que ie me pourrois racheter pour le mesme prix ? Il est vray, respondit-il : Elle poursuiuit. Lors que vous me voulustes donner l'argent, dont nous estions demeurez d'accord, ne vous le laissay-je pas pour me le garder ? Il est vray, dit-il encore. L'ay donc pû, continua-t'elle, m'en aller d'avec vous quand bon m'a semblé, puisque vous auez le mesme prix entre vos mains, pour lequel ie me puis racheter. Ce ieune homme demoura sans repartie ; & celuy deuant qui cette cause se plaidoit, dit qu'Eurylas auoit raison, & qu'il s'en pouuoit aller libre. Epicharis fit vne reuerence, & prit congé d'eux : mais ce ieune homme reuenant de son estonnement, s'escria : Ne laissez pas de l'arrester, pource que ce fut luy qui fit sauuer de nos prisons Melinte & Palamede. On se saisit ainsi pour la seconde fois de la pauvre Epicharis qui s'en alloit ; & elle fut ramenée deuant celuy qui l'auoit iugée, qui se nommoit Trebace. Il y auoit auprès de luy vn ieune Romain dont le visage pareissoit fort delicat, qui dit. Sans doute il nous apprendra des nouuel-

les de ceux que nous cherchons : entrons dans cette ville, & faisons tout environner de soldats, de peur que rien ne puisse escapper. Epicharis fut outrée de douleur, lors qu'elle vit cette resolution, & accusa son extrême mal-heur, pour le regret qu'elle eut d'auoir si bien acheminé iusques-là son dessein, & la crainte qu'elle seroit peut estre cause de la mort de Melinte & de Palamede. Toutefois elle dissimula le mieux qu'elle pût le trouble où elle estoit, pour ne donner point de soupçon par vn estonnement; & connoissant que l'on sçauoit assurément dans Rome que Melinte & Palamede estoient viuaus, tant à cause du cry qui s'estoit fait, que pour voir le fils du Geolier qui parloit ainsi, & les autres qui les cherchoient, elle leur dit. Je suis seul de ma connoissance dans ce païs, & ie ne sçay aucunes nouuelles de Melinte ny de Palamede, avec lesquels ce Geolier m'auoit ensemé dans vne chambre de la prison. Je vous confesse bien que lors qu'ils se sauuerent par la cheminée, & de là par le haut de la tour, i'estois endormy, & ie croy mesme qu'ils m'auoient assoupy de quelque façon : mais à la fin estant éveillé & ne les trouuant plus, pour ce qu'ils auoient laissé de la lumiere dans la chambre, ie me trouuay bien estonné, & ie ne sçauois si ie deuois aller aduertir qu'ils s'estoient sauuez : en fin ayant peur d'estre accusé de leur fuite, pour n'en auoir pas eu assez de soin; ie me resolus de me sauuer comme eux par les mesmes moyens. Mais estant descendu par la corde, vn creneau de la tour s'abbattit qui faillit à m'accabler : m'estant démessé de ces ruines, ie m'en allay le plustost que ie peus, & ie n'ay iamais eu depuis de leurs nouuelles. Elle entretenoit de ces raisons Trebace, & ceux qui l'accompagnoient, en entrant dans

la ville : mais bien qu'elles eussent quelque vray-semblance, l'on ne s'en contentoit pas encore. Trebace enuoya deuers ceux qui estoient dans vn autre vaisseau, pour les aduertir qu'ils descendissent; & qu'ils auoient esperance d'auoir en ce lieu des nouuelles de ceux qu'ils cherchoient. Cependant ils s'allerent reposer dans le plus apparent logis qui fust on toute la ville, comme estant venus de la part de l'Empereur. Epicharis en mesme temps estoit interrogée de tous costez, & satisfaisoit le mieux qu'il luy estoit possible à toutes les demandes qu'on luy faisoit: mais en fin ceux de ce second vaisseau attruerent, entre lesquels elle fut bien estonnée de recognoistre Dicearque & Pisistrate: alors elle se iugea perduë. Dicearque s'approchant d'elle; dit en la regardant fixement. Si ie ne me trompe, c'est icy Epicharis desguisée; & ce n'est pas la premiere fois qu'elle a pris cét habit: Elle auoit bien eu l'assurance d'entrer ainsi dans la prison, & de faire sauuer ceux que vous cherchez; & ce Geolier a eu raison de la recognoistre. Chacun demeura estonné de la resolution & de l'esprit de ceste ieune fille. Mais, continuer-il, en s'adressant à elle, si vous n'estes l'esclau de ce-luy-cy, au moins, ma mignonne, ne pouuez vous pas nier que vous ne soyez la mienne. Vostre esclau, respondit-elle en se reculant d'un pas, & le regardant avec mespris, ie ne la suis point: mais bien d'Ariane vostre niece, à qui vous m'avez donnee. Non, non, reprit-il, vous estes mon esclau, & par le droit que j'ay sur vous de la vie & de la mort; ie vous commande de me dire où sont Melinte & Palamede, que l'Empereur fait chercher. Va, repartit-elle, bourreau de ton sang, qui ne crains point de sacrifier ton neveu pour satisfaire à ta vengeance con-

tre Melinte : Va , furieux & enragé , qui veux perdre le seul espoir de ta maison , pour plaire à ta passion brutale : Assure-toy que les Dieux te puniront. Ouy , ie te confesse que ie sçay bien en quelle terre ils sont à present : mais sois certain que ie ne le diray iamais , ny à quel dessein ils m'ont enuoyée par mer en Epire : & ie feray voir aux plus cruels bourreaux , que i'ay plus de constance encore que tu n'as de rage. Dicearque rougit oyant ces sensibles reproches , & ne luy pût respondre : toutefois Trebace ne laissa pas de commander que l'on la mist aux fers , iusques à ce qu'elle eust déclaré ce qu'elle sçauoit. Epicharis luy respondit en sortant de sa presence , qu'il s'attendist donc à demeurer long temps en ce lieu , ou de la faire bien tost mourir. Elle fut ainsi conduite dans vn lieu obscur , & en y allant elle vit vn de ceux qui la menoiert qui se fit connoistre à elle. C'estoit Arcas le fidelle affranchy de Melinte , qui luy dit à l'oreille. Fais-moy sçauoir où sont ceux que l'on cherche , afin que ie les aille aduertir de se sauuer s'il est possible. Elle luy dit le lieu si habilement , que l'on ne s'apperceut point de ce secret , pource que l'on ne se desioit point d'Arcas : lequel incontinent qu'Epicharis fut enfermée , s'eschappa d'entre ceux de cette troupe ; & alla trouuer Melinte. & ceux de sa compagnie , qui ne sçauoient rien de tout ce qui s'estoit passé. Melinte fut bien content de reuoir son cher Arcas , & en esperâ beaucoup de secours en la nécessité où ils estoient : Mais il fut bien estonné , lors qu'il apprit qu'Epicharis estoit prise , & qu'elle auoit esté reconnüe par Dicearque & Pisistratte , qui estoient arriuez en cette ville , avec des Romains qui cherchoient de la part de l'Empereur à les
faire

faire mourir. Arcas leur dit qu'Epichatis tesmoignoît assez de resolution pour ne dire iamais le lieu où ils estoient; qu'elle leur auoit voulu faire croire fort adroitement, qu'ils estoient en vne terre bien estoignée, & qu'ils l'auoient enuoyée en ce lieu par mer à quelque dessein; mais qu'il voyoit peu d'esperance d'eschapper, pource que toute la ville estoit enuironnée de soldats: Toutes ces cruelles nouuelles accablerent de douleur leurs esprits, qui estoient desia bien auant dans la crainte. Helas! disoit Ariane, il semble que la furie de nostre mal-heur assemble des forces de tous les costez de la terre, pour nous oster tout espoir de salut. Quel crime, bons Dieux, auons nous commis, pour permettre que les hommes nous poursuiuent avec tant de rage? & de qui pouuons nous esperer du secours, puisque celuy mesme qui nous seruoit de pere est le plus animé pour nous perdre? Helas! que ie suis mal-heureuse de viure. Sans moy, Melinte ny mon frere ne seroient pas à present icy; & sans moy, mon oncle ne poursuuiroit pas ainsi leur vie. Iustes Dieux, si ie suis cause de leur mal-heur, faites donc que seule ie sois aussi punie: donnez fin à ma vie qui leur est si fatale, & par mon sang appeaisez vostre courroux. Mais quoy? mon sang est trop peu de chose, pour esteindre tant de colere: vous ne voulez pas qu'un seul de nous eschappe. Hé bien, Dieux, ne differez point de nous faire perir. Sommes nous si puissans & si redoutables, qu'il faille amener tant de gens contre si peu de personnes? Amassez icy toutes les forces de l'Empire; ioignez nos amis mesmes à nos ennemis: souleuez encore contre nous tout le reste de la Terre avec le Ciel & les Enfers. La valeur de Melinte & de mon frere est donc bien redoutable. puis qu'elle se fait

craindre mesme de vous; & que vous auez besoin de l'a-
mas de tant de puissances pour les vaincre. Ariane dans sa
douleur, iettoit contre le Ciel toutes ces p'aintes; &
si elle eust creu quelque chose de plus reuere encore que
les Dieux, qui eust le pouuoir de conduire les res-
sorts de la forrune; dans le transport où elle estoit,
elle n'eust point eu de crainte de l'attaquer. Melinte la
consoloit le mieux qu'il luy estoit possible, & luy disoit
qu'ils estoient encore tous en estat ou de se sauuer par
artifice ou de se deffendre par valeur. Au pis aller, que
la mort n'estoit pas vne chose si mal-heureuse; & qu'il y
auoit dans la vie des choses bien plus à craindre: sur tout
qu'il la prioit de ne point accuser les Dieux de leur mal-
heur. Il se faut garder, disoit-il, d'offenser ceux de qui l'on
peut attendre du secours. Ils nous ont tirez de plus grands
perils; & s'ils permettent à present que nous soyons re-
duits à vne telle extremité, c'est peut-estre afin que nous
reconnoissions que nous ne tenons nostre salut que
d'eux. Melinte taschoit ainsi d'adoucir les ennuis de sa che-
re Ariane, de qui la douleur luy estoit plus insuppor-
table que son mal-heur mesme. Lepante employoit aussi
tout l'art de son eloquence, & toute la force de sa vertu,
pour trouuer du remede, ou au moins de la consolation
au danger où ils estoient. Il n'y auoit que Palamede qui
estoit transporté de fureur, de sçauoir de quelle sorte Epi-
charis estoit traittée, & qu'elle estoit en hazard de sa vie;
& il vouloit partir à l'heure mesme pour trouuer les mo-
yens de la deliurer. Quoy, disoit-il, que ie la laisse mourir
afin qu'elle me fasse viure? & que ie sois si lasche que
de garentir ma vie par la perte de la sienne? Je tueray
plustost tous ceux qui la retiennent, & mon Oncle mes-

me. Rien n'est capable de résister à mon amour & à mon courage quand ie l'auray entrepris. Il faisoit ainsi plusieurs menaces dans sa fureur, & rien ne luy sembloit impossible: mais il estoit retenu par les autres, qui luy representoient qu'en sortant il les mettroit tous en danger: qu'il falloit vn peu consulter ce qui estoit à faire; & que s'il en falloit venir à la force, il viendrait bien mieux à bout de son dessein, quand il seroit assisté de toute leur troupe. Ces considerations appaiserent vn peu l'agitation de son esprit; & le soin que l'on prit de luy le mit hors d'espoir d'eschapper de leurs mains. Cependant Melinte & Lepante demandoient à Arcas qui estoient ceux qui auoient interrogé Epicharis, & qui estoient descendus au port auant Dicarque; pource qu'il estoit besoin de sçauoir tout, & comment il s'estoit rencontré avec eux, afin que sur cela ils peussent voir de quels ennemis ils auoient à se deffendre; & quel remede ils pourroient trouuer aux mal-heurs qu'ils menaçoient. Arcas leur dit que le recit qu'il auoit à leur faire sur ce sujet estoit vn peu long; qu'il falloit qu'il retournast deuers ceux avec lesquels il estoit venu, afin qu'ils n'entrassent point en soupçon de luy s'ils ne le voyoient point; mais qu'il reuiendrait incontinent, & passeroit la nuit avec eux: mesme qu'il vouloit apprendre la resolution qui auoit esté prise depuis qu'il auoit quitté Epicharis. Ils le laisserent aller, & l'ayant attendu avec beaucoup d'impatience, il reuint sur le soir: & apres qu'ils eurent vn peu mangé, il les assemble tous en vn lieu, où s'estant mis au milieu d'eux, il commença ainsi ce qu'il auoit à leur dire.



HISTOIRE D'ARCAS, de Trebace, & d'Emilie.



L faut bien confesser que l'on ne perd iamais vn bien-fait , & que quand l'on sçait reconnoistre vne obligation receüe , on en attire ordinairement vne seconde : car sans le soin que prit Melinte mon Maistre de m'enuoyer à Rome avec des presens pour Maxime , qui le peussent recompenser des pertes qu'il auoit souffertes à nostre occasion , ie ne serois pas à present icy pour vous aduertir de ce qui se prepare contre vous , & pour vous secourir dece qui me sera possible.

Lors que i'arriuai à Rome ie m'enquis où demeuroit Maxime , pource que son logis qui auoit esté consummé par le feu , n'estoit pas encore réparé. Je le sceus en fin , & ayant esté receu de luy plus courtoisement que ie n'esperois à l'abord , il apprit avec beaucoup de ioye de vos nouuelles ; pource qu'il auoit creu iusques-là que vous estiez morts , & accepta avec grande difficulté les presens que ie luy apportois ; les estimant , disoit-il , trop riches pour le peu de seruice qu'il vous auoit rendu. Je luy demanday s'il ne se disoit rien de vous ; il me dit , qu'il n'en auoit ouï parler en aucune façon : mais deux iours apres on nous vint rapporter , qu'il s'estoit fait vn cry public , par lequel il estoit ordonné que Melinte &

Palamede qui s'estoient eschappez des prisons de Rome, fussent tuez en quelquelieu qu'ils seroient trouuez: pour ce qu'ils estoient ennemis de Cesar & du peuple Romain. Cette nouuelle me transist d'effroy: aussi tost ie priay Maxime d'aller au Palais de Neron pour sçauoir de quelle sorte il se parloit d'eux. Il me rapporta qu'il auoit appris que Trebase Tribun des gardes de l'Empereur auoit commandement d'aller avec trois compagnies de soldats, chercher Melinte & Palamede à Syracuse, & par tout ailleurs où l'on croiroit les trouuer, & qu'il equippoit vn vaisseau à ce dessein.

Bien que j'eusse vn grand trouble en l'esprit, ie ne laissay pas de penser à ce que ie pourrois faire pour vous seruir: ie me resolus de me faire vn des soldats des gardes de Neron, & d'entrer dans les compagnies qui deuoient suiure Trebase. Maxime me donna connoissance d'vn Centurion, auquel ie fis vn present honneste: incontinent il me receut, & me fit prestre beaucoup d'affection. Je fis la reuerence à Trebase, qui me trouuant prompt à seruir, me regarda assez fauorablement, & commença à prendre confiance en moy; il me fit en suite plusieurs fois des commandemens, & en fin il me donna la charge de Marechal des logis de ma compagnie.

Lors que nous nous embarquâmes ie remarquay auprès de luy vn ieune Romain fort beau, auquel il portoit vn grand respect, & de qui il auoit vn extrême soin: il auoit vn armet en teste qui luy donnoit de la grace, & ie voyois que toutes ses actions estoient accompagnées d'vne grande delicateffe. Je m'imaginois auoir veu son visage autrefois; mais ie ne pouuois dire

quel il estoit. Trebace m'auoit donné charge de prendre garde à quelques hardes , parmy lesquelles ie m'estois couché pour les garder plus seurement. Ce ieune Romain vint s'asseoir auprès de moy sans me voir , pource que j'estois couché. Trebace qui ne le perdoit point de veü , vint incontinent auprès de luy ; & ne croyant pas qu'il y eust personne qui les vist ny qui les peust escouter , il mit vn genouil en terre deuant luy , & prenant sa main , luy dit. Il semble que vous me fuyez , & quelque soin que ie prenne pour vous seruir , ie ne remarque en vous que froideur pour moy , pour ne pas dire mespris. Trebace , luy respondit-il , excusez la violence des pensées qui m'occupent : ie ne laisse pas de bien reconnoistre la peine que vous prenez de me satisfaire ; & ie sçauray bien vn iour vous tesmoigner combien vous m'obligez. Ah ! Madame , dit-il. Ie fus bien estonné , poursuiuit Arcas , d'entendre ce mot , n'ayant point encore iugé que ce fust vne femme. Cela me fit escouter plus attentiuement. Ah ! Madame , dis-je , continua-t'il , qu'avez vous donc ordonné de moy ? & s'il arriuoit que ie ne peusse trouuer ce que vous cherchez , serois-je tousiours miserable ? Trebace , respondit-elle , apportez-y le plus grand soin que vous pourrez : car assurez vous que ie ne vous rendray iamais content que ie ne sois vangée. Ah ! dit-il , que vous m'estes cruelle. Que voulez vous , Trebace , reprit-elle , vne passion empesche l'autre ; tandis que j'auray la vangeance dans l'esprit , ie n'y puis auoir de l'amour. Mais , repartit-il , ne puis-je point sçauoir quel sujet vous avez d'vne haine si grande contre Melinte ? obligez moy en me le disant

de prendre part à vostre passion , afin que ie v^{ous} oblige puis apres de prendre part à la mienne. Dites moy, belle Emilie , ce que Melinte vous a fait. Quoy ! c'estoit Emilie, interrompit Melinte. Hé! n'est-elle pas morte? C'enom reprit Arcas, me surprit bien autant que vous, & ie me remis aussi tost en la memoire que c'estoit elle mesme qui s'estoit desguisée d'un habit d'homme. Cela me fit apprehender d'estre reconnu par elle ; toutefois n'estant point tombé iusques-là dans cet accident, ie me resolu d'euer sa presence le plus que ie pourrois : puis ie me fiois au changement qui estoit en moy ; pource qu'elle ne m'auoit connu qu'estant esclave & rase , & depuis que ie fus affranchy par vous , i'auois laissé croistre mon poil qui me changeoit entierement. Il est donc bien vray , reprit Melinte tout estonné, qu'elle est viuante! Laissez moy, respondit Arcas, pour suiure le reste; & vous sçaurez si c'est elle mesme. Ah ! Dieux, dit encore Melinte , il ne restoit plus que de faire ressusciter les morts contre nous , & ie ne croy pas qu'il y ait aucune chose à present qui n'ait coniuré nostre ruine. Arcas poursuuiuit ainsi. Emilie respondit à Trebace : Puisque vous desirez sçauoir le sujet que i'ay de haïr Melinte, ie veux bien vous donner cette satisfaction , si vous en pouuez receuoir quelqu'une , d'apprendre combien i'ay eu d'amour pour luy : car il faut que ie vous confesse, que c'est le seul homme qui a eu le pouuoir de faire naistre cette passion en moy. Mais il m'a bien fait payer avec usure le temps que i'auois differé de la receuoir dans mon ame ; & il a bien vangé sur moy les mespris que i'auois faits iusques-là de vous & de quelqu'autres. Sçachez, continua-t'elle, que ce traistre se glissa dans mon esprit

par vne apparence tres-grande de vertus & de merites; obseruant vne modestie dissimulée, qui sçait cacher aussi souuent le vice que la vertu. Je ne nie pas qu'il n'ait des qualitez qui le rendent admirable; mais il faut de necessité qu'il ait vne presomption, qui luy persuade qu'il n'y a rien au monde digne de luy: d'un autre costé, il affecte vn si grand mespris de la gloire & des louanges, qu'on a de la peine à croire qu'il ait de la vanité. Je vous iure que depuis que j'ay sujet d'estre son ennemie, songeant à toutes ses qualitez, ie ne sçay ce que ie dois penser de luy: car s'il estoit vertueux, pourquoy me tesmoignoit-il de l'amour sans en auoir? & s'il n'estoit pas, pourquoy refusoit-il les offres de ma bonne volonté? Il me tesmoigna donc de l'amour; & ie l'aimay. Depuis ayant esté blessé deuant mon logis, & laissé pour mort, ie le fis porter chez moy; où ie l'assistay avec plus de passion qu'une mere n'eust peu faire le plus cher de ses fils. Cet insensible commença de receuoir mes devoirs & mes assistances avec froideur & desdain; & ie recognoissois que ma presence luy estoit tousiours ennuyeuse. Du commencement ie croyois que la douleur de ses blessures causoit sa mauuaise humeur, ou que c'estoit l'ennuy d'une longue maladie: mais depuis qu'une certaine Ariane sœur de Palamede vint de Sicile, quelque mal qu'il eut, il ne parla plus que de se retirer d'auprès de moy pour l'aller trouuer. Je reconnus alors qu'il ne m'auoit iamais aimée, & fus travaillée d'une cruelle jalousie qui ne me donnoit point de repos. Je voyois bien que ie n'auois point sujet de le retenir, puis qu'il ne m'aimoit point: toute fois ie ne pouuois souffrir qu'il me quittast. Iamais ie n'auois esprouué les troubles de tant

de

de passions qui m'agitoient ; mais ie confesse , qu'il ne se peut imaginer vn tourment plus cruel. L'amour , la haine , les ressentimens du mespris , & la ialousie me mertoient en tel desordre , que mon esprit estoit en perpetuelle fureur. Il me restoit pourtant ie ne sçay quelle esperance , que le croyant fort courageux , il ne pouuoit qu'il ne s'estimast extrêmement redevable enuers moy de rant de deuoirs que ie luy auois rendus : toutefois cét ingrat & ce perfide me pria en fin de luy permettre qu'il seretirast. L'attendois ce coup avec beaucoup de crainte , & le receuant ie me contraignis quelque temps pour le persuader de demeurer encore avec moy : mais le voyant resolu de s'en aller , ie sentis qu'il n'y a rien de si sensible que le mespris & l'ingratitude de ce que l'on aime. Je ne pûs me contenir dauantage , & luy fis tous les reproches que peut faire vne Amante outragée , en l'appellant traistre , meschant , ingrat , & tout ce que l'on peut dire dans vne colere furieuse. Cét artificieux ayant donné toute liberté à ma rage pour luy faire perdre sa force , commença de m'appaiser peu à peu , par les plus flatteuses paroles que pourroit inuenter la tromperie mesme. Il me persuada tout ce qu'il voulut , estant si affoiblie par les agitations de mon ame , qu'en cét estat il fut aisé de me vaincre. Puis il taschoit à me faire croire des choses qui estoient si cheres à mes delirs , & qui flattoient de telle sorte mes esperances , que ie conspirois encore avec luy pour m'abuser moy mesme. Jamais il ne m'auoit tant tesmoigné de passion qu'il fit alors : Il n'espargna ny les protestations , ny les sermens pour m'asseurer de son amour & de sa fidelité ; & feignant quelques iours de ne se pouuoir esloigner de ma preience , il obtint insensiblement

congé de s'en aller , en me faisant esperer qu'il se rendroit chez moy à toute heure. S'estant ainsi eschappé de mes mains, il contrefit alors le malade, pour n'estre point obligé de me reuoir , iusques à ce qu'il peust retourner en Sicile. L'enuoyois sçauoir souuent de ses nouuelles, & i'estois aduertie de tout ce qui se passoit chez eux, par le moyen d'un ieune garçon nommé Damis esclaue de Maxime, qui me contoit que rien n'estoit si agreable à Melinte que les cheres assistances de cette belle Ariane. Cela me rongeoit le cœur de ialousie & de despit, de ce qu'il m'auoit ainsi trompée pour sortir d'auec moy. L'attendis encore beaucoup de temps ; & plus il s'en passoit , plus il me faisoit perdre l'esperance de le reuoir iamais. Cét outrage me saisit tellement que ie deuins malade , & voulant esprouuer à quel point iroit son ingratitude, ou si la pitié ne feroit point ce que l'amour ne pouuoit obtenir ; ie fis dire par tout que i'estois à l'extremité, pour essayer s'il ne voudroit point au moins me rendre quelque deuoir aux derniers momens de ma vie. Mais ce cruel, ce barbare , ne fut iamais touché d'aucun accident qui me peust arriuer ; & eut moins de soin de moy , que s'il ne m'eust iamais conuë. N'estant pas encore contente de cette espreuue, ie fis dire que i'estois morte, pour voir s'il ne viendrait point visiter Camille , & pour entendre, estant cachée, ce qu'il luy diroit sur le regret de ma mort ; & ie veux bien vous dire quelle estoit alors ma fureur. L'auois resolu s'il venoit, de sortir de mon embusche apres l'auoir ouï quelque temps, & de le deschirer en pieces avec mes dents & avec mes ongles : mais tout cela ne l'esmeut non plus que s'il eust este sans ame ; & ie sçeus mesme qu'il auoit empesché Palamede de venir voir ma

sœur, sur l'accident que l'on pensoit qui me fust arriué. Je ne sçauois plus dans mon extrême douleur de quel artifice me seruir, ny quelle resolution prendre, lors que la passion des autres faillit à secourir la mienne, & à suppléer au deffaut de mes inuentions. Marcelin, comme ie sçeus de Damis, pour se vanger de ces Siciliens de qui il estoit ensemey, entreprit de les brusser tous vne nuit dans leur maison, ou s'ils sortoient, de tuer Melinte & Palamede, & d'enleuer Ariane dans ce desordre pour la donner à l'Empereur. Cette entreprise, à ce que ie sçeus depuis, ne succedá pas bien pour Marcelin, qui fut tué hors la ville par Melinte, & Ariane se sauua par ie ne sçay quel moyen: mais le lendemain Palamede & Melinte furent pris & amenez prisonniers à Rome. Iamais, poursuiuit Emilie, ie n'eus tant de ioye que d'apprendre qu'ils estoient destinez à la mort, estant accusez d'auoir mis le feu à la ville: & lors que ie fus aduertie qu'on les deuoit mener au Senat pour les iuger, ie me desguisay au mesme estat que ie suis à present pour voir leur contenance, & à quel supplice ils seroient condamnez; & m'estant coulée dans le Senat parmy la foule; ie fis en sorte que i'eus vne place, d'où ie les pourrois voir à mon aise. Je vis ce traistre qui se presenta sans s'estonner, & en le voyant, ie deuins palle, & vn frissonnement me surprit qui m'osta toutes les forces. Le tremblement qui m'auoit surpris, ne me quitta point tandis que ie le vis: mais quand il commença à parler ie me sentis presque esuanoüir, tant ie fus saisie par les passions differentes qui m'agiterent. A la fin ie repris vn peu de force & de courage, & voyant de quelle sorte il se defendoit: Ah! ce disois- ie en moy-mesme, voila com-

ment ce trompeur me parloit quand il me vouloit abuser. Voyez comment il sçait bien desguiser les causes de leur mal-heur & son amour par Ariane. Il n'ose pas prononcer ce nom de peur de se troubler. Toutefois ie vous confesse que ie me sentoys moy-mesme touchée des choses qu'il disoit, & ma haine n'estoit pas assez puissante pour resister à la force de son discours. Je voulois que l'on le iugast à mort, & ie voyois bien qu'il estoit impossible de le condamner. L'attendis son iugement avec autant de trouble que si c'eust esté le mien mesme; & bien que ie desirasse qu'il mourust, ie me surprenois quelquefois moy-mesme en vn estar, que j'auois de la crainte pour sa vie. Je voyois bien pourtant que l'on l'alloit absoudre, & i'en estois fâchée & contente en mesme temps: mais lors que l'on vint dire de la part de Neron, que l'on surfist le iugement, & qu'il vouloit declarer sa volonté sur ce sujet, ie ne sçauois vous dire comment ie demeuray. Je voyois bien que l'Empereur auoit eu crainte que l'on ne les renuoyast absous, & que cela signifiât vne mort inévitable; mais ie ne pouvois me resioür de l'assurance de leur mal-heur. Toutefois lors que Melinte fut remené dans la prison, & que ie ne le vis plus, me voila rentrée en fureur contre luy. Je m'accusois de n'auoir pas animé les Iuges à les punir, ou de n'auoir pas inuenté quelque crime qui les eust fait condamner à l'heure mesme: Je me representois tous les mespris & tous les outrages qu'il m'auoit faits, & auois impatience que Neron ne l'enuoyast esgorger dans la prison. Tout le iour ie ne fis que me tourmenter sur ce sujet; & là nuit ie ne pûs dormir. Je me forgeois en l'esprit que ie voyois les soldats de Neron qui en-

troient dans la prison , & qui massacroient de mille coups ce perfide. Je m'imaginois y arriuer en mesme temps , & m'e resioür de le voir aux abois de la mort ; puis lauer mes mains dans son sang. Apresauoir passé la nuit dans ces resveries , i'enuoyay sçauoir à la prison si desia ils n'estoient pas morts : mais on me rapporta que tout estoit en grande rumeur en ce lieu-là , & que l'on croyoit qu'ils s'estoient precipitez du haut de la tour dans le Tybre, ayant trouué moyen de sortir par la cheminée de la chambre où ils estoient ; qu'une grande quantité de peuple estoit autour du fleuve , & beaucoup d'hommes dans des batteaux pour chercher les corps morts que l'on iugeoit ou noyez ou assommez, pource qu'avec eux il estoit tombé vn creneau de la tour. Ma fureur me donna vne estrange curiosité : ie voulus aller iusques au lieu où l'on cherchoit les corps , pour repaistre ma veüe de ce spectacle ; & ie croy que si celuy de Melinte eust esté trouué , ie fusse morte de ioye en le voyant. Mais tout le soin que prirent beaucoup de personnes , & moy-mesme qui donnois de l'argent pour chercher dans l'eau, se trouua inutile : la nuit arriua , & ie fus contrainte de laisser cette recherche , comme tous les autres qui auoient trauaillé vainement. Je ne laissois pas d'auoir satisfaction , mais non pas entiere , croyant qu'ils estoient morts , & que l'eau les auoit emportez. Quelques iours apres me faisant promener sur l'eau , ie me fis conduire bien loin hors la ville , pour voir si dauanture ces corps n'auroient point esté iettez par le fleuve en quelque bord. Vn ieune garçon qui nous menoit , voyant vn batteau vuide à la rüe , nous dit sans y penser. Voici vn batteau qui est demeuré sans maistre. Je luy de-

manday ce qu'il vouloit dire : Il me respondit. Vn ieune homme l'auoit achepté , mais ie croy que ce n'estoit pas pour se faire battelier ; & il me le donna en garde la nuit que les prisonniers se sauuerent. Puis il adiousta vn peu apres. On auoit beau chercher dans l'eau l'autre iour : ie pense qu'ils sont bien loin à cette heure. Je fremis , poursuiuit Emilie , l'entendant ainsi parler ; & ie le pressay de me dire ce qu'il en sçauoit. Je vous le diray , me dit-il , à la charge que vous ne me descouurirez pas ; ce que luy ayant promis , il continua qu'il auoit veu les prisonniers se sauuer dans ce bateau , apres auoir esté long temps à descendre de la tour par vne corde , & qu'il les auoit veus passer , pource qu'il veilleoit cette nuit sur la riuiera. Je fis semblant , adiousta Emilie , de me resioiir qu'ils se fussent sauuez ; mais en mon ame, ie me resolus de ne les laisser pas ainsi impunis ; & qui m'eust bien considerée il eust veu que ie ne pouuois m'empescher d'auoir le visage tout en feu d'exces de colere. Quoy , disois- ie en moy-mesme , ce Babare sera maintenant en Sicile auprés de sa belle Ariane : & n'aura point de plus chers entretiens avec elle , que de luy conter les mespris qu'il a faits de mon affection ? & il se vantera toute sa vie d'auoir triomphé impunément de toutes mes passions ? Non , ie ne mourray pas ainsi sans estre vangée : il n'est pas si bien sauué qu'il pense l'estre. Je le veux poursuiure en quelque part de la terre qu'il se retire ; & si ie ne suis assez puissante , l'animeray plustost contre luy la fureur de tout le monde , pour empescher qu'il ne m'eschape. Je reuins dans la ville , roulant en mon esprit mille moyens pour le perdre : mais pour estre plus assurée s'il estoit viuant ,

ie me resolus d'enuoyer exprés vn des miens à Syracuse , qui se peust enquerir si Melinte y estoit arriué. Cét homme me rapporta toutes les resioüissances qui s'estoient faites à leur retour ; les sacrifices & les jeux , avec la gloire de Melinte & d'Ariane , que l'on croyoit bien tost voir mariez ensemble. Toutes ces choses m'animerent tellement de la jalousie , de honte & de despit , que ie deliberay de preuenir leur bon-heur par la mort de ce meschant. Ie m'auisay de me seruir de la puissance de l'Empereur pour ne point faillir en mon entreprise. Ie vous voyois alors plus que de coustume , dit-elle à Trebace , pource que ie commençois à reconnoistre que vous m'auiez tousiours aimée d'une affection veritable , qui auoit resisté à tant de mespris ; & i'auois regret d'auoir choisi ce traistre & ce parjure , au lieu de vous qui ne m'eussiez iamais manqué : ie me resolus de n'estre plus ingrate enuers vous , & de contenter vos iustes desirs ; mais à condition qu'auparauant vous feriez en sorte que ie fusse vangée de Melinte. Vous me promistes de satisfaire à ma passion , auant que de me presser de contenter la vostre. Ce fut alors , continua Emilie , que ie vous donnay aquis d'aller declarer à Neron , que Melinte & Palamede ses ennemis estoient viuant ; & de luy demander la commission de les aller faire mourir. Puis ie désiray encore qu'il fust publié par Rome , & par toutes les villes de l'Empire , qu'on eust à les tuer en quel que lieu qu'ils seroient trouuez , & i'ay voulu moy-mesme vous assister en cette commission en me desguisant ainsi , pour faire s'il est possible , que ie tuë moy-mesme ce perfide de ma main : car ie vous confesse que c'est la plus grande ioye que ie puisse espe-

rer en ma vie. Emilie finit ainsi, pourſuiuit Arcas, & Trebace luy reſpondit. Hé bien, Madame, ie voy bien qu'il faut qu'il meure, où ie n'auray iamais contentement de vous : Maintenant que ie ſçay combien vous auez de ſujet de rechercher ſa mort, ie ioindray le deſir de vanger vos outrages, à celuy que i'auois ſeulement de vous obeïr. Ils eurent encore apres enſemble, dit Arcas, quelques autres diſcours. O Dieux ! interrompit Melinte, faut-il que cette femme viue encore pour mon tourment ? Voyez quelle eſt ſa rage. Arcas le pria de le laiſſer continuer, & il reprit. Ie fus bien eſtonné d'auoir appris toute la fureur d'Emilie : toutefois ieus quelque opinion que les Dieux auoient permis que ie fuſſe aduertý de toutes ces choſes, pour me donner le moyen de vous ſeruir. Ie n'eus autre ſoin que de ne me point laiſſer cognoiſtre à Emilie; & nous arriuaſmes ainſi à Syracuſe. Ie ſçauois bien que vous n'y eſtiez pas : de ſorte qu'en ce lieu ie n'auois point de crainte pour vous. Nous deſcendiſmes ſur le ſoir, & logeaſmes dans la ville. Incontinent i'allay voir Telephe, à qui ie contay la recherche que l'on faiſoit de vous ; ce qui le troubla extrêmement. Nous ne laiſſaſmes pas d'auiller, qu'il falloir faire courir la nuit meſme des billets par toute la ville pour prier tous ceux de Syracuſe, s'ils aimoient Melinte, de ſe bien garder de dire aux Romains où il eſtoit allé, pource qu'ils cherchoient à le faire mourir. Cela fut fait ainſi, & l'amour du peuple fut ſi grand enuers vous, dit-il à Melinte, que Trebace & Emilie furent plus de huit iours à s'enquerir de vous de tous coſtez, ſans en pouuoir apprendre aucunes nouuelles. Pour moy, i'auois reſolu de me mettre en mer cependant, & de vous aller
trouuer

trouuer à Corynthe pour vous aduertir de vous sauuer : mais ils auoient fait arrester tous les vaisseaux du port : de sorte que tout cela me fut impossible. A la fin ie ne sçay de quelle façon ils sçeuvent où vous estiez allé : incontinent on nous fit remonter dans le vaisseau , & ie partis avec eux apres auoir dit Adieu à Telephe & Erycine, que ie laissay en pleurs : ie maudissois les vents de nous estre si fauorables : pource que nous arriuasmes à Corynthe en moins de temps que l'on ne le pouuoit esperer : & au port nous trouuasmes tout en trouble. Trebace demanda ce que c'estoit ; & on luy dit que l'on auoit enleué quelques filles dans des vaisseaux qui estoient partis il n'y auoit pas vne heure. Nous descendismes, & ie fus bien estonné de rencontrer Dicearque & Pisistrate, qui estoient empeschez à preparer vn vaisseau, pour aller apres les raiisseurs. Trebace luy demanda quelle affliction il auoit. Seigneur Romain, dit-il, i'auois vne niece dont la conduite m'auoit esté laissée par mon frere en mourant : ie l'auois promise à Pisistrate que voila, dit-il en le monstrant, & vn traistre, nommé Melinte, est venu de Syracuse, qui me l'a rauie. Ah ! le meschant, s'escria Emilie, c'est celuy que nous cherchons de la part de l'Empereur, pour le faire mourir. Consolez vous, bon homme, continua-t'elle, nous vous vangerons. Ie croy, reprit Trebace, qu'ils sont dans l'un des deux vaisseaux que nous auons rencontréz, qui vont deuers les costes de la Grece : il ne faut point perdre de temps à partir pour les suiure ; si vostre vaisseau est prest, dit-il à Dicearque & à Pisistrate, accompagnez nous, & ioignons nos querelles ensemble. Iamais ie ne vis rien de si animé que Dicearque, qui

hasta le plus qu'il pût son embarquement avec Pistrate ; & lors que Trebace & Emilie démarerent , ils les suiuirent.

Après auoir passé le Promontoire de Naupacte ; nous prîmes à main droite le long des costes de la Grece , & abordâmes en tous les ports les vns apres les autres , où nous ne faisions que demander si deux vaisseaux n'estoient point arriuez depuis peu de temps : nous allâmes ainsi en diuers lieux sans pouuoir apprendre de vos nouuelles. En fin nous sommes arriuez icy ; où estant descendus , Epicharis qui estoit au port desguisée en homme , a esté si mal-heureuse , que d'estre reconnuë par le fils du Geolier qui vous auoit retenus prisonniers à Rome. Il nous auoit accompagnez ayant sceu le dessein de Trebace ; pource que son pere ayant esté mis aux fers pour n'auoir pas eu assez de soin de vous , il esperoit de l'en faire deliurer lors qu'il auroit aidé à vous faire mourir ; & c'est pour cela qu'il s'est embarqué avec nous. Voila de quelle sorte tant de personnes se sont rencontrées pour chercher ensemble vostre ruine : & c'est dequoy nous deuons tascher maintenant de vous desfendre. Depuis tantost que ie vous ay quittez , i'ay appris qu'ils ont mis estroite garde par toutes les portes & au long des murailles de la ville : de là ie m'en suis allé marquer les logis pour ceux de ma compagnie : i'en ay retenu vn pour moy assez commode , afin qu'il vous puisse seruir , au cas que vous en ayez affaire , puis ie vous suis venu trouuer , & il faut auiser à présent comment nous nous deuons conduire , & de quelle sorte ie vous pourray secourir. Arcas finit ainsi , & il fut escoute de tous avec beaucoup

d'estonnement & de crainte, apprenant par son discours tant de choses qui s'apprestoient pour rendre leur mort inévitable.

Melinte rompit alors son silence & dit. Hé bien, ie voy qu'ils ne demandent tous que ma vie : ils ne cherchent ny Palamede, ny pas vn de vous : en mourant, ie les rendray tous satisfaits, & vous deliureray tous du danger où vous estes pour moy seul. Ouy, ie m'iray présenter deuant eux : ie m'ouriray le sein d'un poignard en leur presence, pour contenter d'un seul coup la vengeance de l'Empereur, d'I milie & de Diccarque. Vaut-il pas bien mieux que ie fasse voir, que nul ne me pouuoit faire mourir que moy-mesme, que de tomber lâchement entre leurs mains, & d'en recevoir vne mort indigne ? Ce n'est point vne fureur qui m'emporte. Si ie voyois quelque apparence de me garantir & vous aussi, par valeur ou par quelque autre moyen, ie m'empescherois bien de vouloir perdre la vie auant l'esperance, mais nous voyant environnez de gens de guerre de tous costez, il vaut bien mieux que ie meure tout seul avec courage, que de tenter des moyens qui ne réussiroient pas, & qui vous enfeucliroient tous dans ma ruine. Le sage Lepante arresta ce discours de Melinte, en luy mettant la main sur le bras, & luy dit. Pardonnez moy, si ie ne vous estime pas exempt de transport en la resolution que vous prenez. Ceux qui ont le courage grand comme vous, lors qu'ils s'offrent à mourir, se laissent emporter souvent à ce desir, plustost pour vn plaisir qu'ils trouuent à mespriser la mort, que pour vne necessité qui les oblige à la desirer. Mais nous ne sommes iamais ex-

ables d'auoir auancé nostre destin, tandis que l'esprit ou la force sont encore capables de surmonter la rigueur de la fortune. Il faut essayer toutes choses auant cete extremité, & ne point negliger la moindre esperance qui puisse demeurer de reste. Vn moment de temps peut changer l'estat de tout le monde; & cete mesme fortune qui fait assembler tant d'ennemis pour vous destruire, peut d'un reuers les ruiner eux mesmes, & renuerser tant d'accidens par vn seul. L'on ne sçait point encore où nous sommes: Arcas est en estat de nous donner des aduis à toute heure; & s'il faut mourir, attendez au moins que vous ne puissiez plus viure. Pour moy, ie suis d'auis que nous changions de logis, & que nous allions dès cette heure dans ceuy qu'Arcas s'est fait marquer dans la ville, comme si nous estions des Romains mesmes: pource que ce logis estant marqué pour eux, on ne nous y viendra point chercher. Puis il faut qu'Arcas aille aduertir ceux de nostre vaisseau, qu'ils se retirent à vn abry que i'ay veu proche d'icy, de peur qu'ils ne nous descouurissent si l'on s'enqueroit d'eux: nous trouuerons apres quelque moyen de deliurer Epicharis. Ces raisons & ces aduis appaiserent Melinte, & donnerent vn peu de consolation à toute la troupe: Aussi tost on se resolut de suiure les propositions de Lepante, & de sortir de cette maison pour aller en celle qu'Arcas auoit retenuë. Cela fut fait dès la nuit mesme, & tout ce qu'ils auoient de plus precieux fut transporté en cet autre logis qui estoit assez commode: La maison où ils estoient fut laissée à ceux à qui elle appartenoit, desquels ils prirent congé, seignant de s'aller embarquer; ils les laisserent assez

bien recompensez , & les obligerent par leurs presens,
à ne point dire qu'aucun d'eux eust demeuré en ce lieu.
Arcas alla deuers le vaisseau , qu'il fit partir pour aller
en cet abry , avec charge si on les trouuoit , de ne
point dire à qui ils estoient , & de feindre toute au-
tre chose.

Fin de l'onzieme Livre de l'Ariane.







LE
DOVZIESME
LIVRE DE
L'ARIANE.



LE lendemain de ce iour cruel , auquel tant de mal-heurs estoient arriuez , au lieu de tant de ioyes esperées , Trebace & Emilie firent faire vne exacte recherche par toute la ville , excepté dans les maisons où estoient les soldats Romains , qui auoient tous asseuré qu'il n'y auoit aucun Citoyen logé avec eux. Arcas faisoit plus que tous l'empesché , à bien sureter tous les coins des logis , estant asseuré que l'on n'iroit pas dans le sien. Sur le soir il ne manqua pas de s'y rendre , où il assura son bon Maistre & tous les autres , qu'il esperoit d'empescher qu'ils ne fussent descouverts ; & qu'il piccharis estoit admirable en sa resolution de ne les point deceler ; mesme qu'elle auoit entièrement esloigné

la creance qu'ils fussent en ce païs: qu'il craignoit seulement que l'on ne luy fist quelque peine. Cette parole transporta tellement Palamede qu'il se resolut de mourir ou de la sauuer. Il s'enquit d'Arcas en quel lieu du logis de Trebace elle estoit enfermée, & combien de personnes estoient commises pour sa garde; & apres auoir appris toutes les particularitez qu'il desiroit sçauoir, il feignit de ne penser pas à elle dauantage, & se coucha. Mais lors qu'il creut que chacun estoit endormy, il descendit avec ses draps par la fenestre, & se mit dans la ruë, n'ayant pour toutes armes que son espée. Il s'en alla au logis de Trebace, à la porte duquel estoit vn corps de garde, où estant entré sans peine, pour ce que l'on croyoit que ce fust vn des soldats, il voulut gagner la descente du lieu obscur où estoit enfermée Epicharis; & trouuant vn soldat qui en gardoit l'entrée, il luy ietta son manteau à l'entour de la teste de peur qu'il ne criast, & en mesme temps luy enfonça l'espée deux ou trois fois dans le corps, & ne se retira point de là que le soldat n'eust expiré. Il descendit apres sans crainte dans cette obscurité; & paruint iusques à la porte du cachot, où estoit vn autre soldat avec les clefs; & auprès de luy vn peu de lumiere. Ce soldat surpris, luy demanda qui il estoit, mais Palamede ne luy voulant point donner le loisir de se reconnoistre, l'attaqua avec de grands coups d'espée, & incontinent l'estendit mort à ses pieds. Alors il prit les clefs, & avec l'aide de la petite lumiere, ouurit la porte du cachot. Epicharis croyoit que l'on la vinst querir pour luy faire encore quelques demandes, ou pour luy faire confesser quelque chose par tourment: mais lors qu'elle se sentit embrasser par Palamede, elle creut que

que c'estoit quelque soldat indiscret, & le repoussa rudement. Toutefois Palamede se faisant connoistre à elle, & luy tesmoignant mille ioyes de la reuoir, elle fut fort estonnée, & luy demanda comment il auoit pû paruenir iusques en ce lieu. Il luy conta tout ce qu'il auoit fait: puis il luy dit qu'il ne falloit point perdre de temps, & la pria de se haster de sortir avec luy. Je suis retenue, dit-elle, par les pieds; & j'ay bien peur que toute vostre peine n'ait esté inutile, & que vous ne soyez icy en grand danger pour auoir tué mes gardes. Toutefois cherchant parmy les clefs, ils furent si heureux que de trouuer celles de ses fers. Palamede ouurit le ressort, & plein de rauissement de deliurer sa Maistresse, baïsa ses beaux pieds, & maudit mille fois ceux qui auoient tant fait endurer de mal à vne personne si delicate. En fin Epicharis apres auoir esprouué quelque temps si elle pourroit bien marcher, se resolut de sortir. Palamede fut d'auis qu'elle s'en allast seule, comme il estoit, entré seul; qu'il la suiuroit incontinent apres: & de peur qu'elle ne fust reconnue, il luy fit prendre la cotte d'armes, & le casque d'un des deux soldats qu'il auoit tuez, afin qu'on la laissast passer sans difficulté. Elle vouloit qu'il s'en allast seul le premier: mais il fallut qu'elle cedast à l'amour de Palamede. Elle passa donc sans crainte ainsi desguisée au trauers du corps de garde, & s'estant eschappée attendit quelque temps en vn lieu pour s'en aller avec Palamede, la fortune duquel auoit esté bien differente; pource qu'ayant laissé passer quelque temps, il voulut sortir aussi apres auoir pris le casque & la cotte d'armes de l'autre soldat mort: mais lors qu'il s'en falloit peu qu'il ne fust dehors, vn soldat l'arresta par le bras, & luy demanda où il alloit.

Il luy respondit en langage Romain , qu'il sortoit par le commandement de Trebace : mais lors qu'on luy demanda le mot , il ne le sceut dire ; & bien qu'il mist l'espée à la main pour eschapper par sa valeur , on ne laissa pas de l'enuironner , & de se saisir de luy. Incontinent apres les soldats morts furent trouuez , & on sceut qu'Epicharis estoit eschappée. Palamede fut gardé iusques au lendemain , attendant le resveil de Trebace , & on l'amena de grand matin deuant luy : mais lors qu'on eut esté querir Dicearque pour le recognoistre ; il ne se peut représenter vn estonnement pareil à celuy de ce viel-lard , qui poursuiuoit la mort de Melinte , ne croyant pas que son neveu fust avec luy ; mais qu'il estoit encore à Athenes , où il pensoit qu'il fust allé. En fin reuenant à luy , il pria Trebace de sauuer la vie à son neveu , qui n'estoit en aucune sorte coupable de tout ce qu'auoit fait Melinte : mais Trebace voulant satisfaire au commandement qu'il auoit receu de l'Empereur , & vanger la mort de ses soldats en punissant l'entreprise hardie de Palamede , commanda que l'on le mist en la place d'Epicharis , & s'il ne vouloit dire où estoit Melinte , que dans deux iours on le fist mourir. Palamede dit qu'il y auoit long-temps qu'il n'auoit veu Melinte , & que son oncle en estoit tesmoin , avec lequel il estoit party de Syracuse pour aller à Corinthe , & de qui depuis il auoit pris congé pour aller à Athenes : qu'il auoit eu enuie de voir en suite toutes les villes de la Grece & de l'Epire ; & qu'estant arriué en celle-cy , il auoit appris qu'Epicharis estoit retenüe prisonniere , laquelle il aymoit assez pour entreprendre de la deliurer : que puis qu'il auoit esté si heureux que de le

faire, il ne se soucioit plus de ce qui pouuoit arriuer de luy. Trebace dit , que cette rencontre de luy & d'Epicharis , luy faisoit croire qu'il ne disoit pas vray , & quel'on pourroit bien auoir des nouuelles en ce pais de l'autre personne qu'ils cherchoient , puis qu'ils en auoient desia vne en leur puissance. Assurez vous , poursuiuit-il , que si vous ne me declarez où est Melinte , les tourmens vous le feront bien dire. Il n'y a point de tourment , respondit-il , qui soit capable de me faire dire ce que ie ne sçay pas. l'ignore où il est , & pour quel sujet vous le cherchez : vous ne deuez point differer à me faire mourir pour auoir tué vos soldats , si vous ne me prolongez la vie qu'en esperance d'apprendre des nouuelles de Melinte , duquel ie ne vous puis dire autre chose , sinon que ie l'ay laissé à Syracuse. Arcas estoit present , qui estoit accouru dès le matin chez Trebace : pource que Palamede n'ayant point esté trouué dans son lit , ils auoient tous iugé qu'il auroit fait quelque estrange entreprise pour Epicharis , dequoy il consideroit le malheureux euenement , plein de tristesse & de desespoir. Palamede fut conduit en la prison d'où il auoit tiré Epicharis , quelque priere que sceust faire Diocarque pour le garantir ; & Arcas alla conter ces malheureuses nouuelles à Melinte & à Ariane , & leur dit que l'on ne sçauoit ce qu'Epicharis estoit deuenue.

Cette affliction renouuella les pleurs d'Ariane , & fit perdre toute patience à Melinte , qui ayant suiuy iusques-là les sages conseils de Lepante , ne pût souffrir de voir la douleur d'Ariane pour son frere , & le danger où estoit son amy. Il tira à part Arcas , & luy fit iurer qu'il obeïroit inuiolablement à ses commandemens : puis il luy dit , qu'il estoit resolu de deliuer Palamede ; mais

quelque mal-heur qui luy arriuaſt en cette entrepriſe, qu'il luy deſſendoit de ſe declarer pour eſtre des ſiens; afin qu'il conſeruaſt Ariane avec leurs amis, & qu'ils ne vinſſent iamais au pouuoir de Trebace & d'Emilie. Ce fidel-le ſeruiteur taſcha de luy faire changer cette funeſte reſolution : mais Melinte l'eſtonna, en luy iurant, que s'il s'oppoſoit dauantage à ſon deſſein, ou s'il en aduertilloit Ariane & Lepante, qu'il ſe donneroit de ſon eſpée dans le corps. Il luy recommanda ſur tour d'auoir ſoin toute ſa vie d'Ariane, dont il remettoit le ſalut entre ſes mains. Arcas ne ſeut que dire voyant le deſeſpoir de ſon Maĩſtre, qui luy commanda encore de ſortir du logis à l'heure meſme, & de l'aller attendre chez Trebace, où il ſeroit teſmoin de ce qu'il vouloit faire. Ce fut ainſi que Melinte empescha qu'Arcas ne declarast ſon deſſein : auſſi toſt il choiſit huit ieunes ſoldats qui l'auoient ſuiuy depuis Syracuſe, leſquels il auoit eſprouuez pleins de grand courage, & qui admirant ſa vertu luy teſmoignoient vne affection paſſionnée. Il leur fit part de ſon deſſein, & trouuant qu'ils receuoient avec ioye cette occaſion de mourir en le ſervant, il les fit armer ſous des caſaques, & ſans parler à ſa chere Ariane ny à Lepante, ſortit arme comme eux. Il ne voulut ſe ſeruir que de ſa valeur en cette entrepriſe, ſans employer autre artifice. Auſſi toſt qu'il fut arriué deuant la porte de Trebace, il ſe ietta genereuſement dans le corps de garde avec ſes compagnons, & apres auoir tue plus de ſix ſoldats auant que les autres ſe fuſſent recognus, il ferma la porte ſur luy de peur qu'il ne vint du ſecours à Trebace. L'alarme fut incontinant par tout le logis; & plus de trente perſonnes s'aſſemblerent pour les ſouſte-

nir : ils ne laisserent pas de pourfuiure & mettre en piéces tout ce qui se presentoit dauant eux , & iamais Melinte ne donna tant de preuue de sa vaillance , ayant à deffaire les plus aguerris d'entre les soldats Romains. Ses compagnons qui taschoient à l'imiter , sembloient acquerir de nouuelles forces en voyant les grands coups qu'il donnoit , & ne croyoient pas que rien les peust vaincre en la compagnie d'un si valeureux homme. Déja plus de vingt des Romains auoient esté tuez , quand Trebace luy mesme accourut avec Emilie , Dicearque & Pisistrate ; & voyant ce carnage des siens , & de si vaillans hommes qui les pourfuiuoient , il ne pouuoit s'imaginer quels ils estoient , ny d'où leur venoit vn dessein si furieux : toute fois voyant qu'il falloit qu'il s'en messast , il pria Emilie de se retirer , & d'aller regarder leur combat d'une fenestre. Ce fut elle qui reconnut Melinte la premiere , & le monstra à Trebace : Dicearque le remarqua aussi , & s'estant retiré avec Emilie dans vne des chambres , ils virent que Trebace s'estant fait armer , s'estoit attaché au combat avec eux. Arcas pour n'estre point obligé de frapper son Maistre , ny ses compagnons , auoit rompu son espée , & se messant parmy les soldats de Trebace , paressoit des premiers à le combattre , pour empescher par ce moyen les plus ardans de les approcher. Melinte ayant reconnu Trebace qu'il connoissoit , ne songea plus qu'à l'attaquer ; esperant que s'estant deffait de luy , le reste perdroit courage & seroit facilement deffait. Trebace d'autre costé ne refusa point le combat , estant desesperé de voir vn si grand nombre des siens sur la place , & Melinte commençoit à bien esperer de son entreprisé , vo-

yant tant de morts autour de luy , & qu'il estoit encore assisté de six des siens contre peu qui restoit. Mais par mal-heur vn Romain s'auisa d'aller querir par vne sortie de derriere, ceux qui gardoient les portes de la ville , qui accoururent aussi tost : de sorte que Melinte se trouua enuironné de tous costez. Les six qui restoit avec luy , furent incontinent mis au fil de l'espée , & Emilie le voyant seul , cria d'en haut à Trebace que l'on ne luy ostast pas la vie. Melinte alloit estre bien tost accablé de la foule de ceux qui l'attaquerent : toutefois il ne laissoit pas encore de joncher la place de morts en la fureur où il estoit , & on craignoit de l'aborder à cause des grands coups qu'il donnoit de tous costez : mais en fin il fut pris par le moyen d'un soldat Romain , qui en mourant s'attacha de rage à ses jambes, & le fit tomber. Ce fut ainsi que cette valeur prodigieuse fut contrainte de ceder à vne fortune si cruelle, & aussi tost il fut mis dans vn cachot séparé, & chargé de fers par l'ordre d'Emilie.

Pendant ce tumulte, Dicearque songeant au salut de Palamede, estoit allé deuers le lieu où il estoit; & ayant donné de l'argent à vn soldat qui estoit demeuré seul pour en garder l'entrée, pource que les autres estoient accourus à la defense de Trebace, il luy persuada de le laisser aller, pouuant s'excuser sur le desordre qui estoit arriué. Cét homme ayant esté ainsi gagné, Dicearque conduisit son neuen par vne porte de derriere, sans luy dire le sujet de la rumeur qu'il entendoit , pource que sans doute il eust voulu secourir Melinte ; & luy ayant donné aduis de se sauuer, il s'en retourna deuers Trebace , qui songeoit alors à faire emporter les corps de tant de morts qui estoient dans

la court du logis, & ne pouuoit aïsez s'estonner du grand courage de Melinte, & de sa resolution pour sauuer Palamede. Emilie estoit bien contente d'auoir Melinte entre ses mains, & deliberoit en son esprit de quelle sorte elle le feroit mourir, ayant resolu de le tuer de sa main. Alors on leur vint dire que Palamede s'estoit sauué, & il y eut vn soldat qui accusa Dicearque d'auoir esté deuers le cachot : avec cela ceux qui le gardoient ne se trouuant point, on coniectura que Dicearque lesauoit gagnez ; dequoy Trebase indigné, le fit mettre au mesme cachot où estoit auparauant son neveu, proche de celuy où Melinte auoit esté mis, & se resolut de le faire mourir ; pour auoir osé corrompre les siens, & faire sauuer les ennemis de Cesar, & en mesme temps il fit chasser d'auprés de luy Pisistrate.

D'un autre costé Palamede estant sorty, ne sçauoit que iuger de voir toute la ville en rumeur : toutefois ne songeant alors qu'à son salut, il regagna le logis d'Arcas, sans s'enquerir de ce que c'estoit. Mais il fut bien estonné lors qu'il apprit que Melinte estoit sorty avec huit soldats, & il ne sçauoit iuger à quel dessein il s'estoit desrobé de sa troupe en cét equipage. Aussi tost il voulut partir, pour l'aller chercher & le secourir, mais il en fut empêché par l'arriuee d'Arcas, qui leur apprit ce qui s'estoit passé. La belle Ariane qui commençoit à essuyer ses larmes pour le retour de son frere, sentit alors vne nouvelle affliction qui en r'ouurit la source. Chacun estoit si desesperé de ce mal-heur, pour l'affection que l'on portoit à Melinte, qu'au lieu de la consoler ils luy tesmoignoient encore par leur extrême douleur, qu'elle auoit vn grand sujet de s'affliger. Palamede voyant de quelle

forte il estoit obligé à Melinte, d'auoir conceu vne si genereuse entreprise pour le sauuer, estoit bien resolu de luy rendre la pareille : mais il n'en trouuoit point encore le moyen, & il mesloit seulement son despit parmy les extremes desplaisirs de sa sœur, de Lepante & de Cylenie.

Cependant Emilie qui ne pensoit qu'aux moyens de satisfaire entierement sa vengeance, ayant entre ses mains le sujet de toutes ses passions furieuses, songea que si elle pouuoit auoir Ariane en son pouuoir, elle auroit dequoy la punir d'estre cause de ses tourmens, & vn sujet pour agrandir les supplices de Melinte, par les ressentimens qu'il auroit de ce qu'elle feroit souffrir à Ariane, auant que de le faire mourir ; & se doutant qu'elle estoit au mesme lieu, puisque Melinte s'y estoit rencontré, avec Palamede & Epicharis, elle la fit encore chercher de toutes parts pour l'auoir entre ses mains. Mais Arcas sceut si bien diuertir la recherche qui se pouuoit faire en sa maison que iamais elle n'en pût auoir aucunes nouuelles. Plusieurs iours se consommerent ainsi à la recherche dans la ville & en quelques lieux à l'entour : en fin ne pouuant plus differer à se vanger, & Trebace la pressant de mettre fin à la vie de Melinte pour donner commencement à son bon-heur, elle se resolut vn matin de l'aller elle mesme tuer de sa main. Elle prit vn poignard, & se fit conduire au cachot : puis estant asseurée que Melinte ne pouuoit se deffendre d'elle, pour ce qu'il auoit les mains attachées par derriere, & les fers aux pieds, elle renuoya ceux qui estoient avec elle pour entrer seule dans cette obscurité avec vn flambeau à la main ; ayant encore quelque honte de commettre cette action

action en presence d'autrui. Quoy ? dit elle en elle mesme en entrant , il semble que ie tremble , & que mon corps craigne d'executer ce que mon esprit a si resolument entrepris ? puis-je douter encore si ie dois me vanger, apres auoir couru tant de mers pour en trouuer l'occasion ? Non, non, que ce cruel sente la fureur d'une femme iustement irritée , & paye la peine de tous les tourmens qu'il m'a fait endurer. Elle s'incitoit ainsi elle mesme , pour fortifier son cœur , qui ne luy sembloit pas trop assésuré ; & s'en alla deuers Melinte, conduite par la lumiere du flambeau, en dessein deluy faire bien sentir la mort.

Melinte la connut aussi tost ; & voyant qu'elle le cherchoit parmy les ombres , il la voulut preuenir , & luy dit. Venez , Emilie , ce que vous m'apportez m'est bien agreable. Ces paroles la troublerent ; pour ce que cette voix autrefois tant aimée la surprit , & elle ne pensoit pas que Melinte la peust connoistre , la croyant morte , & la voyant en cet habit. Ah ! traistre sorcier, dit-elle en fin, quel demon t'a donc appris que ie suis Emilie ? Oüy, ie suis cette Emilie, l'obiet de tes mespris & de tes ingrátitudes, qui suis sortie des enfers pour te raur ton ame perfide , & l'abandonner aux furies. Hé bien , reprit-il doucement , acheuez donc, Emilie ; faites ce que vous auez entrepris : voila mon estomac descouuert, enfoncez-y le poignard , & assurez vous que la mort que vous m'allez donner , sera receuë de moy , non pas comme vne punition de vous auoir offensée, mais comme vne recompense de vous auoir bien serui. De m'auoir bien serui ? reprit-elle incontinent. Ah ! meschant, appellois tu me bien seruir , quand tu te mocquois de

mon amour, & quand tu payois mes soins de desdain & d'ingratitude? appellois tu, cruel, me bien seruir quand apres t'estre eschappé de moy par artifice, tu ne vouldus plus songer qu'il restoit au monde vne Emilie, à qui tu estois si obligé? Appellois-tu, ingrat, me bien seruir, quand ny le mal qui m'estoit arriué du regret de ne te plus voir, ny ma mort prochaine, ny ma mort mesme ne peurent t'obliger à rendre chez nous vne seule visite, Emilie, repartit Melinte, que sert d'en venir à ces reproches, puisque vous auez resolu de me faire mourir? Acheuez Emilie, voila l'estomac, donnez le coup, & croyez que vous ne m'auez iamais tant obligé que vous ferez à cette heure en m'ostant la vie. Non, respondit-elle, ie veux sçauoir auparauant, en quoy, traistre, tu m'as serui. Ah! Emilie, dit Melinte, voulez vous que pour vostre honte, ie vous remette deuant les yeux de si fascheux ressouuenirs? Ne vous ay-ie donc point bien serui, lors que voyant que cette Emilie, de qui i'admirois auparauant l'esprit & la vertu, se laissoit aller à des desirs peu honnestes, i'ay tasché de t'allentir cette ardeur par mes froideurs, de peur qu'elle ne pleurast toute sa vie la faute de peu de iours? Ne vous ay-ie point serui; lors que deplorant en moy-mesme l'égarement de vostre ame, & faisant comparaison de vostre abbaissement avec l'honneur de vostre vie precedente, ie n'ay point voulu me preualoir de vostre aueuglement, & vous ay maintenü, au moins pure de mauuais effects, puisque ie ne pouuois pas empescher l'impureté de vos desirs & de vos pensées? Doncques ne vous ay-ie point serui, lors que voyant que ma presence allumoit plustost vostre passion,

que mes raisons n'auoient de pouuoir pour l'esteindre, i'ay fait vn effort par artifice pour sortir d'avec vous, esperant qu'en vous ostant l'obiet qui vous portoit à l'impudicité, peu à peu la raison reuiendrait en vous, & vous feroit cognoistre en quel mal-heur vous auiez esté presté de tomber ? Emilie, Emilie, si i'eusse esté tel que vous le souhaittiez alors, que seriez vous à cette heure ? quels repentirs d'auoir fait vne faute si honteuse ? quels regrets vous saisiroient à present d'auoir perdu cet honneur qui rendoit auparauant vostre front si plein d'assurance ? & de vous voir contrainte à tenir les yeux abaissez, comme complices de vostre honte & de vostre mal-heur ? Que vous ay-je donc fait, Emilie, pour me poursuiure avec tant de fureur ? Vous me voulez faire mourir, pource que ie suis cause que vous pouuez encore vous vanter d'estre honneste ; que vous ne craignez point les reproches, ny des hommes, ny de vostre conscience, & que vous trouuez encore des personnes qui entreprennent pour vous toutes choses. Voyez, Emilie, si ie vous ay bien serui ; & iugez à present, si ie vous aurois plus obligée en satisfaisant alors à vostre desir, qu'en ne le faisant pas.

Emilie en qui il restoit encore des semences de vertu & de bon courage, fut si touchée de ces veritables & sensibles reproches, & demeura si pleine de honte, que sa passion furieuse & desreglée ne pouuant soutenir la force d'une si grande vertu, l'abandonna, & elle fut contrainte insensiblement de laisser tomber le poignard qu'elle tenoit. Elle demeura long temps muette, ne sçachant que luy respondre : En fin elle s'assit à costé de luy, & luy dit.

Melinte le plus sage de tous les hommes , tu m'as deux fois vaincuë : la premiere fois tu n'auois acquis que mon cœur & mes affections ; mais à present tu surmontes mon ame , & ma raison mesme , qui confesse qu'il n'y a point de vertu au monde comparable à la tienne. Je me soubmets à toutes les peines que tu voudras m'ordonner pour les tourmens que ie t'ay fait souffrir ; & ie confesseray par tout , que ie te suis redevable du dessein que ie fay de suiure toute ma vie les aduis de ta metueilleuse sagesse.

Emilie rendoit ainsi les hommages deus à la vertu de Melinte, lors que Trebace qui auoit soin d'elle, & qui eut peur que Melinte , tout enchainé comme il estoit, n'eust trouué moyen de se defendre contre elle, pour ce qu'elle demeueroit long temps , la vint trouuer seul, & fut bien estonné quand il la vid auprès de Melinte, plustost en estat de suppliante, que d'une personne qui cherchast à se vanger. Qu'est-ce là, dit-il à Emilie? que voy-ie? Trebace, luy dit-elle, vous avez sujet de vous estonner : mais si vous eussiez ouï les sages propos de Melinte vous seriez aussi vaincu que moy. Voila, poursuiuit-elle, l'homme le plus vertueux du monde , à qui ie suis redevable de la pureté que j'ay iusques icy conseruée , & de la vertu que ie suiuray toute ma vie : ie vous demande que vous luy sauuez la vie pour l'amour de moy , ou que vous me fassiez mourir en sa place. Madame, reprit Trebace , vous sçavez que ie n'ay entrepris la ruine de Melinte, que pour vous satisfaire , n'ayant aucun sujet de le haïr. Si vous avez admire sa sagesse à present , j'ay naguere admiré la grandeur de son courage & de sa force ; & c'estoit avec beaucoup de regret que ie vous auois per-

mis de deffaire vn si vaillant homme. Melinte interrompit ce discours , pour leur dire qu'il n'auoit, ny tant de vertu, ny tant de courage; que ce qu'il auoit fait contre les soldats Romains , estoit plustost vn effect de desespoir que de valeur , pour auoir sceu que son amy estoit en danger de la vie; & qu'Emilie appelloit en luy sagesse, la cognoissance qu'il luy auoit donnée du transport de sa fureur , qui luy faisoit faire des choses mal - seantes à son sexe : que puis qu'ils auoient commandement de l'Empereur de le faire mourir , ils ne laissassent pas pour cela de le faire, de peur qu'ils n'en fussent en peine. Non, non, dit Emilie, ie mourray plustost que cela vous arriue de la part de Trebace; & ie sçay qu'il n'est icy que pour m'obeir. Trebace confirma ce qu'elle disoit , & alors Melinte reprit. Puisque vous voulez que ie vous aye obligation de la vie , ie veux donc m'acquiescer enuers vous en quelque sorte ; vous conseillant, dit-il , s'adressant à Emilie, de considerer à present les merites de Trebace, sa fidelle affection , & tant de seruices qu'il vous a rendus, qui vous obligent ensemble à le receuoir pour vostre espoux. Et vous, dit-il , se tournant vers Trebace, receuez de ma main Emilie, de qui vous n'ignorez pas les belles qualitez , & qui s'estant laissée surprendre par la passion de se vanger , sera desormais la plus vertueuse du monde puis qu'elle l'a sçeu vaincre. Emilie donna la main à Trebace pour l'amour de Melinte , & luy ayant permis de la baiser pour gage qu'elle le receuoit pour mary , le rendit tout transporte de ioye. Trebace se trouuant si redevable à Melinte , luy demanda ce qu'il desiroit encore de luy. Que vous deliuriez , respondit-il, Palamede; il n'est plus en nostre pouuoir, dit Trebace; &

sur cela il luy conta comment Dicearque l'auoit fait sauuer, mais qu'il auoit fait mettre ce vieillard en sa place dans vn cachot proche de celuy où ils estoient, & qu'il estoit resolu de le faire mourir pour auoir osé conceuoir cette entreprise, & qu'à present il y estoit encore plus porté, pource qu'il estoit ennemy de Melinte. Ah! Trebace, dit Melinte, ie vous demande donc la vie de Dicearque, au lieu de celle de Palamede. Trop genereux Melinte, reprit Trebace, si vous sçauiez de quelle sorte il est animé contre vous, vous ne desireriez pas qu'il demeurast en vie. Il n'importe, dit Melinte, il est oncle d'Ariane & de Palamede; & bien qu'il me soit tres-cruel, ie ne souffriray iamais qu'il meure. Ie vous donne donc sa vie, dit Trebace, & veux qu'il ne la tienne que de vous. Melinte le remercia de cette grace: & alors Emilie luy demanda où il auoit pû se cacher dans la ville pendant qu'elle le faisoit chercher. Il luy respondit que ç'auoit esté par le moyen d'Arcas son affranchy, qui s'estoit mis parmy eux estant à Rome, & luy conta tout ce qu'il auoit fait depuis pour secourir Palamede & luy, estant dans Nicopolis: qu'ils auoient tousiours esté avec Ariane & le reste de leur troupe dans le logis qu'il auoit fait marquer pour luy; & que c'estoit là sans doute où Palamede se seroit retiré. Trebace & Emilie louerent fort la fidelité & la resolution de cét affranchy, & Emilie qui se souuenoit de ce qu'il auoit fait autrefois à Rome avec Nise, estant esclave, afin de mourir pour son Maistre, adiousta que ce n'estoit pas la premiere fois qu'il auoit tesmoigné vn grand courage & vne extrême affection pour luy. Melinte interrompit ce discours, pour leur dire que voyant son salut assuré & celuy de Dicearque, il ne restoit plus

qu'à songer à celuy de Trebace, & que c'estoit à quoy il falloit bien pouruoir : pource que si l'Empereur sçauoit qu'il l'eust laissé eschapper, il ne luy pardonneroit pas. Ils songerent quelque temps là-dessus, puis Melinte reprit. Je suis d'avis que pour oster à tous ceux qui sont avec vous la connoissance de la grace que vous me faites, vous sortiez tous deux d'icy, comme si vous veniez de me tuer, & Dicearque encore, puis qu'il est dans vn cachot proche de celuy-cy; & que vous commandiez à tous vos soldats & à tous ceux qui vous seruent, d'aller chercher Palamede dans tous les vaisseaux du port, afin que ie puisse eschapper quand ils seront tous sortis, & qu'il n'y ait personne qui puisse estre tesmoin que vous m'aurez laissé aller. Vous leur direz que Dicearque esperant sauuer sa vie en descourant où estoit son neveu, vous a déclaré auant que de mourir qu'il estoit caché dans quelque vaisseau. Vous pourrez retenir seulement Arcas avec vous, pour vous servir & pour ayder à ma fuitte. Trebace approuua cét aduis, & se resolut de le suiure : il sortit avec Emilie du cachot où ils estoient descendus, sans estre suivis de personne, & aussi tost qu'ils furent en haut & parmy les soldats, Trebace tesmoigna estre fort eschauffé, & dit qu'il venoit de tuer Melinte & Dicearque; mais qu'il falloit encore auoir Palamede qui estoit caché au port dans quelque vaisseau, & que Dicearque l'auoit confessé auant que de mourir. Aussi tost il commanda à tous ses soldats de l'y aller chercher, & leur defendit de reuenir qu'ils ne l'eussent trouué. Il ne rencontra personne dans le logis qu'il n'y enuoyast, feignant de le faire par vne grande passion d'auoir Palamede entre ses mains. Il garda seulement auprès de luy Arcas, qui fondeoit

en pleurs, croyant que son Maistre fust mort. Mais quand ils furent seuls, Trebace luy commanda de fermer les portes, & luy dit qu'il se consolast, & que son Maistre estoit viuant. Arcas fut bien estonné de ce que Trebace sçauoit que Melinte estoit son Maistre, & demeura en suspens, ne sçachant s'il deuoit croire qu'il fust en vie, & ne pouuants'imaginer de quelle sorte Trebace auoit appris de ses nouuelles par Melinte : mais Emilie l'assura en luy disant comme elle le connoissoit, & comment Melinte & eux estoient deuenus amis. Arcas se ietta à leurs pieds d'excès de ioye pour les remercier, & aussi tost ils s'en allerent ensemble au cachot pour faire sortir Melinte. Ce pauvre affranchy voyant à la lumiere du flambeau qu'Emilie auoit laissé, son Maistre qui luy tendoit les bras, pensa mourir de ioye de le voir encore viuant; & en tesmoignant son extreme satisfaction luy dressa les fers des pieds: en mesme temps Trebace & Emilie le prirent des deux costez pour le souleuer; & pource qu'il auoit les pieds engourdis, ils voulurent le soutenir iusques à ce qu'il fust dans la cour du logis, & qu'il peust marcher, & ils le menoient ainsi comme triomphant de la rage qu'ils auoient auparauant conceüe contre luy. Quand il se vid en estat de marcher librement, il voulut prendre congé d'eux, & les pria qu'ils reuoyassent Dicearque apres : mais Emilie desira l'accompagner avec Trebace iusques en son logis, pource qu'elle vouloit voir Ariane, & luy demander pardon des ennuis qu'elle luy auoit fait souffrir en poursuivant la mort de celuy qu'elle aimoit. Melinte les pria de ne point prendre cette peine, de peur que quelqu'un ne les vist ensemble par la ville, & que cela ne fust accuser Trebace. Elle respondit qu'ils

qu'ils n'auoient qu'à mettre chacun vn casque en leur teste & en abbattre la visiere, & qu'ainsi pas vn d'eux ne pourroit estre descouuert: Qu'Arcasiroit cependant que-
rir Dicarque dans le cachot, & l'emmeneroit avec ses
liens mesmes en leur logis, afin qu'il ne receust la grace
de la vie que de Melinte. Il fallut donner ce contentement
au desir qu'auoit Emilie de reuoir Ariane, & de la ren-
dre son amie. Ils mirent chacun vn casque en leur teste,
& sortirent apres auoir donne charge à Arcas d'aller de-
liurer Dicarque, & de l'amener tout lié au logis où ils
alloient.

Ils trouuerent les ruës vuides de peuple, pource que
la plus part auoient suiuy les soldats au port par curiosité,
pour voir ce qu'ils y alloient faire: de façon qu'ils furent
veus de peu de personnes, iusques au logis où ils alloient.
Ariane & Cyllenie eurent grand effroy, quand elles sceu-
rent que trois hommes armez demandoient à entrer. Pa-
lamede qui estoit déjà desesperé de ne sçauoir ce qu'estoit
deuenu son amy, se resolut de soulager ses ressentimens
en se vangeant sur ces trois hommes qu'il iugeoit estre
des soldats Romains, & apres' estre armé avec Lepante,
il commanda que l'on ouurist, & que l'on les laissast en-
trer. Melinte alloit le premier, & fut bien estonné de se
voir en vn instant attaque par Palamede: il reconnut l'er-
réur de son amy; toutefois il fut contraint de mettre l'espée
à la main pour pater les coups qu'il luy portoit en fin pre-
nant son temps il haussa la visiere, & en parlant se fit co-
gnoistre à luy. Palamede ietta aussi tost son espée, & se
ietta à ses genoux pour luy demander pardon. Melinte
l'embrassa, & en le releuant luy dit, qu'il s'estonneroit
encore bien plus, quand il sçauoit qui estoient ceux

qu'il accompagnoient. Trebace & Emilie haussèrent alors la visiere de leurs casques : dequoy Palamede eut vn estonnement aussi grand que s'il eust veu des enchantemens. Lepante qui ne les connoissoit pas, se réjouissoit seulement de voir Melinte viuant, & il courut aussi tost aduertir Ariane & Cyllenie de cette bonne nouvelle. En mesme temps Melinte entra dans la chambre, & Ariane vint le receuoir à bras ouuerts, & ne pût de long temps parler, tant elle estoit transportée de ioye. Trebace & Emilie la saluerent apres, & elle estoit si confuse de ce qu'elle voyoit, & de ce qu'elle entendoit d'eux, qu'il fallut luy donner quelque temps pour estre asseurée que ce n'estoit pas vn songe. Les pleurs de ioye couloient par tout en abondance, de voir vn changement si heureux. Trebace & Emilie leur faisoient beaucoup d'excuses, & taschoient à leur faire oublier leurs maux par de continuelles caresses. En fin Melinte dit, qu'il ne restoit plus qu'à auoir Dicearque. Incontinent apres il entra tout chargé de chaisnes, Arcas le tenant par derriere; & estant amené deuant eux, il fut bien estonné, lors qu'il haussa la veüe, & qu'il vid Melinte, Ariane & Palamede auprés de Trebace, avec des visages bien contens. Il ne pouuoit iuger ce qui auoit causé vn tel changement : mais il fut bien plus confus lors que Trebace luy dit. Vieillard, vous auiez mieux merité la mort que ces personnes-cy, pour auoir corrompu les miens en ma maison; & ie vous auois destiné au supplice : mais l'ay esté contraint de donner vostre vie à la priere de Melinte, le plus vertueux des hommes; & vous ne la tenez deformais que de luy. Dicearque estoit tout honteux d'auoir encore yne fois obligation de la vie à vne personne de qui

il pourſuiuoit la mort : mais Melinte connoiſſant ſon deſordre le voulut ſoulager & l'alla embraffer ; puis mettant vn genouïl en terre , commença à luy deffaire ſes fers , & luy demanda pardon de luy auoir donné beaucoup de deſplaiſir , ayant eſté forcé par ſon amour d'enleuer ſa niece. Ariane en meſme temps s'eſtoit miſe à genoux deuant ſon oncle , & luy demandoit ſa grace pour la faute qu'elle auoit faite de s'en aller de Corynthe ; & c'eſtoit vne action qui tiroit des larmes aux aſſiſtans , de voir vn captif en meſme temps ſuppliant & ſupplié , & que les meſmes perſonnes demandoient la grace & la donnoient : Dicarque pleurant auſſi , ne ſçauoit que leur dire : ſeulement il'embraiſſoit tantost Melinte & tantost Ariane. En fin Trebace luy dit , qu'il receuſt Melinte pour l'eſpoux d'Ariane , & pour le plus ſigné bon-heur qui peult iamais arriuer à ſa famille : qu'il le reconnoiſſoit pour le plus vaiſſant & le plus vertueux homme de la terre , & qu'il s'eſtonnoit comment il auoit eu tant d'animofité iuſques-là contre vne perſonne qui auoit tant d'admirables qualitez. Viuez , dit-il , deſormais heureux enſemble , eſtant obligez les vns aux autres , par beaucoup de ſeruiſes importants ; & cheriſſez le repos que la fortune vous enuoye. Les embraſſemens redoublerent alors , pour teſmoignage qu'ils confirmerent les aduis de Trebace ; & vn peu apres ils conſulterent ce qu'ils auoient à faire. Trebace dit qu'il s'en alloit trouuer ſes ſoldats qui cherchoient encore Palamede dans les vaiſſeaux , & auſquels il eſtoit reſolu de dire que Palamede auoit eſté trouué dans la ville , & mis à mort : qu'à l'heure meſme il les feroit embarquer , & s'en retourneroit à Rome avec Emilie , en la compagnie de laquelle il eſperoit de paſſer

heureusement ses iours. Pour eux , qu'il leur conseilloit ; tant pour leur seureté, que pour la sienne , de changer de noms , & de se retirer en quelque lieu de l'Asie , où l'Empereur n'entendist iamais parler d'eux : encore ne deuoiennent-ils pas se retirer aux lieux commandez par les Gouverneurs Romains , mais chez quelques Rois , ou de la Troade , ou de Commagene , ou de Galatie. Ces aduis ayant esté approuuez , ils prirent congé les vns des autres , avec mille embrassemens , & autant de souhaits , qu'ils peussent viure tous en bon-heur & en repos le reste de leur vie.

Il ne restoit plus qu'à trouuer Epicharis , & ils iugerent qu'elle s'en seroit retournée au premier logis qu'ils auoient : pource qu'elle n'auoit pû sçauoir qu'ils en eussent changé ; mais elle n'y fut point trouuée : toutefois le lendemain ayant sceu que Trebace estoit party avec toute sa troupe , ils voulurent se remettre dans ce logis qui estoit fort grand , attendant qu'ils en eussent des nouvelles , & enuoyerent le fidelle Arcas qui estoit demeuré parmy eux , pour faire venir , ce qu'ils auoient transporté dans l'autre maison ; afin de celebrer en ce lieu-là les nopces de Melinte avec Ariane , & de Lepante avec Cyllenie , qui auoient esté si cruellement différées , & qui furent alors résolus par le consentement mesme de Diocarque , qui estoit si honteux d'estre tant de fois redevable à Melinte , qu'à peine ospir-il leuer les yeux deuant luy. Palamede s'en alla cependant à l'abry où s'estoit caché le vaisseau , pour le faire reuenir , & voir si Epicharis ne seroit point le long de la coste de la mer , mais tout son soin fut inutile. Des le iour mesme on tira du vaisseau tout ce qui leur estoit necessaire , pour s'en al-

ler par terre gagner l'Hellepont , & de là passer en Asie; pource que le chemin estoit beaucoup plus court & plus seur; & avec cela on esperoit trouuer Epicharis. Puis apres on renuoya le vaisseau à Syracuse, avec charge d'aller aduertir secretement au logis de Dicearque, de Melinte & de Telephe, de ce qui leur estoit arriué, & de leur apporter le plus de commoditez qu'on pourroit amasser de leur bien, afin de pouuoir viure en la Galatie auprès du Roy Polemon, où ils se vouloient establir, Lepante se promettant qu'ils y seroient bien receus: & qu'ils reuinssent par le mesme chemin qu'ils tenoient, afin qu'ils ne manquassent pas à les rencontrer: mesmes ils donnerent des marques pour se trouuer, & des instructions de tout ce qu'ils auoient à faire.

Sur le soir, lors que chacun recommençoit les apprests pour la ceremonie du lendemain, on leur dit qu'il y auoit depuis quelques iours dans ce logis vne femme malade, qui auoit esté mise à bord en ce lieu, & qui paroissoit fort venerable. Ils eurent la curiosité de l'aller voir pour luy offrir l'assistance qu'ils pourroient luy donner: mais lors qu'ils furent entrez dans la chambre, & qu'ils s'approcherent de son lit, elle s'escria ayant aperceu Dicearque. Ah! Dietix, qui me presente ce bourreau & ce traistre? & continua mille paroles outrageuses contre luy, en sorte qu'ils creurent que son mal estoit quelque fièvre chaude, & l'ayant recommands à ceux qui la seruoient ils la laisserent. Vn peu de temps apres, Dicearque repassa de hazard par la chambre de cette femme, qui recommençant ses injures & ses maledictions, se fit en fin connoistre à luy pour estre la sage Euphrosyne, femme d'Hermocrate & mere de Melinte. Dicearque

alors plein de confusion de se sentir coupable de tous les mal-heurs qui estoient arriuez à Hermocrate & à elle, ne sçauoit que deuenir, soit qu'il la regardast, soit qu'il retournast deuers Melinte, duquel il ne pouuoit souffrir la veüe, pour l'auoir tant offensé, & pour luy estre si re-deuable. En fin il se resolut de s'approcher d'elle de plus près, & luy dit, que pour satisfaire à tant de mal-heurs & de desplaisirs qu'il luy auoit causez, il s'estimoit heureux d'auoir vn moyen pour luy donner à l'heure mesme autant de contentement qu'il luy auoit donné d'en-nuis & de douleurs. Euphrosyne ne pouuant iuger ce qu'il vouloit dire, luy demanda s'il ne vouloit point encore continuer ses tromperies & ses trahisons, & l'assura que les Dieux la vangeroient vn iour de toutes ses meschancetez. Dicarque ne laissa pas de sortir, & allant trouuer Melinte, luy dit d'un cœur touché de repentir, qu'il s'estimoit en fin bien-heureux, d'auoir trouué dans son mal-heur, dequoy le payer d'une partie de tant d'obligations qu'il luy auoit; non seulement en luy accordant Ariane pour espouse, mais encore en luy faisant vn present inestimable, & dont il auroit sans doute vne extrême ioye. Melinte l'ayant remercié, & ne pouuant s'imaginer quelle chose il luy pouuoit donner, se laissa conduire par luy en la chambre où estoit Euphrosyne, à laquelle il presenta Melinte pour son fils, & dit à Melinte qu'il luy donnoit Euphrosyne pour sa mere, & qu'il se resioüissoit de ce que les Dieux luy auoient offert ce moyen pour leur satisfaire. Euphrosyne & Melinte ne sçauoient encore s'ils le deuoient croire, & demeuroident estonnez sans parler. Non, non, reprit Dicarque, ne doutez point de ce que ie dis.

Euphrosyne sçait ce qu'elle est , & pour vous , dit-il à Melinte, descouurez luy vostre estomach , afin qu'elle voye la marque du cœur , qui luy fera connoistre que vous estes son fils. Melinte luy monstra cette marque , & alors Euphrosyne dit en ouurant les bras. Ah ! mon fils , est-ce bien vous de qui j'ay tant désiré la veüe , & de qui ie n'auois pû iamais sçauoir de nouvelles ? Ah ! Dicearque , que de bon cœur ie vous pardonne tant de tourmens que vous m'avez fait souffrir , & si Hermocrate estoit avec nous , que ie m'estimerois à present heureuse. En mesme temps vn ruisseau de larmes luy mouilla tout le visage. Melinte auoit le cœur si serré , de se sentir embrassé par cette vertueuse mere , de qui il auoit tant de fois regretté la perte , qu'il ne pût se soulager qu'en laissant aller aussi beaucoup de larmes. Cét obiet si tendre & si pirovable , melle de regrets & de satisfactions , de tristesse & de ioye , ne pouuoit estre veu qu'avec des pleurs , qui seruoient à deux vsages , estant capables de représenter , & les ressentimens de douleur , & les excès de contentement. Melinte presenta puis apres Ariane à sa mere ; & luy ayant dit vne partie de ses vertus & de leurs aduantures , luy fit sçauoir qu'elle estoit destinée pour estre son espouse pourueu qu'elle l'eust agreable. Alors elles s'embrasserent avec beaucoup de rauissement ; & Euphrosyne dit , qu'apres tant de bon-heur , elle n'auoit plus à regretter que la perte d'Hermocrate. Melinte luy tesmoigna que son plus grand desir estoit de sçauoir quelle auoit esté leur fortune depuis leur exil de Syracuse , & de quelle sorte elle s'estoit rencontrée en ce lieu. Elle leur fit connoistre qu'elle vouloit bien leur donner ce

contentement , croyant alors auoir assez de force pour le faire ; mais Dicearque preuoyant que ce discours ne se pourroit pas faire , sans qu'il receust les atteintes de beaucoup de reproches , se retira avec Palamede , laissant Melinte , Ariane , Lepante & Cyllenie en estat d'écouter Euphrosyne , qui commença ainsi son discours , tenant la main de Melinte.



HISTOIRE D'HERMOCRATE, & d'Euphrosyne.



OM cher fils , si vous desirez sçauoir l'origine de nos mal-heurs , & quel a esté le grand Hermocrate vostre pere , il faut que ie prenne mon discours vn peu de loin , pour vous faire voir que lors que ie l'espousay , iamais la fortune n'assembla deux personnes qui deussent esperer d'estre plus-heureuses , & iamais n'en rendit de plus mal-heureuses. Sous l'Empire de Tybere, Hermocrate , de qui ie ne vous diray point l'illustre naissance , pource que ie croy que vous ne l'ignorez pas , voulut aller à Rome estant fort ieune. Son pere & sa mere n'ayant autre enfant que luy , auoient bien de la peine à l'esloigner de leurs yeux : mais en fin il obtint congé. Apres s'estre embarqué , il eut du commencement le temps sur la mer assez favorable : mais incontinent il se changea ; & le vaisseau fut surpris d'une si furieuse

rieuse tempeste, qu'apres auoir esté deux iours entiers agité par les vents, en fin il s'alla briser contre le Promontoire d'une Isle. Hermocrate qui scauoit nager, chercha son salut sur les mesmes rochers qui auoient cause son naufrage; & apres auoir long temps regardé les flots, & ne voyant parestre aucun qu'il peust aider à se sauuer comme luy, il se resolut de tourner à l'entour de ces rochers, & de voir où il pourroit se garantir de la mort. En montant avec peine sur ces pointes, il paruint à vn lieu assez vny, où il ouït vne voix; & escoutant plus attentiuement, il entendit ces mots. En fin, ma Princesse, (Hermocrate fut bien estonné d'apprendre qu'il y auoit des Princesses parmy ces rochers.) En fin, ma Princesse, entendit-il, malgré tous les jaloux de mon bon-heur, me voicy seul avec vous: i'appelle seul, puisque Lucie est toute en nous, & prend autant de part que nous dans nos satisfactions. Mon cher Pollion, dit cette Princesse, i'ay eu bien de la peine à me deliurer de tant d'importuns, qui semblent n'estre nez que pour trauerser les Amans: mais ne confidez vous point que leur persecution n'est pas tant à detester que nous pourrions bien croire, puis qu'elle sert à aiguïser les desirs & les rendre plus violens; & à faire mieux sentir les delices de l'amour, quand on pense qu'avec le contentement que l'on reçoit, on a encore celuy de triompher de tous leurs soins. Pour moy, dit ce Pollion, ie ne trouue point estrange que l'Enuie ouure tous ses yeux pour essayer à trauerser ma felicité; car quel bon-heur merita mieux iamais d'estre enuie que le mien? Estre aimé de la plus grande Princesse qui soit sous le Ciel, & non seulement les plus grands du monde en naissance, mais encores de qui la beauté semble estre

Princesse de toutes les beautez de la terre : auoir le bonheur de la voir, de luy parler, d'estre en secret avec elle, de toucher sa belle main, & de luy donner des baisers que les Dieux mesmes doiuent enuier. Adiouste encore, mon cher Pollion, interroinpit la Princesse, d'estre aimé d'elle avec des transports qui ne sont pas imaginables : car ie veux bien que tu sçaches que iamais passion ne fut si violente que la mienne. l'admire ta gentillesse, ta grace, ton courage, qui a ose aspirer iusques à moy, & dont l'heureuse audace t'a rendu digne de ma grandeur; & plus ie descens de degrez pour te receuoir en mon affection, plus ie sens de plaisir à t'obliger. Croyez, ma Princesse, dit Pollion, que ce n'est point vostre grandeur que j'aime, mais vostre beauté, laquelle i'eusse aimée quand vous seriez née d'une Esclaue : toutefois quand ie voy de si beaux yeux, vn si beau teint, vne bouche si belle, vne gorge si merueilleuse, des mains si dignes d'estre baisées, & vne taille si legere, & que ie considere que tant de beautez sont honorées d'une si illustre naissance, ie confesse qu'un certain aiguillon se mesle encore à toutes ces graces, qui les rend plus piquantes, & adiouste aux contentemens de les posseder des rauissemens inexprimables. Il est vray que vostre grandeur est à mon esgard vn bien dans l'imagination, & que vostre beauté qui se void & qui se touche, me deuroit causer vne felicité bien plus sensible : toutefois puisque les plaisirs de l'imagination sont les plus delicats, iugez quel est mon transport, puis qu'à des biens veritables qui sont si parfaits, j'en puis adiouster d'imaginaires qui sont si releuez. D'où vient donc, dit la Princesse, que mes plaisirs ne sont pas moindres que les vostres,

puis que ie m'abaisse au dessous de mon rang en vous favorisant , au lieu que vous vous esleuez en portant vos desirs iusques à moy , & que vos plaisirs s'esleuent à proportion ? C'est, respondit Pollion , que nous sortons tous deux hors de nous mesmes , & tout ce qui transporte est agreable. Vous quittez vostre grandeur en vous abaissant iusques à moy , & ie quitte ma mediocrité en m'eslevant iusques à vous. Chacun se plaist à sortir quelquefois de sa condition , & à se desguiser. Quand les Princes montent sur les Theatres , ils se plaisent à representer des Bergers ; & quand des Bergers se desguisent , ils aiment à faire les Princes : Mais ces plaisirs sont en eux bien imparfaits ; pource qu'ils n'embrassent pas veritablement la condition sous laquelle ils se desguisent ; & pour nous , par l'entremise de l'Amour , nous goustons encore avec les plaisirs du desguisement ceux de la verité : car en m'aimant vous embrassez en effet ma condition sans quitter la vostre ; & portant mon amour iusques à vous , i'embrasse la vostre sans quitter la mienne , & sans perdre les plaisirs de me voir si heureux dans ma mediocrite mesme. Mon cher Pollion , dit la Princesse , ie croy qu'outre cela , l'egalité que donne l'Amour entre tout ce qu'il assemble , meslée avec l'inegalité qui est entre nos conditions , cause cette pointe de plaisir qui ne se sent pas aux autres Amours : car les dons de Nature que nous aimons l'un de l'autre , & qui peuuent faire comparaison les vns avec les autres , s'entraiment & se cherissent ardemment , & semblent en mesme temps se rire de la fortune , qui par nostre inegalité pretendoit nous separer l'un de l'autre.

Ah ! ma chere Lucie , s'escria tout d'un coup la Princesse , que ie sens encore de plaisir quand ie repete ces

mesmes propos que ie dis à mon cher Pollion, & que tu me redis les mesmes discours qu'il me tint, cette bien-heureuse & mal-heureuse nuit qu'il fut surpris auprès de moy & tué entre mes bras. Hermocrate fut encore bien estonné, ayant creu iusques-là entendre vn homme & vne femme de condition inegale, qui se parlassent d'amour avec tant de liberté, & d'apprendre alors que c'estoient deux femmes seulement, qui se redisoient de tels discours, dont il n'auoit pas perdu vne parole, pource qu'elles ne craignoient point d'estre ouïyes en vn tel lieu. Lucie reprit ainsi, Ma bonne Princeesse, vous retombez tousiours dans vos ennuis; & vous m'auiez promis de ne plus tourner vostre pensée vers le souuenir de vos mai-heurs, mais seulement vers vos contentemens passez, ou vers l'esperance d'estre bien tost restablie en vos grandeurs quand Germanicus iouïra de l'Empire; & si vous voulez souffrir que ie vous diuertisse souuent ainsi, ie m'assure que ma memoire vous redira tous les agreables entretiens de Pollion & de vous, puisque j'ay esté presente à tous, & que la part que mon affection me faisoit prendre en tous vos contentemens, me rendoit assez attentiuë pour n'en auoir rien oublié. Que veux-tu que ie fasse, respondit la Princeesse, mes maux presens & les accidens qui les ont causez se font bien mieux sentir, & reuiennent bien plus souuent en ma memoire, que les plaisirs passez; & ie te puis encore assurer que la solitude où ie suis reduite ne m'est point tant ennuyeuse, que le souuenir de la mort de cet agreable & mal-heureux Amant. Alors elles se teurent pour s'en aller de ce lieu; & Hermocrate qui vouloit les voir pour en estre secouru, & pour sçauoir en quelle terre il estoit,

les voulut suiure: mais il ne les pût trouuer, & il découurit seulement vn Palais, & vn grand enclos de jardins, à qui d'un costé ces seuls rochers seruoient de closture, & des autres il estoit fermé de hautes murailles. Cependant qu'il consideroit ce lieu, il entendit ces femmes qui reuenoient vers l'endroit où il estoit; & voulant leur donner à cet abord de la pitié plustost que de la peur, afin qu'elles eussent soin de luy, il se resolut de se coucher le long du chemin où elles venoient, & de feindre qu'il estoit demy mort, comme vn homme ietté là par les vagues apres vn naufrage.

Aussi tost que la Princeesse l'apperceut, elle s'estonna de voir vn corps en ce lieu, puis elle se baissa pour voir s'il estoit mort. Elle sentit bien au poux & à la chaleur qu'il auoit, qu'il estoit encore viuant; & le considerant, elle dit. Chere Lucie, ne remarques-tu point qu'il a beaucoup des beaux traits du visage de Pollion, & que sa taille est pour le moins aussi belle? O Venus, s'escria-t'elle, voudrois-tu bien m'estre si fauorable pour les vœux que ie t'ay faits aujourd'huy, que de m'enuoyer des plaisirs veritables, au lieu des imaginaires que ie sêtois n'agueres des propos de Lucie? Va, machere Lucie, va querir quelques vnes de mes femmes au Palais, pour l'emporter d'icy, & le mettre par nos soins en estat de nous voir.

Lucie courut aussi tost pour satisfaire au desir de la Princeesse, laquelle cependant consideroit Hermocrate, dont la beauté commençoit à luy donner de l'amour, & peu à peu luy faisoit perdre le souuenir de Pollion. En fin se voyant seule avec vn homme qui sembloit priué de sentiment, elle luy donna des baisers, lesquels plus ils luy sembloient imprimez avec ardeur, plus ils luy fai-

soient conceuoir de mespris pour cette personne qui s'abandonnoit si librement à l'amour, quoy qu'il se peust imaginer de sa beauté qu'il n'auoit point encore veüe. En fin Lucie arriue avec d'autres femmes; & la nuit s'approchant on l'emporte au Palais, dans lequel il n'y auoit vn seul homme: mais il estoit soigneusement gardé par dehors en sorte qu'il n'y en peust entrer. La Princeesse deffendit expressement que l'on parlast aux gardes, de ce corps qu'elle auoit trouué; & le fit mettre dans vne chambre proche la sienne, où estant sur vn lit, il se resolut d'ouuir les yeux, & feindre d'estre estonne de se voir où il estoit.

Il vit la Princeesse assise sur son mesme lit, ayant la gorge & les espaules toutes descouuertes, les bras retrouvez iusques assez près du coude, les cheueux liez derriere la teste avec des rubans blancs, & tombans par boucles des deux costez de ses ioües assez bas; vestüe d'une estoffe blanche fort legere, & aucunement transparente; qui ne couuroit son corps qu'autant qu'il le falloit pour dire qu'il ne fust pas nud, & laissoit voir au trauers & sa blancheur & les proportions de sa taille. Elle receuoit de l'esclat par la quantité des flambeaux qui estoient allumez dans la chambre, & estant assistée de trois filles assez agreables parseoit vne Venus accompagnée des trois Graces. Aussi lors qu'Hermocrate eut tesmoigné son estonnement de setrouuer en vn si beaulieu, elle luy voulut d'abord faire croire qu'il estoit entre les mains d'une Deesse, de l'amour de laquelle il auoit esté iugé digne. Je ne vous rediray point toutes les caresses qu'elle luy fit, & les propos qu'elle luy tint pour luy faire accepter son affection, ny tous les artifices dont il usa pour

la refuser honnestement fans l'irriter & pour sortir de ses mains. En fin elle l'appella cent fois ingrat, insensible; & sur ce qu'il luy tesmoigna vn iour qu'il n'auoit autre passion que de se voir aupres du grand Prince Germanicus, dont la vertu luy estoit en admiration, & lequel il desiroit suivre à la guerre qu'il alloit faire en Asie, apres auoir mis fin à celle d'Allemagne; Estes vous encore de ces simples, dit-elle, qui ne sçauent pas que ceux qui ont estably les Loix dans le monde, ont donné aux inclinations les noms de vertus & de vices, selon que cela pouuoit seruir à leurs interrests? pource qu'ils estoient les plus forts, estant ou Rois, ou les premiers des Republiques, & qu'ils pensoient à leur conseruation, ils ont persuadé aux hommes que leur plus grande vertu estoit de s'exposer à toutes sortes de perils dans la guerre, & que leur plus grand vice estoit d'aimer leur vie: ils ont mis la gloire dans la peine & dans la mort mesme, & la honte dans le plaisir & dans le repos; & pource qu'ils estoient ialoux de leurs femmes, & qu'ils leur enuioient les aduantages qu'elles ont sur eux en amour; ils ont estably leur vertu à s'abstenir de leurs plaisirs, & ont appellé vertueuses celles qui s'adonnent à aimer, qui est la seule chose toutefois pour laquelle la Nature semble les auoir créées. Hermocrate voyant qu'elle suiuoit de si dangereuses maximes, voulut l'oster de son erreur pour la rendre plus sage, & luy dit. Madame, ne croyez point que des interrests particuliers ayent esté capables d'establi des Loix dans le monde, mais que les plus sages des hommes y ont mis la main, & n'ont considéré que le repos public. Celuy qui fit celles de Sparte fut si peu intéressé, qu'ayant esté creé Roy au preiudice de son neveu

qui estoit encore enfant , il luy rendit le Royaume aussi tost qu'il fut en aage , n'ayant considéré que le bien de son païs en l'acceptation qu'il fit de cette grandeur. La force n'a pû non plus establir des choses si vniuersellement receuës , mais la raison. Contre la force on se reuolte tost ou tard ; & si les corps sont asservis par elle , les ames qui sont libres gardent leurs opinions , & ne se rangent iamais à ce qui est iniuste. La raison seule maistrise les hommes de leur consentement mesme ; & si quelques vns se rebellent contr'elle par le déreglement de leurs desirs ; ce n'est pas que les passions sçachent mieux persuader qu'elle , mais que l'on ne la veut pas entendre ; pource qu'il n'y a rien que ses conseils ne puissent vaincre , pourueu qu'on les escoute. Mais iugez combien la valeur aux hommes & la chasteté aux femmes sont choses necessaires pour la paix de la terre ; puisque sans ces deux vertus tout seroit en vn tel desordre , que le genre humain seroit destruit en peu de temps. Les brigandages , les outrages , les embrasemens , les violemens & les meurtres , s'exerceroient continuellement , sans la valeur qui les reprime , & qui s'expose aux perils pour maintenir le repos des innocens ; & si indifferemment il estoit permis aux femmes de receuoir les hommes selon leurs desirs , & aux hommes de s'adresser à celles qui leur plairoient ; combien d'assassinats , de seditions & de guerres suruiendroient pour la libre possession des plus belles ? & qui voudroit penser à l'education des enfans dont les peres seroient si douteux ? Hé bien , interrompit la Princesse , il en arriueroit comme des bestes , qui se laissent purement conduire à la Nature , & se meslent indifféremment avec peres , meres , enfans & autres , sans tou-

ces ces distinctions de degrez que nous auons inuentez , & toutes ces ceremonies de mariages ; & toutefois on ne voit point entr'elles de si grands desordres. Il n'est pas des bestes , reprit Hermocrate , comme des hommes , dont les appetits se trouuent secondez par leur esprit , qui est capable de fournir des inuentions quelquefois furieuses , & qui souuent pour vn seul desir voudroit voir la moitié des hommes exterminée : mais les bestes n'ont qu'un certain instinct qui les porte à desirer , & n'ont autre intention que d'aller vers ce qu'elles desirent , & de combattre quelquefois ce qu'elles trouuent à la rencontre qui les trauerse. Encore trouuerez vous quelque ordre entre les animaux : les femelles ne se portent à l'amour qu'en certains temps , & les males ne les recherchent qu'en ces mesmes temps , hors desquels tous leurs desirs sont esteints. En cela , dit la Princesse , ils montrent bien qu'ils ne sont que des bestes. Mais par vos raisons mesmes ie vous veux conuaincre. Ne me refusez donc pas ce qu'une beste ne refuseroit pas à une autre. Voicy le temps que ie desire vostre amour ; il y a assez long temps que ie vy dans la solitude : Et puis que vous auez tant de soin de la conseruation & du repos du monde , vous ne deuez point craindre icy que ma possession cause ny meurtres , ny seditions , ny guerres. Il n'y a aucun homme dans ce Palais : Il n'y a icy ny pere qui ait soin de moy , ny mary qui en soit jaloux , ny riuale que vous puissiez craindre. Madamie , repartit Hermocrate , il y a trop peu de temps que nous auons connoissance l'un de l'autre , pour lier une affection entre nous. Je ne sçay pas si vous estes fille , ou mariee. Ny l'une ny l'autre , interrompit-elle. Vous ne sçauiez pas , reprit-

il, si moy-mesme ie ne suis point marié. Quoy que vous soyez, dit-elle, ie vous aime. Ie ne le suis pas à la verité, poursuit-il, mais si i'ay promis la fidelité à vn autre, ie ne puis plus m'engager. C'est peut-estre, dit-elle, comme se sentant offensée, que ie ne merite pas qu'on en quitte vne autre pour moy. Ie ne suis pas assez belle ou assez grande Princesse. Puis voyant qu'il destournoit la veuë, ce qu'il faisoit ne pouuant plus regarder vne personne qui auoit si peu de pudeur, elle dit en haussant sa voix, & estant toute rouge plustost de fureur que de honte. Sçache que tu vois la plus grande Princesse & la plus mal-heureuse de la terre, & plus mal-heureuse encore de ce que dans ma misere, ayant trouué ce qui pouuoit l'adoucir, i'ay rencontré vn cœur qui ne se plaist qu'à l'accroistre. Alors elleietta quantité de larmes; & vn peu apres ne pouuant supporter ce mespris, elle se saisit tellement de douleur, qu'elle tomba éuanoüye. Hermocrate appella ses femmes au secours, lesquelles l'emporterent dans sa chambre.

Le lendemain elle le vint trouuer, plus modestement vestuë que de coustume; & s'estant assise auprès de luy elle luy parla ainsi. Ie connois que vous estes vertueux, & que comme tel ie me puis fier en vous du secret le plus important de ma vie. Vous voyez deuant vous cette miserable Princesse Iulie, petite fille du grand Auguste, & dont la bonne fortune a esté renuersée par la calomnie, qui fut si puissante auprès de l'Empereur, qu'elle luy fit croire mille choses inuentees par Liuius ma belle mere, qui auoit dessein de destruire la maison de son mary, pour establir la sienne, & mettre Tybere son fils au Trône où il est maintenant. Elle fit massä-

erer vn ieune homme trouué par hazard avec moy , com-
 me s'il eust esté mon aduultere ; me fit releguer en cette
 Isle , m'ordonnant vn pareil supplice qu'elle auoit fait
 souffrir à ma mere ; & mesmes fit qu'Auguste deffen-
 dit que l'on nourrist l'enfant dont i'accouchay icy quel-
 ques mois apres que i'y fus arriuée , comme s'il eust esté
 engendré d'un autre que de Paulus mon mary ; ce qui
 monstroit bien qu'elle n'auoit pas tant d'animosité con-
 tre moy que contre la race , puis qu'elle se contenta de
 l'exil pour moy & voulut faire donner la mort à mon en-
 fant. Helas ! vous le doy - iedire ? toutefois , pourquoy
 craindray - ie vne infidelite de celuy qui a mesme refusé
 mon affection pour ne manquer pas de fidelité ? Ouy , ie
 vous diray que cet enfant a esté nourry , malgre le com-
 mandement qu'auoit fait Auguste qu'on le fist mourir :
 car ayant secu cette cruelle ordonnance , ie fis en for-
 te que l'on en presentast vn autre aux bourreaux qui fu-
 rent enuoyez , & donnay mon fils à nourrir secrette-
 ment. Puisque vous n'avez point eu pitié de la mere ,
 dit elle avec des larmes , au moins ayez pitié de l'enfant.
 Si vous n'avez autre desir que d'aller trouuer Germani-
 cus qui est son oncle , Agrippine sa femme estant ma
 sœur , ie vous presente vne fauorable occasion pour le
 connoistre : Portez luy en secret mon fils , afin qu'il en ait
 soin , & qu'il l'establisce au rang qu'il doit tenir , aussi
 tost que par la mort de Tybere il iouira de l'Empire. Si
 vous avez quelque ressentiment du secours que ie vous
 ay donné , faites moy ce plaisir au lieu de tous ceux que
 i'ay desirez de vous & que vous m'avez refusez. Her-
 mocrate entendant ce discours , fut bien estonné d'ap-
 prendre qu'il estoit entre les mains de cette Iulie , la quel-

le il ſçauoit auoir eſté releguée pour ſon impudicité en vne Iſle près l'Apoüille ; & ne douta point, tant par ce qu'il auoit ſceu des diſcours qu'il auoit ouïy d'elle & de Lucie , que de ceux qu'elle auoit tenus à luy-meſme , que ce qu'elle appelloit calomnie ne fuſt vne accusation veritable : touteſois en partie eſineu de pitié, en partie pour le deſir qu'il auoit d'eſtre hors d'auec elle , il luy promit de faire de ſon fils tout ce qu'elle deſireroit. Elle luy donna vne lettre pour preſenter à Germanicus en luy preſentant ſon fils ; & pource que le Palais eſtoit ſoigneuſement gardé par des hommes eſtablis par Tybere , comme auoit fait Auguſte auparauant , pour empêſcher qu'elle ne viſt vn ſeul homme ; il fut reſolu qu'Hermocrate , qui n'auoit point encore de barbe , ſeroit veſtu en fille , & ſortiroit avec quelques autres femmes pour tromper les Gardes ; ce qui fut fait heureuſement : Lucie le mena en vn logis dans l'Iſle où elle luy mit vn enfant de ſept ou huit ans entre les mains , puis luy donna de quoy faire ſon voyage iuſques à Rome , & ainſi le laiſſa dans cette maiſon.

Hermocrate eſtant demeuré ſeul avec cét enfant , fut en peine long temps de ce qu'il en deuoit faire. D'un coſté il ſ'eſtoit engagé de parole pour le mener à Germanicus : d'autre il doutoit que ce preſent luy deuſt eſtre ^{peu} agreable, voyant vn petit fils d'Auguſte , & enfant de celle qui eſtoit ainſée de ſa femme Agrippine ; lequel pourroit quelque iour oſter l'Empire à ſes enfans. Touteſois il conſidera que Germanicus eſtant deſia adopté par Tybere ; par l'ordre meſme d'Auguſte , l'Empire deuoit eſtre aſſeuré dans ſa maiſon. En fin il reſolut en tout euenement , puis qu'il y eſtoit engagé de parole de le preſen-

ter à Germanicus, lequel en feroit puis apres ce qu'il luy plairoit. Il s'embarque avec luy, & dans quelques iours arriue à Rome: Incontinent il cherche les moyens de parler à Germanicus: mais cela estoit fort difficile, pour ce qu'il estoit empeché à faire les apprests pour son voyage d'Asie. En fin il luy parla vn iour, luy donna la lettre de Iulie, & luy dit qu'il auoit vn enfant à luy presenter, dont la veuë ne luy seroit pas desagreable. Germanicus le pria de le venir trouuer le lendemain à la mesme heure, & de luy amener cét enfant. Hermocrate ne manque pas à l'heure, & luy meine ce dépost qui luy auoit esté commis. Apres luy auoir dit ce qu'il auoit à luy faire sçauoir, ce Prince caressa vn peu l'enfant; & cependant qu'il interrogeoit Hermocrate de plusieurs particularitez; Tout à coup, voila plusieurs personnes qui sortent du derriere des tapisseries de la chambre, entre lesquelles estoit l'Empereur mesme, qui d'abord dit à Hermocrate: Voicy encore vn fourbe qui veut viure d'un pareil artifice que celuy qui se disoit estre le posthume Agrippa: mais ie confesse que celuy-cy a appuyé son inuention sur vne chose plus vray-semblable: car il y a plus d'apparence qu'on ait voulu sauuer vn enfant destiné à la mort, que de faire ressusciter vn homme qu'on auoit veu mourir en l'Isle de Planasie. Vous pouuez iuger quel fut l'estonnement d'Hermocrate, se voyant entre tant de gens, & deuant Tybere mesme, accusé comme le plus méchant & le plus artificieux de la terre: toutefois ayant beaucoup d'esprit & de courage, il se rassura, & allegua plusieurs raisons pour sa defense, lesquelles ne seruirent qu'à le faire iuger vn homme hardy & ingenieux, & capable de

grandes entreprises : il fut en mesmé temps enuoyé en prison, & destiné à la mort pour le lendemain.

Toutefois Germanicus, qui d'abord n'auoit osé s'opposer à la colere de l'Empereur, & qui auoit apperceu de l'innocence dans la naïueté des discours d'Hermocrate, & vne vertu courageuse dans la force de ses raisons, demanda la grace à l'Empereur de le faire venir encore vne fois en sa presence auant que de le faire mourir; & luy dit qu'il auoit plus d'intérêt que Tybere mesme à empêcher la creance de cette supposition; mais qu'il croyoit qu'Hermocrate fust innocent. On l'amene deuant eux, & Hermocrate ayant iugé dans la prison, que la retenüe qu'il auoit gardée en n'osant parler librement deuant tant de personnes des poursuites de Iulie, de peur d'offenser Agrippine sa sœur, pourroit bien luy causer la mort, avec l'infamie d'estre creu vn imposteur; il pria Tybere & Germanicus de l'ouïr tous deux en particulier, & alors il leur fit recit de son naufrage, des propos qu'il auoit entendus de Iulie & de Lucie, de tout ce qu'auoit fait & dit cette Princeesse pour l'attirer à son amour, de ses refus honnestes, & des sages aduertissemens qu'il luy auoit donnez pour la retirer de ses opinions desreglees: puis adiousta qu'il estoit d'une maison assez illustre & assez riche, pour donner sujet de se côntenter de sa fortune, sans songer à des artifices si pernicioeux; & anima son discours de tant de grace, de force, & de sentimens vertueux, que Germanicus l'ayant fait retirer, dit à l'Empereur qu'il l'estimoit innocent; & que les lettres que Iulie leur auoit escrites à tous deux quelques iours auparauant, pour faire prendre cét homme qu'elle accusoit de promener par les villes vn enfant qu'il disoit estre d'elle, & celuy qu'Augu-

ste pensoit auoir fait mourir, n'estoient sans doute qu'une inuention de la rage de cette Princeſſe, pour ſe vanger de ſes refus, & l'enuoyer à Rome receuoir vn ſuplice. Tybere meſme, malgré ſon cruel naturel, fut contraint de confeſſer qu'il croyoit la meſme choſe. On enuoya à Syracuſe ſ'enquerir de ſes parens, de ſes mœurs, & de ſon naufrage; & Eryx ſon pere, d'un coſté reſiouy de ſçauoir qu'il n'eſtoit pas mort, & de l'autre extrêmement en peine d'apprendre dequoy il eſtoit accuſé, & de la fortune qu'il couroit, alla luy-meſme à Rome pour penſer à ſa deſſenſe, & y porta de grandes richelſſes pour faire voir la condition dont il eſtoit, & remettre ſon fils en equipage au cas qu'il fuſt abſous. Les informations qui furent faites ſur les lieux ne firent autre choſe que rendre des teſmoignages de la vertu du pere & du fils, & les meſchans artifices de Iulie qui n'auoit donné à Hermocrate cét enfant ſuppoſé & qui n'eſtoit point à elle, qu'à fin de l'enuoyer perir à Rome, pour ſatisfaire au deſir furieux qu'elle auoit de ſe vanger de luy, ne ſeruirent qu'à luy donner plus aiſément la connoiſſance & l'amitié de Germanicus, qui eſtoit alors le refuge de tout ce qu'il y auoit de vertueux ſur la terre. Hermocrate qui entr'autres excellentes qualitez auoit vne ſageſſe admirable, le ſuiuit quelque temps en ſes voyages de l'Asie, & l'aſſiſta de ſes conſeils pour pacifier l'Armenie & accorder les differens des Romains avec les Parthes: mais tandis que ſa prudence agiſſoit, ſa valeur ne voulut pas demeurer oylieue, & ayant ouï parler de la guerre qui s'eſtoit eſmüe en Affrique ſous la conduite de Tacfarinas, il demanda congé à Germanicus d'y aller, où il donna tant de preuues de ſon grand courage & de ſa prudente conduite,

que Camille qui commandoit les Romains, luy donna de grands commandemens dans l'armée, & l'honora à diuerses fois de Couronnes & de loüanges aduantageuses. Apres que cétte guerre eut esté acheuée par la deffaitte entiere de Tactatinas, Hermocrate vint retrouver Germanicus qui estoit alors à Nicopolis, duquel il fut receu avec grande ioye, ayant adiousté à l'estime qu'il faisoit de luy pour sa sagesse, celle d'estre vn des plus vaillans de la terre. Il admiroit tellement la vertu de ce grand Prince qu'il ne le pouuoit quitter : Germanicus d'autre costé, aimant chetement Hermocrate, luy donnoit beaucoup de sujet de ne le point abandonner; & connoissant sa noblesse & ses vertus, croyoit que luy seul estoit digne de son amitié. Ils furent long temps de cettte sorte inseparables; & si les Dieux voulant punir la terre par les cruels Empeteurs qu'ils ont donné depuis, n'eussent si tost osté du monde cet aimable Prince, que l'on nommoit à iuste titre les Delices du genre humain, ie croy que iamais ie n'eusse connu Hermocrate, & que ie n'eusse pas esté la cause de tous ses malheurs. Mais Germanicus ayant esté empoisonné par Pison & Plancine en la Syrie, Hermocrate ne pût souffrir de reuoir Rome, où estoit vn Empereur si execrable, qui enuiant la vertu de son fils adoptif, & l'amour que toute la terre luy portoit, l'auoit priué cruellement de la vie; de sorte qu'il reuint à Syracuse, mais avec vn tel regret de la mort de Germanicus, que sa tristesse patessoit visiblement sur son visage, & le faisoit aimer de le voir fidelle à vn Prince si regretté de tout le monde. l'estois en ce temps-là des plus considerables de Syracuse, encore que ie n'en fusse pas originaire : mais on ne laissoit pas de sça-
uoir

voir la noblesse de ma naissance ; pource que mes ayeuls qui sortirent de Carthage , lors qu'elle fut destruite par les Romains , estoient de la race des Princes Hamilcar & Hannibal ; avec cela i'auois des biens esgaux , s'il se peut dire , à ma noblesse ; & il ne m'estoit reste que ma mere , de qui tous les soins ne tendoient qu'à me choisir vn party qui me fust auantageux.

Diccarque venu depuis plusieurs siècles de Thimoleon , & qui auoit des biens pour soustenir le rang que luy donnoit sa naissance , se presenta des premiers. Il n'esparigna aucun soin ny aucun artifice , pour faire en sorte qu'il mepûst espouser , & tascha par mille moyens de donner à ma mere de grandes impressions de sa probité , pource qu'il la cognoissoit d'vne vertu si grande qu'il voyoit bien qu'elle seroit imprenable , si ce n'estoit par ce costé. Mais Hermocrate arriuant dans Syracuse , acquit sans y penser ce que l'autre essayoit à gager par mille subtilitez : car chacun estant déjà preuenu de la grande reputation qu'il auoit acquise , ayant fait tant de belles actions , & ayant este honoré de l'amitié d'vn si grand Prince , on reconnut que ce n'estoit pas sans cause que la renommée l'esleuoit si haut , pource que sa noblesse estoit accompagnée de tant de vertus , & qu'il adioustoit à ses bonnes qualitez vne modestie si honneste , avec sa tristesse qui luy donnoit encore de la grace , qu'il n'y auoit personne qui n'eust pour luy de l'amour & du respect.

En mesme temps ayant esté esleuée sous la conduite de la plus sagemere qui fust au monde , ie me faisois aussi assez estimer par vne grande retenue que ie gardois , taschant de luiure sa vertu , & de luy donner tous les conten-

HHHh

remens qu'elle pouuoit esperer d'une fille. Je ne scay ce qu'Hermocrate remarqua en moy qui luy plût, soit une apparence de vertu ou quelque autre chose, mais il me tesmoigna avec beaucoup de grace & de respect le dessein qu'il auoit de me seruir. Pour moy qui n'auois pas enuie de faire un choix, & qui voulois le laisser au iugement de ma mere, ie feignis tousiours de n'entendre point ce qu'il me vouloit dire : toutefois ie n'estois pas marri lors qu'il s'approchoit de moy, & ie prenois peine à l'entretenir des plus honnestes discours qu'il m'estoit possible. Dicearque n'estoit pas en telle estime auprès de moy : pource que ie le connoissois pour un homme violent & artificieux, & ie iugeois que mon humeur ne s'accorderoit pas bien avec la sienne. Ma mere connut aussi tost le dessein d'Hermocrate, & en fut bien contente : de sorte qu'elle n'eut iamais desagreable qu'il me parlât, & la premiere fois qu'il trouua l'occasion de venir chez nous, elle luy tesmoigna que l'entree de sa maison luy seroit tousiours ouuerte. Il receut cette permission avec beaucoup de respect, & s'en seruit fort discrettement : mais Dicearque ne pût souffrir de voir un rival si bien traité, & de se trouuer si esloigné de nos bonnes graces ; & croyant n'en auoir esté reculé que par l'auancement d'Hermocrate, il eut recours à mille artifices, & en fin contrefit une lettre, qu'il enuoya à ma mere, comme si Eryx pered'Hermocrate, la luy eust escripte, par laquelle il l'aduertissoit de ne plus receuoir son fils chez elle, & qu'il auoit d'autres desseins pour luy ; que si elle n'empeschoit d'elle-mesme ces frequentes visites d'Hermocrate, il seroit contraint de le faire, par un moyen qui esclatteroit, & dont le bruit ne luy seroit

pas agreable. Voyez quelle ruse , voila donc ma mere bien eltonnée, & encore plus offensée. Aussi tost qu'Hermocrate la vint voir , elle le pria de ne plus venir chez elle : toutefois avec tant de retenüe , qu'elle ne luy tesmoigna point de mescontentement , croyant qu'il n'auoit aucune part en ce queluy auoit escrit son pere. Hermocrate , bien que ma mere ne l'eust point mal traité , fut toutefois bien surpris , & la supplia mille fois de luy dire quelle faute il auoit pû commettre contre le respect qu'il nous deuoit. Elle ne luy en vouloit apprendre aucune chose : mais elle luy dit en fin qu'Eryx n'auoit pas agreable qu'ils fussent amis. Il confessa que son pere luy auoit bien propose quelque mariage , mais que c'estoit vne chose si esloignée , qu'il ne croyoit pas mesme qu'il y songeast plus. Non non , Hermocrate , reprit-elle , il m'a destendu par escrit de vous plus receuoir ceans : mais ie trouue qu'il pouuoit tesmoigner son auersion pour nous , vn peu plus honnestement. Ah ! Madame , dit-il , ce que vous me dites est-il bien possible ? Il est tellement vray , respondit-elle , que sans contreuenir à son desir & à mon honneur , ie ne puis pas vous souffrir ceans dauantage. Alors il s'en alla outre de deplaisir , & ne sçachant plus comment il deuoit viure : pource que comme il auoit beaucoup de respect & d'amour pour son pere , il auoit aussi beaucoup de ressentiment de l'iniure qu'il croyoit en auoir receüe , tellement que la pietie & la colere faisoient dans son ame vn combat qui ne luy donnoit point de repos. Lors qu'il estoit chez luy , il n'osoit leuer les yeux sur Eryx , de peur de l'offenser par vn mauvais regard : pource qu'il luy eust esté impossible de le voir sans douleur. Il ne vouloit pas desirer du mal à

son pere, & ne pouuoit toutefois luy vouloir du bien: de sorte qu'ayant vescu quelque temps dans ce trouble d'esprit, qu'il ne pouuoit luy-mesme demesler, en fin il tomba malade; & plus Eryx luy rendoit de soins, plus son mal augmentoit. Ce bon pere plein de douleur de voir en ce danger son fils qu'il auoit raison de cherir, tant pource qu'il estoit aimable, que pource que c'estoit le seul qu'il eut, lequel encore ne donnoit aucun soulagement à son ennuy, ne pouuant souffrir sa veuë, & refusant de sa main les remedes qu'il luy presentoit, ne sçauoit iuger d'où venoit l'auersion qu'il auoit pour luy, & versoit vne infinité de larmes. Hermocrate d'vn autre costé voyant son pere dans ces ressentimens, s'accusoit luy-mesme comme vn meschant fils, de luy donner tant de tourmens; & ne sçauoit s'il se deuoit desirer ou mort ou viuant, sçachant bien qu'en mourant il emplissoit d'ennuis & de regrets la vieillesse de ceux qui l'auoient mis au monde, & en viuant il ne pouuoit esperer de contentement, ny leur en donner. Mais en fin Eryx pria sa femme de luy demander quel sujet il auoit de ne le point aimer, & si iamais il luy auoit donné aucun sujet d'estre mal content de luy: qu'ayant receu des Dieux vn fils si vertueux & si obeissant, il s'estimeroit bien ingrat enuers eux & enuers luy-mesme, si iamais il luy estoit arriué de luy donner du desplaisir. Sa mere tascha de tirer de luy ce secret, mais iamais il ne pût estre persuadé d'accuser son pere; & il se resoluoit plustost de mourir, que de laisser aller vne parole qui tesmoignast peu de respect. Elle s'efforça plusieurs fois de luy faire declarer la douleur, qu'elle se doutoit bien qu'il cachoit,

encore qu'elle n'en connust pas la cause ; mais il luy fut impossible d'en rien tirer. A la fin ce bon pere outre d'affliction , ne pût se contenir dauantage : mais s'approchant du liêt de son fils , il se mit à genoux deuant luy , & plein de larmes le pria de luy dire si iamais il luy auoit desplu en quelque chose. Hermocrate honteux de cette submission , & croyant receuoir plustost vne iniure qu'un honneur , se mit à genoux sur son liêt , & se courbant deuers son pere , le pria en l'embrassant de se releuer , & de ne point faire cette honte à sa pieté , par vn abbaissement indigne de luy. Non , luy dit Eryx , iamais ie ne me reueleray que vous ne m'ayez dit en quoy ie vous ay donné du desplaisir. Ah ! mon pere , dit-il , faut il que ie sois si mal-heureux que de n'auoir pas inuiolablement suiuy toutes vos volontez ? & que mes ressentimens ayent repugné à vos desirs ? Que voulez vous dire , reprit Eryx , parlez , mon fils , plus clairement ; car ie ne pense point que iamais vous ayez resisté à ce que i'ay desiré de vous , & ie vous promets aussi de n'estre iamais contraire à ce que vous desirerez. Non , non , mon pere , repartit Hermocrate , soyez bien assure que ie ne vous seray iamais desobeissant , & que ie m'empescheray bien pour l'amour de vous de penser à Euphrosyne ; mais. Alors il s'arresta , & son pere luy dit. Acheuez , mon fils , & ne craignez point de me dire ce que vous souhaitez ? vous m'apprendrez ce que ie ne sçay point encore , & ce que ie desire peut-estre autant que vous. Ah ! mon pere , dit Hermocrate , s'il m'est permis de vous faire quelque reproche , vostre lettre n'a pas tesmoigné que vous le desiriez. Quelle lettre ? respondit-il. Mais pour ne

vous pas ennuyer, continua Euphrosyne, ce bon pere sceut en fin que l'on auoit enuoyé à ma mere de sa part vne lettre supposée, & sans tarder dauantage il vint chez nous, & supplia ma mere de la luy monstrier, & luy dit qu'il falloit qu'elle eust esté enuoyee par quelque demon, qui auoit failly à faire perdre la vie à son fils. Lors qu'il l'eut veüe, il tesmoigna de telle sorte qu'il estoit innocent de cette lettre, & luy fit tant de satisfactions, qu'elle ne pût auoir aucun soupçon de luy, & fit parestre qu'elle auoit beaucoup de regret du mal d'Hermocrate, de qui elle faisoit vne grande estime. Cela fut cause qu'ils conclurent ensemble nostre mariage auant que de se separer; & recherchant d'où pouuoit estre venuë cette lettre, on iugea que ce deuoit estre de Diccarque, qui depuis ce temps-là m'auoit plus tesmoigné de passion que iamais. Voila comment Diccarque voulant empescher nostre mariage, l'auança; faisant asssembler par son inuention, ceux qui eussent eu peut-estre de la peine à le pouuoir faire autrement. Si tost qu'Hermocrate apprit ces bonnes nouuelles, il sembla qu'on luy redonnoit la vie, & nous l'allasmes souuent visiter iusques à ce qu'il fut du tout guery. Alors nous fusmes mariez ensemble avec mille réjouissances, & passasmes trois ou quatre années avec tous les contentemens qui se peuuent imaginer, sans toutefois auoir encore d'enfans. Cependant Diccarque n'ayant pû supporter que nostre mariage se fist lors qu'il seroit à Syracuse, s'en estoit alle à Corinthe, où il fut enuiron deux ans; au bout desquels il reuint en Sicile avec Acidalie qu'il auoit espousée. Incontinent apres il se declara ennemy d'Hermocrate, qui ayant

alors perdu son pere , sembloit tenir le premier lieu dans la ville : il pratiqua de tous costez des factieux , pour faire vne ligue contre luy , & ne sembloit auoir autre but en toutes ses actions que de luy desplaire , & de le ruiner s'il estoit possible. En fin il chercha rant de moyens pour paruenir à son dessein , qu'il y en eut vn qui réussit. Vous sçauiez , peut-estre , poursuint Euphrosyne , comment il fit porter de nuict des armes par dessus les murs de nostre maison ; & les fit ranger comme pour estre prestes en vne occasion : en mesme temps il alla aduertir les principaux de la ville , qu'Hermocrate se vouloit faire Tyran , & que cela se reconnoistroit chez luy. On vint chez nous la nuict mesme , & on me rauit d'entre les bras mon cher Hermocrate , pour le mener prisonnier. Vous pouuez iuger quel fut le trouble qui me surprit : toutefois en ce mal-heur ie receus quelque consolation de l'innocence de mon mary ; & lors que les amis de Dicearque sollicitèrent d'un costé pour le faire condamner à la mort , ie fis ce que ie peus pour faire voir la meschanceté de cet artifice , & quelle apparence il y auoit qu'un particulier se voulust faire Tyran d'une ville qui estoit de l'Empire Romain. Mais tout ce que ie pûs obtenir , fut de moderer la condamnation à un bannissement pour cinqans , & qu'il nous fust donné quinze iours pour mettre ordre à nos affaires. Toutefois ce temps ne seruit qu'à nostre mal-heur : pource que Dicearque ayant sceu que nous nous deuions retirer à Carthage , qui estoit le lieu de mon origine , & ne se contentant pas de nostre bannissement , eut loisir de pratiquer des Corsaires , qui firent paction avec luy , moyennant beaucoup d'ar-

gent, qu'ils nous enleuoient en passant de Lylibée à Carthage ; puis apres , qu'ils nous iroient vendre séparément à quelques Barbares , de peur que nous ne peussions iamais nous reuoir , ny retourner en nostre patrie ; & pource que i'estois fort grosse , en mesme temps il leur fit promettre qu'ils feroient mourir tout ce qui naistroit de moy , iusques à ce que nous eussions esté vendus. Apres que nous eusmes donné le maniment de tout nostre bien à Diocles nostre amy pour l'administrer durant les cinq années du bannissement, nous partismes , accompagnez de Telephe , ne sçachant point les mal-heurs que Dicearque nous auoit preparez : mais ie fus si heureuse que d'accoucher de vous à Lylibée, dit Euphrosyne à Melinte , où ie demeuray plus de quinze iours , attendant que ie puisse souffrir la mer ; & il sembloit que vous auez voulu sortir en ce temps-là , pour retarder autant qu'il vous estoit possible le mal-heur qui deuoit arriuer à vos parens. Nous nous auisâmes heureusement de vous laisser secrettement dans la Sicile , & de vous donner à Telephe ; pource que si nous vous eussions emporté, vous ne seriez pas viuant à cette heure : puis nous prîmes congé de nostre pais avec beaucoup de larmes , & allâmes pour entrer dans le vaisseau : mais il m'arriua vn mal-heur qui nous fut vn augure que ce voyage nous seroit bien funeste : car pensant entrer dans le nauire le pied me faillit, & ie tombay dans la mer : l'affection d'Hermocrate fut telle qu'il se ietta aussi tost apres moy , & en nageant me sauua , & me remit à bord. Apres nous estre vn peu sechez, nous ne laissâmes pas de partir : & pource que le traject n'est pas grand , nous apperceusmes incontinent

nent vn vaisseau leger qui estoit party des costes, & qui nous attaignit en peu de temps. Hermocrate iugea que c'estoient des Corsaires, & pria ceux qui estoient avec luy, de prendre les armes & de se bien deffendre. Mais ils estoient fort peu, & encore n'estoient-ils pas en estat de combattre, ne s'attendant pas qu'on les deust attaquer en si peu de chemin qu'ils auoient à faire. Toutefois ils ne laisserent pas de se deffendre courageusement, & Hermocrate ne fut point pris qu'il n'en eust mis plus de six à ses pieds. Sa valeur fut estimée des Pyrates, qui en sa consideration pardonnerent à ceux qui estoient avec nous, & prenant ce qu'il y auoit de meilleur dans nostre vaisseau, nous firent entrer dans le leur. Apres nous auoir fait passer beaucoup de mer, ils nous menerent iusques au lieu de leur retraite; & ce fut vne chose estrange de la fidelité que ces Pyrates garderent à Dicarque en ce qu'ils luy auoient promis, pource qu'ils pouuoient esperer de nous vne plus grande rançon que ce qu'ils auoient eu de luy, & cependant ils ne manquerent point à ce qu'ils luy auoient iuré. Toutefois ils nous firent quelque grace, pource que nous estions en honneur parmy eux, & accommoderent de tout ce qui nous estoit necessaire. Ils differerent trois ans entiers à nous vendre, pendant lesquels i'accouchay de deux enfans, qu'ils firent mourir comme ils l'auoient arresté: puis apres allerent vendre mon mary en vn lieu bien esloigné. Mais pour moy ils me voulurent retenir, quelque priere que ie leur fisse de ne me point separer d'avec Hermocrate, pource qu'ils m'auoient auparauant apporté à nourrir vn fils de Roy fort ieune qu'ils auoient pris en quelque endroit, & auquel i'auois mis toute mon affection, me consolant par la nourriture que ie faisois, de nostre cruelle captiuité & de nos enfans

morts, attendant que la fortune se changeast. Ces cruels ne furent iamais touchez, ny des supplications & des promesses aduantageuses d'Hermocrate, ny de mes larmes, & l'emmenerēt malgré moy en vn lieu où ie croy qu'il a main-tenāt finy ses iours. Tout mon entretien & ma consolation dans les cruels ennuis que ie souffrois, n'estoient qu'en la nourriture que ie faisois du petit Prince qui fut nommé Eurymedon, lequel me portoit aussi beaucoup d'affection, & en croissant donnoit des tesmoignages non seulement de la grandeur de son extraction, mais encore d'un cœur bien genereux. Lors qu'il me voyoit affligée, il taschoit à m'appaiser, & me consoloit de l'esperance qu'il me donnoit, que si tost qu'il auroit quelque pouuoir, il me rendroit la liberté, & tascheroit de descouurir où estoit Hermocrate pour me le redonner. Toutefois quand il eut le commandement sur tous les pirates, il ne pût si tost effectuer ce qu'il m'auoit promis, estant retenu par eux de le faire, pour ne point contreuenir à leurs loix. Il y a enuiron vn an, que voulant aller en mer, il me promit qu'il m'emmeneroit avec luy: mais ie tombay si malade qu'il luy fut impossible. Depuis quelques iours il est reuenu pour assembler toutes les forces des pirates en dessein d'aller à vne grande entreprife, de laquelle ayant peur de ne point retourner, & me voulant deliurer sans que les pirates le sceussent, il pria vn nommé Amyntas qui l'estoit venu trouuer dans vn esquif de la part de quelques vns de ses amis, de me sauuer secrettement avec luy, lors qu'il reuiendrait icy pour trouuer des personnes qu'il cherchoit. Cēt Amyntas eut soin de moy comme de sa mere, & m'amena en cette ville, où ne rencontrant point ceux qu'il pensoit trouuer, il m'a laissée avec les personnes que vous voyez,

pour me seruir & m'accompagner iusques à Syracuse : Amyntas sçachant qu'Eurymedon estoit près d'icy pour assister ceux-là mesmes dont il estoit en peine , l'est allé trouuer , & ie croy qu'ils s'en sont allez ensemble , n'en ayant pû auoir de nouuelles. Pour moy en attendant que ie fusse guerie du mal qui m'est arriué , & de la peine que i'ay endurée en ma fuite , ie suis demeurée en ce logis , où i'ay esté bien estonnée de voir ce Dicearque , auteur de tous nos desplaisirs , de qui i'auois appris toutes les meschancètez par le moyen d'Eurymedon ; & à qui toutefois ie ne sçauois plus vouloir de mal , puis qu'il m'a redonné mon cher Melinte , & qu'il me fait concevoir quelque esperance , estant deuenu nostre amy , de nous aider à trouuer Hermocrate vostre pere.

Euphrosyne finit ainsi , & Melinte luy conta comme ils sçauoient qui estoient Eurymedon , & Amyntas , & qu'il esperoit d'apprendre bien tost par le moyen d'Eurymedon , ce qu'estoit deuenu son pere ; à quoy il employeroit toute la diligence qui luy seroit possible. Il pria en suite cette vertueuse mere , de pardonner à Dicearque pour l'amour de sa chere Ariane , ce qu'elle promit , & elles s'embrasserent encoré avec beaucoup d'affection. Il luy dit alors la pluspart de ce qui leur estoit arriué , & entr'autres choses la fidelle amitié de Telephe & l'infidelité de Diocles , & comment il auoit esté reconnu fils d'Hermocrate. Puis ces discours estans finis , chacun se retira pour s'aller coucher , & pour attendre avec repos les ceremonies & les reioüissances du lendemain.

Fin du douzieme Liure de l'Ariane.



Lignon juu

Belle Jolie.

Avec L'Enfer.



LE
TREIZIESME
LIVRE DE
L'ARIANE



EPENDANT que la sage Euphrosyne entretenoit ainsi Melinte; Palamede, à qui la perte d'Epicharis ne donnoit point de repos, ne voulut pas perdre le temps qu'il pouuoit employer à la chercher : il prit vn cheual, & sortit de Nicopolis, & alla par tout aux enuirs pour voir si elle ne se seroit point retiree en quelque lieu hors de la ville. Il passa inutilement en cette recherche tout le soir, & vne grande partie de la nuit qui estoit fort obscure, & lors qu'il se retiroit vers la ville, il entendit deux hommes à cheual venir à luy, qui parloient de Melinte & d'Ariane, en tesmoignant beaucoup d'animosité contre

eux. Il ne les pût reconnoistre, pource que l'obscurité estoit si grande qu'il ne les voyoit pas mesme. Mais lors qu'ils furent passez il voulut sçauoir dauantage de leur secret, & apres auoir lié son cheual à vn arbre il les atteignit à pied le plus promptement qu'il pût : puis allant d'un pas leger auprès d'eux sans se faire entendre, il escouta leurs discours quelque temps, sans pouuoir encore rien apprendre : mais en fin l'un des deux reprit ainsi. Quoy ? i'auray amené de Syracuse avec tant de respect & de soin ce traistre & ce pariure vieillard ? ie luy auray si long temps fait la cour dans Corinthe ? & depuis ie l'auray suivi par tous les ports de la Grece pour vanger ses iniures ; & lors qu'il sera satisfait, il n'aura plus de soin si ie le suis aussi ? Palamede reconnut alors par ce discours, & par la voix, que c'estoit Pisistrate, qui adiousta. Donc ie souffriray que Melinte espouse celle qui m'est promise, de quil'amour me donne tant de desirs & d'inquierudes ? ils s'en iront ensemble contents, & me laisseront icy plein de despit, de honte, & de rage ? Cependant ie parestray sans cœur, & ne leur feray pas sentir ce que peut vn homme de ma condition trahy de la sorte, & qui ne manque pas de ressentiment ? Non, non, s'ils sont eschappez des mains de Trebase, ils ne sont pas sauuez des miennes ? & s'ils s'arrestent encore vn iour icy pour s'espouser, ie suis assuré de rendre leurs nopces bien funestes. Mais, respondit celuy qui l'accompagnoit, estes vous bien assurez qu'ils sont encore viuans ? l'ay veu ce soir, reprit Pisistrate, Arcas l'affranchy de Melinte qui menoit Dicearque lié, & qui l'a fait entrer dans vne maison. l'ay enuoyé vn des miens pour les suivre, & luy ay commandé qu'il sçeuist ce que l'on faisoit dans ce logis, feignant d'y

auoir quelque affaire. Il m'a rapporté qu'il a veu Trebace, Melinte, Palamede, Ariane & Diccarque qui estoient bien d'accord ensemble, & que ce n'estoit que resioüissance parmy eux, & ie ne doute point de ce qu'il m'a dit, pource qu'il les connoist tous aussi bien que moy. Mais, repartit celuy à qui il parloit, quand vous aurez dit au Gouverneur de l'Épire, qu'il fasse mourir Melinte & Palamede, pource qu'ils sont ennemis de l'Empereur, & que Trebace auoit esté enuoyé de la part de Neron pour les mettre à mort, pensez vous qu'il vous croye? Pifistrate respondit, Vous ne sçavez donc pas qu'ils ont desia esté publiez par toutes les Prouinces pour ennemis de Cesar, & que l'on a ordonné de les tuer en quelque lieu qu'ils soient trouuez? Non, non, Maxence ne peut différer de les faire mourir, pource qu'il est aduertý de l'Ordonnance de l'Empereur, & s'il en fait quelque difficulté, ie le menaceray de l'accuser luy-mesme deuant Neron. Palamede connoissant de quelle sorte Pifistrate se vouloit vanger, se resolut de le preuenir en le tuant luy-mesme: il mit aussi tost l'espée à la main, & l'arrestant par les resnes de son cheual, de peur qu'il ne luy eschappast, il luy porta vn grand coup dans le corps. Pifistrate s'escria que l'on l'assassinoit; celuy qui estoit avec luy prit la fuite, & Pifistrate n'eust iamais eschappé de ce d'anger, sans vn malheur qui arriua à Palamede: car le pied luy glissa, lors qu'il vouloit redoubler, & il fut contraint de quitter la bride du cheual, qui emporta son Maistre si loin qu'il ne le pût iamais atteindre. Palamede fut contraint de reuenir sur ses pas, & ayant retrouué son cheual s'en retourna dans la ville, lors que le iour commençoit à poindre. Estant arriué au logis il conta son auanture à Melinte & aux autres,

& leur conseilla que sans s'amuser à faire leurs nopces, ils s'en allassent le plus promptement qu'ils pourroient : pource que Pisistrate s'estant eschappé de ses mains ne manqueroit pas d'aller trouuer Maxence, si ses blessures ne l'en empeschoient. Ces nouuelles apporterent encore vn trouble bien grand aux contentemens qu'ils esperoient. Ariane alors supplia Melinte de ne plus desirer que leur mariage se fist, qu'ils ne fussent en vn lieu plein de repos & de seureté, & luy dit qu'il songeast premierement à son salut, & qu'elle tascheroit apres à luy rendre la vie la plus heureuse qu'il luy seroit possible. Melinte fut contraint de luy obeir, & Euphrosyne approuuant la sagesse d'Ariane, fut de son aduis. Aussi tost ils songerent tous à la retraite, & ils eurent bien du regret d'auoir fait partir le vaisseau ; pource qu'ils se fussent sauuez plus seurement par mer, encore que le chemin fust plus long : toutefois ils se resolurent d'aller par terre, & de mettre leur bagage dans des chariots, & crurent, qu'estant plus de cinquante de leur troupe en contant leur fuite, il faudroit vne armée pour les attaquer. Ils s'encouragerent ainsi de partir pour sortir de l'Epire auant que Maxence qui en estoit Gouverneur, fust aduerty par Pisistrate, & ayant acheté des cheuaux autant qu'il leur en falloit, ils se mirent en chemin, se confiant aux Dieux & en leurs courages. Cette troupe si belle & si persecutée des hommes, eut le bon-heur de passer l'Epire en trois ou quatre iournées, & se trouua en fin dans la Thessalie sans aucune fortune. Ils ne manquoient pas de diuertissemens & de plaisirs, ayant au moins avec eux ce qu'ils cherissoient le plus ; dequoy ilss'estimoient si heureux qu'il sembloit qu'ils ne desirassent que la continuation de cette sorte de vie. Toutefois

Melinte

Melinte ne laissoit pas de s'estonner ; de ce que le malheur le persecutoit avec tant d'opiniastreté, & ne leur permettoit pas seulement vn iour de repos , pour les laisser iouïr d'un bien qu'ils desiroient , & qui leur eschappoit tousiours quand ils pensoient l'auoir atteint ; & sur cette pensée vn iour il fit ces vers.

*Fortune incessamment cruelle,
Source eternelle de mal-heurs,
Pourquoy d'une atteinte nouuelle
Nous remets tu dans les douleurs ?
O Dieux , par quel arrest seuer
Soudain rentrez vous en colere
Quand nous vous croyons appaisez ?
Pour moy , ie suis las de me plaindre :
Penseriez vous me faire craindre
La mort que vous me refusez ?*

*Je croy qu'une immortelle enuie
Fait que les Astres coniurez
Troublent les plaisirs que ma vie
A plus ardamment desirez.
Ces cruels poussiez de leur rage
Tousiours excitent quelque orage
Quand ie pense arriuer au port ;
Puis forcez par mon innocence,
Ils arrestent leur violence,
Et n'osent me donner la mort.*

*Aussi le bien que ie desire
Est il trop grand pour des mortels :*

KKKk

*Je prefere l'heur où i'aspire
 A celuy d'auoir des Autels.
 Ciel, ne sois pas ialoux encore
 Si ie la vois & ie l'adore ;
 Je borne là tous mes plaisirs :
 Modere doncques ta colere ,
 Puis que dans ce bien ie modere
 L'ardeur de mes autres desirs.*

*Le desplaisir en sa presence
 N'oseroit s'attaquer à moy :
 Le despit & l'impatience
 S'esloignent lors que ie la voy ;
 Le desespoir perd son audace ,
 Il s'ensuit , & cede la place
 Aux ris , aux plaisirs innocens ;
 Et l'Amour quittant ses malices ,
 M'offre les plus cheres delices
 Dont il puisse rauir nos sens.*

*Mais vne chose m'espouuante :
 Je parle trop imprudemment ;
 Si le Ciel sçait que ie me vante ,
 L'auray quelque nouveau tourment.
 Mon ame , cache ceste ioye ,
 Fay que ce jaloux ne la voye ,
 Si tu veux long temps en iouir :
 Ou bien tost cét inexorable
 Pour te rendre encor miserable ,
 La pourroit faire esuanoïir.*

La presence d'Ariane donnoit ainsi beaucoup de soulagement à l'amour de Melinte : mais il n'y en auoit point en toute la troupe de plus affligé que Palamede, qui regrettoit Epicharis, & qui ne rencontroit aucun passant à qui il n'en demandast des nouuelles. Il estoit encore en quelque contrainte auprès de Diccarque, n'osant faire parestre deuant luy cet amour, & estoit priué de la consolation de pouoir au moins se plaindre librement. Euphrosyne n'auoit point de plus grand plaisir que de se faire reciter par Arcas ou par quelqu'autre, la vie admirable de son fils, & de combien de merueilleuses qualitez le Ciel l'auoit pourueu ; dequoy elle ne cessoit de remercier les Dieux, & de s'estimer bien-heureuse. Elle auoit desia des soins passionnez pour la belle & vertueuse Ariane, de qui elle receuoit les devoirs respectueux avec beaucoup de contentement. Lepante & Cylenie n'apportoient pas peu d'ornement à cette belle compagnie, & la diuertissoient par leur belle humeur, & par la gentillesse de leur esprit, & tous ensemble faisoient vne troupe des plus agreables voyageurs qui se pussent rencontrer en toute la terre.

Desia ils auoient trauersé toute la Thessalie, & approchoient de Larisse qui est proche de la mer, lorsqu'ils entrerent dans vn village où ils virent tous les habitans en grand trouble. Ils couroient de tous costez ne pouuant trouuer de seureté dans leurs maisons, & ne sachant en quel endroit se retirer. Melinte s'adressa à quelques vns de ces hommes esperdus, & leur demanda ce qui cauoit cette frayeur & ce desordre. Ils luy conterent qu'un nombre effroyable de Scythes, apres auoir trauersé le Bosphore de Thrace & passé la mer Egée, estoit venu

prendre terre en Thessalie, & rava geoit toutes ces côtes en tirant vers Larisse. Melinte les rassura le mieux qu'il pût, & fut d'auss qu'ils se retirassent tous dans cette ville le plus promptement qu'ils pourroient : que pour estre mieux receus ils y portassent la plus grande quantité de bled & d'autres viures qu'ils auroient : il leur promit de leur servir d'escorte, & les pria de n'auoir point de crainte. Cette resolution estant prise entr'eux, il rassembla tous ceux qui estoient espars, & leur ayant fait charger dans des chariots tout ce qu'ils auoient de provisions, il fit armer les plus forts, qui faisoient iusques à trois cens hommes, sans ceux qui estoient avec luy : puis il fit faire bonne garde toute la nuit ; & le lendemain dès le matin il disposa les vieilles gens avec les femmes & le bagage au milieu, & mit ceux qui pouuoient servir à combattre, partie à la teste, partie aux costez, & le reste à la queue. Il donna l'auant-garde à conduire à Lepante, l'arriere-garde à Palamede, & il se reserua le gros pour auoir l'œil par tout. Il vouloit deferer le commandement à Dicearque : mais ce vieillard se sentoît alors indisposé, pource qu'il esprouuoit mille ennuis & mille regrets en son ame, & ne pouuant employer son esprit à donner l'ordre, il pria Melinte de prendre cette charge. Cependant Palamede & Lepante s'estoient armez avec Melinte, des belles armes qu'ils auoient dans leur bagage, & se preparoient à bien deffendre les personnes qu'ils conduisoient, contre toutes les puissances qui les pourroient attaquer ; & ils partirent ainsi en bon ordre en s'acheminant vers Larisse. Ils n'eurent pas si tost quitté le village de deux mille pas, qu'ils apperceurent vn gros de Scythes d'environ deux mille hommes qui ve-

noient à eux. Melinte anima ses soldats à combattre vaillamment, & redoutant la lâcheté qui est ordinaire à des païsans, les enflamma par la considération qu'ils auoient à deffendre non seulement leurs personnes, mais encore leurs parens, leurs femmes, leurs enfans & leurs biens: que s'ils fuyoient, ils les abandonnoient tous à la mercy des ennemis; & que s'ils monstroient auoir du cœur, ils ne trouueroient rien de si lâche que ces Barbares, qui sçauent bien poursuiure cruellement ceux qui les fuyent, mais qui ne manquent point aussi à fuir ceux qui osent les attendre. Apres les auoir encouragez, il donna ordre à Lepante d'aller charger les Scythès, qui pensant qu'ils fussent beaucoup plus de gens à cause du bagage qui tenoit beaucoup de lieu, se deffendirent seulement comme ayant à combattre vn nombre esgal d'ennemis: toutefois ils ne laisserent pas de receuoir courageusement Lepante, & tirerent grande quantité de traits sur sa troupe. Melinte s'auança vn peu apres, & ses gens voyant vn Chef si hardy, ne manquerent point à le suiure. Il auoit commandé à ses soldats de ioindre les ennemis le plustost qu'ils pourroient, esperant que les Scythès n'ayant plus l'estendue qui est necessaire pour tirer leurs fleches, seroient contraincts d'en venir au combat de l'espee, auquel ils n'estoient nullement adroits. Cette ruse réussit comme il l'auoit esperé: pource que les Scythès ayant esté attaquez de près par Melinte, & ne pouuant plus se seruir de leurs arcs, ne sçurent soustenir les grands coups d'espee avec lesquels il les assaillit: par tout où Melinte se portoit, les Barbares faisoient iour: toutefois ne fuyant que luy, ils faisoient du desordre d'vn autre costé, & tenoient ainsi la victoire en balance. Mais Palamede

de, fuiuant l'aduis que leur auoit donné Trebace , & se fit appeller Alcydamas , & Palamede Polydore. On les logea dans vne des plus apparentes maisons de la ville, où Dicearque se mit au lit aussi tost, se sentant malade, & pouuant à peine souffrir le iour pour les ennuis qui le faisoient : Euphrosyne , Ariane & Cyllenie se delassèrent du travail du chemin , & leurs craintes furent vn peu apaisées. Les premiers de la ville vindrent receuoir l'ordre d'Alcydamas , qui ayant sceu que les habitans pouuoient bien faire iusques à cinq mil hommes de guerre, eurent qu'avec ce nombre ils pourroit se bien defendre : puis ayant pris Lepante & Polydore, il alla avec eux & les principaux de la ville visiter tout autour de quelle sorte elle estoit deffenduë de murs & de fossez, & quels endroits estoient les plus foibles. Apres s'estre assuré de tous costez , il disposa des gens aux portes, & aux lieux qu'il iugea importans , & pour les soldats qui n'estoient point de garde, il les obligea de faire vn continuel exercice des armes , afin de les aguerrir , & qu'il s'en peust seruir lors qu'il en auroit besoin, & en mesme temps il despescha vn des siens pour aller trouuer Eurymedon en l'Isle de Lesbos, & l'aduertir qu'ils auoient besoin de secours.

Après auoir passé huit iours à faire faire seulement vne feure garde , & à instruire ses gens , il iugea qu'il estoit temps de faire quelque sortie : ayant voulu laisser couler ce temps sans se monstrier aux Scythes , afin de leur faire allentir leur premiere fureur, & qu'ils creussent que ce fust par vne grande crainte que l'on auoit d'eux , que l'on se tenoit enfermé. Cela les rendit plus negligens , & les fit espandre en diuerses troupes, pour aller fourrager à l'en-

tour, attendant qu'ils se resolussent de donner vn assault. Alcydamas prit son temps, & laissant Lepante pour commander dans la ville, sortit avec Polydore à la teste de quinze cens hommes, & alla charger les Scythes diuisez & en desordre, desquels il laissa plus de quatre mil sur la place: puis voyant vn gros de plus de dix mille hommes qui venoit les charger, il fit sa retraite, n'ayant pas fait perte de plus de trente hommes en ce combat.

Alcydamas fut receu dans la ville, avec les cris de ioye de tout le peuple, qui le regardoit comme son Dieu protecteur: mais rien ne luy estoit si agreable que les caresses de la belle Ariane, qui au retour de ses sorties dont il reuint souuent ainsi plein de gloire, le receuoit victorieux, & prenoit la peine de le desarmer, se trouuant dans vn excès de ioye de le reuoir, & d'estre deliurée des craintes qu'elle auoit lors qu'il estoit dehors. Alcydamas estoit alors dans vn rauissement nonpareil, bien qu'il fust honteux de la peine que prenoient ces belles mains qui estoient trop delicates pour manier le fer: il les baisoit à chaque fois qu'elle les portoit, ou pour deffaire son hausse-col, ou ses brassals; & lors qu'il estoit entierement desarmé, il se pasmoit de plaisir en luy donnant de plus estroits & de plus libres embrassemens. Ces caresses se faisoient en presence de la sage Euphrosyne, qui estoit transportée de ioye, considerant l'vnion parfaite de ces belles ames, auxquelles elle souhaitoit vn prompt repos, dans vn lieu plein de seureté. C'estoient là les contentemens qu'Alcydamas donnoit à ses amis par ses frequentes victoires, faisant ainsi souuent succeder la ioye de le voir vainqueur, à la crainte de le voir en danger. Mais en fin il fallut qu'il cedast l'authorité qu'il auoit dans la ville à vn nommé Arimhin, qui fut
 • cnuoyé

enuoyé par Flauian Gouverneur de la Macedoine & de la Theſſalie: toutefois Arimin ayant appris les grands exploits qu'auoit fait Alcydamas , le pria de continuer avec luy les ſoins qu'il auoit pris de la ville , & d'employer touſiours ſa valeur pour ſa deſſence. Alcydamas & Polydore firent encore quelques ſorties qui le mirent en telle eſtime auprés d'Arimin , que rien ne ſe faiſoit que par leurs aduis. Ils ſe maintindrent long temps ſans que les Scythes oſaſſent approcher des murs , pour eſcalader vne ville d'où ſortoient de ſi vaillans hommes : Mais en fin leur grand nombre ayant effrayé toute la Theſſalie & les Prouinces voiſines , obligea Flauian & le Preteur qui gouuernoit l'Epire de ſe ioindre avec ce qu'ils auroient de troupes pour les aller combattre. Ils auoient enſemble dix mille hommes , & Alcydamas & Polydore ayant eu aduis qu'ils vouloient donner bataille, demanderent congé à Arimin pour ſ'y trouuer , & ſortirent à la teſte de deux mille Gentils-hommes Theſſaliens , & de trois mille hommes de pied qu'Arimin enuoyoit. Leur arriuée fut extrêmement agreable à Maxence & à Flauian , qui leur voyant vne ſi bonne mine , & ayant eſte aduertis de leurs valeureuſes actions , les receurent au conſeil de guerre , auquel il fut propoſé en quel lieu on deuoit combattre les ennemis. Chacun demeura d'accord qu'à cauſe de l'inegalité du nombre , il falloit chercher des lieux aduantageux , ce qui fit que Maxence & Flauian furent d'avis que l'on taſchast à les attirer dedans les lieux couuerts de la Theſſalie , entre le mont Olympe & le fleuue Penée , afin qu'ils ne peulſſent eſtendre leurs troupes dans ce lieu eſtroit , & qu'eux ne peulſſent eſtre enuoloppez. Ce conſeil alloit eſtre ſuiuy : mais Alcydamas dit qu'il ſe falloit bien gar-

der d'attirer les Barbares au milieu du pais : pource que n'y ayant point de retraittes , ils s'obstineroient sans doute à vaincre , & le grand nombre pourroit ainsi l'emporter sur le moindre. Qu'il estoit d'avis qu'on les allast attaquer le plus près de leurs vaisseaux que l'on pourroit ; qu'entre les rochers ils trouueroient les mesmes auantages des lieux estroits pour combattre , & que les Barbares ayant les retraittes si proches , ne manqueroient point à les aller chercher à la moindre frayeur qu'ils auroient : que puis qu'ils n'auoient dessein que de les chasser , il falloit faciliter leur fuite , & non pas les reduire en vn lieu où l'on seroit obligé de tuer iusques au dernier pour les vaincre. Pour luy , qu'il trouuoit plus à propos de les aller combattre au lieu mesme où ils auoient assis leur camp , qui estoit entre la ville de Larisse & la coste de la mer ; pource qu'en cas que les Romains n'eussent pas du meilleur , ils auroient la ville pour retraitte , & ce lieu estoit serre à cause des rochers , & tel qu'ils le pouuoient desirer. Ces considerations furent trouuées tres-prudentes , & chacun ayant suuy cét aduis , on se resolut de les combattre le lendemain , & d'aller loger aux enuirs de la ville pour estre prests dès le matin. Cependant ils ordonnerent ainsi leur bataille. Il fut arresté que les Romains seroient à la pointe , commandez par Maxence , les Macedoniens marcheroient à costé droit avec Flauian en vn bataillon , & que les Epirotes & Thessaliens seroient au costé gauche , conduits par vn Cheualier Romain nommé Milon : la caualerie des Thessaliens fut ordonnée pour estre sur les deux aisles , dont il y auroit mille hommes sur la droite commandez par Alcydamas , & autant sur la gauche dont Polydore seroit le Chef. Toutes ces choses ayant esté ainsi disposées , & cha-

cun estant encouragé à bien faire , on se retira aux enuiron de Larisse : mais la Cauallerie fut logée dans la ville, avec commandement de se rendre au point du iour au corps de l'armée. Alecydamas & Polydore y ramenerent leurs troupes , dont le premier se retira en son logis , & l'autre ayant eu charge de garder les portes du costé des Scythes, s'alla reposer au corps de garde.

Alecydamas à ce retour trouua Dicearque fort malade, lequel sçachant qu'il estoit arriué, l'enuoya prier de le venir trouuer , & luy dit qu'il se resioüissoit de ce qu'il le pouuoit voir auant que de mourir , & ayant fait venir encore Euphrosyne & Ariane, il les pria de le vouloir escouter , & leur parla ainsi.



HISTOIRE DE DICEARQUE & d'Acidalie.



P R I s que mon mal me reduit à l'extremité, ie ne veux pas sortir du monde avec la reputation d'un homme si meschant & si cruel que vous auez sujet de me croire; & pour empêcher que ma memoire ne vous soit si odieuse, ie suis contraint de vous reciter toute ma vie , que ie puis appeller vndelastre continuel , & de ne vous taire aucune chose , soit des accidens honteux qui me sont arriuez, soit des violentes & furicuses resolutions que la cruauté de ma fortune m'a forcé de prendre.

Je confesse que l'ambition a esté la passion forcenée

qui m'a tousiours agité, à laquelle celle d'amour se meslant encore, ces deux furies ensemble m'ont tourmenté si cruellement, que ie n'ay point esté maistre de mes actions, & me suis laissé conduire à elles sans appeller en aucune façon la raison à mon secours. Euphrosyne sçait de quelle sorte s'est passée ma ieunesse: car ie ne doute point qu'elle n'ait connu que dès mon ieune aage il m'estoit impossible de souffrir vn esgal dans Syracuse, croyant que ma noblesse & mon courage me donnoient des aduantages, que nul que moy ne pouuoit pretendre. Vivant ainsi i'eus beaucoup de querelles à demesler avec les premiers des ieunes hommes de la ville, sur lesquels il falloit tousiours que i'emportasse le dessus, ou bien ie n'auois aucun repos. Lors que i'eus enuiron l'aage de vingt ans, voyant qu'Euphrosyne estoit la premiere de celles qui estoient en consideration dans Syracuse, ie creus que ce deuoit estre là le but de mes desirs. Du commencement ie ne fus attiré à la rechercher que par la crainte que i'eus que si vn autre venoit à la posseder, ce seroit vn tesmoignage qu'il seroit plus estimé que moy: mais depuis trouuant en elle des qualitez excellentes, ie ioinis de telle sorte l'amour à mon ambition, qu'il n'y auoit moyen que ie n'eusse alors entrepris pour paruenir à ses bonnes graces. Elle sçait les seruices que i'ay tasché de luy rendre, & de combien d'artifices ie me suis seruy pour auancer mon dessein: tantost employant la magnificence, pour monstrier la grandeur de mes biens & de ma naissance; tantost vsant d'vne extrême modestie pour gaigner le cœur de sa mere, qui n'approuoit pas les despences superflües: en fin ie me suis tourné en mille sortes pour la vaincre, me trouuant engagé par l'hon-

neur & par l'amour, pour l'emporter sur tous les autres; toutefois ie n'acquerois aucune chose sur l'esprit d'Euphrosyne, ny de sa mere. Mais quand Hermocrate reuint de ses voyages où il auoit suiuy Germanicus, ie me trouuay bien plus reculé encore de ce que ie pretendois: pource qu'Hermocrate ayant preuenu les Syracusains par vne grande reputation, en laquelle il estoit auant mesme que d'estre de retour, chacun tourna sur luy les yeux aussi tost qu'il parut; & il sembloit que l'on ne prenoit pas la peine de me regarder. Ce mespris anima tellement mon ambition ialouse, que ie ne craignis point de me declarer son ennemy; n'ayant alors aucun sujet de haine contre luy, sinon qu'il estoit plus honoré que moy; & plus il se rendoit aimable à tous, plus ie le voyois à regret. Mais quand il entreprit d'aimer Euphrosyne, ce fut alors que ma ialousie eut vn visible fondement, & ie pratiquay toutes choses ouuertement & secrettement, pour faire perdre l'opinion que l'on auoit de luy. Toutefois ne pouuant rien acquerir de cette façon, & voyant qu'à mon exclusion il estoit receu chez Euphrosyne, ie ne sçauois vous dire quelle rage ie sentis en mon cœur; en fin ie trouuay l'inuention de le chasser de cette maison, par le moyen d'une lettre contrefaite d'Eryx pere d'Hermocrate à la mere d'Euprosyne, par laquelle illa prioit de ne plus souffrir son fils chez elle, pource qu'il le destinoit ailleurs. Cette ruse réussit pour quelque temps, chacun estant prompt à ressentir ce qui touche à l'honneur, & vous sçaez qu'une offense de cette façon surprend tellement, qu'il est impossible que l'on pense alors à douter si la chose est vraie ou fausse. La mere d'Euphrosyne bannit aussi tost Hermocrate de sa maison, sans

le vouloir escouter en sa deffense. Et pour moy sçachant ce qui luy estoit arriué, ie fis tous mes efforts pour acquérir Euphrosyne dans ce ressentiment d'iniure, esperant que pour faire despit à Eryx, ils tourneroient les yeux sur moy. Mais Eryx & Hermocrate s'estant esclairez ensemble, mon artifice fit son effect contre moy-mesme, & en peu de temps le mariage d'Hermocrate & d'Euphrosyne se resolut, & incontinent apres s'accomplit. Je conceus vn tel despit du mespris que l'on auoit fait de moy, & du bon-heur d'Hermocrate, que cent fois ie me resolus de le faire mourir: mais voyant qu'il n'y auoit plus de remede à vne chose faite, ie ne pûs souffrir de demeurer dauantage à Syracuse, où i'eusse este contraint de voir continuellement vn ob et qui m'estoit si fascheux, & m'en allay pour long temps à Corynthe.

Lors que i'y fus arriué, tous ceux de ma connoissance tascherent de me diuertir, & ie ne songeois aussi à autre chose pour dissiper l'ennuy qui me tourmentoit: ie voyois souuent les compagnies, & en fin voulant chasser les passions qui me trouilloient, par vne qui pourroit estre plus heureuse, i'eus dessein de faire vne autre amour, & iettant les yeux sur Acidalie qui estoit la plus belle de Corynthe, i'entrepris de l'aimer. L'allois voulu d'abord esbloüir ceux de Corynthe, par vn superbe appareil d'habillemens & de suite, qui me rendoit honoré par toutes les compagnies. Toutes les filles qui aiment ces ornemens extérieurs, me regardoient avec desir, & attendoient avec inquietude le choix que ie ferois de l'vne d'elles: de sorte que lors que ie m'adressay à Acidalie, elle me receut avec beaucoup de contentement, & ie m'apperceus aussi tost des artifices de quel-

ques autres filles , qui tascherent à me destourner de cette affection , par mille malices qu'elles inuenterent contre Acidalie : mais ces atteintes ne firent point d'effect sur moy ; au contraire , la connoissance que i'eus de leur dessein , fut cause que ie m'engageay plus auant avec elle ; & pource qu'elle estoit fort belle , peu à peu ie me trouuay dans vne passion bien violente. Elle vsa de froideur du commencement , pour s'asseurer dauantage de moy , & ne confessa point qu'elle me vouloit aimer qu'apres beaucoup de temps : mais lors qu'elle me vit entierement soubmis , elle prit quelque empire sur moy ; toutefois elle m'obligeoit d'vne grande confidence ; & ainsi meslant les faueurs à quelques rigueurs affectées , elle me rendit si amoureux , que ie ne pouuois viure qu'auprés d'elle. En ce temps vn ieune homme nommé Attale frequentoit parmy nous , qui estoit d'assez bon lieu ; mais qui se rendoit si agreable par beaucoup de plaisantes actions & de traits de raillerie , que l'on ne croyoit pas se pouuoir bien réjouir s'il n'estoit en la compagnie. Il est vray qu'il estoit d'vne humeur si gaye , & tellement né à la bouffonnerie , que lès traits de son visage , ses bras , ses iambes & tout le reste de son corps , ne manquoient point à executer toutes les souplesses que son esprit leur ordonnoit de faire. Il n'y auoit aucune personne ridicule qu'il n'imitast , aucune subtilité qu'il ignorast : mais il s'estoit tellement estudié à contrefaire les discours des impertinens & des stupides , qu'il luy eust esté difficile de parler serieusement. Ie m'apperceus qu'Acidalie prenoit vn peu plus de plaisir qu'elle ne deuoit en tout ce que faisoit Attale. Aussi tost qu'il parloit , elle admiroit la viuacité de son esprit : s'il tournoit vn pied ou vne main , elle faisoit

remarquer les gentilleſſes de ſes poſtures, & donnoit tous iours aduis la premiere de ce qu'il faiſoit, de peur qu'il perdiſt la louange d'une ſeule de ſes actions. Je me faiſois de ce qu'elle ſ'emportoit vn peu trop à l'eſtimer, iugeant que cela prouenoit d'un eſprit foible, qui iugeoit grandement louable, ce qui eſtoit ſimplement ridicule. Je raſchay à luy faire perdre peu à peu cette bonne opinion qu'elle auoit d'Attale, luy faiſant recognoiſtre qu'il auoit raiſon de contrefaire ainſi le ſot & le niais, pource qu'il ne pourroit iamais faire vn diſcours qui teſmognaiſt qu'il fuſt habile en quelque choſe : que ces eſprits n'eſtoient propres que pour faire rire, & qu'il falloit bien ſe garder de leur fier vn ſecret, ou d'eſperer d'eux vn conſeil ſur vne choſe d'importance : qu'auiſi voyoit-on ordinairement que les femmes & les filles aimoient ces perſonnes en public pour en rire : mais de les eſtimer dignes de leur affection, qu'elles ſ'en donnoient bien de garde ; pource que ces ſortes de gens ne peuuent auoir les conditions neceſſaires pour entretenir long temps vne amitie : Car, luy diſois-ie, le reſpect, la diſcretion & la fidelité ſont des qualitez trop ſerieuſes pour des eſprits ſi eſueillez : ils ſont ſi libres & ſi volages, qu'ils ne peuuent ſouffrir aucune contrainte ; & pour ne pas perdre vn bon mot ou vne action plaiſante, ils quitteroient toutes conſiderations de tenir vne affection ſecrete. Acidalie connoiſſoit bien que ie parlois comme intereſſé, & cela luy faiſoit douter que mes raiſons fuſſent bonnes : touteſois elle fut quelque temps à me croire. Mais en fin Attale ſ'eſtant apperceu de ſon inclination, commença à ne plus eſtre ſi liberal enuers tous de ſa bouffonnerie, & luy teſmoigna
qu'il

qu'il ne se seruoit de ces actions que pour luy plaire. Cela l'obligea entierement , & Attale connoissant le progrès qu'il faisoit dans ses bonnes graces , s'auançoit à prendre des libertez avec elle sans le beaucoup hazarder : pource que si elle ne le vouloit pas souffrir, cela estoit pardonné à l'humeur libre d'Attale , & si elle le souffroit, il sçauoit se seruir assez souuent de cette faueur. Je voyois toutes ces choses avec beaucoup de despit , ne sçachant quel remede y trouuer , & ne laissois pas de l'aimer esperduement ; & mon amour croissant augmentoit ma rage, luy voyant prendre des faueurs que ie n'osois pretendre. Acidalie se laissa tellement emporter à cette folle amour d'Attale , qu'elle ne la pouuoit plus cacher : s'il estoit en quelque lieu, il falloit incontinent qu'elle quit-
tast toute autre personne pour l'aller trouuer ; & estoit tellement aueuglée en admirant tout ce qu'il faisoit, qu'elle ne s'apperceuoit point de la visible connoissance qu'elle donnoit à chacun de sa passion. Je luy representay aussi discrettement que ie pûs, quel tort elle se faisoit, & luy faisois sentir qu'elle me deuoit estimer autrement que luy : mais elle ne me pût souffrir dauantage parler de la sorte , & ie voyois qu'elle commençoit à me fuir , de peur que ie ne l'importunasse de ces discours, & n'auoit plus de soucy que de son Attale.

Il faut en fin que ie vous conte mes plus cruelles douleurs , & le sujet de toute ma honte. Vn iour j'allay chez elle l'apresdisnée assez tard , & sçachant qu'elle s'estoit allé promener , ie me resolus de l'attendre dans sa chambre , & me mis sur vn liét, où insensiblement ie m'endormis. Je m'esueillay toutefois lors qu'elle reuint , & vis Attale seul avec elle dans la chambre: elle

ne ſçauoit point que ie fuſſe dans la maiſon , de ſorte que ie me reculay deuers la ruelle du liſt le plus que ie pûs dans l'obſcurité , de peur d'eſtre apperceu , & d'où ie pouuois voir ce qu'ils feroient. Elle oſta le mouchoir qui luy cachoit le ſein , & incontinent Attale ſe mit à le baiſer aſſez librement , pource qu'elle prenoit plaſiſr à ces careſſes , & aux cajolleries avec leſquelles il admiroit la beauté de ce ſein , & ſe confeſſoit redeuable de la liberté qu'elle luy donnoit : puis il adiouſta par moquerie. Mais vrayement , Madame , vous deuriez accorder de pareilles faueurs à Diccarque qui vous aime ſi ſerieuſement ; & elle luy reſpondit , quand ie luy en donneroſ la permiſſion , il ne les prendroit iamais de ſi bonne grace que vous. Ie fus bien outré de ces paroles , mais ie ſouffris encore des coups bien plus ſenſibles. Ils ſe mirent ſur des ſieges qui eſtoient au pied du liſt , où à la verité ie ne les pouuois pas voir , mais ie pouuois aſſément entendre ce qu'ils diſoient. Apres quelques diſcours qui teſmoignoient qu'elle luy permettoit de grandes priuantez , i'oüy qu'elle dit. Ah ! Dieux , Attale , laiſſez moy : n'eſtes vous pas encore ſatisfait ? & quelque temps apres elle adiouſta. Hé bien ! eſtes vous content ? Ie croy à preſent qu'elle luy permettoit ſeulement quelques libertez , qui toutefois ne ſe doiuent point ſouffrir : mais alors ma ialouſie me força de croire que ces paroles teſmoignoient qu'il auoit obtenu d'elle les dernieres faueurs ; & ſans mettre en doute que cela ne fuſt , i'entray en vne telle fureur , que ie regrettray cent fois de n'auoir pas vn poignard pour les tuer tous deux : mais ne pouuant me vanger alors , ma honte & mon deſpit me contraignirent de me taire , de peur qu'ils ſceuſſent que j'a-

uois esté tesmoin de leurs caresses. Ils s'en allerent assez tost pour n'estre point surpris ; & pour moy ayant demeuré quelque temps plein de confusion & de rage , ie me retiray le plus secrettement que ie peus , ayant plus de crainte d'estre descouuert , que si moy-mesme i'eusse fait vne action bien honteuse.

Lors que ie fuschez moy ie m'enfermay seul , & là mon amour irritée d'une offense si cruelle , me fit abandonner à la fureur & au desespoir : ie m'arrachay les cheueux , ie m'outrageay de coups , & fis toutes les actions qu'une rage vehemente force de faire. Je voyois bien que ie pouuois mespriser cette Acidalie , & la laisser libre avec son Attale : mais i'estois engagé si puissamment à l'aimer , que ie croyois auoir receu d'elle vn aussi grand outrage que si desia elle eust esté ma femme. Je la considerois dans sa faute , & l'auois alors à mespris : puis aussi tost ie me l'imaginois toute belle , & ne pouuois souffrir seulement la pensée qu'un autre en eust la possession. Mais quoy ? disois-je , ie l'aimeray encore , & n'auray point à desdain vne personne soüillée , la honte de son sexe & les restes d'Attale ? ie continueray encore à desirer ce que ie dois auoir en horreur , & m'estimeray mal-heureux d'auoir esté tesmoin de ce qu'elle a souffert , au lieu de me resioüir d'auoir connu sa legereté & sa foiblesse ? Non , non , soyons plus sages , & chassons de nostre esprit cette beauté qui cache tant de deffauts ; & qui n'a offensé mon amour qu'en se perdant elle mesme. Je demourois quelque temps en cette resolution , & peu apres cette Acidalie reuenoit en mon ame avec plus de charmes que iamais ; & il sembloit que mon imagination se pleust à me la représenter plus esclatante , afin de m'empescher de l'oublier , & pour me mettre en

vn plus grand trouble. Alors ie reprenois ainſi. Quoy donc, ie la laiſſeray en la poſſeſſion d'vn autre, & cependant que i'auray bien de la peine à me deliurer d'vn ſi doux & ſi cruel ſouuenir, Attale iouiſſa paiſiblement d'Acidalie, & gouſtera autant de delices que i'eſprouueray de tourmens? où fuiſſe-ye, miſerable? demeureray-ye à Corinthe pour voir continuellement mon mal-heur, & pour le mieux ſentir? ou bien retourneray-ye à Syracuſe, pour voir d'vn autre coſte Hermocrate heureux avec Euphroſyne, dont les contentemens me renouelleront à toute heure le ſouuenir de ceux d'Attale avec Acidalie: Acidalie, cruelle, ingrate, folle, impudique, te puis-ie aimer encore? Mais auſſi, Acidalie pleine de beauté, de graces & de charmes, puis-ie ne te point aimer? Eſprit indigne d'eſtre aime de moy: mais Beauté digne de tous les vœux de la terre. O deſpit! ô amour! que dois-ie faire? l'aimeray-ie, ou ne l'aimeray-ie point?

Mon ame eſtoit ainſi agitée de mille penſées furieuſes & extrauagantes, & ma rage me transporta tellement, que ie conceus vne reſolution dont vous vous eſtonnerez, ne croyant pas qu'en tous les ſiecles perſonne en ait peu prendre vne pareille. Non, ce dis-ie, il eſt certain que ie ne la dois point aimer; & qu'il faut au contraire que ie pourſuiue d'vne haine mortelle, celle qui m'a fait vn ſi cruel outrage: mais il faut auſſi que i'empêche qu'vn autre la poſſede. Je veux l'eſpouſer, afin que j'aye ce pouuoir de la rendre auſſi malheureuſe, qu'elle rend ma vie pleine de deſaſtre. Je ne la toucheray iamais, ne pouuant plus m'approcher d'vne perſonne ſouillée; mais i'empêcheray bien que perſonne n'en approche; & ainſi ie n'auray que les deſplaiſirs

de n'en iouir point, qui me sont aussi bien ineuitables.

Après auoir passé la nuit à me ronger l'esprit de ces furieuses resueries, ie me fortifiay si bien en cette estrange resolution, que le lendemain i'allay trouuer dès le matin vn de ses oncles pour le prier de parler de nostre mariage à sa mere, sçachant bien qu'ils me receuroient aussi tost; & pour l'obliger à dépescher cette affaire, ie luy fis present d'un diamant de grande valeur. l'auois remis mon visage le mieux que i'auois peu, pour feindre vne grande affection; & quelque temps après ieus vne responce aussi fauorable que ie l'auois esperée. Acidalie mesme ne repugna point à la volonté de ses parens, sçachant bien qu'ils n'eussent iamais consenty qu'elle espousast Attale. Elle tesmoigna me recevoir avec beaucoup de contentement pour m'abuser; & ie feignois aussi de desirer avec impatience le iour de nostre mariage, faisant parestre le plus de ioye que ie pouuois; encore que plus ie la voyois alors, plus ie me fortifiois pour l'auoir en haine. Attale se fit voir quelques iours chez elle en ce temps-là, & ie remarquay bien quelques regards qu'ils s'enuoyerent, l'un enuiant mon bonheur, & l'autre faisant parestre qu'elle me receuoit à regret; & ils ne sçauoient pas que ie sceusse tant de choses de leur intelligence: mais ie gardois en mon cœur d'estranges desseins.

En fin le iour de nostre mariage arriue, & toutes les ceremonies estant acheuées, sur le soir on nous mena coucher ensemble, mais ce fut vne nuit estrange: pource que si tost que l'on nous eut laissez seuls, ie luy dis. Acidalie, croyez vous que ie sois à present ce Dicearque autrefois si amoureux de vostre beauté, & si prompt à obeir à

vos commandemens? Non, non, sçachez que ie suis vostre plus cruel ennemy, & que ie ne vous ay espousée que pour vous rendre la plus miserable personne du monde. Elle se mit à pleurer, & me demanda pourquoy ie luy parlois ainsi. Allez, luy dis-je, sale & impudique, pleurez seulement vostre faute, & n'esperez pas de m'esmouvoir iamais. Souuenez vous de ce qu'Attale a obtenu de vous, dequoy i'ay esté tefmoin, & croyez que ie ne vous ay pas espousée pour iouir de ses restes; mais pour l'empescher de iouir de vous, & pour vous faire tous les iours sentir la punition del'outrage que vous m'avez fait. Elle nia long temps qu'elle eust iamais permis aucune chose à Attale, mais en fin voyant que ie sçauois trop de nouuelles de ce qu'ils auoient dit ensemble, elle fut reduite à me confesser qu'elle luy auoit seulement accordé quelques petites libertez, dequoy elle me demanda pardon avec vn torrent de pleurs: toutefois ie ne la voulus point croire, & elle ne me pût iamais fieschir; de façon que toute la nuit se passa en reproches, en desespoirs, en sanglots & en larmes. Le lendemain ceux qui nous vindrent visiter, s'estonnerent bien de la voir en l'estat d'une personne desesperée, & on ne sçauoit qu'en iuger. Je voyois bien qu'elle auoit enuie de chercher du refuge deuers sa mere, & en luy faisant ses plaintes, faire en sorte que ie ne l'emmenasse point à Syracuse, & qu'elle la retirast chez elle; mais ie la preuins: pource que dès le iour mesme i'auois fait preparer vn vaisseau avec tout mon equipage, & ayant pris congé de mes amis dans Corynthe, ie la contraignis de partir avec moy.

Iugez vn peu quel espoir ie pouuois auoir de iouir iamais d'aucun contentement: ie prenois pour ma compa-

gne ordinaire vne personne qui estoit la peste de ma vie, & de qui i'auois resolu d'estre le fleau perpetuel, ayant entrepris de ne la laisser iouïr d'aucun repos, puis qu'elle me rendoit le plus mal-heureux des hommes. Mais lors que nous fumes arriuez à Syracuse, ie fus bien empesché, me trouuant obligé de veiller continuellement sur celle que ie ne pouuois regarder qu'à regret, & laquelle ie craignois mesme d'irriter par trop, de peur qu'elle ne se portast à m'oster encore vne fois l'honneur, & peut-estre la vie. Toutefois elle n'estoit pas d'un naturel violent, & n'eust pû conceuoir vne resolution hardie: seulement lors que i'estois seul, elle venoit quelquefois me trouuer, & se iettant à mes pieds elle imploroit ma pitié, & me demandoit pardon en versant vne infinité de larmes, m'embrassant les genoux & faisant mille soubmissions. Ses pleurs & sa beauté m'esbranloient vn peu: mais aussi tost ie destournois la veüe, & plein d'une cruelle resolution ie luy disois. Madame, si vous pouuiez recouurer la pureté que vous auez perdue, vous auriez quelque sujet d'esperer mon amitié: mais puis qu'il est impossible, croyez que i'ay tousiours vostre faute présente à mon souuenir, qui vous deffend d'attendre que iamais ie vous pardonne. Elle me faisoit alors mille sermens, que la faute qu'elle auoit faite n'estoit point telle que ie la croyois: mais les Dieux mesmes n'eussent pas esté capables de m'en faire perdre l'opinion. Ah! disoit-elle alors, puisque vous le voulez croire, otez moy donc du monde: faites que ie meure de vostre main, pour finir vne si cruelle misere. Il faudroit, luy respondois-je, que ie me tuasse en mesme temps, pource que ie suis assuré de ne guerir iamais du ressentiment de vostre offense que par la mort, & ie ne puis me soulager que par

la vangeance que ie prens de vous. Alors elle se mettoit aux iniures contre moy, m'appellant cruel, barbare, tygre, & me faisant mille reproches que sa douleur la forçoit de me dire. Mais, ny ses soubmissions, ny ses pleurs, ny sa rage, ne me purent iamais fleeschir. Tout le relasche que ie luy donnois, c'estoit lors que ie la laissois quelque temps viure separément sans la voir; m'estant assure de sa continence, pource que de desplaisir elles'estoit bannie de toutes sortes de compagnies. Toutefois donnant ainsi du tourment à autrui, ie n'en estois pas exempt; & ie croy que i'auois l'esprit pour le moins aussi agité qu'elle, estant contraint de resserrer mes douleurs dans mon ame de peur d'en donner tesmoignage, & elle soulageoit les siennes par les pleurs qu'elle ne craignoit point de respan-dre.

Me voyant reduit à vne vie si mal-heureuse que ie m'estois moy-mesme procurée, & ne rencontrant dans ma maison que des objets pitoyables & funestes, ie me resolus pour soulager vn peu mon esprit par les occupations du dehors, de m'employer aux affaires publiques; & me sentant rongé d'ennuis ie pris vne haine contre tout le mode, & eusse voulu voir tous les hommes aussi mal-heureux que moy. Hermocrate fut le premier object de ma fureur: la vieille inimitié que i'auois conceuë contre luy, fit que ie me trouuay entierement disposé à le vouloir destruire, esperant que si ie satisfaisois ainsi ma passion de me vanger de tous costez, ie ne serois pas au moins priué de tout plaisir. Ie pratiquay toutes sortes de moyens pour le perdre, & ayant fait vne ligue contre luy, ie mis en mon esprit le plus de desseins que ie pouuois sur ce sujer, afin qu'il fust du tout occupé en ces pensées, & que ie songeasse moins

se moins à mes mal - heurs domestiques. Cette ligue me rendit puissant, & ie me trouuay en estat de resister à toutes les choses qu'il propoisoit dans les assemblées publiques, & de renuerſer tous les desseins : mais trouuant qu'il l'emportoit quelquefois sur moy par l'autorité qu'il auoit acquise, & l'amour que l'on luy portoit, ie me laissay aller plus que iamais au desir de le ruiner entierement. Je me seruis à ce dessein de la ruse de faire croire aux Syracusains qu'il affectoit la tyrannie; & par les armes que ie fistrouuer chez luy ie donnay fondement à mon accusation, qui toutefois eust esté trouuée fausse aisément, sans les artifices que i'employay pour rendre le Preteur Romain iuge de cette cause; mais les Syracusains qui l'aimoient me preuindrent; & n'osant aussi l'absoudre entierement, le bannirent seulement pour cinq ans selon leur ancienne Loy.

Je n'estois point content de ce iugement, au contraire i'estimois qu'il estoit aduantageux pour Hermocrate, auquel les Syracusains ayant témoigné tant d'affection, ie craignois qu'ils ne le rappellassent bien tost de son exil, & ne le missent en plus grande autorité que iamais. De fortune vn peu auparauant quelques Corsaires auoient esté pris sur les costes, & Hermocrate pourſuiuant leur punition, i'entrepris de les sauuer, seulement pour luy contredire. Je fus visité secrettement par quelques Pyrates leurs compagnons, qui raschoient de corrompre les Iuges; & qui ayant appris le dessein que i'auois de les obliger, m'offrirent tout ce que ie pourrois desirer d'eux pour le salut de ceux qui estoient pris. Je refusay tous leurs presents; mais en mesme temps Hermocrate estant condamné

à estre banny, & sçachant qu'il auoit resolu de s'en aller à Carthage, ie les enuoyay querir, & les fis obliger par serment d'executer fidellement tout ce que ie desirerois d'eux, & que ie leur remettrois entre les mains leurs compagnons. Ils me promirent de me seruir contre tout le monde, & aussi tost ie fis deliurer de ma seule autorité, ceux qui auoient esté pris, pource que ie gouernois tout alors; & les ayant tous fait venir chez moy, ie les priay de ioindre leurs querelles aux miennes, & de faire en sorte qu'ils prissent Herinocrate leur ennemy & le mien, lors qu'il s'en iroit à Carthage, & qu'ils l'emmenassent si loin avec sa femme qu'il n'en fust plus parlé dans la Sicile; qu'il falloit pour ce sujet qu'ils les vendissent à quelques Barbares, & ie desiray d'eux encore que ce fust séparément, afin de deslierainsi ceux dont l'vnion m'auoit donné tant de ialousié & de tourment.

Ils receurent tous cette priere avec beaucoup de ioye, tant pour auoir occasion de me tesmoigner de quelle sorte ils desiroient me seruir, que pour se vanger sur Hermocrate de ce qu'il auoit poursuiuy leur mort, & ils me iurerent tous qu'inuiolablement ils executeroient ce que ie desirois d'eux. Je les priay encore, que si Euphrosyne qui estoit fort grosse, accouchoit dans le temps qu'elle seroit avec eux, ils iettassent dans la mer ce qui en naistroit, pour esteindre à iamais cette race. Apres qu'ils m'eurent promis de faire exactement tout ce que ie leur recommandoys, ie leur fis encore quelques presents; j'en receus aussi d'eux, pour ne leur pas tesmoigner de mespris, & apres beaucoup de mutuelles protestations, ils s'en allerent attendre Hermocrate au passage aupres du

port de Lylibée. Ils ne faillirent point d'accomplir fidelement ce qu'ils m'auoient promis ; car ils enleuerent Hermocrate & Euphrosyne , mais ils manquerent seulement en cela , qu'ils ne vendirent pas Hermocrate si tost qu'ils m'auoient assuré , & le garderent quelque temps avec sa femme parmy eux.

Ie n'eus point de nouuelles de ce que tous estoient deuenus , sinon enuiron quatre ans apres , pendant lequel temps n'ayant plus Hermocrate , qui m'occuppoit l'esprit auparauant , ie tombay dans le vif ressentiment des maux de ma maison ; & pour les soulager en quelque sorte , i'entrepris de bastir vne maison superbeaux champs , & fis en mesme temps construire vne tour , en intention d'y renfermer Acidalie pour le reste de ses iours. Mais au bout de ces quatre années ie sceus que quelques hommes demandoient à parler à moy. Ie les fis venir , & les reconneus pour ces mesmes Pyrates , qui venoient me rendre compte de ce qu'ils auoient fait. Ils me dirent qu'ils auoient pris Hermocrate & Euphrosyne , lesquels ils n'auoient peu vendre encore en lieu d'où ils ne peussent reuenir ; que lors qu'ils auoient eu Euphrosyne , elle s'estoit déjà deliurée de l'enfant dont elle estoit grosse : mais que depuis estant parmy eux , elle auoit accouché d'une fille qui leur auoit semblé si belle qu'ils n'auoient peu se resoudre de la faire mourir : toutefois que pour ne point manquer à ce qu'ils m'auoient promis ils me l'auoient amenée pour en disposer comme bon me sembleroit. Alors ils me presenterent cette ieune fille , âgée d'environ deux ans , de qui la beauté me surprit : mais lors qu'elle ouurit ses petits bras pour m'embrasser en me sa-

liant, ie fus touché d'amour & de pitié pour elle, & me resolut plustost de la nourrir, que de luy estre si cruel que i'auois resolu. l'ay bien du regret, poursuiuit Dicearque, en s'adressant à Euphrosyne & à Melinte, de ne pouuoir vous presenter à cette heure cette nourriture que i'ay faite; c'est la gentille & courageuse Epicharis, qui est fille d'Euphrosyne, & vostre sœur, dit-il à Melinte. Euphrosyne ne sçauoit point qui estoit cette Epicharis: toutefois elle estoit bien resioüye que son enfant eust esté conserué: Mais Melinte & Ariane s'escrierent en mesme temps. Melinte dit: Quoy, Epicharis est ma sœur? & Ariane, Helas! Melinte, ma chere Epicharis est donc vostre sœur? Ah! que cette nouvelle donnera de ioye à mon frere qui l'aime si passionnément, & en mesme temps qu'il en receura de douleur pour ne sçauoir où elle est. Dicearque fit vn peu cesser toutes ces admirations & ces ioyes, en continuant ainsi. Il est vray que cette ieune fille se rendit tousiours si agreable, que ie fus contraint de l'aimer malgré la haine que i'auois pour ceux qui l'auoient mise au monde. Elle auoit vn esprit si vit & si gentil, qu'elle me contraignoit souuent de rire, lors que i'en auois peu de sujet en la presence d'Acidalie; & quand elle fut plus auancée en aage, ie fus pressé par quelques vns de mes amis de la marier, pensant qu'elle fust esclaué, à vn nommé Asylas qui estoit vn serf, né dans ma maison: mais i'eus en horreur cette proposition; comparant la noblesse de son sang, avec la bassesse d'Asylas; & ne pûs m'empescher de dire, que les Dieux ne me pardonneroient iamais de mesler son sang illustre

auec cet autre si indigne d'elle. Cette parole fut bien remarquée, & plusieurs fois depuis ie fus pressé par plusieurs, & par Palamede mesme, de leur dire de quels parens elle estoit née. Iamais ie ne leur en voulus rien dire, voulant me reseruer tousiours à disposer de sa fortune, & la rendre telle qu'il me plairoit. En ce temps Acidalie mourut, soit qu'elle se fust donné la mort par poison, ou qu'elle luy fust arriüée de desplaisir, ne pouuant plus supporter sa misere, & mesme voyant que cette tour estoit preparée pour elle : mais auant que de mourir elle me fit tant de sermens, qu'elle n'auoit point commis la faute que ie m'estois imaginée, que ie pense à present que la creance que i'en auois eüe n'auoit eu que ma ialousie pour fondement. Elle se vouüa aux furies pour la tourmenter eternellement dans les enfers, si cela estoit veritable; & ne desira autre satisfaction de moy en mourant, sinon que ie perdisse cette opinion. Ie voulus bien laisser partir son ame auec ce contentement, & depuis i'eus autant de regret de l'auoir traitée cruellement, comme i'y auois pris de plaisir autrefois; & ie fus tourmenté d'une nouuelle sorte de supplice; pource qu' auparauant i'estois picqué du ressentiment de l'outrage que ie croyois en auoir receu; & depuis sa mort ie fus persecuté du regret de ceux que ie luy auois fait souffrir.

I'auois tousiours tenu Epicharis auprès d'elle, mais à sa mort ie la donnay à ma niece Ariane, pource qu'elle l'aimoit. Depuis ayant sceu que Melinte auoit esté reconnu fils d'Hermocrate, ce fut vn renouvel-

lement de ma fureur contre ce sang que ie haïssois : i'auois resolu vn peu auparauant de luy donner ma niece en mariage , croyant qu'il fust fils de Telephe, & voyant la grande affection que luy portoient les Syracusains : mais lors que ie sceus la verité de son extraction , la connoissance de sa condition beaucoup plus releuée , au lieu de seruir à ce qu'il desiroit , me fit non seulement perdre l'affection que ie commençois à luy porter , mais encore iuter sa ruine ; & voyant qu'il falloit premierement m'asseurer d'Ariane qui l'aimoit , ie l'emmenay à Corinthe , esperant apres l'auoir mariee à Pisistrate , retourner à Syracuse pour perdre Melinte. Il me preuint par la resolution qu'il prit d'enleuer ma niece ; & lors que i'estois dans les ressentimens de cet affront qui rendoit ma haine irreconciliable , ie me trouuay assisté de Trebace pour le poursuiure , & ne refusay point son secours , encore qu'il cherchast à faire mourir mon neveu aussi bien que luy. A la verité ie croyois alors qu'il fust à Athenes , & ne pensois en aucune façon qu'il fust avec Melinte : mais quand i'eusseceu qu'ils eussent esté ensemble , ie n'eusse point douté en l'estat où i'estois , de sacrifier Palamede & Ariane encore , pourueu que ie fusse vangé. Ie suis Trebace à ce dessein ; & ie l'animois autant qu'il m'estoit possible , afin que Melinte ne nous eschappast point : mais les Dieux ont rendu tous les efforts de ma rage inutiles , & les graces que i'ay receuës tant de fois de luy , m'ont forcé de reconnoistre, non seulement qu'il estoit aimé d'eux & en leur protection , mais encore que mal-

gré ma haine, ma fureur & tous mes ressentimens, il falloit que ie luy eusse obligation de la vie, & que ie l'aimasse.

Il sembloit qu'ayant chassé de mon ame les passions qui la tourmentoient, par la reuerence que ie commençois à porter aux secrettes ordonnances des Dieux, ie deusse viure desormais en quelque repos: mais sentant de continuels saissemens de repentirs qui m'attaquent & me tuent, ie voy bien que les Dieux m'ont ordonné vne vie entierement tragique, & ne veulent pas que ie suruiue à mes mal-heurs. Ils veulent à présent que ie meure: mais puisque la mort doit estre la fin de ma misere, ie vous prie qu'elle soit aussi la fin de la haine que vous avez sujet de me porter. Vous, sage Euprosyne, & vous, genereux Melinte, ie vous coniore par tout ce qui vous reste de plus cher au monde, de me pardonner tant de maux que ie vous ay fait souffrir: plaignez plutost les continuelles fureurs de ma miserable vie, que d'accuser mes actions & d'en garder le souuenir pour m'auoir en horreur. Vous, ma chere niece, qui avez quelquefois senty des effects de mes mal-heurs, pardonnez moy aussi, & obtenez de Melinte & d'Euprosyne qu'ils me pardonnent; que l'emporte au moins cette consolation là bas, que si i'ay vescu ennemy de tout le monde; ie meure au moins dans la grace de ceux que j'ay les plus affligez.

Dicarque finit ainsi en pleurant; & interrompant souuent ses mots de sanglots, qui procedoient de son repentir. Euprosyne & Ariane ne peurent

retenir leurs larmes ; mais Melinte qui auoit le cœur plus constant , luy parla ainsi. Mon pere, car ie vous veux appeller ainsi , puis que vous seruez de pere à ma chere Ariane ; cessez , ie vous prie , de vous affliger , & nous aussi, par vos pleurs & vos regrets, qui nous tesmoignent trop que vous auez vn bon naturel, mais que le seul mal-heur de vostre vie vous a forcé de nous haïr , & que le nostre seul aussi nous a rendus l'object de vostre haine. Dicearque, nous cognoissons tous les iours la force des destinées , qui nous maistrisent & nous forcent à faire souuent des actions auxquelles nous repugnons de nature. Mais puis que ces mesmes destins vous permettent à present de vous recognoistre, & vous laissent, comme vous l'esprouuez, en vostre liberté, il faut à cette heure agir de vous mesme avec courage, pour chasser la suite de ces premieres passions furieuses, qui sont la honte, le regret, & le repentir. C'est le seul mal que vous sentez à present , & auquel laissant prendre force, sans doute il vous donneroit la mort. Dicearque, montrez en cette occasion de quel sang vous estes sorty : domptez genereusement ces petits laïssemens, & iouïssiez désormais avec nous du repos que les destins nous preparent. Ce mesme grand courage que vostre cruelle fortune a contraint de seruir à vos fureurs, se fust employé avec honneur à de plus nobles actions, si vostre vie eust esté plus heureuse. Iusques icy vous ne l'auiez fait agir que contre vous mesme, maintenant faites le seruir pour vous. Perdez le regret de ce qui s'est passé ; puis que nous en voulons perdre le souuenir. Euphrosyne

fyne vous l'ordonne, Ariane vous en prie, & ie vous en hon-
nure. Alors elles confirmerent ce que Melinte disoit, en
l'embrassant & le priant de prendre courage: Mais Dicear-
que sentant son mal creu à tel point qu'il ne pouuoit plus
le vaincre, les asscura qu'ils ne deuoient point esperer qu'il
peüst viure dauantage: qu'il mourroit toute fois avec beau-
coup de soulagement, puis que de si bon cœur ils luy par-
donnoient.

Après quelques autres discours on se resolut de le lais-
ser en repos, & chacun se retira pour s'aller coucher,
Melinte ayant iugé qu'il luy falloit vn peu dormir, pour
bien faire son deuoir en la bataille qui se deuoit don-
ner le lendemain. Dicearque mourut trois ou quatre
heures apres: Melinte ayant sceu cét accident, se leua
pour aller consoler Ariane, & apres auoir employé quel-
que temps à ce deuoir, recommanda ce soin au sage
Lepante, & la garde de ce qu'ils auoient tous deux de
plus cher dans la ville, cependant qu'il ne songeroit qu'à
combattre. Alors il voulut prendre congé d'Ariane, qui
estoit bien triste de la mort de son oncle; mais dont l'af-
fliction estoit bien augmentée par les craintes qu'elle
commençoit d'auoir pour Melinte; considerant que plus
il estoit courageux, plus il s'alloit mettre auant dans les
perils; & elle luy dit en pleurant, Helas! que la vie est
mal-heureuse, puis qu'il faut si souuent s'exposer à la per-
dre pour la conseruer, & pourquoy le Ciel a-t'il ordon-
né que les plus genereux seruissent de rempart aux plus
lasches? & que la vie des plus vertueux fust prodiguée,
pour garantir celle de ceux qui sont les plus indignes de
viure? Chere Ariane, luy dit Melinte, quelle distinction
feroit-on entre les courageux & les lasches, si iamais il

n'y auoit de peril : mais au moins on se doit consoler, de ce que dans les combats plus on est valeureux, moins on court de fortune; car il est bien plus auantageux d'aller au deuant des dangers en attaquant & en donnant la peur & la mort à son ennemy, que de combattre foiblement, ou de fuir avec lascheté en receuant l'une & l'autre. Il y en a qui attribuent la timidité à vne prudence, qui sçait reconnoistre la grandeur d'un peril & s'empesche de s'y hazarder: mais tant s'en faut, elle ne prouient que de la foiblesse du iugement, qui ayant reconnue le peril, ne sçait pas ce qu'il faut faire pour le repousser; & dans cette ignorance se trouble, & fait que l'on abandonne & l'honneur & la vie mesme, pour la crainte que l'on a de la perdre. Consolerez vous, ma chere Ariane, assurez vous en la faueur des Dieux Protecteurs de l'Empire de Rome & de la Grece; & ne croyez point que ie sois destiné à mourir de la main d'un Barbare. Estant aimé de vous ie n'ay rien à craindre: car ie suis certain que les prieres & les vœux que vous ferez pour moy seront exaucez du Ciel, partant d'une bouche si belle & d'une ame si pure. Adieu, luy dit-il, en luy donnant un baiser. Ariane tomba en s'affoiblissant, entre les bras de Lépante, lequel il pria d'en auoir soin: puis il partit auant le iour pour aller trouuer Palamede, auquel il donna en mesme temps des nouuelles bien tristes, luy apprenant la mort de Dicearque, & d'autres bien agreables, luy recitant comme Epicharis estoit sa sœur. Cette reconnoissance luy fit perdre l'ennuy de la mort de son oncle, & il fut si rauy de sçauoir ce bonheur pour sa chere Epicharis, auquel il participoit extrêmement, qu'il embrassa mille fois Melinte, & le pria de luy promettre qu'elle seroit son espouse. Melinte s'estima

bien-heureux d'auoir dequoy s'acquitter enuers luy pour l'assistance qu'il luy auoit donnée auprès d'Ariane; & apres quelques autres propos sur cette réjouissance, & quelques regrets sur ce qu'Epicharis estoit perduë, ils laisserent cet entretien pour songer à mettre leurs troupes en bon ordre, & pour estre en estat de faire ce tour-là des actions dignes de la grande reputation qu'ils auoient acquise.


Fin du treizieme Liure de l'Ariane.







LE
 QVATORZIESME
 LIVRE DE
 L'ARIANE.



ESIA les coureurs auoient esté enuoyez de toutes parts pour sçauoir quelle contenance tenoient les ennemis; & ils rapporterent que les Scythes faisoient mine d'attendre le combat: pource que n'osant plus s'escarter en diuerses troupes pour aller fourager, à cause que les Romains estoient en corps d'armée, ils auoient mis ensemble toutes leurs forces, qui pareissoient environ quarante mille hommes de pied, sans aucune caualerie.

La ville de Larisse est assise entre deux collines, dont le vallon s'elargit peu à peu deuers la mer, & fait en fin en

s'estendant vne campagne assez spacieuse. Cette situation donnoit la commodité de choisir la iuste estendue, qui estoit necessaire pour contenir le front de l'armée, & cela fit qu'apres auoir occupé cet espace, on se resolut d'aller attaquer les ennemis par quelques escarmouches de caualerie, pour les attirer en ce lieu, feignant de fuir, afin d'auoir alors la commodité des lieux telle qu'ils l'auoient desirée pour le combat. Alcydamas & Polydore s'estoient armez ce iour-là de riches armes, dont ceux de Larisse leur auoient fait present, & n'auoient pas oublié à se parer d'escharpes superbes, & à se couvrir de plumes pour se faire bien remarquer à ceux qu'ils commandoient, & pour estre en vn estat qui fust digne des belles actions qu'ils esperoient de faire.

L'armée occupa incontinent le lieu destiné pour la bataille, & les troupes estant rangées, les Chefs commencerent à se promener par les rangs, pour animer leurs soldats. Le valeureux Alcydamas sembloit ce iour-là plus haut que de coustume, & auoit ie ne sçay quoy d'estincelant dans les yeux, & de resplendissant sur le visage, qui le faisoit parestre quelque Dieu descendu en terre pour le secours de la Grece & de l'Empire Romain. On voyoit flotter ses plumes blanches & incarnates par dessus les rangs qu'il surpassoit de toute la teste, & sa seule mine sembloit inspirer vne partie de son grand courage à ceux qui alloient combattre sous sa conduite. En fin voulant parler aux siens, auant que d'en enuoyer vne partie pour aller à l'escarmouche, il fit faire silence, & d'une voix agreable & asseurée, il leur parla ainsi.

MES compagnons , Si ie vous parle , ce n'est pas que ie doute de vos courages, ny que ie desire d'auantage les animer , mais au contraire pour vous témoigner le contentement que ie reçois de me voir assisté de troupes si genereuses; i'espere faire auoüer au iourd'huy aux Romains , quel est leur bon-heur d'auoir les Thessaliens pour gardes de leur Empire : car ie suis assésé voyant l'ardeur de combattre qui paroist sur vos visages , qu'ils nous seront redeuables de la victoire de cette iournée. Souuenez vous que nous sommes dans cette Thessalie, qui a tousiours esté fatale aux grands exploits de guerre ; & qui a veu décider autrefois la querelle pour l'Empire de l'Vniuers , entre les deux plus grands Capitaines du monde. Faisons parestre au iourd'huy autant de valeur que ces fameux guerriers , en combattant pour des causes bien plus iustes. Ils ruinoient le monde pour en demeurer les Maistres , & vous combattez pour conseruer vostre país de la fureur des Barbares. Ils n'estoient poussez que d'une ambition forcenée ; & vous estes animez d'une genereuse pieté , desirant conseruer vos Autels , vos parens , & vostre chere Patrie. Allons donc , mes compagnons , allons nager dans les ruisseaux de sang que nous ferons respandre à ces Nations brutales , dont le nombre ne seruira que pour augmenter nos trophées & nostre gloire. Faisons leur sentir à grands coups d'espées , un regret

d'auoir voulu attaquer vne Prouince si belliqueuse. Suiuez-moy, compagnons. Mais quoy ? desia vous voulez partir : ie vous suiuray donc, & tascheray en vous imitant de seruir aujourd'huy aux valeureux Thessaliens pour leur faire acquerir vne gloire immortelle.

Alcydamas ayant ainsi parlé, tous les compagnons leuerent en haut leurs espées, pour luy tesmoigner l'en-
 uie qu'ils auoient qu'il les menast au combat : aussi tost
 il donna commandement à quelques vnes de ses troupes
 d'aller attaquer les Scythes, & de feindre peu à peu de
 fuir pour les attirer au lieu où ils estoient. Les Barba-
 res les receurent avec de grands cris, & les voyant si peu
 de gens, les poursuiuirent à coups de fleches avec tout
 le corps de leur armée, qui s'approcha des Romains de la
 portée de leurs traits. Alors Maxence enuoya faire com-
 mandement à Alcydamas & à Polydore de les aller char-
 ger, afin que les Barbares n'eussent pas l'honneur d'a-
 uoir choqué les premiers. Ils partirent tous deux à la te-
 ste de leurs troupes, & fondirent de telle furie sur les
 Scythes, qu'ils enfoncerent les deux cornes de leur ba-
 taillon qu'ils auoient formé en croissant. Alcydamas ayant
 préueu qu'il luy faudroit faire vn grand carnage, auoit
 pris vn large coutelas de fine trempe, auquel il n'y auoit
 point d'arines qui peussent resister : de sorte qu'estant
 manié par vn bras puissant & adroit, il tranchoit tout
 ce qu'il attaignoit ; & tout le camp estoit semé de testes,
 de bras, de jambes & de corps tronçonnez. Polydore ne
 donnoit pas aussi de son costé de petites preuues de sa vail-
 lance,

lance, & les Theſſaliens ſuiuoient courageuſement des Chefs ſi valeureux, & tailloient en pieces tout ce qui ſe preſentoit deuant eux. Les Romains voyant vn ſi heureux commencement, auancerent leur pointe, & s'allerent attacher à ce qui leur eſtoit oppoſé de l'armée des Scythes, pour ſeconder les heureux ſucces de la cauallerie. Alcydamas cependant continuoit ſes grands coups, & mettoit tout ce qu'il rencontroit ou au fil de l'eſpée ou en deſordre: en fin avec l'aſſiſtance de ſes compagnons, il paruint iuſques au milieu de la corne gauche des ennemis, d'où il commença d'appercevoir vn peu plus loing vne troupe de Scythes qui le tenoit ſerrée à l'entour d'vn qui les ſurpaſſoit de toute la teſte, & qui auoit toutes les marques d'eſtre leur Roy. Ce fut là qu'il attacha tous ſes deſſeins, & pource que ſon cheual commençoit à ſ'affoiblir eſtant tout percé de fleſches, il monta ſur vn de ceux qu'on luy tenoit preſts, & ayant animé ſes compagnons pour le ſuiure, il pouſſa vers ce gros, qu'il ouurit incontinent à force de coups, & penetra avec deux ou trois de ſes compagnons ſeulement iuſques au lieu où eſtoit le Roy, accompagné des plus forts de ſon armée. Alors ſon eſpée fit des exploits merueilleux, pource que ces grands corps s'oppoſerent au deuant de leur Roy, & il luy eſt fallut tuer beaucoup auant que de paruenir iuſques à luy. Mais en fin il en abbatit tant à ſes pieds qu'il s'attacha au Roy, qui ne refuſa point le combat: Il ſe deffendit long temps avec vn grand courage, & porta pluſieurs coups à Alcydamas, qui luy firent ſentir la pesanteur de ſon bras: toutefois le vaillant Alcydamas apres l'auoir affoibly par pluſieurs playes, luy donna tant de coups ſur le caſque qu'il le mit en pieces; puis il ſepara

en deux la teste de ce Prince Barbare , qui tomba à ses pieds. Le reste des compagnons d'Alcydamas suruindrent en mesme temps , & admirerent le grand carnage qu'il auoit fait : alors les Barbares ne les purent plus soustenir , & prirent la fuitte. Alcydamas se mit à les poursuiure , tuant incessamment ceux qu'il pouuoit atteindre. Il les chassa iusques à la mer , où vne partie des Scythes s'estoit sauuée dans leurs vaisseaux , & cét Element fut la seule borne de sa victoire.

La fortune de Polydore auoit presque esté pareille , pource qu'ayant aussi enfoncé ceux de la pointe qui luy estoit opposée , il en auoit fait vne tuerie estrange , & poursuiuoit encore le reste qui fuyoit deuers la mer , où ils furent receus par Alcydamas & taillez en pieces. Ces deux amis s'estant rencontréz ensemble , se lierent de leurs bras victorieux , & se tindrent long temps embrassez ; se réjouissant de se reuoir , & remerciant les Dieux d'vne si grande victoire. Polydore auoit seulement vne blessure d'vne fiesche qu'il'auoit atteint à la cuisse , dont ils estancherent le sang , & incontinent apres ils rallierent tous ceux qui les auoient suivis , & trouuerent qu'ils n'auoient pas perdu cinquante hommes de la cauallerie qu'ils conduisoient : mais ils ne se virent accompagnez que d'environ trois mille hommes de pied qui les auoient suivis ; & s'estonnerent de ne voir aucun des Romains parmy eux. Ils se resolurent de retourner au champ de bataille , où ils trouuerent bien vn grand nombre de Scythes morts , mais aussi la pluspart des Romains tuez , de qu'il la fortune auoit esté bien differente de la leur : car ils apprirent de quelques soldats laissez pour morts , que lors qu'ils vainquoient de leurs costez , le bataillon

des Scythes qui estoit au milieu auoit enfoncé celuy des Romains , & apres en auoir tué la pluspart , poursuuiuoit encore le reste dans la ville. Ce fut alors qu'Alcydamas plaignit le mal-heur de ce que l'ardeur l'auoit emporté à vouloir tuer de sa main le Roy des Scythes ; pour ce que sans cette rencontre , iamais il n'eust laissé le soin du gros de la bataille , & il n'eust pas manqué d'aller secourir les Romains , ayant tousiours pris garde auparauant à tout ce qui se passoit. Aussi tost il pria ceux qui restoient de le suiure , & en peu de temps se rendit avec sa petite armée dans la ville , où les barbares estoient entrez pêle-messe avec les fuyans , & commençoient à piller de tous costez , apres auoir tué tout ce qui auoit résisté à leur fureur : il n'y auoit plus que le chasteau qui tenoit encore , dans lequel Arimin s'estoit enfermé. Alcydamas commença à mettre au fil de l'espée tous les Scythes qu'il rencontra , & en fit vne furieuse boucherie , pource qu'ils ne songeoient plus qu'à piller. Il jonchoit les ruës des corps de ces Barbares , qui sentant des ennemis si peu attendus , se mirent à fuir de toutes parts. Ceux - là mesme qui tenoient Arimin assiégé , creurent que c'estoient des Dieux qui estoient descendus du Ciel pour secourir les Romains , ne pouuant iuger de quel costé leur venoient ces ennemis ; & prirent la fuite. La nuit qui s'approchoit fauorisa la retraite des Scythes , & empecha qu'Alcydamas n'emportast avec Polydore l'honneur de deux grandes viétoires en vn iour , & ne défit entierement le grand nombre des Barbares. Ils ne voulurent point les poursuivre hors de la ville de peur de l'abandonner ; & ayant soin de conseruer ce qui restoit , ils firent fermer les portes , puis mirent des gardes par

tout, pour songer seulement à se deffendre, & tous les Scythes qui se trouuerent alors dans la ville furent faits prisonniers. Alcydamas ayant donné l'ordre de tous costez, alla avec Polydore au chasteau pour aller trouuer les Chefs, & aduiser ce qui estoit à faire. Là il apprit que Maxence, Flauian & Milon auoient esté tuez en combattant, & Arimin luy dit qu'il auoit receu quelques Romains dans le chasteau, avec lesquels il s'estoit deffendu long temps. Ce Gouverneur obligé à Alcydamas de son salut & de la conseruation de la ville, receut avec mille embrassemens ce vainqueur plein de gloire, & luy donna mille louanges d'auoir fait de si grands exploits : puis apres que leurs caresses furent finies, ils s'assemblerent en conseil pour deliberer ce qu'ils auoient à faire, apres vn si grande defaite de part & d'autre. Chacun demeura de l'aduis du sage Alcydamas, qui considerant qu'il ne leur restoit plus qu'environ cinq mille hommes, & qu'ils n'auoient pas tué plus de la moitié des ennemis, dit qu'il se falloit bien empescher de combattre, de peur de hazarder la perte entiere de la ville ; mais qu'il estoit besoin d'attendre les troupes qui leur viendroient de l'Achaïe, avec lesquelles ils pourroient chasser ce qui restoit de ces Barbares. Lors qu'ils estoient sur cette resolution, on leur amena vn Grec qui auoit esté pris entre les Scythes, & qui disoit auoir quelque chose d'importance à communiquer à ceux qui commandoient à la ville. Cét homme estant deuant Arimin, parut vn vieillard de bonne mine qui s'estoit sauue d'entre les Scythes pour se deliurer de leurs mains, & ayant sceu qu'il estoit resté si peu de personnes dans Larisse, venoit aduertir Arimin qu'il empeschast bien qu'aucun des siens ne sortist de la ville pour combat-

tre; pource qu'il n'y auoit rien de si dangereux que ces Barbares desesperez : & il estoit certain qu'ils s'en iroient apres vne si grande deffaire, ne pouuant pas vaincre toutes les forces de la Grece. Ce bon vieillard sembloit auoir vn extrême soin du sang des Romains & des Grècs, & les prioit avec vne grande affection qu'aucun d'eux ne se voulust hazarder, soit par vne esperance de deffaire ce qui restoit de Barbares, soit par vne vaine gloire de faire parestre son courage à entreprendre quelque action hardie pour se signaler auant qu'ils s'en allassent. Mais il n'eut pas beaucoup de peine à persuader ceux qui estoient desia tous resolu à ne point combattre pour ne rien mettre au hazard. Alors il fut parlé de quelques actions de ieunes gens, qui pour acquerir de l'honneur auoient souuent mis en danger tous ceux de leur party. Là dessus on allegua les Loix Romaines qui auoient pourueu à la punition de ces fautes; ordonnant la mort à ceux qui auroient combattu contre le commandement de leur Chef, encore qu'ils retournassent victorieux : mesme on en rapporta quelques exemples. Ce vieillard qui auoit long temps vescu parmy les Scythies, lesquels l'auoient obligé de seruir de Sacrificateur à leurs Dieux, dit que ces Barbares, encore qu'ils fussent depourueus de lettres, ne laissoient pas d'establir des loix, qui bien qu'elles se sentissent vn peu de la Barbarie, estoient neantmoins fondées sur beaucoup de raisons; comme il se pouuoit voir par celle qu'ils auoient faite contre les Capitaines particuliers, qui sans ordre auroient combattu l'ennemy : car ils punissoient de mort leur desobeïssance, encore qu'ils eussent este heureux; & ce supplice estoit bien estrange & bien remarquable; pource que l'on pro-

menoit ce vainqueur mal heureux par toute la ville dans vn chariot comme triomphant : les soldats qui l'auoient seruy en l'action alloient deuant & portoient les despoüilles qu'ils auoient acquises ; apres ce chariot marchoit le Sacrificateur avec ceux qui estoient destinez pour les sacrifices, & vn peu apres suiuoit le bourreau avec vne hache : au milieu de la ville estoit vn eschaffaut , sur lequel estoit vn petit Autel où l'on faisoit renuerser celuy qui auoit failly ; & le Sacrificateur luy fendoit l'estomac, & en tiroit le cœur pour estre brûlé honorablement dans le feu qui estoit allumé des fleches des ennemis ; puis apres sa teste estoit couppée par le bourreau : pour monstrier que le cœur qui estoit le siege du courage , deuoit estre honoré pour auoir fait vne belle action , mais que la teste où consiste la conduite , deuoit estre punie pour auoir manqué d'obeir au commandement. Ceste loy fut trouuée bien bizarre , toutefois on dit qu'elle auoit quelque chose de fort raisonnable : surquoy plusieurs ayant fait d'autres discours, Arimin pour tesmoigner qu'il vouloit auoir vn grand soin de la vie des Chefs qui restoiennent, iura qu'il feroit obseruer cette Loy des Scythes, si quelqu'un estoit si hardy que de combattre contre la deffense qu'il leur en faisoit. Tous les Chefs pour monstrier qu'ils obeïroient inuiolablement à ce qu'il commandoit, iurerent qu'ils ne combattoient que par son ordre , sur peine d'encourir la rigueur de cette mesme loy. Arimin leur dit en suite que si les Scythes ne s'en alloient point si tost, & qu'il iugeast quelque occasion propre pour faire vne sortie , il ne leur refuseroit pas de leur donner moyen de faire parestre leurs courages : mais qu'ils n'esperassent point cette permission de luy de plus de quatre

iours. Apres ce discours ils firent garder soigneusement ce vieillard, de peur qu'il ne fust trouué menteur en ce qu'il auoit asseuré que les Scythes s'en iroient deuant qu'il fust deux iours: puis chacun se retira chez soy, pour se reposer de tant de trauaux qu'ils auoient endurez en cette grande iournée.

Lors qu'Alcydamas & Polydore furent arriuez en leur logis, Euphrosyne vint au deuant de son fils pour l'embrasser, & luy tesmoigner la ioye qu'elle auoit de le voir de retour de si grands dangers. Il vouloit aller dans la chambre d'Ariane, mais Euphrosyne luy dit qu'elle s'estoit endormie avec Cyllenie; apres auoir seu leur heureux retour dans la ville; & le pria de les laisser reposer apres tant de peines & de craintes qu'elles auoient eües; que les Scythes auoient atâqué ce logis auant qu'ils reuinssent tous deux dans la ville, & que Lepante apres l'auoir deffendu vaillamment, estoit demeure blessé de plusieurs playes, qui toute fois n'estoient pas bien dangereuses. Ils voulurent aller voir Lepante, mais Euphrosyne les coniuira de s'aller reposer, & de remettre les visites & les entretiens iusques au lendemain. Elle les obligea ainsi à s'aller coucher, pource que iamais ils n'eurent tant de besoin de dormir; aussi le sommeil ne les abandonna-t'il point iusques au lendemain que le iour estoit desia bien auancé.

Ce repos auoit esté bien necessaire à Alcydamas, tant pour se remettre de ses trauaux passez, que pour resister aux ennuis & aux douleurs qu'il deuoit receuoir à son reueil. Euphrosyne fut contrainte de luy apprendre qu'Ariane auoit esté enleuée par les Scythes, mais qu'elle n'auoit point voulu luy dire cette nouuelle la nuit

ou receüe en la compagnie des Deesses , pardonne moy la lâcheté de ne t'auoir point secourüe ; pardonne moy, chere Ariane. Mais comment pourras-tu iamais excuser ce crime , qui me rend indigne du sçauoir mesme de t'auoir aimée ? Non , il est certain qu'à present tu me regardes avec mespris : tu vois combien ie meritois peu l'honneur de ton amitié, & que le Ciel seul estoit digne de toy. Tu as raison , diuine Ariane , & ie ne m'estime plus digne seulement de regarder ce Ciel qui te possède. Ie veux mourir , pour oster du monde vn homme si indigne de viure : mais auparauant ie veux vanger ta mort sur ces Nations brutales. Ie te veux esleuer des tombeaux & des pyramides des corps assommez de ces Barbares , & leur faire lauer leur impiété dans des fleues de leur sang. Grande Deesse , ie veux que tous les lieux de la terre où ie les rencontreray , soient tes Autels , sur lesquels ie te feray tous les iours de sanglants sacrifices ; & apres m'estre sacrifié moy-mesme pour derniere victime , i'iray là bas gemir eternellement pour le crime que i'ay commis de t'auoir abandonnée. Alcydamas apres auoir laissé aller dans sa douleur & dans sa rage plusieurs discours pareils , sauta tout d'un coup hors du lit , ne sçachant ce qu'il deuoit resoudre sur vn si cruel accident. Il demandoit tantost ses habits , tantost ses armes , changeant continuellement de propos , & paroissant vne personne insensée. Euphrosyne taschoit à remettre son esprit en le consolant , & eust bien désiré que le sage Lepante eust esté en estat de luy faire prendre quelque constante resolution. Elle luy dit qu'il ne falloit encore desesperer de rien , & que peut-estre Ariane auroit esté laissée par les Scythes fuyans , dans quelque autre endroit de la ville:

qu'il falloit chercher de tous costez , auant que de plaindre ce mal-heur comme veritable. On fit chercher de tous costez , avec beaucoup de soin ; mais toute cette diligence fut inutile. Polydore s'offrit d'aller secrettement la nuit avec Arcas dans le camp des Scythes , & de voir de tous costez , s'ils ne la pourroient point trouuer : Alcydamas mesme auoit quelque enuie d'y aller , & de tenter ce moyen ; mais chacun considerant qu'ils se mettroient dans vn danger manifeste sans beaucoup d'apparence de la trouuer , on les pria d'attendre encore vn peu que la fortune presentast quelque autre occasion , & de moderer par l'esperance les ennuis & les regrets de cette grande perte.

Alcydamas allant sur les murailles de la ville , pour decouurir ce que faisoient les ennemis , vid qu'apres s'estre remis dans leur camp , ils commençoient à en tirer tout ce qui y estoit pour le porter dans leurs vaisseaux , & faisoient contenance de gens qui se dispoient à partir le lendemain. Ceste veüe luy donna mille douleurs : pource qu'il iugeoit que iamais on ne souffriroit qu'il sortist pour les aller combattre , puis qu'ils faisoient mine de s'en aller ; & que si vne fois Ariane estoit emmenée en Scythie, iamais il n'en auroit de nouuelles. Il tournoit donc en son esprit mille pensees , & faisoit mille desseins , qui se trouuoient en fin sans aucun fondement asseuré. Il estoit dans ces résueries , quand l'un de ceux qui commandoient à la garde des portes , luy amena vn homme qui vouloit luy parler. Alcydamas cognoissant que c'estoit Amyntas , courut l'embrasser en soupirant ; Et Amyntas luy dit en particulier qu'Eurymedon serendroit auprès de luy dans deux iours avec trois mille hommes

de guerre. Helas ! dit Alcymadas , qu'Eurymedon viendra tard pour moy. Sçachez, cher Amyntas, que les Scythes s'en vont demain , ou le iour d'apres au plus tard , & emment Ariane. Ariane ? reprit Amyntas tout estonné ; Ah ! Dieux , quel mal-heur ? Alcymadas ne pût retenir les larmes ; il le conduisit chez luy, faisant ses plaintes & ses regrets : toutefois il le pria de ne dire à personne pour quel sujet il estoit venu , pource qu'il se pourroit seruir en quelque façon de son arriuée. Amyntas luy promit de garder le secret , & luy dit que la Thesalie n'auoit pas esté attaquée seule par ces Barbares , mais l'Isle encore d'où il venoit , de laquelle ils auoient heureusement esté chassés. Ils arriuèrent au logis , où Amyntas apres auoir salué Euphrosyne , se rejoyt fort de la reuoir ; mais bien plus encore d'apprendre qu'elle estoit mere d'Alcymadas , auquel il s'estimoit bien-heureux d'auoir rendu seruice en la deliurant ; & voyant qu'Alcymadas auoit besoin de diuertissement , il se resolut de luy conter ce qui luy estoit arriué depuis qu'il les auoit quittez en Epire. S'estant donc assis auprès de luy , d'Euphrosyne & de Polydore , il parla ainsi.



SVITTE DE L'HISTOIRE d'Eurymedon , & de Pasithée.

LORS que vous aurez sçeu l'hour qui nous a accompagné en nos voyages, ie ne doute point que vous n'ayez sujet de nous porter enuie, & de vous plain-

dre de la fortune, qui vous a si cruellement persecutez en mesme temps qu'elle nous traittoit si fauorablement.

Quand ie fus passé en Corceyre, ietrouuay qu'il se faisoit vn grand apprest de guerre en faueur d'Eurymedon, pour le retour duquel tous les Corsaires auoient esté si rejoyis, qu'il ne luy auoit pas esté mal-aisé d'obtenir d'eux tout ce qu'il desiroit. Les vns estoient empeschez à équiper les vaisseaux, les autres à mettre leurs armes en bon estat, & ils tesmoignoient tous autant de ioye d'aller seruir leur Prince, que s'ils eussent esté assurez dela conquête de l'Asie. Ie trouuay Eurymedon dans l'Isle, qui rangeoit ses gens en bataille, pour leur apprendre à combattre aussi bien sur terre qu'ils faisoient sur mer. Lors qu'il m'apperceut il vint au deuant de moy, & apres m'auoir embrassé me demanda de vos nouuelles. Ie luy dis en quel estat vous estiez, & le besoin que vous auiez de son secours: cela fut cause qu'il aduertit ses gens qu'il falloit partir le lendemain; & il me dit que ie pouuois m'en retourner, & vous assurer que le iour d'apres il se rendroit avec ses forces à Nicopolis, d'où il ne doutoit point qu'il ne vous deliurast, & que de là vous prendriez ensemble la route de Lesbos: toutefois il voulut me retenir le reste du iour, afin que ie ne partisse que la nuit, & que ie luy peusse faire vn plaisir en m'en retournant. Ie luy tesmoignay que ie serois bien aise d'auoir vne occasion de le seruir; & sur le soir il me donna Euphrosyne, qu'il me pria d'emmener secrettement dans mon esquip, pour la sauuer des Corsaires, & me la recommanda avec autant d'affection que si c'eust esté sa mere. Ie pris congé de luy, & arriuy à Nicopolis, où ie ne vous trouuay point au logis auquel ie vous auois laissé, & quelque

soin que ie prisse , iamaïs ie ne pûs sçauoir ce que vous estiez deuenus. Je laissay Euphrosyne dans le logis , & le lendemain ie m'en allay au port, où ie vis arriuer vn vaisseau dans lequel estoit Eurymedon , qui venoit sçauoir ce qu'il estoit besoin de faire, auant que de faire parestre le reste de sa petite armée. Je luy dis que ie ne vous auois point trouuez dans la ville : que i'auois sçeu que Trebace y estoit encore, qui n'auoit point eu nouuelles de vous; & que sans doute vous auriez trouué quelque autre moyen de vous sauuer. Nous iugeasmes qu'il seroit inutile de demeurer là dauantage. Eurymedon me demanda si Euphrosyne estoit en lieu de seurété. Je luy dis que ie l'auois mise au mesme logis où nous auions demeuré ensemble. Il me donna quelques commoditez qu'il fit tirer de son vaisseau pour luy porter : puis il s'enquit de moy de ce que ie voulois faire. Je luy tesmoignay que mes amis n'estant plus en ce lieu là, ie n'y auois plus d'affaire; & que ie serois bien aise de l'accompagner à Lesbos. Il fut bien content que ie le voulusse seruir en cette occasion ; & apres que i'eus esté reuoir Euphrosyne pour luy porter toutes les choses dont elle pouuoit auoir besoin , ie retournay le trouuer, & nous partismes ensemble du port; puis ayant ioint les autres vaisseaux qui l'attendoient, nous commençasmes à voguer. Le vent nous favorisa tellement que nous fîmes en peu de iours le tour du Peloponèse, & ayant passé la mer Egée , nous arriuasmes heureusement en l'Isle, où Eurymedon fut d'auis de prendre terre aux costes, & non pas au port.

Le riuage estoit si desert, que nous eusmes bien de la peine à y trouuer seulement vne personne, qui nous peust dire en quel estat estoient les affaires du païs : toutefois

nous rencontraſmes en fin quelques hommes qui cherchoient retraite dans les lieux les plus reculez, & qui nous apprirent qu'un grand nombre de Scythes eſtoit venu deſcendre en l'isle pour la piller, & que le Roy Archelas eſtoit reſolu de leur donner bataille, ayant avec luy pluſieurs Princes eſtrangers, qui eſtoient venus pour la deliurance de la Princeſſe Palithée, & qui s'eſtoient rencontréz fort à propos avec des forces pour ſauuer l'isle, & en chaffer les Barbares.

Eurymedon apprenant ces nouuelles ne ſçeut à quoy il ſe deuoit reſoudre : il euſt bien deſiré ſ'aller preſenter au Roy, pour le ſeruir au iour de la bataille ; mais il craignoit ſa colere. Auſſi ne ſçauoit-il comment il pourroit ſe trouuer au combat, ſans eſtre reconnu : d'un autre coſté il luy eſtoit impoſſible de demeurer dans le païs ſans eſtre rencontré, ou par les Scythes, ou par Archelas, & nous n'auions en tout que quatre mille hommes, avec leſquels nous ne pouuions pas reſiſter à vne grande armee ; en fin il ſ'aduifa de cette ruſe. Vous ſçauéz qu'il eſt fort ieune, & extremement beau, il ſe reſolut de ſe déguifer en fille, pour aller trouuer le Roy ſans qu'il le reconnuſt, & de dire à Archelas qu'il eſtoit fille du Roy de Colchos, que les Scythes auoient maſſacré apres auoir pillé ſon Royaume, & qu'elle auoit trouué moyen de ſe ſauuer de leur fureur, avec peu de ſoldats qu'elle auoit amenez ; que cherchant un refuge aupres de luy, elle eſtoit bien aiſe de trouuer occaſion à cet abord de le ſecourir luy meſme, & de ſe vanger ſur ces peuples cruels de la mort de ſon pere. Cela eſtant ainſi concerté il choiſit les plus ieunes d'entre les ſoldats pour ſe déguiler auſſi, & repreſenter les filles de ſa ſuitte ; & pource que ie

n'ay point encore de poil, il me pria d'estre de ce nombre. De bonne fortune il auoit faict prouision de quelques habits de femme fort beaux, ayant dessein d'enleuer Pasithée, de peur qu'elle n'en eust besoin s'en allant avec luy à l'impourueu, & cela luy vint fort à propos & à nous. Le vous iure que lors qu'il eut pris vne juppe, & qu'il eut accommodé en tresse ses cheueux, qu'il porte fort longs, i'y fust trompé moy-mesme; & ie cognois peu de filles qui le surpassassent en beauté. Il s'arma seulement d'un corselet & d'un casque, & ayant l'espee au costé & le jaelot en main, il ordonna à tous ceux qui s'estoient aussi disguisez de se mettre au mesme estat, & nous fismes descendre des nauires quelques cheuaux, sur lesquels nous montasmes, & allasmes en bon ordre à la teste de nos troupes vers Mitylene.

Nous n'auions pas fait encore la moitié du chemin, que nous apperceusmes des hommes de cheual, armez, qui couroient espars comme estant assez desperdus: nous en arrestasmes quelques vns qui nous dirent que les armées d'Archelas & des Scythes s'estoient rencontrées, & qu'il s'en falloit peu que le Roy ne fust deffait. Eurymedon se fit enseigner le lieu où la bataille se donnoit, & aussi tost il nous commanda d'auancer pour secourir ce Prince. Nous arriuasmes incontinent sur vne butte, d'où nous apperceusmes le combat, & ayant reconnu les troupes du Roy qui estoient fort en desordre, nous courusmes pour les soutenir; & nous le fismes si à propos, que les vaincus commencerent à reprendre courage.

Eurymedon ouurit en vn moment les escadrons des Scythes, & son habit de fille faisoit parestre ses coups

plus merueilleux : ie le suiuiſois par tout , taſchant d'imiter ſa valeur , & nous paruinſmes en fin iuſques au plus fort de la bataille , où eſtoit le Roy qui eſtoit tombé de ſon cheual, & n'eſtoit plus deſſendu que de deux ou trois ſoldats qui ſouſtenoient avec beaucoup de peine vn grand nombre de Scythes. Eurymedon tua quatre ou cinq Barbares qui ſembloient les plus obſtinez, & cependant que ie ſouſtenois les autres, il deſcendit de cheual, & s'adreſſant au Roy, luy dit. Courage, Archelas, aſſeure toy que tu ſeras aujourd'huy vainqueur. En meſme temps il luy aida à remonter à cheual, & ſe remettant auſſi toſt ſur le ſien, ils allerent enſemble attaquer les Barbares qui commençoient à ſ'eſbranler.

Le Roy auoit touſiours les yeux attachez ſur cette guerriere inconnüe, & ne ſçauoit de quel coſté luy venoit ce ſecours. Il admiroit les coups qui partoient du bras de cette genereuſe fille, & ne pouuoit croire que ce fuſt autre choſe que Pallas meſme, qui fuſt venuë à ſa deſſenſe. Je ne vous rediray point toutes les rencontres particulieres de cette bataille : en fin nous demeurames vainqueurs ; & apres que nous fuſmes de retour de la chaffe des fuyans, le Roy receut Eurymedon avec autant de reſpect que ſi c'eult eſté vne Deeſſe : mais luy ne voulant point le tenir en cette erreur, luy dit qu'il eſtoit la fille du Roy de Colchos, avec ce qu'il auoit prémedité, & adiouſta qu'il n'auoit iamais eu tant de ioye, qu'à punir ces Barbares de la mort de ſon pere.

Archelas oſa bien l'embraffer alors en qualité de Princeſſe, & luy dit que puis qu'il auoit tiré vn ſi grand auantage du mal-heur de ſon pere & du ſien, il le prioit auſſi de diſpoſer de tout ce qu'elle luy auoit conſerué. Grand
Roy

Roy , dit cette Princeſſe deſguifée , ie ne vous demande qu'une retraite dans vos Eſtats , & que ie puiſſe tenir auprès de vous un rang digne de ma naiſſance. Le Prince qui ſe ſentoit deſia touché d'amour , luy dit , qu'il eſtoit en elle de ſervir dans ſon Royaume le degré le plus haut où ſon ſexe peult paruenir ; & qu'il la feroit Maïſtreſſe de ſes Eſtats & de ſa perſonne , ſi elle l'auoit agreable. Eurymedon ne voulut pas perdre cette occaſion , & luy dit. La fortune où ie ſuis ne me permet pas d'eſperer cét honneur : toutefois puis que celle où vous eſtes vous permet toutes choſes , j'accepte l'offre que vous me faites , & ie vous prie de vous en bien ſouuenir , lors que ie vous ſommeray de voſtre promeſſe. Il iura qu'il ne luy manqueroit iamais , & qu'il luy ſeroit aiſé d'eſfectuer ce qu'il deſiroit avec une grande paſſion. Pluſieurs Princes arriuerent en meſme temps , & ſembloient deſirer quelque choſe du Roy , qui voyant leur impatience , dit à Eurymedon qui s'eſtoit fait nommer Hermione , que ces Princes attendoient ſon iugement ; pource qu'il leur auoit promis que celuy qui teſmoigneroit le plus de valeur en cette iournée , auroit en mariage la Princeſſe Paſithée ſa fille. Eury- medon rougit à ce diſcours , eſtant bien faſché de n'auoir pas paru à la bataille en habit d'homme , pource que perſonne n'eult pû pretendre cét honneur plus legitiment que luy. Le Roy ſ'apperceut de ſa rougeur , & luy en demanda le ſujet. Je vous le diray une autrefois , reſpondit Hermione : mais voyons à qui vous donnerez la Princeſſe. Si vous eſtiez homme , dit Archelas , ſans doute elle vous ſeroit acquiſe ,

pource que vous estes la personne qui auez le plus monstré de valeur : mais cela n'estant point ie ne veux pas laisser de vous donner l'honneur de cette victoire. Alors il fit signe aux Princes qu'il vouloit leur parler, & il prononça ces mots. Puisque nous sommes tous redeuables de la deffaite des Scythes au seul courage de la vaillante Hermione, il n'y en a point d'autre qu'elle qui doieue prendre aucun honneur : & puis qu'en la personne de ma fille le Royaume de la Troade & de cette Isle estoit destiné à celuy qui eust emporté le prix; ie suis obligé par mon serment de faire Hermione Reine de mes Estats, quand ie n'y serois pas obligé par mon affection.

Les Princes furent bien estonnez ; & bien que Hermione parust avec beaucoup de beautez & de graces , ils ne peurent toutefois estre satisfaits d'elle. Le Roy la prit alors par la main , & la fit mettre avec luy dans vn chatiot qui l'attendoit pour retourner à Mitylene , avec les troupes victorieuses qui l'accompagnoient. Le peuple qui auoit esté aduertý que le Roy desiroit espouser cette Princesse , l'appelloit desia leur Reine; dequoy Eurymedon sousrioit en luy mesme. Archelas l'ayant auprès de luy , voulut sçauoir pour quel sujet elle auoit rougy quand elle auoit entendu parler de Pasithée sa fille. Pource , respondit-elle, que ie ne croyois pas que vous eussiez d'enfans, & cette parole m'a surpris. Je n'ay, dit-il que cette fille, encore seroit-il plus à propos que ie ne l'eusse point, pour le desplaisir que j'en ay receu : alors il fit vn grand soupir. Hermione luy demanda quel sujet elle luy auoit donné de se plaindre d'elle. Il y a quel-

que temps, respondit Archelas, qu'un ieune inconnu vint aborder en cette Isle, & apres que ie l'eus receu avec beaucoup d'honneur, il sceut si bien la gagner, qu'il la rendit amoureuse de luy. Ce meschant euita ma colere en s'enfuyant, & j'ay esté contraint de renfermer pour iamais ma fille en vn lieu où elle n'en peust auoir de nouuelles. Je vous plains, dit Hermione, si elle a esté si mal-heureuse que d'offenser son honneur. Je ne croy pas, reprit le Roy, qu'elle se soit tellement oubliée : mais ie la surpris vn iour lors que ce ieune homme, qui se nommoit Eurymedon, luy baisoit la main. Ah ! grand Roy, repliqua Hermione, cela seul ne merite pas vn si cruel supplice. Mais, continua-t'elle, qui estoit cét Eurymedon ? estoit-ce vn Prince, ou vne personne indigne des bonnes graces de la Princeesse. Il se disoit Prince à la verité, respondit le Roy, & auoit beaucoup de belles qualitez : mesmes nous luy auions quelque obligation ma fille & moy : mais à grande peine eussay-je pû estre asseuré s'il estoit de sang Royal, puis qu'il ne le sçauoit pas luy mesme ; & c'estoit trop de temerité à luy d'entreprendre la recherche de ma fille sans mon consentement, puisque la fortune ne luy auoit rien donné sur quoy il peust fonder son esperance. L'amour, luy dit Hermione, n'a pas toutes ces considerations ; & les fautes auxquelles il nous porte, sont plustost des erreurs excusables, que des crimes : & si cét Eurymedon auoit quelques bonnes qualitez, ie trouue que la Princeesse n'a pas commis vne si grande faute ; & vous prie par l'affection que vous me tesmoignez, de n'estre pas si cruel à vostre sang, & de luy vouloir don-

ner la liberté en ma faueur. Archelas qui vouloit obliger Hermione, luy promit de la deliurer auant qu'il fust huit iours, puis qu'elle le desiroit.

Il la conduisit en son Palais, où elle fut logée comme si desia elle eust esté la Reine; & toutes les Princesses & les Dames vindrent luy faire la reuerence. Hermione s'acquitoit fort bien de toutes ces ceremonies, & sembloit y auoir esté nourrie toute sa vie: mais rien ne luy tarδοit tant que de voir Pasithée. Toutefois elle craignoit de se descouurir, si elle en parloit trop souuent au Roy: Luy d'autre costé ne souhaittoit rien tant que d'espouser Hermione: mais il n'y auoit pas apparence de faire ce mariage, qu'il n'eust bien pourueu de tous costez à la seureté de son Royaume apres la deffaitte des Scythes. Il ne laissoit pas de luy tesmoigner son impatience, & Eurymedon appelloit les Dieux à tesmion, & le prioit de croire qu'il souhaittoit l'honneur de son alliance autant ou plus que luy mesme. Dequoy le Roy le remercioit, n'entendant pas le sens des paroles d'Eurymedon, qui vouloit parler de l'alliance qu'il desiroit faire avec luy en espousant sa fille.

En fin deux iours apres Hermione fit tomber le discours sur Pasithée, & tesmoignant vn grand desir de la voir obtint du Roy la permission de l'aller visiter dans le Chasteau où elle estoit, à la charge qu'elle ne seroit accompagnée que de ses filles. l'estois de ce nombre, continua Amyntas, de sorte que j'allay avec Hermione dans ce Chasteau, dont le dedans n'estoit gardé que par des femmes. Elles firent toutes beaucoup d'honneur à Hermione, sçachant qu'elle estoit destinée pour estre leur Reine, & nous fusmes conduits au lieu

où estoit la belle Pasithée, qui vint au deuant de nous, & ayant oüy parler d'Hermione, & de tout ce qui se disoit d'elle, la receut avec vn fort grand respect, comme celle de qui elle croyoit dépendre vn iour entierement. Hermione l'embrassa & la baisa long-temps; puis l'ayant tirée à part, luy demanda si elle ne se souuenoit point d'auoir veu quelqu'vn qui luy ressembloit. Pasithée rougit, & n'osa luy dire qu'elle ressembloit fort à Eurymedon; pource qu'elle craignoit de prononcer ce nom deuant celle qui deuoit estre bien-tost la Reine. Eurymedon reconnut sa crainte, & pour l'asseurer luy dit: Belle Princesse, ne craignez point de me descourir vostre secret, ie suis sœur du Prince Eurymedon, qui ne suis venuë en cette Isle que pour vous seruir, & mon cher frere, qui se meurt pour vostre amour. l'ay esté si heureuse que de secourir le Roy vostre pere en la bataille, & luy donner assez de passion pour luy faire desirer de m'epouser. Mais ie ne luy accorderay iamais ce qu'il souhaite que vous ne soyiez mariée avec Eurymedon. Madame, respondit Pasithée vn peu confuse, ie croirois que vous me voudriez surprendre par ces paroles, si ie ne remarquois en vous tous les traits du visage d'Eurymedon; & puis que vous auez bien voulu luy tesmoigner vne si parfaite amitié; ie veux bien aussi vous auouer l'amour extrême que ie luy porte, pour laquelle j'ay estimé ma captiuité bien douce. Hermione la baisa pour luy monstrier combien ces paroles luy estoient agreables, & la pria de luy iurer qu'Eurymedon seroit son mary. Ie le iure, dit-elle, entre vós mains, &

ie vous promets de me donner à luy aussi tost que le Roy y aura donné son consentement.

Elles se toucherent alors dans la main , & se baisserent long temps : puis ce discours estant cessé , Pasithée parla des ennuis qu'elle auoit receus en cette prison , dont Hermione luy promit qu'elle seroit bien-tost deliurée , pourueu que le Roy luy tint sa parole. Eurymedon estoit si rauy de voir sa chere Maistresse , & de l'erreur dans laquelle il la tenoit , qu'il ne cessoit de luy tesmoigner vn extrême contentement , & ne manquoit pas de prendre autant de baisers qu'elle luy en donnoit de fois l'occasion. Mais il voulut passer plus auant , & ayant tesmoigné à Pasithée qu'il eust bien voulu se deliurer des entretiens de son pere pour vn iour ou deux , il fit en sorte que la Princesse trouua bon qu'il enuoyast vers le Roy pour luy demander la permission de coucher cette nuit avec la Princesse sa fille , pource qu'elle ne pouuoit assez la voir à son gré. L'estois , poursuiuit Amyntas , la principale des filles de la fuite d'Hermione , & ie fus choisie pour aller deuers Archelas , qui s'accorda à ce que desiroit Hermione , à condition qu'elle reuiendrait le lendemain. Je leur apportay ces nouvelles , qui furent receuës avec grande ioye de toutes deux ; mais bien plus d'Eurymedon , qui sous ce desguisement esperoit recevoir les plus cheres faueurs de sa belle Maistresse. Tout le soir ils ne cessèrent de s'entretenir avec vne incroyable satisfaction , & la nuit estant venue nous les deshabillâmes. Les filles de Pasithée ne luy eurent pas si tost osté ce qui luy cachoit le sein , qu'Hermione y porta la bouche ,

& luy dit que son frere auoit bien raison d'estre si passionnément amoureux d'elle , & qu'elle ne se repentiroit iamais d'auoir entrepris de le seruir pour vn si beau sujet. Pafithée receuoit ces caresses & ces paroles avec beaucoup de respect , & en fin nous les mîmes ensemble au liçt. Il m'eust esté assez facile de coucher aussi avec vne des filles de la Princesse : mais quand i'en eusse eu la volonté , ie n'en eusse pas eu le loisir : car incontinent nous entendîmes crier Pafithée. L'allay avec ses filles pour voir ce qui luy estoit arriué , & lors que nous fûmes auprès d'elle , ie la trouuay bien empeschée à sçauoir dequoy elle se deuoit plaindre : pource qu'Eurymedon luy ayant dit ce qu'il estoit , & l'ayant fort pressée de luy accorder ce qu'il desiroit , elle ne songeoit qu'à sortir d'entre ses mains ; toutefois elle ne vouloit point aussi l'accuser deuant ses filles , de peur que le Roy ne sçeuft la fourbe qu'on luy auoit iouée. En fin elle se resolut de feindre qu'elle auoit esté surprise par de furieuses douleurs qui l'auoient obligée de crier ainsi , & dit que de peur d'incommoder Hermione elle alloit se retirer en la chambre de ses filles. Eurymedon voyant sa resolution n'osa la retenir , & elle sortant du liçt s'alla enfermer dans vne chambre où nous ne la peûmes voir que le lendemain.

Il me faisoit part de tous ses secrets , & il me conta dès la nuit même que s'estant déclaré à la Princesse , elle s'estoit fort offensée de sa hardiesse , & s'estoit esloignée de luy ; & que bien qu'il eust tasché de la vaincre , en luy représentant qu'elle luy auoit donné la foy , & que le Roy son pere leur auoit permis de

coucher ensemble , iamaïs elle ne l'auoit voulu escouter. En fin qu'ayant entrepris d'employer quelques efforts pour ne perdre pas vne si belle occasion , elle s'estoit escriée afin que quelqu'un la deliurast d'entre ses mains. Il auoit peur qu'elle fust fort fâchée contre luy : mais ie l'assuray qu'il ne le deuoit point craindre , & que puis qu'elle auoit eu la retenue de ne le point accuser deuant ses filles , c'estoit signe qu'elle auoit encore beaucoup d'amour pour luy. Le lendemain il trouua veritable ce que ie luy auois dit : pource que feignant d'aller voir comment elle se portoit , elle se laissa long temps entretenir par luy , & receut toutes ses excuses ; puis se resolut de se laisser enleuer en quelque lieu du monde qu'il la voulust mener , à la charge qu'il n'entreprendroit rien sur elle qu'ils ne fussent mariez ensemble par le consentement de son pere.

Eurymedon fut en fin contraint de la laisser pour aller retrouver le Roy : nous partismes de ce Chasteau & allasmes au Palais d'Archelas , qui tesmoignant vne grande ioye de reuoir Hermione , luy demanda si sa fille l'auoit traitée comme elle le meritoit. Vous auez , respondit-elle , la plus aimable fille qui soit au monde , & vous pouuez iuger si i'en estois mal satisfaite , puis que le iour d'hier ne me suffisoit pas pour iouir de sa compagnie , & qu'il a fallu y adiouter la nuit. Le Roy repartit : Ne vous a-t'elle point fait beaucoup de plaintes de moy ? Au contraire , reprit Hermione , nous n'auons cessé de vous louer de la permission que vous nous auez donnée : pource que iamaïs deux personnes n'eurent tant d'inclination à s'aimer. le me ré-
jouis

jouis fort, dit Archelas, qu'il soit sorty de moy quelque chose qui vous soit agreable, & ie seray bien aise qu'elle vous fasse compagnie & seruice toute sa vie. Ils eurent encore quelques autres entretiens pareils, apres lesquels Eurymedon m'enuoya deuers ses trou-
pes, pour les aduertir qu'elles se tinssent prestes pour partir, & que cependant on prist bien garde de ne le pas descourir. Je rencontray par la ville celuy que vous nous auiez enuoyé, dit Amyntas à Melinte, qui ne m'eust iamais reconnu en l'habit où i'estois; & ie fus bien-heureux de le trouuer, pource que s'enquerant d'Eurymedon, il eust peut-estre donné quelque soupçon. Je me fis connoistre à luy, & il me dit le lieu où vous estiez, & pour quel sujet vous l'auiez enuoyé: ie luy promis d'en parler à Eurymedon, & de le disposer à vous mener ses forces lors que nous enleuerions la Princesse, & l'ayant conduit dans nos vaisseaux, ie luy donnay charge de m'y attendre.

Lors que ie fus de retour deuers Eurymedon, il reçut bien de la ioye de sçauoir en quel lieu vous estiez, & d'auoir moyen de vous secourir; pource qu'emmenant la Princesse, il luy seroit assez commode d'aller descendre en la Thessalie: toutefois nous remismes à deliberer de toutes choses avec Pasithée.

Le lendemain il retourna la voir, & apres luy auoir fait encore mille caresses, luy fit part des nouuelles qu'il auoit receuës de ses plus chers amis qui auoient besoin de son secours, & luy dit que si elle l'auoit agreable, ils s'en iroient tous ensemble en la Thessalie, qui estoit vn lieu bien propre pour leur retraitte. Elle consentit à tout ce qu'il voulut, & pource qu'elle de-

uoit estre mise le lendemain en liberté, ils furent d'aui-
de m'enuoyer deuers vous, pour vous dire que dans
deux iours ils esperoient se rendre icy : pource qu'e-
stant tous deux libres, ils pourroient faindre de
s'aller promener ensemble hors la ville & se met-
tre dans les vaisseaux que l'on tenoit prests pour par-
tir.

L'auois de l'impatience de vous voir, pour vous
apporter ces nouuelles; de sorte que ie pris con-
gé d'eux aussi tost, & vins m'embarquer avec celuy
que vous auiez enuoyé, qui me conta tout ce qui
vous estoit arriué depuis que ie vous auois quitté,
& que de peur d'estre descouuert, vous vous faisiez
appeller Alcydamas, & Palamede Polydore; il m'ap-
prit vn lieu où nous pourrions descendre en ce país
sans estre veus des Scythes; & vous voyez comment
i'y suis arriué sans danger. Je l'ay renuoyé dans le vais-
seau, afin qu'il adressast de mesme Eurymedon, lors
qu'il viendrait. Je ne doute point qu'ils ne soient
bien tost icy, pource que l'on ne se deffie aucune-
ment de la feinte Hermione; & Archelas est telle-
ment auégulé de son amour, qu'il luy permet tout
ce qu'elle desire; de sorte qu'il leur sera facile de s'es-
chapper; & i'espere qu'alors qu'ils seront arriuez avec
leurs forces, nous aurons moyen d'empescher les Scy-
thes d'emmener Ariane, s'ils demeurent encore icy du-
rant ce temps; & que nous trouuerons quelque occa-
sion de l'enleuer d'entre leurs mains, soit par ruse, soit
par force ouuerte.

Amyntas finit ainsi son discours, qui eust esté es-
couté avec bien plus de plaisir en vne autre saison; tou-

refois il ne laissa pas de donner vn peu de relasche aux douleurs qu'ils souffroient pour la perte d'Ariane. Mais quand il eut acheué, à peine peurent-ils dire leur sentiment sur ce qu'ils auoient entendu, tant ils estoient affligez; & chacun d'eux reprit les plaintes comme auparavant.

Fin du quatorziesme Liure de l'Ariane.







LE
QVINZIESME
LIVRE DE
L'ARIANE



ANDIS qu'Amyntas recitoit les auantures du genereux Eurymedon & de la belle Pasithée, Alcydamas auoit bien de la peine à luy donner de l'attention, estant si cruellément diuertý par son mal-heur qui occupoit entierement son esprit, que souuent il luy faisoit recommencer vn mesme discours pour en apprendre la suite; pource que ses pensées s'eschappoient continuellement pour aller trouuer Ariane. Mais lors qu'il eut acheué, il le tira à part, & le pria de venir avec luy au Chasteau pour parler à Arimin. Polydore auoit esté conseillé de garder le liét à cause de sa blesseure, de

sorte qu'Alcydamas se peût cacher de luy en cette occa-
 sion : & ayant aduertty Amyntas de son dessein , il le me-
 na deuant Arimin , auquel il dit que celuy qu'il voyoit
 estoit vn de ses amis qui estoit venu secrettement de la
 part d'Eurymedon , de qui il luy auoit parlé au commen-
 cement du siege , pour l'aduertir qu'il luy enuoyoit par
 mer trois mille hommes qui estoient à vn abry vn peu
 esloigné des vaisseaux des Scythes , & qui entreroient
 cette nuit dans la ville par diuerfes portes , pour n'aller
 pas en gros , & n'estre pas apperceus des Barbares. A-
 rimin fut bien aise de ce secours , & Alcydamas le pria
 d'enuoyer aduertir tous les Chefs & les Gardes des por-
 tes , qu'ils fissent ce qu'il desireroit . Aussi tost Arimin
 manda par tout que l'on fist durant cette nuit tout
 ce qu'Alcydamas commanderoit , & vn peu apres Al-
 cydamas le quitta pour aller donner ordre à ce qu'il a-
 uoit entrepris . Amyntas & Arcas sceurent seuls son se-
 cret , avec lesquels la nuit estant arriuée , il alla tirer
 cinquante hommes à cheual de chacune Compagnie
 des Thessaliens , à quoy aucun des Capitaines ne resi-
 sta , croyant qu'il eust cet ordre . Il choisit ainsi ius-
 ques à cinq cens hommes : puis il prit trente trompet-
 tes , & ayant tout fait sortir de la ville sans bruit , il
 dit à ses compagnons qu'il auoit promis à Arimin de
 luy deffaire cette nuit tout le camp des Scythes , lesquels
 il ne pouuoit souffrir de voir partir emmenant beaucoup
 de personnes qu'ils auoient prises dans Larisse , sans tal-
 cher à les retirer de leurs mains : qu'il les auoit tous
 choisis , sçachant qu'ils auoient assez de courage pour aller
 attaquer les Barbares dans leur camp mesme , lors qu'ils
 seroient assoupis de vin & de sommeil ; & que peu de

personnes fondant sur eux à l'impourueu , feroient plus d'effect que plusieurs dont ils auroient eu aduis ; qu'ils luy tesmoignassent donc s'ils auoient enuie de le suiure & de gagner le plus grand honneur que gens de guerre eussent iamais sceu acquerir. Ces Gentils-hommes Thessaliens aimoient tellement le valeureux Alcydamas, & se fioient si fort en sa conduite, qu'ils luy crierent tous qu'il les menast. Alors il leur dit que cette entreprife auoit esté conceüe par luy particulièrement pour sauuer quelques Dames qui estoient prisonnières des Scythes ; de sorte qu'entrant dans leurs tentes il faudroit espargner ce sexe , & les retirer d'entre leurs mains ; & pource que la principale se nommoit Ariane, il leur donnoit ce cry pour effrayer les Barbares en les attaquant tout à coup ; & qu'il les prioit de crier incessamment , Ariane, Ariane, où estes vous ? lors qu'une fois ils se feroient meslez parmy eux. Cela estant ainsi arresté, il alla luy-mesme poser vingt de ses trompettes, deux à deux, tout à l'entour du camp des Scythes, avec ordre de sonner lors qu'il feroit commencer de son costé. Il en reserua dix pour estre à la teste de ces cinq cens hommes, lors qu'il entreroit avec eux dans le camp. Apres les auoir encore bien encouragés, il n'en fit qu'une troupe, avec laquelle il alla bien ferré, & à l'entrée du camp fit sonner ses trompettes. les autres responderent à l'instant de tous costez, donnant une allarme effroyable ; & aussi tost il commença à entrer dans les tentes de toutes parts, & de faire une estrange boucherie des Scythes effrayez, qui pensoient que tous les demons se fussent assemblez pour les assommer. Melinte & ses compagnons n'auoient que la peine de tuer, entrant par tout, en criant incessamment Ariane, Aria-

ne, & tout retentissoit de ce beau nom. Melinte cherchant par tous les endroits les plus cachez, crioit, Ariane, ma chere Ariane, où estes vous? Ariane, c'est Alcydamas qui vous cherche: belle Ariane, où estes vous? Cependant il tuoit tout autant de Scythes qui se presentoient à luy; & il s'engagea si auant en cette recherche, qu'il rencontra vn gros de Barbares qui s'estoient ralliez, n'ayant alors qu'Amyntas & Arcas à ses costez. Son courage ne luy permit pas de reculer; au contraire il poussa son cheual au milieu d'eux, & les escarta en vn instant. Sa valeur animée encore par son amour, luy faisoit faire des coups prodigieux, s'imaginant que chacun des Scythes qu'il fraploit estoit celuy qui auoit enleué Ariane. Incontinent il tua ou mit en fuitte ce nombre qui s'estoit rallié, & alors nul ne luy fit plus de resistance. Il fendoit les testes, il abbattoit les espaulles, & ses ennemis croyoient que ce fust Mars luy mesme qui fust venu pour les destruire. Amyntas & Arcas en tuoient aussi autant qu'ils en trouuoient, & le reste des Thessa-liens admirant l'espouuantable effroy de ces Barbares, ne cessoient de les mettre au fil de l'espée. De sorte que parmy tout le camp les corps morts estoient amoncellez les vns sur les autres; & cependant ils ne cessoient tous de crier, Ariane, Ariane.

Alcydamas apres auoir visité toutes les tentes, & le iour commençant à poindre, se trouua en fin hors du camp, ne voyant plus aucun ennemy, & ne pouuant trouuer ce qu'il cherchoit. Il laissa poursuiure aux siens ce qui restoit des Scythes qui gagnoient leurs vaisseaux, & lassé de tuer, de chercher, & de crier, & se trouuant tout hors d'haleine & plein de sueur, il fut contraint de
des-

descendre de cheual , & se coucha au pied d'un arbre. Doncques , dit-il alors en luy mesme , voila le fruit que ie recueille de tant de trauaux? Vn seul ne reste en Thes-salie de tant de Barbares qui l'auoient assaillie. Je les auray tous exterminéz , & cependant ie n'auray point Ariane? Ah! valeur inutile , qui souffres que ces Barbares triomphent de moy dans leur deffaite mesme ; & qui n'as pû par la mort de tant d'hommes racheter la vie d'Ariane seule. Amour miserable ! que feray - ie ? suruiuray - ie laschement à mon desastre? ou bien me peut-il rester quelque esperance par quelque moyen qui soit encore à esprouuer? Dieux iniustes , que ne me la rendez vous ? ne me l'auez vous point vous mesmes rauie? Vn Dieu ne pouuoit prendre que la forme d'un Scythe pour vne action si barbare. Helas! si vn Dieu la possede à present , quelle rage de ialousie ? & si vn Scythe l'enmeine , quelle horreur de honte & d'infamie.

Lors que le miserable Alcydamas s'employoit à faire ces regrets , il vid passer deuant luy vn Scythe fuyant , & vne fille qui couroit apres , & qui le poursuuoit à coups de traits. Alcydamas eut peur que le Scythe se retournant ne luy peust faire du desplaisir ; de sorte qu'il se leua , & la suiuant luy cria : Arrestez vous , belle fille , vous estes trop valeureuse : ne craignez vous point ce Barbare? Cette fille entendit la voix qui luy parloit , & se retournant , laissa approcher Alcydamas qu'elle reconnut aussi tost , & luy dit. Ah ! mon cher Alcydamas , est-ce bien vous? Alcydamas reconnut aussi tost la voix & le visage d'Ariane , & ouurant les bras d'excès de ioye , la tint long temps embrassée. Ils demurerent ainsi quelque temps immobiles , & sans pouuoir parler : en fin quittant les

embrassemens pour se regarder , & admirer l'heur de s'estre retrouuez. Helas! dit Alcydamas , est-ce bien vous que ie n'ay pû trouuer en cherchant de toutes parts , & que ie trouue en ne vous cherchant point? Ils estoient tous deux si affoiblis de trauail , & de saisissement de ioye , qu'ils furent contrains de se mettre sur l'herbe près d'une haye, & incontinent Arcas qui s'estoit esgaré de son Maistre, arriua au mesme lieu, & Amyntas vn peu apres, qui se réjouirent avec Ariane du bon-heur de la reuoir. Aussi tost qu'elle pût parler librement, Alcydamas luy tesmoigna l'impatience qu'il auoit de sçauoir quelle auoit esté la fortune , & comment elle n'auoit point entendu qu'ils l'appelloient de toutes parts.

Pour vous faire sçauoir , respondit-elle, de quelle sorte cela est arriué, il faut que ie vous recite les accidens que i'ay courus depuis ma prise dans Larisse. Vn Scythe qui m'emmenoit ayant trouué vn cheual dans la ville, m'emporta dessus , & sortant hors les portes voulut gagner vn bois pour s'esloigner de la rencontre de ses compagnons. Iugez en quel effroy i'estois , & combien de cris & de plaintes i'espandois inutilement; mais lors qu'il s'arresta , & qu'il voulut descendre de cheual avec moy, il se sentit frappé d'une fiesche. Il se retourna aussi tost, & vid vn autre Scythe qui l'auoit suiuy à pied , lequel ayant dessein de m'auoir , & ne le pouuant si tost atteindre , l'auoit voulu arrester par ce coup tire de loin. Le premier qui auoit esté frappé, tirant vne fiesche de son carquois la mit aussi tost à son arc, & en blessa aussi l'autre qui venoit à luy. Alors ils jeterent tous deux leurs arcs & leurs fiesches, & mirent l'espée à la main pour combat-

tre, & voir à qui des deux ie demeurerois. l'estois si es-
perduë que ie ne sçauois quelle resolution prendre, vo-
yant que quelque accident qui peult arriuer ie demeure-
rois à l'un des deux. Je taschay à monter sur le cheual
qui estoit près de moy, pour m'enfuir cependant qu'ils
combattroient : mais iamais il ne me fut possible, & ie
fus contrainte d'attendre le succès de ce duel. Ils se don-
noient des coups furieux, estant tous deux animez du
desir de m'auoir : mais le premier estant encore enflam-
mé de courroux, & de l'enuie de se vanger de l'autre,
me sembloit plus vaillant : aussi abbatit-il à ses pieds ce-
luy qui l'auoit attaqué, & se couchant sur luy tascha de
luy oster la vie : dequoy l'autre ne faisoit plus que se def-
fendre en se debattant. Desia le premier luy auoit don-
né deux coups d'espée dans la gorge, & ie voyois qu'il
m'auoit tantost acquise, lors qu'un serpent, sorty d'un
buisson qui estoit près de là, vint mordre à la jambe ce-
luy qui estoit dessus : puis s'alla remettre dans le buis-
son. Je creus aussi tost que c'estoit un aduis que les Dieux
m'enuoyent, que si ie me pouuois deffaire de celuy
qui restoit, ie serois sauuée. Je pris alors courage, &
croyant estre assistée d'une inspiration diuine, ie me
faisis d'un de leurs arcs, & mettant vne fleche dessus,
l'approchay d'eux, & courbant l'arc avec le plus de force
que ie püs, ie laissay aller la fleche, & perçay le corps
de celuy qui alloit estre vainqueur, que l'autre Scythe en
mourant tenoit encore embrassé. Je ne me contentay pas
de celle-là : mais voyant qu'il ne se pouuoit encore deff-
faire de celuy qu'il tuoit, ie redoublay d'une autre fleche,
avec laquelle ie fus si heureuse que de luy percer le cœur,
& tous deux expirerent en mesme temps. l'estois bien

contente de mevoir ainsi deliurée : toutefois lors que ie pensay partir, ie vis en leuant les yeux, quatre ou cinq autres Scythes qui s'approchoient de moy, & qui auoient esté tesmoins de mon action, dont l'émotion ayant peut-estre donné à mon visage quelque esclat extraordinaire, ils creurent qu'il y auoit en moy quelque chose de diuin, d'auoir tué comme ils pensoient deux hommes d'un seul coup. Ils eurent donc quelque respect pour moy, croyant que j'estois quelque Deesse tutelaire de la Grece, qui vangeoit sur eux le degast qu'ils auoient fait dans la Thessalie. Toutefois l'un d'entr'eux plus hardy s'approcha de moy, & voulut me toucher. Ie me reculay aussi tost derriere le buisson où i'auois veu le serpent se retirer, & mettant vne fiesche sur mon arc, ie la iettay dans le buisson pour en faire partir le serpent, lequel aussi tost se lança sur eux. Alors ils ne mirent point en doute que ie ne fusse vne Deesse, croyant que la fiesche que i'auois tirée se fust changée en serpent pour les deuorer. Ils se ietterent à mes pieds pour m'adorer, & me tesmoignerent par leur langage que ie n'entendois point, qu'ils me prioient de leur pardonner, & d'empescher ce serpent de leur nuire. Il arriua par hazard que le serpent s'esloigna d'eux en mesme temps, & se perdit dans les hayes; ils me tesmoignerent par leurs actions combien ils m'en estoient redevables : mais lors que ie voulus me seruir de cette opinion que ie leur auois donnée que j'estois vne Deesse pour m'en aller d'avec'eux, ie me trouuay bien empeschée; pource qu'ils m'environnoient à genoux, & me prioient de ne les point abandonner. D'autre costé i'aimois mieux demeurer parmy ceux qui estoient preuenus de cette erreur, que de retomber entre les mains de quelques au-

tres qui n'eussent pas esté trompez comme eux. Je me resolus donc, ne pouuant faire autre chose, de m'en aller avec eux, & de m'en seruir pour ma deffence contre les autres. l'allois d'un pas altier, & tantost ie leur tescmornois un visage plus doux pour leur faire esperer mon assistance. En fin ils me conduisirent dans une tente, & incontinent firent espandre le bruit parmy les Scythes, qu'ils auoient trouué la Deesse tutelaire de la Grece: pource que l'en voyois plusieurs qui venoient ouurir les bords de la tente, & me regardoient avec une grande admiration. l'estois bien empeschée comment ie me conduirois, pour faire en sorte qu'ils ne se desabusassent point; & craignant que m'ayant reconnuë pour une personne qui les auroit trompée, ils ne me fissent souffrir beaucoup d'indignitez, ie me resolus ne me pouuant eschapper d'eux, de me laisser mourir en ne mangeant point: & cette resolution seruit à leur faire accroistre encore leur opinion; pource que les refusant tousiours quand ils me presentoient à manger, ils creurent que ie n'auois pas besoin des soustiens ordinaires de la vie des hommes, & i'esperois mourir de cette sorte sans qu'ils s'en apperceussent. Je passay ainsi la nuit & le iour d'hier sans prendre aucune nourriture: mais le soir voyant qu'ils beuuient plus que de coustume, i'eus quelque esperance de me pouoir sauuer. Moy mesme ie les incitois à se réjouir & à boire, & en fin ils s'enyurerent tellement que de sept ou huit qu'ils estoient dans cette tente, il n'y en auoit plus que deux qui ne fussent point assoupis; encore leurs yeux monstroient-ils que bien tost ils se coucheroient par terre. Alors ie leur presentay encore du vin, qu'ils receurent avec respect, estant bien glorieux, comme ie croy, qu'une

Deesse leur versast à boire , & peu de temps apres ils cheurent à la renuerse comme les autres. Me voila donc seule qui eust les yeux ouuerts dans cette tente , & ie me resolu de me sauuer ; mais estant aussi pressée pour le moins de manger comme de fuir , ie vous confesse que ie pris quelques morceaux de pain & de viande auant que de sortir , & en m'eschappant ie ne me pûs empescher de porter incontinent à ma bouche ce que i'auois de prouision. Mais ie n'estois pas encore à vingt pas hors du camp, que i'ay entendu des trompettes de tous costez. l'en ay esté effrayée, & ie ne sçauois si ie deuois aller plus auant, ou si ie deuois retourner dans le camp : mais aimant mieux toutes sortes de mauuaises auantures , que d'aller encore parmy les Barbares, ie me suis auancée, & ay trouué vne cauerne dans laquelle i'ay bien eu l'assurance d'entrer, ayant l'arc au poing & la trouffe sur les espauls ; & i'auois vne fleche à la main toute preste pour me deffendre, ou contre les hommes, ou contre les bestes. Je me suis tenuë quelque temps cachée en ce lieu - là ; puis entendant tant de bruit , i'ay esté curieuse de voir ce qui se passoit, & suis montée au dessus de cette cauerne , d'où i'ay apperceu tous les Scythes fuyans , & vn effroy si grand parmy eux , qu'ils croyoient estre poursuiuis de ceux-là mesmes qui fuyoient. Je me réjouissois de leur deffaite , & auois quelque opinion en moy - mesme qu'Alcydamas estoit Chef d'une si hardie entreprisede. l'ay passé ainsi plus de trois heures à considerer ce spectacle qui m'estoit fort agreable , & ie commençois à m'estonner de ce qu'en toute la campagne il ne paroïssoit plus aucun Scythe, pource que le iour commençoit à poindre: Je leuois les mains au Ciel pour vne victoire si grande, ac-

quise par les Grecs , lors que l'ay entendu quelque bruit, & apperceu deux Barbares qui cherchoient à se sauuer. l'ay eu peur qu'ils ne me vissent , & qu'ils ne m'offensassent : ie suis rentrée dans la cauerne , & peu de temps apres ie les ay veus venir dans ce mesme lieu à dessein de s'y cacher. Alors ne pouuant euitier qu'ils ne me trouuassent s'ils s'auangoient dauantage , ieme suis resoluë , pour ce que ie les voyois sans qu'ils m'apperceussent , de tirer mes fleches , pour les en chasser en leur donnant de la peur. La premiere en a atteint l'vn à la gorge , & l'a estendu à terre ; l'autre Scythe l'ayant entenduë siffler , & croyant qu'il y auoit encore des ennemis cachez là dedans , a commencé de fuir. Sa lascheté m'a rendue courageuse , & ie me suis sentie emportée par vne certaine ardeur de gloire , pour auoir l'honneur de tuer le dernier des Scythes. Je me suis mise à le pourfuiure à coups de traits ; & en le chassant j'ay esté si heureuse que de vous rencontrer. Voila , mon cher Alcydamas , continua Ariane , quelle a esté ma fortune depuis que ie vous ay perdu , & de quelle sorte vous ne me pouuiez pas trouuer , & que ie ne vous pouuois pas entendre , lors que vous m'appelliez parmy le camp ; & ie ne doute point que vous n'ayez eu beaucoup de crainte pour moy , & que l'entreprise que vous auez faite n'ait esté pour me deliurer seulement. Alors ils s'embrasserent encore , & Amyntas conta à la belle Ariane ce qu'il auoit oüy dire des deux victoires d'Alcydamas au iour de la bataille ; la mort du Roy des Scythes par samain , ses regrets en suite de l'auoir perdue , & l'estrange resolution qu'il auoit prise de combattre avec cinq cens hommes tout le reste de l'armée des Barbares pour la deliurer auant qu'ils s'en allassent. Lors qu'ils re-

citoyent ensemble tout ce qui leur estoit arriué, les Thesaliens qui estoient espars de tous costez, se rallierent en ce mesme lieu ayant sceu que leur Capitaine y estoit, & luy dirent qu'il n'estoit pas demeuré vn Scythe en toute la coste qui ne fust mort, & le peu qui restoit s'en estoit fuy, & auoit gagné la pleine mer dans leurs nauires. Ces Gentils-hommes estoient si contens d'une si grande gloire, qu'ils ne pouuoient contenir leurs ioyes, pource que iamais si peu de gens ne deffirent vn si grand nombre; & Alcydamas ayant veu que quelques vns vouloient s'amuser à piller les pria de laisser le butin, pource qu'ils estoient assez riches d'honneur: mais pour faire voir en s'en retournant à la ville la grandeur de la deffaite, & combien d'hommes eux seuls auoient tuez, qu'ils se chargeassent d'autant d'arcs que chacun d'eux pourroit porter, pour estonner Arimin & le peuple par ces seules despoüilles en entrant dans la ville. Chacun s'accorda à son desir, & Ariane s'estant mise sur le cheual d'Arcas qui alloit à costé d'elle, Alcydamas ordonna qu'ils iroient tous, trois à trois, en portant les faisceaux d'arcs liez sur leurs espaules, & il se mit en vn rang au milieu, & alloit à costé de la belle Ariane qui triomphoit aussi des Scythes, ayant l'arc en la main & la trouffe en escharpe. Alcydamas estoit rauy del'auoir trouuée, & de la voir en cet estat de guerriere, qui adioustoit vne fierté maiestueuse à tant de graces qu'elle auoit, & qui augmentoit mesme l'amour d'Alcydamas; sa valeur se rendant encore amoureuse de celle d'Ariane; puis en cet equipage ils marcherent tous vers la ville.

Cependant on estoit en grand effroy dans Larisse, pource qu'Arimin ayant enuoyé sçauoir sur la minuit si le secours

cours estoit entré, on luy rapporta qu'il n'auoit paru personne ; mais qu'au contraire Alcycdamas estoit sorty avec quelques troupes qu'il auoit tirees de toutes les compaignies. Cela l'estonna, ne pouuant sçauoir quel estoit le dessein d'Alcycdamas, & ayant encore laissé passer quelques heures sans qu'aucun reuinst de la part d'Alcycdamas, on luy apprit en fin qu'il estoit sans doute allé pour sauuer vne fille qu'il aimoit, que les Scythes auoient enleuée estant dans la ville : pource qu'il n'auoit fait que la regretter toute iour, apres l'auoir cherchée de tous costez. Arimin ne pût alors se persuader qu'il esperast venir à bout de tous les Scythes avec si peu de gens : mais il creut que pour racheter sa Maistresse il auroit voulu liurer aux Barbares tous les meilleurs de ses hommes qu'il leur auoit menez ; desquels la ville estant affoiblie, il pourroit encore aisément mettre les Barbares dedans pour les obliger encore dauantage à luy rendre cette fille. Aussi-tost il enuoya querir Polydore qui estoit au liét, & qui s'estant leué pour l'aller trouuer, Arimin luy dit qu'Alcycdamas estoit vn traistre & vn meschant, & qu'il vouloit qu'il luy en respondist. Polydore s'estant fait dire ce qui estoit arriué, assura Arimin qu'Alcycdamas n'estoit point vn traistre, & que peut-estre auroit-il entrepris quelque chose par desespoir, à cause que les Scythes emmenoiert Ariane : mais qu'il fust bien certain qu'il ne perdrait point ceux qu'il auoit menez avec luy, & qu'il les vendroit encore moins : dequoy il luy donnoit sa vie pour caution. Arimin fit garder seurement Polydore, & ne demeurant point satisfait de ce qu'il luy disoit, alla visiter toutes les gardes de la ville ; & tout le peuple demeura plein de crainte, n'ayant pas trois ou quatre mille hommes

de reste pour résister à tant d'ennemis.

Les portes estoient donc gardées avec beaucoup de soin, lors qu'Aleydamas avec sa troupe demanda que l'on luy ouuist. On alla aduertir Arimin qu'il estoit aux portes avec ceux qu'il auoit fait sortir, & qu'il demandoit à rentrer. Cette nouuelle rassura l'esprit d'Arimin, qui toutefois craignant vne surprise commanda que l'on ne les laissast entrer que l'un apres l'autre. Cét ordre seruit à faire donner plus de gloire & de loüanges à Aleydamas: pour ce que ses gensdarmes entrant ainsi separément chargez d'arcs, le peuple faisoit des acclamations à chacun d'eux qui entroit; & lors que tous furent dans la ville, ils se mirent en ordre comme ils estoient venus, & s'en allerent au Temple pour remercier les Dieux d'une si celebre victoire. Tous les habitans leuoient de ioye les mains au Ciel, de voir tant de despoüilles, & si peu de personnes qui les auoient remportées; & s'estonnoient de voir à costé d'Aleydamas cette ieune guerriere qui sembloit auoir grande part à cette victoire, & qui attiroit les yeux & les vœux de tout le monde.

Après qu'Aleydamas eut remercié les Dieux du salut d'Ariane, & de la victoire qu'ils luy auoient donnée, il pria Amyntas de conduire Ariane en son logis, & donna charge à Arcas de l'accompagner; puis avec le reste de sa troupe il alla trouuer Arimin. Il le supplia d'excuser le transport de son amour qui l'auoit obligé de l'abuser, & de sortir sans son congé pour tirer Ariane des mains des Scythes; & luy dit que la victoire qu'il auoit remportée estoit si grande, que lors qu'il en scauroit la vérité, il esperoit qu'il oublieroit aisément vne faute qui auoit esté suivie d'un si heureux succès, & qui auoit deliuré tou-

re la Grece de tant d'ennemis. Arimin admirant vn effect si merueilleux, bien que cela luy eust cousté beaucoup de craintes, fut contraint d'honorer Alcydamas, & d'esteindre tout le ressentiment qu'il pouuoit auoir de ce qu'il luy auoit desobey : puis apres auoir parlé long temps de quelle sorte le combat s'estoit passé, il luy permit de se retirer pour prendre du repos, & fit deliurer Polydore.

Lors qu'ils furent artuez en leur logis, Alcydamas fut contraint de se mettre au liect pour se reposer de tant de combats, d'ennuis & de veilles. Ariane d'vn autre costé auoit esté receüe avec mille ioyes par Euphrosyne, & par sa chere Cyllenie qui n'auoit eu aucun repos depuis son enleuement ; tant pour le regret de l'auoir perdue, que pour le danger où auoit esté son bien aimé Lepante à cause de ses blesseures ; lesquelles toutefois estoient alors en meilleur estat. Euphrosyne pleine de contentement de les reuoir, ne cessoit d'auoir soin, tantost de son fils, tantost d'Ariane, & les visitant séparément dans leur chambre elle les obligea de dormir, encore qu'ils ne fussent alors que sur la moitié du iour.

Vn peu de temps apres, Polydore & Amyntas entendant quelque rumeur dans la rue, regarderent par la fenestre, & apperceurent vne fille esperdue que quelques soldats vouloient auoir, contre lesquels vn vieillard & vn ieune homme se deffendoient avec plus de courage que de force. Ils descendirent incontinent pour empêcher cette lasche violence, & tascherent avec les paroles de faire retirer ces soldats ; puis voyant qu'ils ne vouloient rien faire par prieres, & qu'ils continuoient à presser ce

vieillard & ce ieune homme , ils furent contrainsts de se mettre de leur costé , & de les deffendre : deux soldats voyant ce renfort se ioignirent aux premiers : mais en peu de temps Polydore & Amyntas en tuerent trois , & le reste prit la fuitte. Alors ils voulurent mettre en lieu de iëureté ceux qui auoient esté ainsi poursuiuis , & allant deuers ce ieune homme qui s'estoit deffendu courageusement , Polydore reconnut que c'estoit sa chere Epicharis. Il l'embrassa plein de ioye de la reuoir , & de l'auoir garentie de ce danger. Amyntas eut bien de quoy se réjouir aussi, voyant que celle qu'Epicharis deffendoit estoit la belle Erycine sa Maistresse , & le vieillard estoit Telephe pere d'Erycine. Les embrassemens suiuirent les admirations de s'estre rencontrez si à propos, les vns pour auoir esté deffendus , les autres pour les auoir secourus : & tous ayant vne grande impatience de sçauoir comment ils s'estoient trouuez , entrèrent dans le logis , où Polydore receuant celle qu'il auoit tant regrettée. Belle & valeureuse Epicharis , luy dit-il , pour le bon-heur que vous me donnez de vous reuoir , ie veux vous donner des nouuelles qui vous feront bien agreables : mais promettez moy auparauant qu'elles seront aussi heureuses pour moy. Epicharis luy dit : Vous sçauiez que ie vous suis obligée en tant de sortes , que vous deuez estre asseuré d'estre heureux quand vostre bon-heur ne dépendra que de moy. le sçay , reprit-il , de quels parens vous estes née. Ah ! Palamede , dit-elle saisie de ioye , est-il bien possible ? de qui le pouuez vous auoir appris ? le le sçay , repartit-il , & ie vous demande quel homme du monde vous aimeriez le mieux auoir pour frere. le voudrois , respondit-elle sans beaucoup songer , en auoir vn tel que Melinte , que i'ay

touſiours aimé de cette ſorte , bien que ie ne puiſſe pas eſperer cét honneur. Ah ! digne ſœur d'un tel frere , repriſt Palamede ; Souuenez vous , Epicharis , que ie vous le donne aujour d'huy pour voſtre frere ; & puis que vous ne pouuez pas eſperer vn plus grand bon-heur , accordez moy auſſi le plus grand que ie puiſſe eſperer , qui eſt l'honneur de vous poſſeder. Palamede, dit Epicharis, ne vous moquez point de moy : bien que j'aye beaucoup de courage , ie n'ay pas encore tant d'ambition. Non , pourſuiuit-il, aſſez vous que ie ſuis veritable, & que vous eſtes ſœur de Melinte , & fille de la ſage Euphroſyne que nous auons trouuée en voſtre abſence , & qui eſt icy parmy nous.

Epicharis demeura muette , n'oſant alors , ny contredire Palamede , ny le croire encore : mais pour luy , voyant qu'elle ne pouuoit ſ'aſſurer en ſes paroles , il la conduiſit où eſtoit Euphroſyne , à laquelle il dit qu'il luy preſentoit ſa fille Epicharis , de qui elle auoit oüy conter tant de merueilles. Euphroſyne voyant qu'elle eſtoit veſtue en garçon. Quoy , dit-elle , ce ieune homme eſt-il ma fille ? ouy , reſpondit-il , voilà cette genereuſe Epicharis , qui ſous cét habit a fait de plus belles actions que le plus vaillant des hommes , & que les Dieux euſſent fait ſans doute de mon ſexe , ſ'ils n'euffent eu deſſein de me rendre heureux. Euphroſyne fut ainſi obligée de le croire , & ouurit les bras pour la recevoir. Epicharis bien que remplie de ioye , eſtoit toutefois interdite , ne pouuant encore ſ'aſſurer de ce bon-heur , & auoit de la honte de ſe voir en cét eſtat deuant vne mere qui auoit la façon ſi venerable. Alcydamas & Ariane ſ'eſueillèrent au bruit de tant de réjouiffances , & eſtant aduertis qu'Epicharis eſtoit

retrouuée , ils accoururent à demy habillez pour la voir , tant ils auoient de desir de luy donner le premier embrasement de frere & de sœur. Ils la trouuerent entre les bras d'Euphrosyne , & alors ils l'accablèrent de tant de caresses qu'elle en estoit pleine de confusion. D'autre costé Telephe embrassoit , tantost Melinte , tantost Euphrosyne. Erycine demandoit aussi son tour pour embrasser Ariane , & ne pouuoit donner à Amyntas le temps qu'il desiroit pour l'entretenir : toute fois elle tesmoignoit luy auoir vne grande obligation de sa deliurance. Ils auoient en mesme temps tant de personnes à caresser , & tant de ioyes à ressentir , qu'ils ne sçauoient , ny comment aborder ceux qu'ils desiroient voir , ny comment quitter ceux à qui ils s'estoient adressez pour voir les autres. Il fallut employer plus de deux heures à démesler toutes ces reconnoissances ; & en fin chacun ayant moderé les admirations & les ioyes , on desira sçauoir de quelle sorte ils s'estoient rencontrez en celieu. Mais pource qu'en mesme temps on leur faisoit à tous beaucoup de demandes diuerses sur ce qui leur estoit arriué , il fut trouué plus expedient qu'une personne seule parlât , pour sçauoir toutes leurs fortunes ; & Epicharis ayant esté choisie pour conter ce qu'elle auoit fait depuis qu'elle s'estoit perduë à Nicopolis , elle demanda silence : & lors que chacun fut assis , elle commença ainsi à parler.



HISTOIRE D'EPICHARIS.



LORS que ie vous auray fait sçauoir combien i'ay couru de fortunes depuis que i'ay este separée d'auec vous, & combien i'en ay fait courir à ce qu'il y a de plus grand & de plus redouté sur la terre, vous vous estonnerez sans doute qu'une fille en si peu de temps ait esté capable de remuer de si puissans ressorts, & qu'elle ait entrepris de vanger le monde du Tyran qui l'opprime, & de donner vn autre Chef à l'Empire: mais il est certain qu'il n'y a point de puissance asseurée, s'il se trouue seulement vne personne qui vueille abandonner sa vie.

Après que i'eus esté sauuée des prisons de Trebace, par l'entreprise hardie de Palamède, ie l'attendis quelque temps au lieu où il m'auoit dit qu'il se trouueroit après qu'il seroit sorty comme moy: mais voyant qu'il ne venoit point, ie creus qu'il se seroit esgaré à cause de l'obscurité de la nuit, & après auoir ietté le casque & la cotte d'armes que i'auois pris au soldat mort pour sortir, & que ie portois auec peine pour leur pesanteur, i'allay au logis où i'auois demeuré avec vous; mais ie ne vous y trouuay point, & ne pûs auoir de vos nouuelles. De là ie me rendis sur le port ne sçachant que deuenir; & croyant que vous vous feriez sauuez par quelque moyen, ie me résolus aussi de ne point rentrer dans la ville, pour

ne plus tomber entre les mains de Trebace & de Dicearque. De fortune ie trouuay vn petit vaisseau qui alloit partir, dans lequel ie me mis sans m'enquerir quelle route il prenoit, ne songeant alors qu'à fuir nos ennemis. Je ne sçauois vous dire pour quel sujet ce vaisseau estoit venu en Epire, pource que ie parlois fort peu à ceux qui estoient dedans, de peur de me descouurir: mais ils s'allerent rendre dans la flotte des galeres de l'Empereur qui est ordinairement au Promontoire de Misene en Italie. Il y auoit près de deux iours que ie n'auois dormy; de sorte que lors que nous fusmes arriuez ie fus contrainte de demeurer dans le vaisseau, pource que le sommeil m'assaillit auec trop de violence, & ie me couchay en vn lieu reculé.

Je n'auois point quitté mes habits d'homme depuis que i'auois esté prise; & quelque indiscret me trouuant, lors que ie dormois fort profondement, s'amusa à me considérer; & voyant quelque enflure en mon habit à l'endroit du sein, me despoüilla la gorge sans que ie le sentisse. Apres auoir reconnu ce que i'estois, il alla aduertir ses compagnons, qui se trouuerent aussi insolens que luy; & ils m'escuellerent aussi tost sans aucun respect, pour me mener à celuy qui auoit commandement sur eux. Je fus bien estonnée à mon reſveil de me voir entre les mains de ces hommes, & ayant le sein descouvert; ie leur demanday ce qu'ils vouloient faire de moy, & ils me dirent qu'ils vouloient sçauoir à quel dessein ie me desguisois ainsi. I'arriuay deuant leur Capitaine qui se nommoit Proculus, & i'auois plus de despit de ce qu'insolamment ils me descouuroient le sein pour luy faire voir ce que i'estois, que de crainte d'estre punie. Je fus si heureuse que

Procu-

Proculus fut esmeu de pitié , & deffendit à ces hommes de me mal-traitter : puis feignant qu'il me vouloit interroger à part , il leur commanda de s'en aller. Ils sortirent de sa galere, & alors il me mena dans vne chambre, & me demanda pour quel sujet i'allois en cét habit.

Je ne sçay ce qui luy auoit pleu en moy , mais il me faisoit parestre vne bien-veillance qui naissoit trop promptement pour estre fondee sur vn bon dessein : & pour luy oster l'esperance qu'il sembloit conceuoir d'obtenir de moy quelque chose contre mon honneur, ie me ressolus de luy tesmoigner beaucoup de courage , & luy parlay ainsi. Je sçay bien que ce desguisement est estimé vn crime, pource qu'il y en a eu de mon sexe qui ont caché leur infamie sous cét habit, & s'en sont seruies pour continuer avec plus de liberte des actions indignes d'elles : mais il doit estre estimé louable lors que l'on s'en sert pour vn effect tout contraire , comme moy qui ay esté contrainte de le prendre pour conseruer mon honneur , & pour eschapper des mains de ceux qui me le vouloient rauer ; & si ce moyen m'eust manqué , i'estois resoluë de perdre plustost la vie. Ce discours l'empescha de me faire parestre alors aucun desir des-honneste , & il me pria seulement de luy dire qui estoient ceux qui m'auoient voulu faire du desplaisir. Je ne pouuois pas en vn moment inuenter vne suite de choses fausses, avec beaucoup de noms & de circonstances : de sorte que n'ayant rien de plus present en l'esprit que Trebace, & le ressentiment de l'iniure que i'en auois receuë, ie luy dis, qu'estant à Nicopolis i'estois tombée par mal-heur entre les mains de Trebace, Tribun des gardes de l'Empereur, qui

cherchoit de la part de Neron à faire mourir quelques personnes avec qui i'estois : que Trebace apres m'auoir long temps tenuë aux fers , m'auoir menacée de mort , si ie ne luy declarois où estoient ceux qu'il cherchoit : mais qu'en fin voyant vne grande resolution en moy , il auoit conuertty sa rage en vne affection deshonneste , que ie redoutay encore dauantage que le dessein qu'il auoit auparauant de me faire mourir ; & qu'ayant trouué moyen de sortir de ses mains par ce delguisement , ie n'auois pas esté depuis en lieu où ie peusse m'accommoder d'autres habits. Proculus qui vouloit m'obliger , & qui n'estoit pas satisfait de Neron , me dit. O Dieux ! iusques à quand ce Tyrann trouuera-t'il des bourreaux pour faire tous ses massacres ? Voyez comme il est contraint de seferuir de meschans hommes pour exterminer tout le monde. Les charges sont à present les recompenses des crimes ; & l'on n'est esleué en honneur que selon la grandeur des meschancez que l'on a commises , ou de celles que l'on est capable de commettre. Ces iours passez nous auions pour General de ces galeres vn Anicetus , qui n'auoit eu cette charge que pour auoir tué la mere de Neron. Cet infame Empereur voulant depuis se desfaire de sa femme Oëtaue , qui estoit de la race des Césars , pour espouser Sabine , retira d'icy ce meurtrier , pour aller deuant le Senat se dire faussement adultere de cette chaste Princeesse. Et pendant le regne d'un monstre si abominable peut-on esperer que les hommes vertueux paruiennent à quelque honneur ? Il y a long temps que ie sers en la charge que i'ay icy sur quelques vaisseaux , sans auoir pû obtenir aucune grace pour mes seruices , sinon que l'on souffre que ie serue encore. Consoléz vous , belle fille , continua-t'il , vous

n'estes pas seule à ressentir les cruautés de cette tyrannie; & assurez vous que si vous auez souffert quelque tourment, il y a vn nombre infiny de personnes qui gemissent, & qui n'attendent qu'un homme qui ait le courage assez grand pour se faire leur Chef, & deliurer le monde de tant de miseres.

L'estois bien contente, poursuuiuit Epicharis, de l'entendre parler de la sorte : car ie n'auois pas moins de ressentiment queluy contre Neron, à cause de la rage qu'il tesmoignoit contre Melinte & Palamede; & songeant en moy-mesme qu'ils ne seroient iamais en seureté, tandis qu'un si meschant Empereur viuroit, ie voulus l'animer encore dauantage, pour faire qu'il entreprist quelque chose, & qu'il nous deliurast d'un si puissant ennemy. Je luy dis, que s'il n'estoit besoin que d'une personne pour esveiller les autres, ie m'offrois d'aller dans Rome pour faire vne puissante coniuration contre Neron, & que ie sacrifierois volontiers ma vie pour le salut de tout le monde. Courage, me dit-il, genereuse fille, commencez vn si beau dessein; & soyez assurée que ie vous seconderay bien. Si l'Empereur vient bien tost icy, comme il prend souuent plaisir à se promener sur la mer, ie ne veux point employer d'autre homme que moy pour en deliurer la terre: Si vous voulez aller à Rome, tachez à l'attirer icy par le moyen de quelques vns que vous pratiquerez, & vous connoistrez que ie scay bien exécuter ce que i'entreprends. Nous eusmes encore quelques propos ensemble de cette sorte, par lesquels nous nous encourageâmes à cette entreprise. Je pris resolution de m'en aller des le lendemain à Rome pour attirer dans nostre coniuration les plus puissans; ne doutant point qu'il n'y eust quantité d'hommes

pleins de courage , qui ne demandoient que la mort de Neron , mais qui n'osoient fier à personne vn si hardy dessein , & qui ne manqueroient pas de ioindre ensemble leurs forces, s'ils se pouuoient iamais communiquer leurs ressentimens.

Proculus qui n'auoit osé du commencement me témoigner le desir des-honneste qu'il auoit pour moy , pource que ie luy auois parlé avec vne extremé hardiesse , creut alors que me liant à luy par cette confidence pour vn secret si important , il pourroit auoir avec moy quelque familiarité plus grande , & me dit. Belle fille , ceux qui veulent courir ensemble quelque fortune , ont ordinairement de l'amitié les vns pour les autres ; soit qu'il y ait en eux de la sympathie , qui est cause qu'ils se portent à de semblables desseins ; soit à cause du secours mutuel qu'il se faut donner pour faire réussir vne entreprise : le vous prie que nous nous ioignions d'affection , afin que si nos desseins sont heureux , nous puissions iouir ensemble du repos que nous aurons acquis à tout le monde. Ie luy respondis , que ie ne refusois pas de me lier à luy de l'amitié qui estoit necessaire à ceux qui auoient vn mesme dessein ; & que ie luy promettois toute sorte de fidelité & de secours. Adioustez encore , dit-il , qu'apres que nous autons executé ce que nous desirons , vous me promettez de viure avec moy , & que nous ne nous separerons iamais. Ie luy repartis , que ie ne pouuois encore deliberer sur ce que ie deuois faire , apres auoir deliuré le monde du Tyran , & le priay de me laisser en ma liberté iusques à ce temps. Alors il me témoigna beaucoup de passion , & me pressa par plusieurs paroles de luy faire parestre vn peu plus de bonne volonte : mais

ie ne luy en voulus donner aucune assurance : toutefois ie luy parlay en sorte , que ie luy laissois encore lieu d'esperer, de peur de le députer , & de luy faire changer de resolution.

Le lendemain ie pris des habits de femme , ne voulant point aller à Rome autrement , de peur d'estre connue estant en homme par ceux que i'auois trompez dans la prison , & d'estre prise pour la seconde fois. Proculus me voulut donner de l'argent ; mais pource que i'auois encore celuy que i'auois pris pour gagner le portier de Nicopolis , ie le remerciay , & le quittant ie me mis en la compagnie de quelques personnes qui s'en alloient à Rome. Nous y arrivâmes en peu de temps , & ie m'allay loger chez Maxime , qui me receut avec vn excès de tesmoignages d'affection & me dit qu'il auoit de grandes obligations à Melinte du souuenir qu'il auoit eu de luy ; & sur le soir il me monstra les riches presens qu'il luy auoit enuoyez , lesquels il disoit auoir receus seulement pour les garder comme de chers gages de son amitié. Je creus, pource qu'il estoit aimé des plus puissans de Rome, que ie pourrois venir à leur connoissance par son moyen ; & lors que nous fûmes seuls , ie commençay à luy dire en combien de façons Neron nous auoit persecutez. Il nous pleignit d'abord seulement , puis peu à peu ie fis en sorte qu'il se descouurit à moy , & me confessa que le monde acquereroit vn grand repos, si on le deliuroit d'vn Prince si cruel. Alors ie ne feignis point de luy dire mon dessein , & que ie ne manquerois point de courage, pour vne entreprîse si vtile à toute la terre. Il me fortifia autant qu'il pût en cette resolution , & me dit qu'il me donneroit accès à des personnes , par le moyen desquelles il

croyoit que mon desir pourroit reüssir : & pource qu'en mesme temps il falloit songer qui seroit le successeur à l'Empire, il dit qu'il n'en connoissoit point de plus propre que Pison, qui auoit la noblesse & toutes les qualitez requises; & que ce choix seroit approuuë du Senat, du peuple & des legions. Le luy fis le discours que j'auois eu avec Proculus, & qu'il ne tiendroit pas à luy que Neron ne receust la punition de ses crimes, si on pouuoit l'attirer deuers Misene. Maxime me dit qu'à la verite Neron alloit souuent deuers Baïes & Puteoles, qui estoient en ces quartiers, pour se promener sur la mer, & qu'il alloit mesme souuent en la maison de Pison qui estoit à Baïes, & que l'on trouueroit là beaucoup de commodité de tuer Neron : mais qu'il connoissoit Proculus, & que c'estoit vn homme en qui il ne se falloit pas fier, pource qu'il estoit grand parleur, & d'un esprit turbulent & volage.

Le iour d'apres il me fit parler à deux ou trois Senateurs, & à quelques Cheualiers Romains, qui me receurent comme si i'eusse esté enuoyée du Ciel, pour assembler ce qui restoit d'hommes de vertu & de courage, & par vn genereux effort se deliurer de la tyrannie. Je fus bien aise de voir vn si heureux cominencement : mais ie rencontray dans la ville Proculus qui m'auoit suiui, & qui me cherchoit de tous costez, ne pouuànt plus viure sans moy, à ce qu'il disoit. Apres auoir tesmoigné vne grande ioye de me reuoir, il me demanda si j'auois trauaille à ce que nous auions concerté ensemble : Je fus bien empêchée comment ie me deuois conduire avec cet homme, ne voulant ny le mescontenter, ny luy donner part aussi en mon secret, pour suiure l'aduis de Maxime. Je me re-

solus en fin de luy dire que i'auois quitté le dessein que nous auions pris ensemble, & que les difficultez m'auoient fait peur. Il voulut me rassurer pour me faire poursuiure cette entreprise; mais ie luy dis que ie n'y voulois plus penser. Apres quelques autres discours, il m'obligea de luy dire où ie logeois; & depuis il vint assez souuent chez Maxime pour me voir: mais ie luy fis tousiours dire que ie n'y estois pas, pour euit de m'engager encore avec luy.

Cependant en trois ou quatre iours, j'attiray à mon party plus de vingt personnes d'autorité: & en fin l'on me fit parler à Pison, qui apres m'auoir fait plusieurs caresses, me pria d'auoir bon courage, & me promit de grandes recompenses quand il seroit paruenu à l'Empire.

Pison estoit des amis de Senèque & de Lucain; pour Senèque il n'osoit luy parler de cette coniuration, redoutant sa sagesse trop seuerre: mais ayant gagné Lucain qui estoit neveu de Senèque, il le pria d'en parler à son oncle pour le sonder; afin que s'il desapprouuoit ce dessein, il fust au moins retenu de le deceler par la consideration de son neveu.

Ie me rencontray par hazard chez Lucain lors que Senèque le vint voir: car i'estois ordinairement en sa maison, à cause qu'Atille sa mere estoit de la coniuration; & i'estois bien aise pour l'honneur de mon sexe d'estre souuent avec elle pour n'estre pas seule à pratiquer avec des hommes. Lucain desirant que ie fisse rapport à Pison de quelle sorte il auroit parlé à Senèque, m'enferma dans vn cabinet, d'où ie pouuois entendre ce qu'ils se diroient; & i'eus vn extrême contentement de cette rencontre pour

auoir occasion d'entendre les discours de ce grand Philosophe , de qui la vertu & la science auoient tant de reputation. Lors qu'ils furent seuls dans la chambre, ils parlerent d'abord de plusieurs choses indifferentes ; & Lucain le mettant en fin sur le discours des affaires & de la vie de Neron; Mon neveu , dit-il , ie ne vous en puis apprendre aucune chose. Depuis que l'Empereur ne me voulut pas permettre , comme vous sçauéz , de me retirer aux champs , j'ay trouué moyen de iouir de la solitude dans Rome mesme , & n'osant m'elloigner des affaires, ie lesay elloignées de moy, ne leur permettant plus de m'approcher. Lucain luy respondit. Prenez garde que Neron ne s' imagine que vous des-approuuez ses actions, fuyant d'en estre tesmoin ; & s'il a cette opinion , celuy qui n'a pas redouté de faire mourir sa mere, son frere & sa femme , ne craindra pas de faire mourir son Precepteur. Hé ! mon neveu , reprit Seneque , croyez vous que ie puisse estre inquieté de cette crainte ? à quoy me seruiroit l'estude continuelle de la Philosophie , si elle ne m'apprenoit à mourir ? Le ne m'adonne pas à la sagesse pour acquerir le repos ; mais ie cherche le repos pour acquerir la sagesse. l'aime bien mieux qu'il me fasse mourir , que de m'obliger à participer à ses crimes. S'il m'oste du monde , ie receuray la mort comme vn bien , au lieu de la retraitte que i'auois desirée ; & il me donnera sans y penser ce qu'il m'a refusé. Ce sont-là , repartit Lucain , des paroles dignes de vous : mais ne tesmoigneriez vous pas encore plus de vertu , de secourir la Republique mourante, que de ne craindre pas de mourir ? Si elle vous tend les bras , pour la soustenir lors qu'elle va choir, refuserez vous de luy prester la main ? & la Philosophie vous garantira-

rentira-t'elle des reproches de l'auoir abandonnée? Si ce secours, repliqua Seneque, se pouuoit donner sans la mort de celuy que i'ay esleué, & qui me tient lieu de fils; i'atteste les Dieux que i'employerois volontiers cette vie que ie mesprise, pour le salut de tout le monde: mais quelle vertu si seure peut m'obliger à tuer mon bien-faïcteur & mon nourrisson? & quelle sagesse enseigne à estre ingrat & patricide? l'excuse en vous à la verité cette amour pour la Republique. l'auoué que si ie n'estois Seneque, ie serois le premier à donner la mort à Neron. Tant de crimes, & tant de sang respendu, ont effacé cette Maïesté sacrée que les Dieux marquent sur le front des Princes; & cet abominable affectant les tiltres de basteleur & de ioüeur de harpe, a de luy mesme abandonné ceux d'Empereur & de Maistre de l'Vniuers. le croy qu'il n'y aura iamais que ce Prince au monde, pour qui il soit permis de rompre le serment de fidelité: nous deuons reuerer ceux à qui nous obeïssons, pource que nous deuons croire qu'ils nous sont donnez du Ciel; mais celuy-là n'est point donné des Dieux, qui se plaist à se souïller des crimes les plus horribles.

Lucain ayant laissé quelque temps parler Seneque, fut bien aïse de ce qu'il approuuoit que l'on se deliurast du Tyran; & ne feignit point alors de luy descourir la coniuration; toutefois il ne trouua point estrange qu'il refusast d'y prester ses mains. Seneque fut bien eltonné d'apprendre que tant de personnes auoient esté pratiquées en si peu de temps, & louä fort

Y Y Y y

cette entreprise. Il aduertit son neveu qu'il falloit donc se haster, de peur que tant de personnes ayant part au secret, il n'y eust quelqu'un d'entr'eux dont la resolution se relaschast. Lors que Lucain luy eut nommé la plus part des coniurez, il trouua que l'on s'estoit heureusement adressé à tous ceux qui pouuoient garder le secret, & qui ne manquoient pas de courage: toutefois il iugea du Senateur Sceuinus ce qui arriua depuis; pource qu'il dit que c'estoit vn homme qui auoit du cœur, mais qui faisoit fort l'empesche de peu de chose; & qu'ayant vn si grand dessein en l'esprit, il auoit peur qu'il ne descouurist par ses actions, ce que la langue penseroit bien cacher. En fin Senèque s'en allant donna aduis à son neveu d'aller trouuer Fenius Rufus, l'un des deux Capitaines des gardes de l'Empereur, & qu'il se mettroit sans doute de la coniuration, à cause de la ialousie qu'il auoit contre Tigellinus son compaignon, qui auoit tout le credit auprès de Neron: que c'estoit celuy qui auoit le plus de moyen d'executer ce qu'ils desiroient; & qu'il ne manqueroit pas d'auoir en sa disposition des Tribuns des gardes qui ne demandoient que le changement.

Après que Senèque se fût retiré, ie sortis du cabinet où j'estois: & Lucain me donna charge d'aller dire à Pison ce que j'auois entendu, & me dit qu'il s'en alloit voir Rufus, lequel il trouua disposé comme Senèque l'auoit dit. Lors que les coniurez sceurent qu'un des Capitaines des gardes estoit de la partie, cela leur donna bien plus de courage; mesme quand il se fit voir à eux; & l'on ne douta plus que l'on ne vinst

à bout de l'entreprise. Il n'estoit plus question que de sçauoir en quel lieu on attaqueroit Neron. Vn iour estant au logis de Lucaïn, i'eus vne longue conference avec Rufus, en laquelle il me tesmoigna plus de bonne volonté que ie n'eusse desiré; & la seconde fois qu'il me vit en ce lieu là, il me tira d'auprès d'Atille à laquelle ie parlois, & m'ayant prise à part comme pour discourir sur le sujet de nostre dessein, il me dit. Je ne cesse de m'estonner, gentille Epicharis, qu'avec tant de ieunesse & de beauté, vous puissiez auoir tant de courage; & quand ie vous regarde, ie pense voir la Deesse qui a soin de Rome, & qui nous veut animer par sa presence à nous deffaire du Tyran. Je luy respondis qu'il n'y auoit point de beauté en moy, & encore moins de diuinité, mais que i'auois seulement vn peu de courage, & que ie prenois grand plaisir à prester mes ressentimens & mon entremise pour vn bien si necessaire au monde. Belle Epicharis, reprit-il, vous obligez en ce dessein toute la terre, mais ie prendray part plus que personne en cette obligation, si vous adioustez à l'affection generale que vous auez pour tout le monde, vne amitié particuliere pour moy. Je luy repartis, que ie n'ignorois pas à quel point ie le deuois honorer, & combien chacun luy estoit redevable d'auoir voulu nous secourir de son assistance; que pour ce sujet ie m'estimerois bien-heureuse de luy rendre seruice. Laissons, dit-il, ces paroles d'honneur, de respect & de deuoir, & traittons ie vous prie avec plus de familiarité: ie vous confesse que vostre grace me charme, & que vos actions me rauissent; & ie croy

que cette affection que vous faites naistre, me donnera beaucoup de tourment si vous ne me secourez. Si vous auez assez de pitié pour songer à soulager tout le monde, ne me refusez pas à tout seul du soulagement, puis que vous le pouuez faire avec bien moins de danger. Rufus, luy dis-ie, ie n'entens point ce que vous voulez dire d'affection, de peine & de soulagement: ce sont des paroles auxquelles ie ne suis point accoustumée; & ie croy mesme qu'il y a du crime à les escouter. Ne nous rendons point indignes, ie vous prie, de la faueur que les Dieux nous presentent; & ne croyons point qu'ils se vueillent seruir de personnes vitieuses pour mettre la main au salut de tous les hommes. Quelle autorité pretendrions nous auoir pour oster le desordre, s'il y auoit en nous du desreglement? & quelle grace aurions nous à nous mesler de punir les crimes, sinous nous rendions nous mesmes criminels? le modéray vn peu ses desirs par ce discours; toutefois il ne laissa pas de m'importuner encore; & depuis il m'enuoyoit souuent prier d'aller chez luy; mais ie ne le voulus iamais, sçachant qu'il auoit dessein de me parler d'autre chose que de la coniuration contre Neron; & pour vous dire la verité, ie croy qu'il auoit coniuré contre moy-mesme.

Toutes choses estoient alors préparées, & il auoit esté arresté qu'un des coniurez se ietteroit aux pieds de Neron comme pour luy demander quelque grace, & luy embrassant les genoux le feroit tomber: & qu'en mesme temps Rufus avec quelques Tribuns & Centurions de la garde, & les autres coniurez se ietteroient

sur luy ; Secuinus offrant de luy donner le premier coup ; & à ce dessein il portoit vn poignard qu'il auoit pris en vn Temple. le me retirois ordinairement chez Maxime ; & vn soir ie fus estonnée que plusieurs soldats y entrèrent , & me prirent pour me conduire deuant Neron. le creus aussi tost que la coniuration estoit descouuerte, & me resolut à la mort : mais lors que i'y fus arriüée , ie trouuay que ce n'estoit autre chose , sinon que Proculus ayant eu dépit de ce que ie ne le voulois plus voir , auoit changé son affection en haine , & estoit venu declarer à l'Empereur que ie luy auois dit qu'il y auoit vne puissante coniuration contre sa vie. On me le presenta , & apres que i'eus oüy ce qu'il auoit dénoncé , ie niay que ie luy eusse iamais communiqué aucune coniuration ; ne voulant pas mesme luy dire qu'il m'en auoit parlé le premier , de peur que l'on ne me demandast pourquoy ie n'en aurois pas plustost donné aduis , & que cela ne fust soupçonner que i'auois eu depuis intelligence avec quelques vns. Rufus estoit present à costé de Neron , & auoit bien peur pour luy & pour moy , croyant que par foiblesse ie descouurirois tout le secret : mais ie demanday à Proculus sur quoy il s'estoit imaginé que ie luy auois parlé d'une coniuration ; & qu'il me nommast seulement vn homme que ie luy eusse dit qui eust part à ce dessein. Il ne pût alors en nommer vn seul , & on commença à se moquer de luy de ce qu'il ne pouuoit mieux appuyer sa denonciation. Rufus fut bien satisfait de ma constance ; & cela augmenta l'affection qu'il auoit pour

moy : mais bien que ie n'eusse pas este conuaincuë , l'on fut d'auis de me retenir prisonniere; pource que l'on considera que ce qui n'estoit pas bien aueré, pourroit bien n'estre pas faux.

Vn peu apres arriua ce que Seneque auoit prédit; pource que Sceuinus ayant en son esprit le dessein de la mort de Neron , s'amusa à preuoir tout ce qu'il auoit à faire auant que de mourir , au cas que la coniuration fust descouuerte. Il fut si impertinent que de faire des festins à ses amis comme pour prendre congé d'eux , de faire son testament , de distribuer de ses biens à ses seruiteurs , de preparer des bandages pour les playes , & des remedes pour arrester le sang , pour luy seruir , s'il arriuoit qu'il fust blessé dans l'execution : puis il portoit ce poignard qu'il auoit pris en vn Temple , & ne pouuoit s'empescher de dire que c'estoit pour vn grand dessein : mais ce qui nous perdit , ce fut que ce mal - auisé donna ce poignard à vn de ses affranchis nommé Milichus , pour en aiguïser la pointe & le rendre bien tranchant.

Milichus ayant consideré toutes les actions de son Maistre depuis quelque temps , iugea qu'il auoit dessein contre la vie du Prince , & esperant de grandes recompenses , alla en aduertir Neron. Sceuinus fut pris aussi tost , qui nia ce que son affranchy auoit dit , & satisfit assez bien à tout ce qu'on luy demanda touchant ces preparatifs : mais quand Milichus eut dit que Sceuinus auoit long temps parlé le iour de deuant avec Natalis , qui estoit l'amy intime de Pison , & l'vn des coniurez ; on prit Natalis , & on les

interrogea séparément sur ce qu'ils auoient dit ensemble en cette conference. Leurs responses furent différentes ; & alors on les voulut mettre à la torture : mais ils n'en purent pas seulement supporter la veüe : ils dirent tout ce qu'ils sçauoient de la coniuration , & nommerent la plus part des complices : Lucain fut pris incontinent , & cét homme qui tesmoignoît tant de constance , fut si traistre & si lasche qu'il accusa mesme sa mere. Pison & les autres ayant esté arrestez , décelèrent leurs plus fideles amis ; & en ce temps on se souuint que i'estois en prison pour ce mesme sujet , & on espera qu'ayant le corps delicat, ie ne pourrois pas souffrir les tourmens , & que l'en descouu-
u-rirois encore beaucoup d'autres.

Je fus amenée deuant Neron qui me commanda de luy nommer le reste des coniurez. Je voulois encore nier d'en auoir aucune connoissance : mais en fin quand ie vis que le secret estoit descouuert , & estant enquisse par Neron mesme pourquoy ie m'estois portee à entreprendre de luy oster la vie ; Pource , luy dis - ie d'un visage & d'un ton de voix assésuré, que tu es vn parricide , vn inceste , & vn bâteleur infame ; pource que tu veux exterminer la vertu de la terre : & que le monde ne sera iamais assez tost deliuré de tes cruautéz execrables. Il rougit m'entendant parler ainsi : pource que peut-estre il n'auoit iamais entendu des paroles si libres : ayant bien accoustumé de faire des crimes , mais non pas qu'on les luy reprochast. Il commanda que l'on me fist souffrir toutes sortes de supplices , pour tirer la verité de ma bou-

che ; & ie luy dis en sortant de sa presence , qu'il s'asseurast que ma langue tesmoigneroit autant de courage à ne rien dire , que mon bras en eust monstré à le frapper.

Il estoit arriué que Rufus n'auoit esté decelé par aucun de ceux qui auoient esté pris ; & pour tesmoigner qu'il n'estoit pas des complices , luy mesme s'entremettoit fort avec ses soldats , pour seruir l'Empereur à chercher & examiner les coniurez , & à destourner le peril de sa vie. Lors qu'il vit que i'estois destinée aux tourmens , il prit cette charge luy mesme , de tirer la verité de moy ; & commanda à ses soldats de me mener en vn lieu separé , où incontinent il prepara la torture : & ie fus despoüillée en quelques parties dū corps. Rufus n'auoit en ce lieu là que ceux sur lesquels il auoit commandement ; desquels la pluspart estoient de nostre coniuration : toutefois se voyant reduit , ou à me faire mourir cruellement , ou à courir danger de sa vie s'il taschoit à me sauuer , il ne sçauoit à quoy se résoudre. Il se mit en vn coin de la prison , où destournant le visage de dessus moy , & s'appuyant le front contre le mur , il pleuroit , il s'arrachoit les cheueux , & deschiroit ses habits. Cependant ses soldats attendoient ses commandemens pour me tourmenter ; & en fin vn Tribun plus hardy que les autres , & qui commençoit à auoir pitié de moy , alla luy demander s'il desiroit qu'on me sauuaist ; & qu'il n'y auoit pas vn d'eux qui n'en eust autant de desir que luy. Mais, respondit Rufus , nous sommes perdus si l'Empereur le sçait. Fiez vous en nous , reprit le Tribun , il faut que

que nous fassions accroire qu'elle est morte dans les tourmens, comme il a bien paru qu'elle y estoit resoluë, & nous la conduirons chez vous, où vous en disposerez comme il vous plaira. Rufus se laissa persuader; & les soldats tesmoignant beaucoup de ioye, me reuestirent, & sur le soir m'emmenèrent secrettement au logis de Rufus.

Alors ie tombay d'un mal-heur en vn autre; pource que Rufus m'ayant entre ses mains, renouella ses mauuais desirs, au milieu mesme des inquietudes qu'il pouuoit auoir pour la crainte d'estre accusé par les coniurez: & apres auoir tasché inutilement de me vaincre par douceur, il commença à me reprocher la vie qu'il m'auoit conseruée, & à me menacer qu'il me remettroit aux tourmens dont il m'auoit deliurée. Ie luy fis voir que i'estois aussi bien inuincible aux menaces qu'aux douces paroles: toutefois ie croy qu'il en fust venu à la violence, sans le secours que le Ciel me donna.

Rufus ne laissoit pas d'estre ordinairement auprès de l'Empereur, & abusant du bon-heur de ce qu'on ne l'auoit point accusé, il se monstroient le plus aspre à tourmenter les coniurez, afin que l'on ne le soupçonnast point. En fin ceux à qui il ordonnoit des supplices, ne pouuant plus souffrir qu'un des complices fust le plus cruel inquisiteur, se resolurent de l'accuser. Sceuinus estant interrogé par luy en presence de l'Empereur, & menacé de plus grands tourmens s'il ne declaroit la verité, luy dit. Il n'y a personne qui en sçache plus de nouuelles que toy. Rufus demeura interdit, & ne sçeut s'il deuoit respondre ou se taire; sa peur le descourut aussi tost, &

en mesme temps les autres qui estoient interrogez avec Secuinus le conuainquirent; l'Empereur commanda qu'il fust lié, & le fit mourir vn peu aptes. Pour moy ie trouuay moyen de m'eschapper de sa maison, cependant que sa femme, ses enfans & ses seruiteurs estoient en desolation & en desordre. l'allay chez Maxime, qui par bonne fortune n'auoit esté accusé d'aucun des coniurez, & qui fut bien resioüy de me voir, pource que c'estoit vn bruit que l'on croyoit tout certain par la ville, que i'estois morte aptes auoir tesmoigné vne constance admirable à souffrir la gehenne par deux iours consecutifs, sans auoir rien declare; & que ie m'estois estranglée moy-mesme. Mais ne voulant point demeurer dauantage dans Rome, & mon honneur ayant couru tant de fortunes depuis que l'on m'auoit reconnuë fille, ie vestis vn habit d'homme pour me sauuet. le pris congé de Maxime, qui me donna vn peu d'argent avec vn cheual, pour m'aller embarquer en quelque port, & retournet en Sicile, où i'esperois auoir des nouuelles d'Ariane. Je fis heureusement mon voyage, & arriuant à Sytacuse ie ne trouuay personne au logis de Diccarque, qui me peust dire de vos nouuelles: mais allant chez Telephe, il fut bien estonné, & Erycine aussi, de me voir en cét estat; & i'appris de Telephe que le vaisseau qui nous auoit menez en Epire venoit d'arriuer, & que vous l'auiez renuoyé voulant aller par terre gagner la mer Egée, & de là passer en Asie; & pour aduertit encore Telephe, & ceux qui auoient charge des affaires de Diccarque, de Palamede, & d'Ariane, de vous enuoyer le plus d'argent qu'ils pourroient pour le besoin que vous en auiez, ayant dessein de demeurer en Asie. Telephe me dit qu'il alloit vous amasser

tout ce qu'il vous pourroit porter , tant du bien de Melinte que du sien , & qu'il se resoluoit de vous aller trouver luy-mesme avec Erycine qui ne vouloit point l'abandonner. Je fus bien aisé de m'estre rencontrée si à propos pour me venir rendre avec vous; & deux iours apres nous partismes avec quelques seruiteurs qui estoient à Dicearque, & qui luy apportoint beaucoup de commoditez.

Le vent nous fut si fauorable que nous arriuasmes incontinent en Epire , & ayant mis à terre tous les biens que nous auions , nous prismes vn chariot dans lequel nous les fismes charger , & nous nous mismes à cheual en dessein d'aller par le mesme chemin que vous auiez tenu , selon l'aduis que vous auiez donné. Nous nous resolusmes de ne point abandonner le chariot , à cause des richesses dont il estoit plein ; de sorte que nous auons ainsi passé l'Epire , le mont Pinde , & toute la Theessalie , allant tousiours à l'entour , avec les gens de Telephe & ceux de Dicearque , sans auoir fait aucune mauuaise rencontre ; sinon aujourd'huy que nous auons trouué des soldats insolens , à qui la beauté d'Erycine a plu , & qui nous ont accompagnez iusques dans cette ville , en ne cessant de venir autour d'elle , de la toucher , & de nous dire des paroles pleines d'effronterie. Nous auons eu bien de la peine Telephe & moy à nous opposer à eux , toutefois avec douceur , de peur que leur impudence ne passast outre ; & nous sommes venus ainsi iusques en cette ville , où nostre chariot ayant esté arresté à la porte pour estre visité , à cause , comme ie croy , de ce qui se pratique durant la guerre , nous auons esté contrains de laisser nos gens pour le garder , & de venir

mettre Erycine en lieu de seureté. Ces soldats voyant que nous n'estions plus que trois nous ont encore suiuis; & icy prés se voyant deuant leur logis & se sentant fortifiez de la presence de leurs compagnons, ils ont voulu forcer Erycine d'y entrer avec eux, & impudemment l'ont fait descendre de son cheual. Aussi tost nous auons mis pied à terre Telephe & moy pour empescher cette violence, & auons mis l'espée à la main: mais pour abreger le recit de ce que vous sçauiez aussi bien que nous, Palamede & Amyntas nous ont secourus fort à propos, sans lesquels nous n'eussions pas resisté long temps. Voila tout ce qui m'est arriué depuis que j'ay esté séparée de vous: maintenant il sera besoin d'enuoyer quelqu'un pour faire entrer nostre bagage & nos gens; & nous aduiferons puis apres, en quel lieu les Dieux nous veulent donner vne retraite apres tant de fortunes estranges: car il n'y a point de doute que tandis que Neron viura, il faut faire en sorte que les noms de Melinte, de Palamede & d'Epicharis ne viennent plus à ses oreilles.

Epicharis finit ainsi, & ils s'estonnerent tous qu'elle eust peu conceuoir vne si hardie entreprise, pour le salut seulement de Melinte & de Palamede; & qu'en si peu de temps elle eust fait courir vne si grande fortune à la plus redoutable puissance de la terre. Ils enuoyerent Arcas qui estoit fort cognu de ceux qui gardoient les portes, pour faire entrer les gens de Telephe, & ceux de Dicearque, qui ne sçauoient pas encore la mort de leur Maistre. Apres qu'ils furent venus, & que tous se virent pourueus de biens & de seruiteurs, ils se resolurent, apres auoir aduertey ceux qui venoient d'arriuer que Melinte auoit

pris le nom d'Alcydamas & Palamede celuy de Polydore , de partir tous ensemble de la Theſſalie , & d'aller viure près du Roy Polemon dans l'Asie , pour faire en sorte que dans Rome on n'eust plus de leurs nouvelles.

Fin du quinzième Livre de l'Ariane.





Vignon sculp.

A. Le Jeune

Avec Primitius



LE
SEIZIESME
LIVRE DE
L'ARIANE.



A I S Pisistrate quiauoit esté em-
 pesché d'aller trouuer Maxen-
 ce, à cause d'une grande blessu-
 re qu'il auoit receuë la nuict de
 Palamede, apprit aussi tost qu'il
 fut guery, que ce Preteur estoit
 allé deuers Larisse avec ce qu'il
 auoit de gens de guerre. Il s'en-
 quit en suite au logis où Melin-
 te & Ariane auoient demeuré dans Nicopolis, ce qu'ils
 estoient deuenus, & sçeut qu'ils auoient pris le chemin
 de la Thessalie. Il se resolut de les suiure, & d'aller ad-
 uertir Maxence dans Larisse, de faire chercher Melinte &
 Palamede pour les faire mourir. Il y arriua au mesme
 temps que Melinte, qui se faisoit nommer Alcidas,

reuint chargé de tant de despoüilles, & ramena Ariane. S'estant arresté lors que ce petit triomphe passoit, il recogneut aussi tost Melinte & Ariane qui estoient à costé l'un de l'autre. Il ouït ce qui se disoit d'eux, & sçeut que Melinte sous le nom d'Alcydamas auoit fait de grands exploits le iour de la bataille, & depuis auoit defait tout le camp des Scythes avec cinq cens hommes seulement. Les réjouissances que tesmoignoït le peuple pour son retour, augmentèrent l'enuie & la rage de Pisistrate, qui s'estant enquis particulièrement de quelle sorte le tout s'estoit passé, sçeut que cét Alcydamas sans s'arrester au serment queles Chefs auoient fait de ne point combattre, ny se soucier de la punition qui deuoit suiure le mespris de l'ordre de son Chef, auoit esté assaillir la nuit les ennemis qui auoient enleué Ariane, & auoit esté si vaillant & si heureux, que de defaire tout ce qui restoit de Scythes dans la Theessalie. Pisistrate au lieu d'admirer les beaux effects d'un si grand courage, resolut dans son esprit de rendre cette valeur ruineuse à celuy qui la possédoit: & lors que le soir fut arriué il alla trouuer Arimin, auquel il representa quelle faute il faisoit de laisser le crime de cét Alcydamas impuny; de quelle consequence il estoit de permettre que l'on violast les loix de la discipline Romaine, qui ne s'estoit iusques-là maintenüe que par la seuerité: qu'il se souuinst encore qu'il se rendoit pariure, ne songeant plus à faire obseruer vne Loy des Scythes, à laquelle il s'estoit obligé par serment: Mais qu'outre toutes ces choses il luy declaroit, que celuy qui se faisoit nommer Alcydamas, estoit ce Melinte destiné à la mort par l'Empereur, qui auoit esté publié par tout ennemy de Cesar & du peuple Romain; qu'il s'acqueroit Neron pour
vn

vn ennemy qui ne luy pardonneroit iamais , quand il ſçauroit que Melinte auroit eſté entre ſes mains ſans le faire mourir ; & qu'il attiroit ſur luy le meſme ſupplice dont il auroit ſauué Melinte : que pour luy il eſtoit reſolu d'en aduertir le Prince , pour ſatisfaire à la fidelité qu'il luy deuoit ; & qu'Arimin ne trouuaſt pas eſtrange ſ'il donnoit aduis que Melinte auoit eſté en ſon pouuoir , ayant adiouſté au crime de leze Maieſté celuy d'auoir encore violé les loix de la guerre. Arimin trouble par ces paroles , & entrant dans les iuſtes appréhenſions de la fortune qu'il couroit , ne pouuant eſtimer ſa vie en ſeureté , tandis que Melinte viuroit , laiſſa routes les conſiderations de l'amitié qu'il luy portoit ; & quoy qu'avec regret de ſe voir forcé de perdre vne telle vertu , ſe reſolut à le faire mourir : mais pource qu'il eſtoit ſi vaillant & ſi aimé dans Lariffe , il iugea qu'il luy falloit proceder en ce deſſein avec vne grande prudence. Il enuoya querir tous les Capitaines , deſquels il prit encore le ſerment de fidelité , & les aduertit qu'Alcydamas eſtoit ce Melinte ennemy de Neron & du peuple Romain ; que ſ'ils le laiſſoient eſchapper , leur mort ſeroit ineuitable. Apres les auoir ainſi perſuadez , & qu'ils eurent promis de preferer la fidelité qu'ils deuoient à Neron , à la conſeruation de Melinte , il enuoya dès le matin des trouppes ſe faiſir de ſon logis ; l'vn des Capitaines entra dedans avec ſes ſoldats , & le trouuant au lit luy commanda de la part d'Arimin de ſ'habiller & de le ſuiure. Ce commandement leſurprit , ne ſçachant quel changement eſtoit arriué depuis le iour precedent : toutefois il ne ſ'eſtonna point , & ſ'eſtant accommodé de ſes habits , il demanda en quelle part il luy falloit aller. Ce Capitaine execu-

toit bien à regret ce commandement, pour l'estime qu'il faisoit de son grand courage, & estoit honteux de surprendre ainsi sans armes, celuy qui dans la guerre n'eust pas redouté seul la rencontre de mille ennemis; de sorte qu'en le conduisant au lieu destiné pour sa prison, il luy conta qu'un nommé Pisistrate estoit venu declarer à Arimin qu'il se nommoit Melinte, & qu'il estoit ennemy de l'Empereur, & condamné à la mort; qu'il l'auoit mesme menacé de donner aduis à Neron de sa desobeissance s'il le laissoit eschapper. Melinte aduertuy d'où luy venoit son mal-heur, se resolut à la mort, voyant qu'elle luy estoit inuitable; & il fut enfermé soigneusement, de peur qu'il n'arriuaist quelque violence de la part de ceux qui luy estoient affectionnez. Cependant on gardoit aussi dans le logis Palamede, Amyntas, Lepante, & tous ceux qui eussent pû faire quelque entreprise pour le deliurer, lesquels ne scauoient d'où venoit un si grand changement, & tout estoit en estonnement & en pleurs dans cette maison. La belle Ariane, Euphrosyne, Cyllenie & Epicharis mesloient leurs larmes ensemble, & moins elles scauoient d'où leur venoit la douleur, plus elles en ressentoient. Les Gentils-hommes Thessaliens qui aimoient ardemment Melinte, ne luy manquerent pas en cette occasion, & deputerent deuers Arimin pour obtenir son salut: Ceux de Larisse mesme se sentant luy estre redeuables de tout ce qu'ils auoient au monde, s'allerent aussi ietter à genoux deuant le Gouverneur pour luy demander sa grace: mais rien ne fut capable de le fleschir, tant il redoutoit Neron; & sachant que s'il pardonnoit on ne luy pardonneroit pas. Le peuple ne demandoit qu'à resister à cette iniustice: toutefois ils fu-

rent retenus par les soldats qu'ils voyoient en armes de tous costez , & en fin la vie de Melinte fut reduite à vn tel point, qu'on ne delibera plus que du genre du supplice.

Arimin pour faire voir qu'il ne violoit point ses sermens, voulut que l'on executast cette loy des Scythes, laquelle il auoit iuré de faire obseruer, si aucun contreuenoit à la deffense qu'il auoit faite de combattre ; encore qu'il luy semblast fort inhumain de faire arracher le cœur à vn homme viuant, pour luy trancher apres la teste. Toutefois il voulut satisfaire ensemble à son serment & au desir de Neron, auquel il croyoit donner vn fort grand plaisir, quand il luy apprendroit que son ennemy auroit esté puny d'une façon si estrange, pource qu'il aimoit les nouvelles inuentions de cruauté.

Aussi tost il enuoya querir le Sacrificateur de Larisse qui seruoit au Temple de la Deesse Thetis, auquel il dit qu'il estoit engagé par serment de faire executer vne loy des Scythes, qui ordonnoit pour la punition de tout homme qui auroit combattu contre la deffence qui en auoit esté faite, encore qu'il fust reuenu victorieux, que le criminel ayant esté promené en triomphe par la ville fust conduit sur vn eschaffaut, où le Sacrificateur luy deuoit ouurer l'estomac, & en tirer le cœur pour estre bruslé avec honneur ; & que sa teste estoit tranchée par le bourreau. Le Sacrificateur luy demanda quelle estoit la raison de cette barbare loy ; & il luy respondit que les Scythes auoient iugé que le cœur qui estoit le siege du courage deuoit estre honoré, & que la teste qui auoit failly à la conduite & à l'obeissance, deuoit estre punie.] Le Sacrificateur de Thetis refusa de faire cette execution, & dit

qu'il s'estimeroit pollü s'il auoit respandu du sang humain, & se croiroit incapable de sacrifier iamais aux Dieux, qui n'aimoient point le meurtre des hommes, mais se contentoient de sacrifices d'animaux: que mesme l'effusion du sang humain leur estoit deffenduë par vn Oracle particulier de Thetis, auquel il ne pouuoit des-obeyr. Arimin ne le pouuant disposer à seruir à cette execution le renuoya, & se fit amener ce vieil Sacrificateur des Scythes qui auoit enseigne la loy: auquel il ordonna de faire cette action, puis qu'il sçauoit mieux de quelle façon cela s'obseruoit, & qu'il estoit cause qu'il auoit iuré de la faire obseruer. Ce bon homme s'en voulut excuser, & dit qu'il ne sçauoit que par recit cette loy qu'il n'auoit iamais veu pratiquer, & qu'il s'estimeroit bien mal-heureux de prester ses mains à vn supplice si cruel; mais Arimin le menaça de mort s'il luy contredisoit dauantage; & ce vieillard fut contraint de vestir les habits de grand Prestre, & de se preparer à cette mal-heureuse ceremonie. Il enseigna avec beaucoup de regret ce qui estoit à faire, & on enuoya aussitost ramasser le plus que l'on pût de fleches des Scythes de la derniere deffaite; puis on ordonna qu'elles seroient distribuées à tous les Thesaliens qui auoient assisté Melinte, pour en porter chacun sa charge au triomphe, & les mettre puis apres en vn monceau pour seruir à brusler le cœur victorieux.

Melinte qui estoit aduertý de ce qui se passoit par celuy qui l'auoit en garde, voyant qu'il luy falloit mourir, & sçachant que Pisistrate seul estoit cause de sa mort par sa malice, fit dire à Arimin qu'il luy demandoit seulement deux graces: la premiere, qu'il peust combattre Pisistrate auant sa mort, pour le punir de sa meschanceté; & la

seconde, qu'Ariane l'accompagnaſt dans le chariot allant au triomphe, & qu'il peust auoir la consolation de luy tenir la main pendant le supplice, pour mourir entre ses bras. Arimin qui n'estoit pas cruel, & qui ne haïſſoit pas Melinte, luy accorda ces deux choses, pourueu que Pisistrate consentist à la premiere; & creust que Melinte auoit trouué cette inuention, pour se laisser tuer au combat, plustost que de souffrir la honte & la cruauté du supplice; & pource que Pisistrate pourroit redouter Melinte, comme vn homme dont la valeur estoit en telle estime, il l'enuoya querir, & luy dit qu'il auoit sçeu que le dessein de Melinte estoit de mourir les armes à la main, plustost que par le supplice: qu'à cette occasion il auoit dit que Pisistrate estoit vn traistre & vn meschant, afin de l'animer à se battre contre luy: qu'il pouuoit ainsi acquérir beaucoup d'honneur avec peu de danger, ostant la vie à vn homme si vaillant, qui n'auoit autre dessein que de la perdre. Pisistrate qui ne manquoit pas de courage, se laissa persuader à Arimin, se sentant flatter de l'esperance de faire mourir son ennemy de sa main, & luy respondit qu'il acceptoit le combat pour faire voir qu'il n'estoit ny traistre ny meschant; & qu'il n'auoit regret en cela que de se battre contre vn homme condamné.

Toute cette iournée se passa encore en ces contestations, & aux preparatifs pour la cruelle ceremonie. Palantede s'outrageoit luy mesme de rage d'estre enfermé, & de ne pouuoir sçauoir ce que l'on faisoit de son amy. Tout estoit plein de douleur en cette maison, & Ariane ne cessoit de verser des pleurs pour la crainte qu'elle auoit de ce qui pouuoit arriuer à son cher Melinte. Mais

le lendemain lors qu'on la vint querir pour l'aller trouver, & qu'elle sçeut ce qui se passoit, bien que l'on essayast de la resoudre à supporter constamment ce mal-heur, elle s'esuanoüit au premier recit d'un supplice si horrible. Toutefois apres qu'elle fut un peu reuenüe, on l'emporta dans la prison, & on la mit auprès de Melinte, qui estoit tout le monde par son admirable constance; & qui la voyant sans couleur & sans voix, & outrée de douleur, luy adressa ainsi sa parole.

Belle & chere Ariane, qui auez pris part à tous les accidens de ma vie, ne me refusez pas en ce dernier l'assistance que ie desire de vous. Puis que j'ay esté si heureux que de vous deliurer des Barbares, & de vous mettre en seureté, permettez que ie iouïsse quelque temps du bonheur de vous voir, & secourez moy aussi, lors que la mort me va deliurer des Barbares qui me l'ont ordonnée. Courage, Ariane, faisons voir qu'il n'y a iamais rien eu de si parfait que nostre amitié, & qu'elle a esté aussi constante à bien souffrir, comme à bien aimer. Ariane, prenez garde que vous effacez par ces pleurs la gloire de vostre grand courage. Celle qui a vaincu les Scythes, ne pourra-t'elle vaincre la douleur, qui ne se rend forte en nous que par nostre foiblesse? Chere Ariane, si nous auons suiuy toute nostre vie les loix de la sagesse, faisons un effort de vertu en cette derniere action; & au lieu de donner de la pitié, donnons de l'admiration à tout le monde. N'esbranlez point, ie vous prie, la force de ma resolution par les atteintes de vostre douleur; & puis que la grandeur de vos merites a rehaussé mon courage, ne ruinez pas vostre ouurage vous mesme, & trouuez en vous la mesme vertu que vous auez

fait naistre en moy. Allons, ma chere Ariane, ie ne vous demande autre faueur iusques à la mort, sinon de pouuoir tenir cette belle main que vous m'aucez donnée; & apres que mon ame sera sortie de ce corps, que vous tesmoigniez auoir assez d'amour pour me pouuoir suruiure.

Iamais l'eloquence de Melinte ne fit vn effect si contraire à son desir, pource que plus il luy alleguoit de raisons pour l'exhorter à la constance, plus Ariane auoit de douleur de voir vne si grande vertu si cruellement outragée. Elle ne luy pût repartir qu'avec des sanglots & des pleurs; luy estant impossible de mieux respondre qu'elle ne se pouuoit consoler, qu'en faisant voir qu'elle ne pouuoit luy respondre.

Melinte ayant sçeu que toutes choses estoient préparées, demanda ses belles armes qui luy auoient seruy le iour de la bataille, lesquelles on luy apporta; & apres s'estre entierement armé, excepté la teste; il pria encore Ariane de se resoudre à l'accompagner, & l'assister iusques au dernier soupir, puisque cette faueur luy auoit esté accordée par Arimin. Elle se laissa conduire, ne pouuant estancher ses larmes, & mourant mille fois de douleur de voir son cher Melinte destiné à vne mort si barbare, dont elle seule estoit la cause.

Les ruës & la place publique estoient bordées des soldats d'Arimin, pour empescher les desordres & les esmotions. Les Thessaliens qui auoient seruy Melinte à cette glorieuse deffaire, qui estoit son seul crime, furent condamnés d'aller deuant estant desarmés, & portant seulement les faisseaux de fleches. Lors que tous furent passez en ordre, on fit monter Melinte dans vn chariot

doré, armé comme il estoit, ayant seulement la teste decouverte, & son casque à ses pieds. La desolée Ariane fut mise auprès de luy, laquelle il prit par la main. Le Sacrificateur alloit en suite à cheual, & à l'entour de luy ceux qui estoient nécessaires pour le sacrifice: le bourreau suivoit à pied portant vne hache, & apres luy quelques autres officiers. Ainsi commença à marcher ce funeste triomphe, qui tiroit les larmes de tout le monde; chacun considerant le sujet illustre pour lequel Melinte estoit conduit au supplice. Son visage si serain, & sa contenance si assurée près d'une mort si cruelle, donnoient de l'émotion aux plus durs courages; & les plus tendres, comme la plus part du peuple, ietroient des plaintes & des cris, qui tesmoignoient combien sensiblement ils estoient touchés de compassion. D'autre costé les larmes & les sanglots continuels d'Ariane fendoient de pitié tous les cœurs, de sorte que la fermeté de l'un & la foiblesse de l'autre faisoient de pareils effets, & causoient en chacun un esgal desplaisir. Mais les sages discours du vertueux Melinte, par lesquels il essayoit de la resoudre, estant entendus, adoustoient un grand estonnement à la commune douleur; & en fin lors qu'ils eurent ainsi passé les ruës, & fait le tour de la place, le chariot fut conduit au pied de l'eschaffaut qui auoit esté dressé, au milieu duquel estoit un Autel où estoient les costeaux sacrez. Incontinent Arimin arriva d'un autre costé dans la place, amenant Pisistrate à cheual tout armé, & enuoya un cheual aussi à Melinte. Le Sacrificateur & Ariane monterent sur l'eschaffaut, & se mirent sur deux sieges qui estoient aux deux costez del Autel, & Melinte apres auoir promis à Ariane de la venir bien tost trouver, prit congé d'elle;

d'elle; & ayant mis son habillement de teste monta sur son cheual.

Arimin fit venir les soldats qui estoient aux portes & dans les ruës, pour renforcer les gardes de la place de peur d'une esmeute, voyant les volontez du peuple fort eschauffées pour Melinte, qui fut mis à l'un des bouts du camp, & Pisistrate à l'autre, n'ayant chacun qu'un grand jaelot à la main, & l'espée au colté. Ariane sans estre veüe s'estoit saisie d'un des coulsteaux qui estoient sur l'Autel, pour s'en tuer si Melinte mouroit en ce combat, & pleine de crainte & d'horreur regarda ce qui en arriueroit. Les trompettes sonnerent, & aussi-tost Melinte & Pisistrate partirent l'un contre l'autre; ils se lancerent leurs jaelots en s'approchant: celuy de Pisistrate atteignit legerement les armes de Melinte, mais celuy de Melinte partant d'un bras plus adroit & plus puissant, perça ses armes, & s'arresta bien auant dans son espaule gauche. Aussi-tost ils mirent l'espée à la main, Pisistrate animé de furie contre Melinte, & du despit de ce qu'il ne l'espargnoit pas, & Melinte porté de son grand courage, & du desir de punir la melanchanceté de Pisistrate. Melinte fit pleuvoir en un moment une gresle de coups sur les armes de Pisistrate, sans luy donner à peine le loisir de leuer les bras, & apres auoir fait voler les pieces de ses armes & de son casque par la place, luy ouurit en fin l'estomac d'une grande playe: puis voyant qu'il alloit tomber luy trancha la teste d'un seul coup, & le punit ainsi de la mesme mort qu'il luy auoit preparée.

Ce combat finy, le peuple commença à battre des mains, & à crier que l'on sauuaist le braue Melinte, mais luy sans s'arrester à ces cris, & n'esperant point de grace,

retourna de luy-mesme vers l'eschaffaut, sur lequel il monta, & dit que l'on le desarmaist pour acheuer ce qui estoit ordonné de luy : seulement il pria qu'il ne fust point lié. Cependant il consoloit Ariane, & la prioit de ne luy point enuier par ses larmes vne mort si glorieuse : qu'il n'y auoit que sa douleur qui amoindrist le contentement avec lequel il alloit mourir, apres l'auoir sauuee des mains des Barbares, apres auoir acquis tant de victoires, & puny son principal ennemy. Hé bien, Ariane, disoit-il, qu'auions nous plus à desirer des Dieux, sinon de nous laisser iouir en repos de nostre amitié ? s'ils me refusent vne vie oisue, & s'ils m'ordonnent la mort lors qu'il ne me reste plus d'honneur à acquerir, dois-je me plaindre d'eux de ce qu'ils me retirent au periode le plus illustre de ma vie ? Non, Ariane, aussi vois-je bien que vous ne me plaignez pas ; au contraire vous enuiez ma mort : mais peut-estre vous plaignez vous de ce que vous serez abandonnée de moy. Ah ! ma chere Ariane, consolez vous, & vivez sans ceste crainte. Je seray l'heureux Genie qui vous assistera incessamment iusques à ce que les Dieux ayent disposé de vous ; l'écarteray de vous les malheurs, ie conduiray vos pas & vos actions, afin que vous ne rencontriez que du bon-heur, & vous deuez estre asseurée de m'auoir tousiours à vos costez ; le iour ie vous assisteray inuisiblement, & la nuit ie communiqueray avec vous, en vous visitant par des songes agreables. Ne preuenez point, ma chere Ariane, les destins qui vous sont ordonnez : vous deuez faire parestre autant de constance pour viure, comme i'en dois auoir pour mourir. A Dieu, ma chere Ariane, consolez vous, & vivez pour l'amour de moy, comme de bon cœur ie vay mourir.

pour l'amour de vous. Alors il s'approcha d'elle pour luy donner le dernier baïser: mais elle ne pouuant supporter ce cruel adieu, laissa en fin eschapper ces paroles entreses sanglots. O Dieux! ô Ciel! ah Melinte! ie me meurs, & tomba ainsi esuanoüye sur l'eschaffaut. Toutefois on la fit reuenir avec de l'eau que l'on luy ietta sur le visage, & ouurant les yeux elle cognut quelle faute elle faisoit de laisser ainsi mourir Melinte sans l'assister: puis en prenant courage elle regarda si elle auoit encore le cousteau qu'elle auoit caché, & le trouuant elle fit semblant de se resoudre. En ce temps Melinte estant despoiüllé iusques à la ceinture, & voyant le bucher honorable que l'on auoit appresté des fleches des ennemis pour brusler son cœur, il se tourna deuers Ariane, & luy dit. Chere Ariane, ie vous demande encore vne grace apres ma mort: c'est que ce cœur qui vous a tant aimée, apres auoir esté tiré de mon estomac, soit pris de vos belles mains, & porté par vous pour estre bruslé sur ce bucher. Ne permettez point, belle Ariane, que ce cœur qui se sent si noble pour vous auoir aimée, soit touché par d'autres mains que les vostres; & faites que n'ayant iamais bruslé que pour vous, il ne soit encôre bruslé que par vous. Quelle ioye pensez vous qu'il receura, lors qu'apres vous auoir tant adorée sans vous cognoistre que par le desir, il se sentira porté par ces mains si belles & si aimees? Ariane, promettez moy ceste grace: n'ayez point d'horreur de toucher vne chose qui vous a tant chérie; & ne mesprîsez pas apres ma mort, ceste part de moy-mesme, qui dans son peu d'espace contenoit tant d'amour & de desir pour vous. Je vous le donne pour estre sacrifice par vous à vous mesme; & soyez assurée que iamais victime ne fut plus pure, ny présentée avec plus d'ardeur.

Ariane roulant d'autres desseins en son ame, resmoygna au constant Melinte qu'elle obeiroyt à tout ce qu'il desiroit; & apres s'estre long-temps embrassez pour se dire le dernier adieu, le viel Sacrificateur dit à Melinte les larmes aux yeux, qu'il se renuersast sur l'Autel, afin qu'il luy ouurist l'estomac. Alors ce braue & genereux courage quittant en fin sa chere Ariane, sans toutefois abandonner sa main, se pancha à teste renuersée sur l'Autel, ayant l'estomac descouuert, & dit au Sacrificateur qu'il acheuast. Lors qu'Ariane vid qu'il auoit pris le cousteau sacré, & se courboit sur Melinte, elle ne pût supporter vne si cruelle veüe, mais destournant sa teste, elle tira le cousteau qu'elle auoit cache, puis elloigna sa main le plus qu'elle pût pour se le plonger dans le sein avec plus de force.

Mais le cry que fit en mesme temps le Sacrificateur la troubla, & luy fit tourner encore la teste, pour voir ce qui luy estoit arriué. Ce bon vieillard qui prestoit si à regret ses mains pour vn si cruel office, ayant approche ses yeux de l'estomac de Melinte, & voyant la marque du cœur qu'il auoit dès sa naissance, se mit à crier. Ah! mon fils! ah Melinte, vray sang de Pyrrhe & d'Achille, iamais ie ne vous donneray la mort. Puis ayant laissé tomber le cousteau, il se laissa choir aussi luy-mesme de faiblesse & de foiblesse. Tous les assistans voulurent sçauoir ce que c'estoit. Arimin luy-mesme s'approcha avec ses soldats & ses officiers, croyant que ce vieillard refusast par pitié d'exécuter ce qu'il auoit promis; & luy demanda pourquoy il n'acheuoit pas. Le bon homme ne pouuant parler qu'à peine, luy dit. C'est mon fils, c'est la diuine race d'Achille.

Incontinent on entendit crier parmy la presse vn

homme qui demandoit que l'on luy fist place, & que l'on retardast l'exécution. Cet homme fut reconnu pour le Sacrificateur de Thetis dans Larisse; & Arimin croyant qu'après y auoir mieux pensé, il ne vouloit pas souffrir qu'un autre que luy fist l'office de ce grand Prestre en vne si celebre occasion dans sa ville, le fit auancer, & monter sur l'eschaffaut. Mais aussi tost qu'il y fut, il se fit faire silence, & adressant sa parole au Gouverneur luy dit. Arimin, gardez vous bien de faire mourir cet homme, il est du sang des Dieux: puis monstrant vn vieil liure qu'il auoit apporté, il continua qu'ayant voulu reuoir l'ancien Oracle par lequel il leur estoit deffendu de sacrifier des hommes, i' auoit leu ces vers qu'il prononça.

*Que mes Prestres gardent leurs mains
De verser le sang des humains,
Si iamais de ma race antique
Vous voulez vn Roy retronuer:
Quand son cœur se pourra sauer
Des rigueurs de la loy Scythique.*

Puis il fit lire cét Oracle à Arimin dans ce vieil liure; où il estoit recité comme les Rois qui estoient de la race d'Achille, ayant failly en Thessalie & en Epire, les Thessaliens auoient consulté la Deesse Thetis, pour sçauoir qui ils esliroient pour leur commander; surquoy ils eurent ceste responce, & que d'puis ils n'auoient eu aucun Roy. Le Sacrificateur adiousta qu'il estoit tout clair que Melinte estoit entendu par l'Oracle, & que son cœur deuoit estre sauué de la cruauté de ceste loy des Scythes: qu'il ne restoit qu'à verifier comment il estoit du sang d'Achille: que pour

luy il iugeoit que ses valeureuses actions en auoient déjà rendu de puiffans tefmoignages. L'autre Sacrificateur qui s'estoit fait alors cognoistre à Melinte pour son pere Hermocrate, lequel auoit esté vendu aux Scythes par les Corsaires, assëura Arimin & le grand Prestre de Larisse que Melinte estoit de la vraye race de Pyrrhe & d'Achille, & que la preuue en estoit aisée à faire dans Syracuse. Arimin leur respondit que quand cela seroit, iamais l'Empereur ne souffriroit que les Thessaliens se retirassent de dessous sa domination. Le Sacrificateur de Thetis luy repartit, que Melinte pourroit bien tenir le Royaume avec la mesme condition des autres Rois qui releuoient de l'Empire. Mais Arimin reiettant vne chose si esloignée de son intention, & laquelle il croyoit inuentée exprés pour sauuer Melinte, se resolut de passer outre, & commanda à ses soldats qu'ils montassent sur l'eschaffaut & tuassent Melinte, qui en mesme temps demouroit immobile d'estonnement, & Ariane aussi voyant tant de nouueautez.

Mais vne nouuelle rumeur qui s'espandit dans la place empescha les soldats d'obeïr à Arimin. C'estoit Eurymedon avec trois mille hommes, qui estoit entré dans la ville, ayant trouué les portes sans gardes, & qui ayant appris le danger où estoit Melinte, s'auançoit deuers la place. Il commença aussi-tost à faire crier de tous costez par ses gens, sauuez Melinte, sauuez Melinte, ou vous estes tous morts. Arimin ne sçachant ce que ce pouuoit estre, appella tous ses soldats, & les rangea autour de luy: puis enuoya sçauoir qui estoient ces nouueaux arriuez. Cependant plusieurs Thessaliens montoient déjà sur l'eschaffaut, & salüoient Melinte, en luy baisant

les mains, & l'appellant leur Roy promis par les Oracles, & luy disoient que comme il estoit heritier de la beauté & de la valeur d'Achille, il deuoit estre aussi le successeur legitime de son Royaume. Melinte reiettoit ces sousmissions & ces noms, & ne songeoit qu'à embrasser & honorer son pere; Ariane luy rendoit aussi ses devoirs, & ils consideroient tous trois ensemble l'estrange euenement de ces choses, qui leur donnoient vn peu d'esperance parmy beaucoup de crainte. Cependant Arimin estoit bien empesché, se voyant enuironné de tant de gens dont il croyoit encore le nombre plus grand: mais Melinte, ayant sçeu la venue d'Eurymedon, pria Arimin de s'approcher de luy, & luy dit. Je voy bien que beaucoup de choses taschent à me sauuer, mais ie sçay bien aussi que si l'Empereur desire ma mort, rien ne m'en sçauroit garentir. Je ne me flatte point de l'esperance du Royaume de Thessalie; cela est bien esloigné de mes desirs, encore qu'il soit bien vray que ie sois du sang d'Achille: mais, Arimin, pour le present ie vous conseille de differer à me faire mourir, iusques à ce que vous sçachiez encore la volonté de l'Empereur: ce n'est pas que ce retardement me promette le salut, mais vous ne pouuez asseurer autrement le vostre.

Arimin consentit à ce qu'il disoit, n'ayant aucune mauuaise volonté contre Melinte, & se sentant troublé de toutes ces rencontres: puis le pria d'aller dire à ces gens de guerre qu'ils traitassent en amis. Melinte alla deuers eux à cheual, & lors qu'Eurymedon l'eut apperceu il courut l'embrasser, & luy accorda tout ce qu'il desiroit: mais il ne voulut pas permettre qu'il retournaist deuers Arimin. Le peuple rangea aussi-tost de leur costé, & tous appelloient

Melinte leur Roy & leur Protecteur, & crioient tout haut qu'ils le garderoient bien puis qu'il les auoit bien gardez. Melinte refusoit tous ces honneurs, & enuoya assurer Arimin qu'il n'y consentoit point, & qu'il n'entreprendroit iamais rien contre l'autorité de l'Empire Romain: que seulement il le supplioit de l'assister de quelque faueur enuers Neron pour appaiser son courroux. Arimin remis par ceste assurance, & qui ne demandoit que la paix, luy promit de le seruir aupres de l'Empereur avec affection: puis se retira au Chasteau. Melinte & Eurymedon s'en allerent deuers l'eschaffaut pour prendre avec eux Hermocrate & Ariane, qui estoient confus de ioye de se voir deliurez de si grands perils. Eurymedon ayant saluë la belle Ariane, luy dit qu'il auoit amené vne Princesse pour estre sa compagne: ils eurent alors impatience de voir la belle Pasithée, qu'Eurymedon auoit laissée derriere, lors qu'il s'estoit auance vers la place pour sauuer Melinte. Ariane alors auoit esté mise à cheual, & Pasithée venant de mesme à sa rencontre entre vne haye de soldats, elles voulurent descendre toutes deux pour se mieux receuoir, ayant oüy parler l'une de l'autre fort auantageusement. Apres les caresses & les complimens, chacun se mit à iuger de ces différentes Beautez, qui estoient toutes deux merueilleuses: toutefois celle d'Ariane surpassoit l'autre de beaucoup, & ceux qui scauoient les effets estranges de celle de Pasithée, s'estonnoient de ce qu'Ariane estant plus belle n'estoit pas si generalement aimée; mais les plus habiles comparant la grace majestueuse d'Ariane avec la douceur familiere de Pasithée, demurerent d'accord que la dernière allumoit aussi tost tous les desirs, faisant naistre l'espoir
par

par cette complaisance generale : mais qu'Ariane par sa beauté faisoit bien naistre l'admiration , mais par sa gratuité accompagnée de modestie , faisoit mourir l'esperoir , qui est celuy seul qui nourrit l'amour : de sorte qu'elle ne pouuoit estre aimée que par des hommes de grand courage , qui ne craignissent point les difficultez , là où Pasithée facilitoit elle mesme la naissance de l'amour par sa douceur naturelle , qui donnoit acces à tous , sans toutefois qu'elle eust autre dessein que de cherir honnestement ceux qui l'approchoient.

Ils se retirerent tous au premier logis qui leur auoit esté donné , qui estoit le plus remarquable de la ville , d'où venoient de sortir les soldats qui gardoient Palamede , Euphrosyne & les autres ; pource qu'Arimin leur auoit mandé qu'ils reuinssent auprès de luy. On se donna en ce lieu à des embrassemens sans nombre , pource que si les vns auoient couru de grands dangers , les autres auoient eu de grandes craintes pour eux. Euphrosyne faillit à mourir de ioye voyant Hermocrate : il fut long temps aussi sans la pouuoir quitter , apres auoir esté separé d'elle tant de temps & si cruellement : puis il embrassoit tantost Telephe son fidelle amy , tantost Epicharis sa fille , & leur contoit comment il auoit esté vendu aux Scythes , des mains desquels il n'esperoit pas d'estre iamais deliuré , sans la resolution que prit vn grand nombre d'entr'eux de venir chercher d'autres terres ; & qu'ils l'auoient amené avec eux , & l'auoient contraint d'estre leur Sacrificateur , pource qu'ils auoient remarqué qu'il auoit quelque connoissance des choses naturelles. Les autres se contoient ainsi les vns aux autres leurs diuerfes fortunes , & sur tout Palamede resnoignoit les desplaisirs qu'il

auoit receus avec Amyntas , de ce qu'on les tenoit enfermez durant l'extrême danger où auoit esté Melinte ; dequoy ils n'auoient eu pour consolation que leurs cheres Maistresses, Epicharis & Erycine, lesquelles n'auoient pas eu toutefois moins de douleur qu'eux , dont l'vne se trouuoit alors sœur de Melinte, l'autre auoit creu l'estre autrefois. Eurymedon fut bien aise quand il vid Hermocrate , & Euphrosyne qu'il appelloit sa bonne mere, pource qu'elle l'auoit nourry ; & les embrassant plusieurs fois se resioüit avec eux de ce qu'ils auoient Melinte pour fils : puis ayant sçeu que son amy Lepante estoit au lit, pour les blessures qu'il auoit receuës en deffendant les Dames, il l'alla trouuer en sa chambre , où Cyllenie estoit seule avec luy, l'assitant avec vne extrême affection : mais voyant que ses blessures ne seroient de long temps gueries par les remedes ordinaires, il luy fit apporter d'vne drogue excellente , dont il auoit accoustumé de se seruir, & deux iours apres ses playes furent refermées. Cependant le fidele Arcas bailloit les mains de son cher Maistre , estant rauy de le voir encore viuant , apres vne si perilleuse fortune. C'estoit vne generale resioüissance dedans cette maison , & dehors aussi , à cause des Thessaliens qui iettoient mille cris d'allegresse, d'auoir trouué vn Roy si sage , si vaillant & si accompli que Melinte. Ils s'estoient assemblez pour faire garde autour de sa maison , & estoient résolus de mourir tous plustost que de souffrir que l'on luy fust aucun desplaisir.

Il ne restoit à Melinte que la crainte du costé de Neuron, duquel il iugeoit que la colere s'augmenteroit, lors qu'il sçauroit qu'il pretendoit au Royaume de Thessalie : mais Arimin luy enuoya faire sçauoir le lende-

main pour heureuses nouuelles, celles que l'on luy venoit d'apporter, que Neron estoit mort, & que sa memoire estoit maudite par tout le monde, comme d'un monstre execrable; que Galba auoit esté declaré Empereur, & qu'il estoit sur le point de passer d'Espagne en Italie. Alors leurs contentemens furent parfaits: Incontinent tout le peuple courut aux Temples pour remercier les Dieux d'auoir osté du monde le Tyran; & les plus nobles des Theffaliens prièrent Arimin de leur permettre qu'ils allassent à Rome demander à Galba Melinte pour leur Roy. Arimin voulant seruir Melinte en cette occasion pour luy donner sujet d'oublier les maux qu'il luy auoit faits, non seulement leur accorda ce qu'ils desiroient de luy; mais encore voulut les accompagner pour faire le recit au nouuel Empereur de la valeur extrême de Melinte, par le moyen duquel seul les Scythes auoient esté exterminés, auant mesme que l'on eust à Rome la nouuelle de leur descente. Apres auoir visité Melinte, & pris congé de luy, il laissa vn Lieutenant en sa place, & voulut partir: Palamede qui auoit appris qu'Othon reuenoit avec Galba, & auoit alors tout pouuoir auprès de luy, obtint de Melinte, & d'Epicharis qu'il fist aussi ce voyage, afin d'obliger Othon par leur ancienne amitié, de favoriser Melinte auprès de l'Empereur, & ils partirent ainsi tous ensemble.

Cependant on prepara dans Larisse les magnificences pour les nopces de Melinte, qu'ils appelloient desia leur Roy, & d'Ariane qu'ils nommoient la Deesse des Scythes. Vn vieil Corsaire qui accompagnoit Eurymedon ordinairement, voyant Hermocrate & Euphrosyne qu'il reconnut auoir esté parmy eux, & ayant appris tout ce

qui leur estoit arriué , & qu'ils estoient les parens du brave & du noble Melinte le cher amy , & le vainqueur autrefois de son Maistre , voulut donner vn nouuel accroissement à leurs ioyes en se descouurant à eux. Il leur demanda premierement pardon de leur auoir tant fait souffrir de maux , pour lesquels , dit-il , ie ne puis m'acquitter iamais enuers vous , qu'en vous faisant vn present d'une extrême valeur. Je vous donne , poursuivit-il, Eurymedon mon Maistre pour vostre fils. Chacun demeura fort estonné , & Eurymedon mesme auquel il s'adressa & dit. Eurymedon , ce que ie dis est vray ; & ie croy que vous n'estes pas marry, ayant tousiours esté tenu dans l'opinion d'estre Prince , de vous trouuer à present descendu de Pyrrhe & d'Achille.

Ils ne pouuoient encore comprendre comment cela se pouuoit faire ; mais ce Corsaire continua. l'ay sçeu , dit-il à Euphrosyne, que vous auez appris comment Dicearque nous auoit obligez à faire mourir ce quinaistroit de vous , iusques à ce que vous fussiez vendus. Le premier enfant que vous mistes au monde estant parmy nous , ce fut Eurymedon , que nous prismes aussi tost , & le portasmes dans vn manteau deuers la mer pour le jeter dedans. Mais lors que nous estions en chemin , vn aigle vint l'enleuer d'entre nos mains , lors que nous ne songions qu'à le porter , & s'esleuant dans l'air s'alla en fin abaisser vers vn lieu que nous remarquasmes. Nous y courusmes aussi tost par curiosité , & apres auoir long temps cherche , nous trouuasmes en fin l'enfant , que l'aigle auoit caché sous vn laurier. Nous coniecturasmes de là qu'il seroit vn iour illustre , puis que le Roy des oyseaux l'auoit voulu sauuer , & luy auoit donné

pour aſyle l'arbre deſtiné pour couronner les victorieux : de ſorte que nous nous reſoluſmes de l'eſleuer , & de nous en ſeruir pour nos conqueſtes : mais ne voulant pas qu'Euphroſyne le connuſt pour ſien , ayant deſſein de luy faire croire à luy meſme vn iour qu'il eſtoit de ſang Royal pour eſleuer ſon courage ; nous le fiſmes nourrir quelques iours par vne femme , puis apres nous vous le rendiſmes , dit-il à Euphroſyne , pour le nourrir , ſeignant que c'eſtoit vn enfant de Roy que nous auons pris ; & depuis il a veſcu comme vous auez l'eſcu. Lors qu'ils eſtoient ſur ces réjouïſſances , & que Paſithee eſtoit rauie de cognoiſtre l'illuſtre & vaillante race de ſon cher Eurymedon , on leur rapporta qu'Archelas les auoit ſuiuis , & eſtoit bien près d'entrer dans la ville. Melinte voulut aller au deuant de luy en equipage de Prince , eſtant accompagné d'Eurymedon , de Lepante & d'Amyntas , afin de faire en ſorte qu'il receuſt en grace ſon frere nouuellement reconnu. Archelas auoit appris à ſon arriuee au port, que Melinte eſtoit deſtiné Roy de Theſſalie , & qu'il eſtoit du ſang d'Achille & de Pyrrhe ; de ſorte que lors qu'ils ſe rencontrerent , ils ſe ſaluerent en Rois ; & Melinte voyant dans ſon viſage vne profonde triſteſſe , luy dit. Grand Prince , il faut que vous quittez icy les reſſentimens d'oſſence contre ceux que vous pourſuiuez , & que vous teniez la parole que vous auez donnée. Voila , mon frere , dit-il en monſtrant Eurymedon , à qui vous auez accordé voſtre alliance , & que ie vous prie de receuoir en voſtre grace.

Archelas ne ſçauoit ce que Melinte luy vouloit dire , mais il continua. Ne vous eſtonnez pas ſi ie dis que vous auez promis à mon frere voſtre alliance : c'eſt là cette

belle Hermione qui a eu le bon heur de vous secourir si à propos au iour de la bataille, & de qui la beauté vous a pû toucher d'amour. Il se nomme Eurymedon, & c'est celuy-là qui apres avoir sauué la Princefse vostre fille que l'on vouloit enleuer, fut si heureux que d'estre aimé d'elle. Il auoit esté contraint de se desguiser ainsi, redoutant vostre colere; pardonnez à sa passion l'entreprise qu'il a conceuë de vous abuser, & changez ie vous prie l'amour que vous auiez pour Hermione, en amitié pour Eurymedon. Archelas estoit si confus de ce qu'il apprenoit, qu'il demouroit immobile, & cependant le bel Eurymedon se ietta à ses pieds pour luy demander pardon de la faute qu'il auoit faite d'enleuer sa fille. En fin le Roy considerant que s'il tesmoignoit encore de la colere, cela ne tourneroit qu'à sa confusion, se resolut d'embrasser Eurymedon, le connoissant d'une naissance qui le rendoit digne de sa fille; & lors que la paix fut faite entr'eux, ils le menerent dans la ville, où Pasithée vint au deuant de luy, conduite par la belle Ariane. Elle se ietta à ses pieds, & il luy pardonna en la releuant; & voulut demeurer en ce lieu-là, pour assister à la ceremonie lors que Melinte seroit Couronné, & pour celebrer les nopces de sa fille avec celles d'Ariane.

Pendant quelques iours qu'ils furent à se resioüir ensemble de tant de trauaux acheuez, & de l'esperance d'une fortune pour Melinte digne de sa haute vertu & de ses admirables actions, ceux qui estoient allez à Rome y arriuerent heureusement, & en peu de temps firent de telle sorte reconnoistre les signalez seruices que Melinte auoit rendus à l'Empire, qu'ils obtindrent ce qu'ils

voulurent avec l'assistance d'Othon, qui se monstra passionné pour son amy Melinte, & pour la belle Ariane qu'il auoit autrefois si promptement & si ardemment aimée; & Palamede fut fait Cheualier Romain, & avec ce titre fut créé Gouverneur de la Sicile. Arimin, Palamede & les Theffaliens reuindrent en grande diligence, & apporterent à Melinte les lettres de l'Empereur & le decret du Senat, par lesquels le Royaume de Theffalie & d'une partie de l'Epire luy estoit donné, comme au legitime heritier de Pyrrhe & d'Achille, auquel ils souhaittoient toute prosperité pour les importants seruices qu'il auoit rendus à l'Empire, de qui toutefois il releueroit; & ils l'exhortoient à continuer les mesmes soins pour conseruer les limites des Romains contre les inondations des Barbares. Puis Arimin presenta deux riches couronnes d'or enuoyées par l'Empereur, l'une au vaillant Melinte, & l'autre à la belle & vertueuse Ariane.

Les Theffaliens firent par tout des feux de ioye pour vne si heureuse nouuelle; & afin que tant de réjouissances ne se fissent pas en confusion, & que chacune se fist mieux ressentir en son particulier, le lendemain fut destiné pour le couronnement & le mariage de Melinte & d'Ariane; le iour d'apres pour celuy du Prince Eurymedon avec la Princesse Palithée, & le troisieme pour les nopces de Palamede avec Epikharis, de Lepante avec Cyllenie, & d'Amyntas avec Erycine. Les deputez de toutes les villes de la Theffalie qui attendoient dans Larisse le retour des Ambassadeurs, vindrent se réjouir avec leur Roy, donné par les Cieux, & promis par les Oracles; & luy prester le serment de fidelité, & toute la ville estoit empeschée pour la ceremonie du lendemain.



Les habitans de Larisse auoient semé de fleurs toutes les ruës, & s'en estoient couronnez pour rendre ce iour-là le plus celebre & le plus agreable qu'ils pourroient. Dès le matin chacun se vint ranger à la porte de Melinte, & on le mena au Temple avec Ariane en cet ordre. Les soldats, tant de la ville, que ceux qu'Eurymedon & le Roy Archelas auoient amenez, estoient disposez en haye au long de toutes les ruës par lesquelles la pompe deuoit passer, iusques au Temple de Thetis. Plusieurs trompettes estoient à la teste des compagnies de Gentils hommes Thessaliens que Melinte auoit conduits au iour de la bataille: puis on faisoit marcher quantité de chariots chargez des despoüilles des Scythes. Apres estoient portées en trophée les armes de leur Roy, que Melinte auoit tué: puis les prisonniers Barbares estoient menez les mains liées derriere; en suite desquels alloient à cheual deux à deux, les cinq cens braues Thessaliens qui auoient seruy Melinte en la vaillante entreprise de la nuit, ayant des armes argentées, & de riches caparaçons à leurs cheuaux: ils portoient leurs jaelots entortillez de fleurs, & leurs testes couronnées de laurier. Au milieu d'eux on menoit en main de deux costez le cheual de Melinte, qui sembloit estre deuenü plus glorieux de la fortune de son Maistre, tant il marchoit superbement. Cinquante taureaux blancs suiuiuent pour le Sacrifice, ayant les cornes & les ongles dorez, ornez de festons, & couverts de tapis de soye qui trainoient en terre. Les Sacrificateurs alloient apres les victimes, & portoient routes les choses necessaires pour le sacrifice. Vn peu apres dix ieunes Gentils-

hommes Theſſaliens, veſtus de blanc, & couronnez de fleurs, portoient ſur leurs eſpaules vne façon de brancard, au milieu duquel eſtoit vn tapis de pourpre avec des franges d'or trainant iuſques en terre; ſurquoy eſtoit poſée la Couronne d'or & le Sceptre pour Melinte: puis ſuiuoient dix des plus belles filles de la Theſſalie, veſtuës auſſi de blanc, ayant les cheueux eſpars couronnez de fleurs qui en portoient vn autre, orné de meſme, ſur lequel eſtoient la Couronne & le Sceptre pour Ariane. Arimin Ambaſſadeur de l'Empereur, & le Roy Archelas alloient en ſuite à cheual à coſté l'un de l'autre, enuironnez de leurs Officiers. Puis apres marchoit le char triomphant de Melinte & d'Ariane, tout eſclatant d'or, & orné de feſtons de fleurs, tiré par ſix cheuaux blancs de Theſſalie, qui auoient les crins liez de cordons de ſoye incarnate meſlée d'or & d'argent, ſur leſquels eſtoient ſix ieunes enfans aiſlez en façon d'Amours. Le vaillant Melinte attiroit alors les yeux de tout le monde: il eſtoit couronné de laurier, & veſtu d'un manteau de pourpre Royale broché d'or, tenant la main de la diuine Ariane, qui eſtoit veſtuë en Reine, & dont l'admirable beauté, animée par la ioye de tant de bon-heur & d'applaudiſſemens, auoit vne ſplendeur, dont les rayons ſe rendoient touteſois ſupportables, pour n'eſbloüir pas, & donner aux yeux vn rauiſſement agreable. Le valeureux Eurymedon alloit en ſuite à cheual, à coſté de la belle Paſithée qui eſtoit à cheual auſſi, ſur vne houſſe en broderie d'or, eſtant ſouſtenuë des deux coſtez par deux Gentils-hommes Leſbiens. Palamede alloit de meſme apres,

& se faisoit admirer de tous, tant de sa mine agreable, que de la grace qu'il auoit à manier son cheual. La gentille Epicharis alloit à costé de luy de la mesme sorte que Pasithée, ayant ie ne sçay quoy de plus graue dans le visage, depuis que d'Esclaue elle estoit deuenue Prin-
cesse. Apres eux suiuit Lepante avec Cyllenie montez de mesme, puis Amyntas avec Erycine. Telephe alloit seul à cheual, & estoit suiuy d'un chariot sur lequel estoient Hermocrate & Euphrosyne qui leuoient incessamment les mains au Ciel, luy rendant graces d'auoir mis vne si heureuse fin à leurs mal-heurs. La Noblesse de Thessalie marchoit apres, & en suite les Deputez des villes, puis vn nombre infiny de peuple.

Des despoüilles il n'y eut que les armes du Roy des Scythes qui entrerent dans le Temple, pour y estre laissées & consacrées à la Deesse; le reste passa outre. Toute la suite entra, & apres que les sacrifices furent faits, Melinte ayant son manteau Royal porté d'un costé par le Prince Eury-
medon, & de l'autre par Palamede, & Ariane ayant le sien porté par les Princesses Pasithée, & Epicharis, furent mis sur vn lieu releué, où s'estant agenouillez sur des coussins, ils furent couronnez par Arimin, représentant l'Empereur, & par le Roy Archelas. Puis le grand Sacrificateur les espousa, & incontinent tout le peuple se mit à crier, Viue le Roy Melinte, & la Reine Ariane: que leur regne leur soit heureux & à nous. Apres que ces ceremonies furent acheuées ils sortirent du Temple, & il n'y eut que l'accident arriué à Hermocrate & à Euphrosyne,

qui tempera vn peucescontentemens, pource qu'ils furent trouuez morts de ioye au pied d'vn Autel, & embrassez l'vn à l'autre; toutefois estant estimez bien heureux, on eust creu enuier leur repos d'en respandre vne seule larme.

Toute la ville retentissoit de chants de ioye; les festins qui auoient esté preparez pour ceste royale assemblée, furent accomgagnez de musique de toutes sortes de voix & d'instruments. Mais rien ne fut si agreable à ces deux nobles Amans, que la nuit, qui donna vne heureuse conclusion à tant de ioyes. Lors que leurs sens furent endormis de plaisir, leurs esprits goustèrent à leur tour tant de delices, que ce doux transport leur eust fait abandonner leurs corps, si sans eux ils eussent peu conseruer ces diuins rauissemens: mais de peur qu'il n'arriuaist quelque desunion, ils se renoient si estroitement embrassez, qu'il n'y eut que la ceremonie du lendemain qui les peust separer.

C'estoit le rang d'Eurymedon & de Pasithée, de qui l'amour n'auoit pas eu moins d'impatience, aussi l'accomplissement de leurs desirs ne fut pas suiuy de moins de douceurs. Le iour suiuant, Palamede avec Epicharis, Lepante avec Cyllenie, & Amyntas avec Erycine, ayant obserué les mesmes ceremonies, goustèrent de pareils contentemens; & apres qu'Arimin, Archelas & quelques autres qui se voulurent retirer furent partis avec mille embrassemens, Melinte commença à donner ordre à la seureté de son Royaume, en fortifiant ses ports, & ses frontieres; & ayant estably par la douceur sa domination, il iouït paisiblement le reste de ses iours avec sa chere Ariane des

LIVRE XVI.

775

delicieuses campagnes de la Thessalie : comme si les Dieux
eussent destiné aux plus belles , & aux plus vertueu-
ses personnes du monde, les plus agreables lieux de la
terre.

F I N.



1
2

Extrait du Privilege du Roy.



AT Lettres Patentes du Roy , données à Paris le 14. Mars 1639. il est permis au Sieur des Marets de faire imprimer , vendre & debiter toutes ses Oeuures, tant celles qui ont esté desia imprimées, que celles qui ne l'ont encore esté, durant l'espace de vingt ans; à compter du iour que chaque volume aura esté acheué d'imprimer pour la premiere fois: Avec deffences à toutes personnes d'en contrefaire aucune chose durant ledit temps, souz quelque pretexte que ce soit, à peine de trois mil liures d'amende, de confiscation de tous les exemplaires contrefaits, & de tous despens, dommages & interests, comme il est porté plus amplement par lesdites lettres de Priuilege, à l'extrait, & aux coppies desquelles deuëment collationnées, sa Maiesté veut que soy soit adioustée comme à l'Original.

Signé, Par le Roy en son Conseil.

CON R A R T.

Ledit Sieur des Marets a cedé & transporté le Priuilege dont l'Extrait est cy-dessus escript, au sieur Mathieu Guillemot, Marchand Libraire à Paris, pour l'Ariane seulement, & pour en iouir durant ledit temps, conformément aux clauses portées par iceluy, comme il est plus amplement contenu par l'acte passé entr'eux le 14. Mars 1639.









